




H





EPITOME
THEOLOGIAE
SCHOLASTICAE.

EPITOME
THEOLOGICAE
SCHOLASTICAE

EPITOME

THEOLOGICÆ SCHOLASTICÆ

I N Q V A

Breuitè, & dilucidè præcipui eius tra-
ctatus expenduntur, & agitantur

A R. P.


NICOLA O

A S. IOANNE BAPTISTA

PANORMITANO,

Sacræ Theologiæ Lectore, & Primo Definitorè Generali
FF. Eremit. Discalceat. S. Augustini Congregat.

ITALIÆ, ET GERMANIÆ.



R O M Æ, M.DCLXXXVI.

Ex Typographia Dominici Antonij Herculij.

SVPERIORVM PERMISSV.

THE NEW YORK PUBLIC LIBRARY

ASTOR LENOX AND TILDEN FOUNDATIONS

THE NEW YORK PUBLIC LIBRARY

ASTOR LENOX AND TILDEN FOUNDATIONS

100 N. 5TH ST. N.Y.C.



NEW YORK

1900

1900

LAVRENTIO

A S. FRANCISCO

Vicario Generali

FF. Eremitarum Discalceatorum S. Augustini
Congregationis Italiae, & Germaniae.

PATRI, ET PASTORI VIGILANTISSIMO.



Vre optimo hoc meum Theologiæ Scholasticæ opusculum inclyti Mæcenatæ quærens, qui sui irrefragabili nominis patrocinio foueret, te vnicum, & præclarissimum eligendum decreuit, vsque ad hyperbolem beneuolum P. A. R. Integerrimum equidem Patronum se inuenisse lætatur, dum in publicam lucem exit, illius nomini consecratum; qui ita ingenij, doctrinæque eminentia in Philosophiæ, & Theologiæ Lectoris officio enituit; vt singularem de ipso in sapientissimis Neapolitanæ Ciuitatis Lyceis Magnates literarum opinionem efformauerint. Natus autem ad maxima, de tua in rebus agendis prudentia, regulari obseruantia, & præstantissimis animi tui dotibus confisi Patres Congregationis Discalceatorum in Prouincialem Neapolitanæ Prouinciæ, bis in Definitorum Generalem virtutum tuarum admiratione capti elegerunt: Nescius, an dignitates ex virtutibus fulgorem acceperint; an virtutes, & merita magis cum dignitatibus, & sanguinis splendore crebuerint. Cum maximum denique integritatis, & prudentiæ, nec non virtutum omnium experimentum dedisses totius

tius Congregationis gubernium communi omnium plausu, Vrbisque admiratione vota totius Capituli Generalis, solo tuo suffragio excepto, te in Vic. Generalem meritissimum eligentes dederunt. Quantam autem in hoc excelso munere subeundo prudentiam, animi clementiam, inrequietam obseruantiae curam exerceas, potius experientia, quam ratio ipsa suadet: verus SS. Ecclesiae luminis, & Patriarchae Augustini Filius eadem verba, quae Sanctissimus Parens populo Hypponensi dicere solitus erat, tu Filijs eiusdem, & tuis Fratribus repetere iure merito poteris: *Me putate Matrem animarum vestrarum esse, & ita vos velle componere, ut in vobis, nec macula, nec ruga posset ante Tribunal aeterni Iudicis apparere.* Patitur enim verò tua merita recensendo eloquentia ipsa deliquium; nec suppetunt bractearum satis phrasès, ut his merita tua omnibus innotescant; inanem enim illam aurem, quam spirant encomia selectis dictionum aucupijs intertexta renuit: tacitis ergo obsequij monumentis percurro, quod modestia, & humilitas tua exequi vetat P. A. R. Hoc vnum quaeso, ut opus hoc in meae obseruantiae testimonium excipias eadem animi beneuolentia, satis vberima; sicut iam pridem me ipsum in tuum patrocinium excepisse semper satisque lator.

P. V. A. R.

*Addidisti. & obsequen. in Christo seruus, & Filius
F. Nicolaus à S. Ioanne Baptista.*



LECTVRO BENEVOLO.

BRenissimum hoc, sed fructuosum sanè compendium, quod nomine Epitome Theologiæ Scholasticæ tibi sistitur humanissime lector toruo supercilio ne despicias; continet enim in hoc paruo corpore, quantum in copiosis huius seculi Doctores voluminibus de hac cælesti, & supernaturali scientia exararunt. Cibus equidem cuiusque disciplinæ lenissimum nauscat miseranda aliquorum conditio, nisi breuitatis proponatur sale conspersus; affatum illud Valerij Maximi arte oculos fortasse habentium: Multa, & magna breuiter tractanda sunt. Robustiores ingenij per dies innumeras ferè Theologorum turmas inueniunt, qui ad depascendum esurientem animum, infinitis propè Theologia codicibus inuitant; imbecilliores verò in soporis piscina languentes, quem possit claritate, & breuitate eorum ingenium demulcire, nec non curiositati satisfacere incunctanter, non inuenientes, perquirunt: Pro experto enim habent, quod Hugon lib. 5. Didascali scripsit: Lectio duobus modis animo fastidium ingerere solet, & affigere spiritum, qualitate videlicet, si obscurior fuerit, & quantitate si prolixior extiterit. Hac de causa exiguum hoc opus, Epitome Theologia Scholasticæ nomine insignitum in sine meorum scholasticorum laborum, quos per duo ferè iussa sustinui, in lucem edere gratum non paucis me futurum putauit; nam perfectis in hac Theologica Palaestra species huius eminentissima scientia laconicè in unum collectas sistendo, contra obliuionis agitionem seruiet ad munimen, tironibus in hac eadem via progredientibus eris in pedagegum, & curiosis quibusue alijs, qui rerum prolixitate aborrent erit ad animi, spiritusque solatium; cum in eo selectissima sententia, & pondere rationum graues celebriorum Doctorem in fronte conspiciantur. Ab aliquibus tamen non ad eò necessarijs abstinendum censui; quia aptius

hac

*hac faciens, genio, & commodo addiscentiam, & illorum, qui bre-
uitatis sunt amatores seruiui. Seriem etiam disputationum ab An-
gelico nostro Doctore praefixam non inuerti, in omnibus Sanctum,
Præceptorem, ut felicissimam literaria navigationis cynosuram ha-
bens. Hoc unum quaeso tuo insedat animo amice Lector, ut si hoc opus
Scholasticum, quod benevolentia ductus tibi offero humanitate, quam
charitas, & gratitudo ipsa deposcit excipies, ad conciones quasdam
panegyricas exauilatas typis mandandas me libenter accinges: & si for-
tè doctrinarum illam opulentiam, quam Epitome vetat non inuenies,
vel quod tuo suffragatur ingenio ad libandum occasio non presta-
tur, pius excuses, in quo deliqui; nec in eo laboriosum tibi aliquid
offeritur; nam si sapiens eris, & eruditus Familiare tibi erit to-
lerare nescientem, ut ait Heldebertus; si verò ignarus, disces in tuis
erroribus alienis parcere. Vale.*




APPROBATIO RELIGIONIS.

DE Mandato A.R.P. Laurentij à S. Francisco Congregationis nostræ Vicarij Generalis librum à R.P. Nicolao à S.Io: Baptista Primo Definitor Generali exaratum, cui titulus est: *Epitome Theologia Scholastica*, nos infra scripti perlegimus, nihilque contrarium bonis moribus, aut fidei Orthodoxæ reperientes, imo paucis multa complectentē, typis, & laude dignum iudicamus. In Conuentu nostro Iesu Mariæ de Vrbe, hac die Octaua Maij 1685.

Fr. Laurentius à S. Ioanne Procurator Generalis.

Fr. Paulus à S. Hieronymo Secundus Defin. Gener.



Nos Fr. Laurentius à S. Francisco Fratrum Erem. Discalc.
Ordinis S. Augustini Congregationis Italiæ, & Germaniæ Vicarius Generalis.

Cvm opus, cui Titulus, *Epitome Theologia Scholastica* à Reuerendo Patre Nicolao à S.Io. Baptista Primo Definitor Generali nostræ Congregationis, quondā Sacre Theologiæ Prælectore, compositum; duo ex nostris Theologis, Reuerendi nimirum Patres Laurentius à S. Ioanne Procurator Generalis, & Paulus à S. Hieronymo Secundus Definitor Generalis eiusdem nostræ Congregationis, ac olim Sacre Theologiæ Prælectores, quibus id commissimus, approbauerint: vt typis mandetur; quantum ad Nos spectat, seruatis reliquis de iure seruandis, facultatem concedimus. Datum Romę in nostro Conuentu Iesu Mariæ die 13. Maij 1685.

Fr. Laurentius à S. Francisco V. Generalis.

Locus † Sigilli.

Fr. Hieronymus à S. Nicolao Secret. Gen.

E Pitome Theologiæ Scolaſticæ à Reuerendo Admodum Patre Nicolao à S. Ioanne Baptiſta FF. Eremitar. Diſcalceatorũ Sancti Auguſtini Primo Definitorẽ Generali digeſtum, perlegi ex mandato Reuerendiſſimi Magiſtri Sacri Palatii; & nihil mihi à Fide Catholica abſonum occurrit, aut ſacris canonibus, Concilijs, Apoſtolicisq; conſtitutionibus contrarium, vel à bonis moribus alienum: quare Prælo dignum exiſtimo, vt publicæ ſtudioſorum vtilitati deſeruiat; Siquidem plurima in paucis non ſine claritate, breui labore edifcere poterunt ſcientiarum cultores. Datum Romæ in Seminario noſtro S. Pauli apud S. Pancratium in Vrbe, die vndecima Iulij 1685.

*Fr. Tiberius à Ieſu Carmelita Diſcalceatus.
In eod. Semin. Sacrar. controuerſiar. prelector.*

Imprimatur Si videbitur Reuerendiſs. P. Mag. Sac. Palatii Apoſt.

I. de Angelis Archiepiſc. Urb. Viceſc.

IMPRIMATUR.

**Fr. Joſeph Clarionus Sac. Theologiæ Profeſſor, ac Reuerendiſs.
P. Fr. Dominici Mariæ Puteobonelli Sac. Pal. Apoſt. Mag.
Soc. Ord. Prædicatorum.**

E L E N C H V S

Tractatum, & Dubiorum, quæ in hac Epitome
examinantur.

C ontrouersia Proæmiales. pag.	1.
<i>Vtrum Theologia sit scientia, & quodnam sit eius obiectum.</i>	1.
<i>Vtrum sacra Scriptura vti debeat metaphoris, & sub vna littera habeat plures sensus.</i>	5.

EX PRIMA PARTE TRACTATVS PRIMVS.

D E Deo, eiusque Attributis, & Visione.	7.
<i>Vtrum sit demonstrabile à posteriori Deum esse.</i>	8.
<i>Quodnam sit speciale constitutum Deitatis.</i>	12.
<i>Quomodo inter se distinguantur Attributa, & perfectiones absolute in Deo.</i>	14.
<i>Vtrum intellectus creatus possit Deum videre per essentiam.</i>	23.
<i>An possit potentia aliqua materialis eleuari ad Deum videndum.</i>	24.
<i>Vtrum intellectus creatus possit naturaliter Deum videre.</i>	26.
<i>Vtrum aliqua substantia ex possibilibus possit naturali virtute Deum intuitiue cognoscere.</i>	28.
<i>Vtrum concurrant ad visionem beatam intellectus, & lumen.</i>	31.
<i>Vtrum Diuina Essentia suppleat vicem speciei impressæ in visione beata.</i>	34.
<i>Vtrum in visione Dei sit possibilis species impressa creata.</i>	36.
<i>Vtrum in visione beata detur verbum, seu species expressa creata.</i>	41.
<i>Quenam vident Beati in visione Dei.</i>	44.
<i>Vtrum inæqualitas visionis procedat à lumine.</i>	46.
<i>An sit possibilis comprehensio Dei.</i>	47.

TRACTATVS SECVNDVS.

D E Scientia Dei.	48.
<i>Quotuplex sit in Deo scientia rerum.</i>	50.
<i>Quodnam sit obiectum scientiæ Diuinæ necessaria.</i>	50.
<i>Vtrum scientia Dei sit causa rerum.</i>	53.
<i>Vtrum Deus cognoscat Futura contingentia.</i>	55.
<i>Vtrum Deus cognoscat Futura contingentia antecedenter ad suum Decretum.</i>	56.
<i>Vtrum Deus cognoscat certò Futura contingentia, & libera, quia physice existunt in æternitate.</i>	60.
<i>Vtrum Deus cognoscat Futura contingentia in Decreto efficaci suæ voluntatis.</i>	66.

<i>Examinatur scientia media.</i>	72.
<i>An detur scientia media.</i>	73.
<i>Impugnatur scientia media rationibus.</i>	75.
<i>Brevis explicatio sensus compositi, & diuisi.</i>	84.

TRACTATVS TERTIVS.

D E Voluntate Dei.	86
<i>Quodnā sit obiectū formale motiū, et terminatiū diuinæ volūtatis.</i>	86
<i>Vtrum Deus diligat creaturas.</i>	88.
<i>Vtrum in Deo sit libertas, & quomodo constituitur.</i>	90
<i>Vtrum decreta diuinæ voluntatis sint ab intrinseco efficacia, & prædeterminantia.</i>	94.
<i>Vtrum Deus physice prædeterminet liberum arbitriū, ut actum eliciat.</i>	100.
<i>Vtrum Deus physice prædeterminet materiale peccati.</i>	111.

TRACTATVS QVARTVS.

D E Prædestinatione, & Reprobatione.	117.
<i>Quid sit, & an detur Prædestinatio.</i>	117.
<i>Vtrum Prædestinatio formaliter consistat in actu intellectus.</i>	118.
<i>Vtrum efficax electio ad gloriam sit ante præuisionem meritum.</i>	119.
<i>Quinam sint effectus Prædestinationis.</i>	134.
<i>De certitudine Prædestinationis, & libro ultæ.</i>	135.
<i>Quid sit Reprobatio, & an detur.</i>	138.
<i>Vtrum Reprobatio sit ante, vel post præuisionem demerita.</i>	139
<i>Qui nam sint effectus Reprobationis.</i>	152.

TRACTATVS QVINTVS.

D E Deo Trino, & Vno.	155.
<i>Vtrum dentur processiones in diuinis.</i>	156.
<i>Vtrum diuinæ processiones sint actus intellectus, & voluntatis.</i>	158.
<i>Vtrum processio Verbi sit generatio.</i>	159.
<i>De Relationibus diuinis.</i>	
<i>Vtrum dentur in Deo relationes reales, & quid importent.</i>	163.
<i>Vtrum relationes sint de conceptu essentia, & an sint tantum quatuor.</i>	164.
<i>Vtrum relationes diuinæ secundum esse Ad exprimant specialem perfectionem ab absoluta distinctam.</i>	167.
<i>De Personis diuinis,</i>	
<i>Vtrum ratio persona inueniatur in diuinis.</i>	171.
<i>De Diuinis Nominibus.</i>	
<i>Quomodo sit utendum in diuinis nominibus.</i>	174.
<i>De Notionibus diuinis.</i>	176.
<i>De Personis in particulari, & primò de Persona Patris.</i>	178.
<i>De Persona Filij.</i>	178.
<i>Vtrum Verbum procedat ex cognitione creaturarum possibilium.</i>	181.
<i>De Persona Spiritus sancti.</i>	186
<i>Vtrum si Spiritus sanctus non procederet à Filio distingueretur ab illo.</i>	188.

Quodnam sit constitutum Personarum. 193.

De Missionibus animarum. 193.

TRACTATUS SEXTVS.

DE Angelis. 194.

Verum dentur Angeli, & in quo loco sint creati. 194.

Verum Angeli sint incorporei, & immateriales. 195.

Verum Angeli sint compositi. 197.

Verum Angeli defuncti existentes differant specie. 198.

Verum de potentia Dei absoluta possint Angeli intra eandem speciem multiplicari. 203.

Verum Angeli sint incorruptibiles, & ab intrinseco indestructibiles. 208.

Verum Angeli assumant corpora, & exercent opera vite. 211.

De Loco, & motu Angelorum.

Quanam sit in Angelis proxima ratio existendi in loco. 213.

Verum unus Angelus possit esse in pluribus locis, vel plures Angeli in uno loco. 218.

An, & quot modis Angelus possit moueri localiter. 220.

Verum Angelus possit transire de uno loco ad alium non transeundo per medium. 224.

Verum motus Angeli possit fieri in instanti. 228.

De Cognitione Angelorum.

Verum Angelus ad cognoscenda alia à se indigeat speciebus. 230.

Quanam sint obiecta, quæ naturaliter Angelus cognoscit. 238.

Verum in Angelis possit esse discursus. 244.

De Illuminatione, & Locutione Angelorum. 245.

De Perfectione Angelorum in esse Gratia, & Glorif. 248.

De Angelorum malitia. 250.

*Verum sit possibilis pura creatura rationalis ex natura sua essentialiter im-
peccabilis.* 251.

Verum primum Angelorum peccatum fuerit Superbia. 255.

Verum Angelus potuerit peccare in primo sue creationis instanti. 257.

Verum Angeli sint inflexibiles arbitrij. 260.

De Pœna Angelorum.

Quomodo Demones torquantur in inferno. 264.

De Hierarchijs, Ordinibus, & Custodia Angelorum. 268.

EX SECVNDA PARTE.

TRACTATUS PRIMVS.

DE Ultimo fine, & Beatitudine. 270.

Quid, & quodplex sit Beatitudo. 271.

In quonam consistat Beatitudo nostra formalis. 272.

De Dotibus Beatitudinis. 277.

VITVM

TRACTATVS SECVNDVS.

DE Voluntario, & Inuoluntario. 281.
Quid sit Voluntarium, & ubi inuenitur.

Promodo diuidatur Voluntarium. 282.

Vtrum possit dari pura omisso libera. 283.

Quid sit Inuoluntarium. 285.

Quanam res causent Inuoluntarium. 286.

TRACTATVS TERTIVS.

DE Actibus humanis. 289.
Quanam sint circumstantie humanorum actuum.

De Regulis humanorum actuum. 290.

Vtrum possit dari actus indifferens etiam in indiuiduo. 293

De Libertate.

Quid, & quoduplex sit libertas. 296.

Vtrum in homine sit libertas. 296.

In quo nam consistat essentia libertatis. 297

TRACTATVS QVARTVS.

DE Vitijs, & Peccatis, & Primo de virtutibus in communi. 302.
Quid, & quoduplex sit vitium.

De Virtutibus moralibus inuisis. 302.

Quodnam sit subiectum virtutum. 305.

Vtrum virtutes consistant in medio. 306.

De Bonis Spiritus sancti. 308.

De Vitijs, & Primo quid veniat nomine vity. 309.

Quomodo vicia cum virtutibus opponantur. 310.

De Peccatis. 312.

Vtrum Peccatum consistat in positivo. 312.

Vtrum ad peccatum requiratur expressa cognitio Dei offensi. 317.

De Diuisionibus Peccatorum. 319

De Distinctione specifica, & numerica peccatorum. 320.

De Reliquis peccatorum diuisionibus. 323.

Quodnam sit discrimen inter peccatum Mortale, & Veniale. 325.

Deciduntur aliqua dubia spectantia ad peccatum mortale, & veniale. 327.

De Causis externis peccatorum, & penis ipsorum. 329.

De Peccato Habituali, & Originali. 332.

Vtrum peccatum originale contrahatur ab omnibus, & in quo consistat. 333.

Explicatur quomodo peccatum originale contrahatur, & sit nobis voluntarium. 335.

Soluntur dubia circa effectum, & penam peccati originalis. 336.

TRACTATVS QVINTVS.

DE Iustitia, & iure in genere. 337.

Quid, & quoduplex sit Iustitia.

Quid, & quotuplex sit *Ius*. 339.

De Legibus.

Quid, & quotuplex sit *Lex*. 343.

De Aliquibus conditionibus ad variationem legis requisitis. 346.

Traduntur aliqua ad legem humanam spectantia. 348.

TRACTATUS SEXTVS.

De Gratia, eiusque necessitate. 351.

Utrum homo absque gratia aliquod verum cognoscere possit; 352.

Utrum homo possit facere aliquod bonum morale absque auxilio speciali. 354.

Utrum homo possit Deum efficaciter diligere super omnia ex solis naturalibus

sine gratia. 356.

Utrum homo sine gratia possit omnia precepta legis naturalis seruare, &

vitare peccata illi contraria. 357.

Utrum homo possit se solo disponere ad habendum auxilium gratia. 361.

Utrum, & quæ gratia sit necessaria ad perseverantiam finalem. 365.

De Diuisionibus gratiæ. 367.

Utrum gratia sufficiens detur omnibus. 369.

TRACTATUS SEPTIMVS.

De Fide, Spe, & Charitate, & primò quid sit Fides, 374.

Quodnam sit obiectum formale Fidei. 374.

Utrum Fides possit iurare cum euidencia in attestante. 379.

Utrum repugnet simul esse in eodem intellectu actum Fidei, & Scientia, vel

Opinionis. 381.

De Signis creandis: utis nostre Fidei. 384.

Utrum preceptum Fidei obliget. 385.

Quomodo Fides sit necessaria ad salutem. 386.

Traduntur aliqua circa habitum Fidei. 387.

De Romano Pontifice, eius auctoritate, & infallibilitate. 388.

Quanam sint Concilia generalia approbata. 389.

Concilia generalia reprobanda. 391.

Concilia generalia partim approbata partim reprobanda. 391.

Propositiones editæ à Clero Gallicano 1682. examinantur, & repro-

bantur. 394.

Designantur species propositionum damnabilium. 413.

De Spe.

Quid sit Spes, & quodnam eius obiectum. 414.

De Subiecto Spei. 416.

Utrum supposita reuelatione sua damnationis possit, & teneatur reprobus

sperare beatitudinem. 418.

De Charitate.

Quid sit, & an detur Caritas. 419.

De Obiecto Charitatis. 420.

Quomodo, & quando preceptum Charitatis obligat 422.

EX TERTIA PARTE.

TRACTATUS PRIMVS;

D E Incarnatione.	
De Possibilitate, existentia, & conuenientia Incarnationis.	424.
Vtrum fuerit necessarium Deum Incarnari.	426.
Vtrum peccatum sit infinitum.	427.
Vtrum satisfactio Christi Domini fuerit perfecta ex rigore iustitie.	429.
Vtrum si homo non peccasset, Verbum diuinum Incarnatum fuisset.	431.
De Vnione Verbi diuini cum natura humana.	434.
Vtrum unio hypostatica sit modus substantialis distinctus ab humanitate, & Verbo.	435.
De Causa meritoria Incarnationis.	438.
De Natura assumptibili, & assumpta.	439.
Vtrum Verbum defacto assumpsit omnes partes naturæ humanæ.	441.
De Gratia substantiali, & accidentali Christi.	442.
Vtrum in Christo fuerit Fides, & Spes.	443.
De Scientia creata, & increata animæ Christi Domini, eiusque potentia.	443.
Conciliatur libertas Christi Domini cum eius impeccabilitate.	445.
De Merito, Seruitute Christi, eiusque Sacerdotio.	446.
Vtrum Christus, ut homo sit Filius adoptiuus, vel naturalis Dei,	447.
De Prædestinatione, & Adoratione Christi.	448.

TRACTATUS SECVNDVS.

D E Sacramentis in genere, & primò de quidditate, seu essentia Sacramenti in genere.	449.
De Necessitate, & existentia Sacramentorum.	451.
A quo nam Sacramenta fuerint instituta.	451.
Vtrum Sacramenta causent gratiam.	453.
De Charactere Sacramentali.	456.
Vtrum sit possibilis in creaturis defacto existentibus potentia obedientialis ad quodlibet.	457.
Vtrum Sacramenta nouæ legis causent physice gratiam.	459.
Vtrum ad Sacramenta conferenda, & suscipienda requiratur intentio, & sanctitas.	462.
Vtrum sola intentio faciendi, quod facit Ecclesia sufficiat ad valorem Sacramenti.	464.
De Tempore quo fuerunt Sacramenta instituta.	469.



CONTROVERSIÆ PROOEMIÆLES.

INTER alias præstantissimas dignitates, atq; excellen-
tias, quibus passim Theologia nostra, idest, quæ reperit-
tur in nobis viatoribus, enitet, ea est, quòd ipsam non so-
lùm aliqui radicaliter, & originatiuè supernaturalem
dicant; verùm etiam entitatiuè supernaturalem faciant,
ad differentiam Metaphysices, quæ Theologia naturalis
appellatur. Ad huius igitur eminentissimæ facultatis no-
ticiam aliquam habendam, posthabitis ijs, quæ circa quæstiones proëmia-
les non adeo necessaria videntur, examinandum primò duxi in hac nostra
Theologiæ scholasticæ Epitome.

Vtrum Theologia sit scientia, & quodnam sit eius obiectum?

In nomine scientiæ venit cognitio, certa, & firma, vt volunt aliqui;
dico, Theologiam, quæ est in nobis viatoribus, esse verè, & propriè
scientiam; colligitur ex varijs Scripturæ testimonijs: *Sapient.* etenim, 10.
dicitur: *Dedit illi scientiam sanctorum*, & *Pauli 1. ad Corinth. 13.* siuè lin-
guæ cessabunt, siuè scientia destruetur; sed nomine scientiæ, vt exponit
hic locus Caietanus, intelligit D. Paulus Theologiam; ergo &c. Idem
intelligit *cap. 12.* quando idem Apostolus inquit: *Alij datur sermo scien-
tiæ*, vt vult S. P. N. August. 14. de *Trinitate*. Theologia igitur nostra,
tam siuè euidencia considerata, est cognitio firma, certa, atque infalli-
bilis: vt potè quæ authoritati, & scientiæ diuinæ innititur; est insuper
obiectum certum, & infallibile, vt subest cognitioni diuinæ. Si ve-
ro sermo sit de scientia accepta pro habitu formaliter, & actualiter cer-
ta, & euidens; puto probabilius: Theologiam viatorum non esse scien-
tiam; cum ipsa non sit actus, & formaliter euidens; nam in materia fidei,
cuius inferantur ex discursu Theologico, manent semper Theologis
viatoribus enigmatica, ac proinde obscura, & ineuidencia.

Quia tamen ad rationem scientiæ saltem non in statu perfecto, non
tribuitur euidencia formalis, & actualis: sed est sufficiens euidencia ra-
di-

dicalis, & æquivalenter; Dico: Theologiam viatorum dicendam esse scientiam, licet non in statu perfecto. Habet enim Theologia euidentiam suorum principiorum, certò præsuppositam in scientia superiori: cum qua ex sua natura postulat coniungi, & habere ex tali coniunctione euidentiam actualem suorum principiorum; procedit enim Theologia ex articulis fidei, notis quidem euidenter per scientiam Dei, & Beatorum, cui subalternatur: creditis verò à Theologia ex reuelatione diuina; ergo, sicuti disciplinæ subalternatæ, quando procedunt ex principiis notis in scientia subalternante, creditis verò in subalternata, dicuntur scientiæ: ita Theologia est dicenda scientia eo ipso, quòd procedit ex articulis fidei notis in scientia Dei, cui subalternatur.

Nota I. si alicubi negatur à D. Thoma, Theologiam nostram esse scientiam, ipse loquitur de scientia in statu perfecto; agit enim D. Thomas præcipuè in 1. 2. *quest.* 67. de incompatibilitate fidei cum visione clara Dei, quæ est scientia in statu perfectissimo. *Nota II.* quòd licet ad essentialem rationem scientiæ requiratur à pluribus tam certitudo, quam euidencia, diuerso tamen modo exiguntur; certitudo enim exigitur tamquam primaria, & intrinseca ratio constitutiua scientiæ: euidencia autem tamquam perfectio, vel intrinsecè complens: vt accidit in scientia subalternante, vel præsupposita, vt videre est in subalternata. *III.* falsum est, quod in cognitione scientifica prior sit euidencia, quam certitudo; aliter valeret hæc consequentia: cognitio est certa, ergo est euidens: quod est falsum; nam cognitio fidei diuinæ est certa, & tamen non est euidens.

Cum dictum sit, Theologiam nostram subalternari scientiæ Dei, & Beatorum: oritur dubium; an sit vera, & propria subalternatio? *Resp.* cum D. Thoma, in *presenti, art.* 2. Theologiam nostram esse propriè subalternatam scientiæ Dei, & Beatorum; nam essentialis, & præcipua ratio subalternationis attenditur penès subordinationem principiorum, in quantum principia vnius scientiæ, cum non possint esse immediatè per se nota, manifestantur per lumen superioris scientiæ; hoc autem modo se habet Theologia nostra circa mysteria, quæ rationes, & causas suas habent in Deo, & veritates, quæ per fidem immediatè sunt creditæ; ergo &c. Verum, quia putant aliqui, hanc esse solam quæstionem de nomine, nolo in hoc amplius immorari.

Petes, num habitus Theologicus, qui venit nomine sacræ Doctrinæ, sit eminenter, vel formaliter tantum, vel eminenter formaliter simul, speculatiuus, & practicus? *Resp.* eundem simul Theologiæ habitum indiuisum entitatiuè, continere simul eminenter formaliter rationes practici, & speculatiui, eodem modo: quo anima rationalis vnit in se eminenter formaliter vegetatiuum, & sensitiuum, quæ sunt dispersa in animabus inferioribus, nam iuxta illud axioma: *quæ sunt dispersa in inferioribus, sunt unita in superioribus*; sed Theologia est superior ad omnes scientias

naturales, cum versetur circa obiectum infinitum; sequitur, quod *eticum*, & *speculativum*, cum sint differentiae diuisivae scientiarum *aturalium*, debeant adunari in Theologia: & in ea eminenter formari contineri.

Dices, non potest practicum, & speculativum adunari in eodem habi- secundum quod exercent inter se oppositionem; sed in sacra Doctrina exercent oppositionem: nam practicum ordinatur ad opus, speculativum non ordinatur ad opus, ergo, &c. *Resp.* minorem esse falsam; primo, nam sacra Doctrina dicitur practica; quia dispositivè dirigit inferendo iudicativè regulas practicas ex principiis fidei: non quia ordinatur ad opus. Secundo, ordinari, & non ordinari ad opus, non opponuntur in obiecto habitus superioris; & sicuti possunt adunari sine implicancia in intellectu, in divina scientia, & in fide: ita etiam in Theologia.

Nota, quod Theologia nostra est simul practica, & speculativa: non quia omnes actus, aut conclusiones ipsius sint simul practicae, & speculativae; sed quia idem habitus Theologicus potest se extendere ad conclusiones practicas, & speculativas. Ceterum haec quaestio habet primum de nomine iuxta diversas rationes, secundum quas accipiunt Doctores practicum, & speculativum; ideo ad secundum punctum discutitur, quod est de obiecto Theologiae progredimur. Sed hic est

Prænotandum I. quod illud, quod in praesenti est subiectum adequatum attributionis Theologiae, est etiam obiectum ipsius; nam in praesenti Theologi idem volunt esse subiectam, & obiectum. Deus igitur quia Deus, seu sub ratione Deitatis, est subiectum, vel obiectum adequatum attributionis Theologiae. Quia illud est subiectum adequatum attributionis in qualibet scientia, cuius cognitio potissimum intenditur in tali scientia: & ad quod omnia, quae in ea considerantur, attributionem habent; vel omnia, quae ad eam spectant, praedicantur: vel in recto, vel in obliquo; huiusmodi est Deus, quia Deus, seu sub ratione Deitatis; nam omnia, quae tractantur in Theologia, & ab ipsa considerantur, vel sunt ipsemet Deus, vel aliquod ad ipsum pertinens, aut per modum proprietatis, ut *Attributa*, vel ut effectus ab ipso procedens, veluti *Creaturae*, de quibus agit in prima parte; vel tanquam media ad ipsum conducentia, sicut actus humani *leges*, *gratia*, *virtutes*, *Incarnatio*, & *Sacramenta*, de quibus in secunda, & tertia parte disputat; ergo Deus, quia Deus, seu sub ratione Deitatis, est subiectum adequatum attributionis Theologiae;

Nota II. quod subiectum, siue obiectum adequatum attributionis vocatur ab aliquibus obiectum materiale, & alij ipsum dicunt formale, quod, ad differentiam obiecti, siue subiecti formalis quod, Theologiae, quod est divina revelatio virtualis, & mediata, seu auctoritas divina, revelans virtualiter, & mediate, siue remote. Velim autem hic adducere, quod quando Thomistae dicunt, obiectum formale quo, scilicet ratio-

tionem *sub qua* obiecti Theologiæ, esse reuelationem virtuales, & mediatam, loquuntur de sacra Doctrina, seu Theologia, prout est habitus scientificus formaliter distinctus ab habitu fidei: vnde, & nos in eodem sensu, idem suslinentes, loquimur. Et sic, si Theologia consideratur secundum sua principia, quæ sunt articuli fidei, eius obiectum formale, quod est diuina reuelatio immediata; si verò consideretur secundum conclusiones ex illis deductas, est diuina reuelatio virtualis, & mediata, vt diximus; nam mysteria fidei sunt principia Theologiæ nostræ, & ipsa fides se habet pro hoc statu per modum habitus principiorum, respectu eiusdem Theologiæ; ergo, cum conclusiones virtute contineantur in principiis, & lumen conclusionum in lumine principiorum, oportet dicere, quod si Theologia consideratur secundum sua principia, quæ sunt articuli fidei, eius obiectum formale quod est reuelatio immediata; vel clarius: si ratio formalis *sub qua* fidei est diuina reuelatio immediata, ratio formalis *sub qua* Theologiæ est reuelatio virtualis, & mediata.

Nota hic III. quod ratio formalis *sub qua* Theologiæ non debet esse aliquod intrinsecum ipsis subiectis: sicut accidit in scientiis purè naturalibus; nam Doctrina sacra totaliter procedit ex diuina autoritate, & reuelatione: vnde sufficit ipsi illud extrinsecum, nempe reuelatio diuina.

Argumenta primæ Conclusioni aduersantia faciliè soluantur, si neget, quod ens cognoscibile per diuinam reuelationem sit obiectum formale adequatum Theologiæ. Et si D. Thom. 1. *quest. Prologi, artic. 4.* dixit: *Ens diuinum cognoscibile per inspirationem est subiectum huius scientiæ*, vel loquutus est dubitando, non asserendo, vt vult Caietanus: vel per ly *ens diuinum* intelligit ipsum Deum.

Similiter est prænotandum, non esse necessarium: vt omnia, de quibus agitur in scientia, debeant prædicari in recto; sed sufficit, quod possint aliqua prædicari in obliquo. Habetur prædicatio in casu recto, si dicatur: Deus est sua essentia, Deus est sua scientia, aut bonitas, &c. omnes autem res creatæ ad extra prædicantur de Deo, & illi attribuuntur in casu obliquo: vnde nihil officit, quod omnia, quæ tractantur in Theologia, non dicantur Deus. Denique quamuis scientia sumat ab obiecto specificationem, non tamen sumit essentiam eiusdem perfectionis: vnde non sequitur, Theologiam debere esse scientiam infinitam, quia obiectum est infinitum; nam sicuti scientia de motu non est motus, & scientia, qua Deus cognoscit finitum, non est finita, secundum esse: sic Theologia, quæ est scientia de infinito, non est infinita.

Petes, an sacra Doctrina sit verè argumentatiua? Puto probabilius contra nonnullos, sacram Doctrinam verè esse argumentatiuam, ex præmissis nempe reuelatis, ac fide diuina creditis, procedendo ad alias veritates ostendendas, & probandas, sæpè enim videmus, apertos, & dialecticos syllogismos in scripturis ipsis fieri; & Christus ipse, Theologorum Magister sæpè legitur contra Iudeos argumentatus: vt cum ostendit

disse non eijcere demonia in Beelzebub; quia alioquin sequeretur, regnum diaboli esse diuisum in se ipso: & in c. 22. *Matth.* suam Diuinitatem ostendit ex *Psal.* 109. in quo Dauid vocauit ipsum Dominum, dicendo: quod si Christus non esset Deus, sed purus homo, Regius propheta non vocaret illum Dominum suum: Si ergo filius eius est, quomodo vocat eum Dominum? dicendo: *Dixit Dominus Domino meo.*

Petes II. quænam sunt loca, ex quibus Theologia nostra sua argumenta depromit: et quid sit locus Theologicus? *Resp.* quod locus Theologicus nihil aliud est, nisi quoddam promptuarium, vel thesaurus, in quo continentur, vel conseruantur varia argumenta Theologica, apta ad probandum aliquo modo conclusiones Theologicas. Huiusmodi igitur loca Theologica ad decem communiter Doctores reducunt. I. locus, vnde sumitur irrefragabile argumentum à Theologia, est Scriptura canonica, Spiritu sancto dictante, non solum eius sententias, sed etiam verba; & vocatur à Tertulliano: *Epistola omnipotentis Dei ad homines missa.* II. sumitur ex traditionibus Apostolicis; dicitur autem traditio Apostolica, vel quia Apostoli à Christo Domino acceperunt, vt Matrimonium, Confirmationem, Extremam Vnctionem esse Sacramenta nouæ legis; vel quia Apostoli, Spiritu sancto suggerente, ad Ecclesiæ vtilitatem addiderunt, quauis Christus illam non dederit, vt Quadragesimæ ieiunium. III. est consuetudo Ecclesiæ. IV. Authoritas Concilij Generalis, vel Prouincialis à Romano Pontifice approbata. V. Authoritas declarationum ipsius Romani Pontificis: sed de hac authoritate plura in tractatu de fide inuenies in hoc sumuario; vbi etiam circa Concilia Generalia plura, studiosè pertractantur. VI. est Authoritas Sanctorum Patrum, præcipuè eorum, qui in Ecclesia Doctoris laurea fulgent. VII. est Theologorum Scholasticorum. VIII. est Ratio naturalis naturali lumine deducta. IX. est Authoritas Philosophorum. X. Authoritas humanæ historiæ. Prima quinque loca, vt communis docent Authores, certam, & infallibilem fundant probationem; reliqua verò quinque, vel moraliter certum, vel solum probabile efficiunt argumentum.

Vtrum sacra Scriptura utidebeat metaphoris, & sub una litera habeat plures sensus?

Vtitur conuenientissimè Scriptura, & sacra doctrina metaphoris: redeunt egregias rationes Dionysius, de *caelesti Hierarchia*, cap. 1. & 2. Damascenus 1. lib. *Fidei orthodoxæ*, cap. 14. & 15. & D. Thomas. Naturale enim est homini, ex corporeis, & sensibilibus ad cognitionem spiritualium, & intelligibilium ascendere; sed metaphore, quibus vtitur Scriptura, desumptæ sunt ex rebus corporeis ad spiritualia nobis explenda: nam per D. P. N. Augustinum desinitur metaphora: quod sit de

re propria ad rem impropriam verbi usurpata translatio, ut cum v. g. per oculum Dei intelligimus, & significamus intellectum ipsius; vox enim *oculus*, quæ propriè significat potentiam visuam, transferretur ad significandum intellectum propter similitudinem, quam habet hic cum illo; sicut propter fortitudinem vocatur Christus, Leo.

Vocabulum, *sensus*, idem sonat, ac mentis intelligentia; unde *Sapientis* 7. legitur: *optavi, & datus est mihi sensus*; idest, intelligentia: & *Lucæ* 24. *Tunc aperuit eis sensum, ut intelligerent scripturas*. Sensus ergo Scripturæ est id, quod Spiritus sanctus, ipse præcipuus scripturæ author, significare intendit. Hic autem est duplex, literalis scilicet, & spiritualis, seu mysticus. Literalis est, quem verba immediate significant, seu est ipsa res enarrata, ut est historia Isaac, qui gestauit ligna humeris suis ad locum sacrificij, quæ literaliter exponitur de ipso Isaac. Spiritualis, seu mysticus est; quem res significatæ vterius significant; & sic supradicta historia Isaac, in sensu spirituali significat, Christum portaturum fuisse crucem super humeros suos ad locum, ubi erat pro mundi redemptione immolandus. Hoc privilegio, ut res significatæ per voces aliquid aliud vterius significant, sola sacra Scriptura gaudet.

Sensus literalis diuiditur in Historicum, Propheticum, & Exoratorium, iuxta diuersitatem materialium, quas continet; nam si litera narret historiam, dicitur Historicus; Propheticus, si futura prædicet; Exoratorius, si laudes Dei contineat. *Nota* autem hic in parabolis, quibus in Scriptura sacra regnum Cælorum comparatur alicui rei, esse sensum literalem, quem sensum voces sua propria significatione reddunt. *II. nota*, quod si 2. ad *Corinth.* cap. 3. dicitur, *litera occidit*, intelligitur, quando aliquis in ijs, quæ legit in veteri testamento, quod fuit umbra futurorum, literæ dumtaxat insillendo, solum sensum literalem, quærit: neque inde transire velit ad spirituales sensum, & intelligentiam eorum, quæ in lege gratiæ impleta fuerunt.

Sensus spiritualis Scripturæ sacre est triplex: Allegoricus videlicet, Moralís, seu Tropologicus, & Anagogicus. Dicitur sensus Allegoricus: cum res gesta in lege veteri fuit figura rei faciendæ in noua; sicut serpens à Moyse exaltatus allegoricè Christum præfigurabat. Moralís, seu Tropologicus: cum gesta in nouo testamento indicant ea, quæ nos facere debemus: v. g. oratio Christi, ieiunium &c. denotant, nos debere ad imitationem Christi, cui conformari debemus, ieiunare, orare, &c. Anagogicus, quando ea, quæ accidunt in Ecclesia militante, significant ea, quæ in Triumphante geruntur: v. g. *Fundamenta eius in montibus sanctis*, quod Anagogicè de cælesti patria intelligitur. Unde concludimus, quatuor esse sensus Scripturæ sacre hisce carminibus contentos, quos tradit *Lyran.* in prologo 1. & 3. *Bibliorum*.

Litera gesta docet; quid credas, Allegoria;

Moralis, quid agas; quid speres, Anagogia.

Exem-

Exemplum autem omnium quatuor sensuū hac in vnica voce, *Ierusalem*, affertur ab eodem Nicolao de Lyra: quæ in sensu literali præcipuam, urbem Palestinæ, quæ fuit sedes regni Iudæorum: in Allegorico, Ecclesiam militantem: in Morali, animam christianam: in Anagogico, Ecclesiam Triumphantem significat.

Non solum potest sub eadem litera sacrae Scripturae contineri sensus literalis, & mysticus: sed etiam quandoque sub eadem litera possunt plures sensus literales includi: vt patet in illis verbis *Psal. 2. Dominus dixit ad me, filius meus es tu, ego hodie genui te*; quæ possunt literaliter intelligi de æterna Christi natiuitate, de eius resurrectione, vel de natiuitate ipsius ex Virgine.

EX PR I M A P A R T E

TRACTATVS PRIMVS.

De Deo, eiusque Attributis, & Visione.

Primum huius quæstionis quæsitum est; an Deum esse; sit per se notum. Propositio autem per se nota dicitur illa, quæ ex suis terminis euidenter cognoscitur; & quia propositio potest dici per se nota dupliciter, & secundum se, & quò ad nos. *Dico I. Deum esse*, non est propositio per se nota quò ad nos. Ostenditur sanè ex illo *ad Rom. 1. Inuisibilia Dei à creatura mundi*, (idest ab homine,) *per ea, quæ facta sunt, intellectu conspiciuntur, sempiterna quoque eius virtus, & diuinitas*. atq; hanc ipsam manifestat veritatem experientia ipsa; nam vt supra diximus: propositio per se nota est illa, quæ ex suis terminis euidenter cognoscitur, sed nullus, propositis tantum terminis, expertus fuit, habuisse Dei notitiam innatam, & euidentem assensum, quòd Deus esset, ergo &c.

Propositio ista: *Deus est colendus*, est propositio æternæ veritatis: vnde est semper concedenda; falsum autem est, hanc propositionem esse per se nobis notaminam, vt aliquis concedat, Deum esse colendum: non est necessè, vt intelligat, Deum esse: sed satis est, si intelligat, deberi illi cultum, facta suppositione, quod sit. Vel dic, quod propositio ista: *Deus est colendus*, cum sit propositio, & principium prædicum, est solum per se notum ei, qui speculative cognoscit, Deum esse: supponit enim notitiam speculatiuam Dei habitam per discursum, vel fidem.

Dico II. hæc propositio: Deus est, si spectetur secundum se, & suis tantum extremis cognosci potest, eam esse veram, idest, est per se nota secundum se; quia propositio per se nota secundum se, vel quoad, est illa, cuius prædicatum est de ratione subiecti; idest, cuius prædicatum includitur in ratione, & definitione subiecti; sed prædicatum
huius

huius propositionis est huiusmodi: cum enim Deus sit ens per essentiam, & actus purus, existentia est de conceptu quiditativo diuinæ essentiae; est igitur hæc propositio, *Deus est*, nota quò ad se, non quò ad nos, qui solùm à posteriori, per discursum ex rebus creatis habitum, possumus cognoscere.

Demonstrari à priori non potest, Deum esse; est sententia communis SS. Patrum, ac omnium ferè scholasticorum: sed solùm à posteriori, siue per effectus à solo Deo productos demonstrari posse, Deum esse. Demonstratio per effectus fit: quando per effectus, qui sunt nobis notiores, procedimus ad demonstrandam causam; ostenditur ex illo *Sapient. 13. A magnitudine speciei, & creatura cognoscibiliter poteris Creator horum videri*; vnde negare, à posteriori Deum demonstrari posse, non solùm est temerarium, sed etiam in fide minimè tutum est.

Nota, quòd quamvis hæc propositio: *Deus, vel est, vel non est*, sit nobis per se nota, non sequitur, quòd illa, *Deus est*, sit huiusmodi; quia illa includitur in illo principio per se noto, quòd scilicet, quodlibet in rerum natura, & in statu reali, vel est, vel non est: quòd non verificatur de secunda.

Utrum sit demonstrabile à posteriori, Deum esse?

CVM sit certum, & constet ex dictis, Deum esse, seu existentiam Dei esse per se notam quòad se, non autem quò ad nos: videndum nunc est; an existentia Dei sit demonstrabilis à posteriori per veram, & propriam demonstrationem metaphysicam, idest notitia certa, & euidenti, & per medium ab extremis distinctum.

Est communis Theologorum sententia, & D. Thomæ, (qui contrariam sententiam appellat manifestè falsam, & errorem:) existentiam Dei esse demonstrabilem à posteriori, idest, demonstratione *Quia*: Constat hæc veritas ex cap. 1. *Epistolæ ad Romanos*. ubi Apostolus loquens de Gentilibus philosophis: *Quod, inquit, notum est Dei, manifestum est in illis, Deus enim illis manifestauit; Inuisibilia enim Dei per ea, quæ facta sunt, intellectu conspiciuntur, sempiterna quoque eius virtus, & diuinitas.*

Prima, & euidentissima ratio, qua D. Thomas probat à posteriori existentiam Dei, desumitur à ratione causæ efficientis; admissa enim, quacumque serie finita causatorum, euidenter probat, dari primam causam incausatam; nam est euident, idem non posse efficere se ipsum: erit consequenter euident, non posse duo se efficere ad inuicem: aliter sequeretur, quòd idem præexisteret ante se ipsum; ergo quòd de nouo fit, ab alio fit; hoc autem aliud, vel fit ab alio, vel non: & sic in infinitum, nisi deueniamus ad aliquod improductum, & incausatum, & ad primam rerum omnium causam improductam, & necessariam.

Dices, multi docent, posse duo se ad inuicem causare: & multi sustinent,

et materiam primam, & formam substantialem esse sibi ad inuicem causas. *Respon.* posse, duo se ad inuicem causare in genere causæ materialis, vel formalis: non autem in genere causæ efficientis; quia cum materia non causet formam, nisi recipiendo ab ea primum esse: & forma causet materiam communicando illi suum primum esse: neutra ad alteram effectum debet præintelligi existens, neque neutra ad se ipsam causa verò efficiens, cum debeat præsupponi in aliquo priori existens suum effectum, si inuicem cum alia daret primò esse, sequeretur, quòd effectus præexisteret ante se ipsum. Et licet aliqui sustineant, posse duo se se inuicem causare in genere causæ efficientis; numquam veritatur, quod adæquatè adæquatione causæ se mutuò causent. Rursus si detur mutua causalitas in eodem genere efficientis, deueniendum semper est ad aliquòd tertium, quod causet. Cum igitur in causis se subordinatis, seu ad inuicem in sua causalitate per se dependens procedi nequeat in infinitum iuxta principia D. Thomæ: restat, deueniendum esse ad primam causam efficientem; à qua ita alix omnes pendeant, ut ipsa à nulla dependeat; cum idem non possit esse in potentia dependibili: & in actu, à quo dependeat.

Secundum principium verissimum, & necessarium, adeoque sufficientissimum ad probandum, Deum esse, desumptum ex eodè Angelico præceptore, est à ratione motus; cumque in mouentibus, & motis per se subordinatis, qualia ad motum horum inferiorum debent concurrere, procedi nequeat in infinitum: deueniendum est omninò ad primum mouens omninò immotum; cum idem non possit esse simul mouens, & motum respectu eiusdem; aliàs esset simul in potentia, & actu. Est igitur verissimum, quòd omne, quocumque genere motus moueatur, necesse est, ab aliquo principio motiuo adæquato moueri, à quo compleatur in ratione principij adæquatum: cum implicet, dari effectum sine causa adæquata. Nam vel mouetur motu violento: & hoc cum moueatur ab infuso, non habet in se principium sufficiens, & adæquatum motus: mouetur motu naturali, huiusmodi autem ens dependet ab alio non solum in esse, sed & in operari. nam cum esse recipiat ab alio virtutem operandum, & sic exigit moueri ab alio; vel mouetur motu physico, est, motu sensibili, & materiali, quatenus dictam virtutem ad operandum habet conseruatam ab alio, & sic mouebitur ab alio per principij productionem virtutis, & conseruationem eiusdem: vel denique mouebitur motu metaphysico, hoc est, spiritali, & incorporeo, quod non sit perfecta sibi sufficientia ad essendum, & operandum, indiget cursu alterius ad operandum; ita ut si Deus non agat simul cum illius, nulla ratione in actum secundum exire potest, & sic semper sequitur ex omni capite, omne, quod mouetur, moueri necessariò ab alio. Et hoc autem, quòd omne, quod mouetur, moueatur à Deo, modo explicato, non valet inferre absolutè: ergo Deus est causa peccati,

quatenus in actionibus peccaminosis moueremur à Deo : *Sequela* enim est vera solum, loquendo de actionibus peccaminosis materialiter acceptis, in quibus nos in eis à Deo physicè moueri dicimur : non autem in actionibus peccaminosis formaliter sumptis ; nam ad eas sic acceptas sola voluntas humana , non verò Deus concurrir. Hinc est, quòd nullo modo deduci potest , quòd Deus sit causa peccati ; quia peccatum, sonat formaliter, quatenus importat malitiã. *Nec* etiam rectè sequitur, nullam actionem, ne transeuntem quidè posse tribui agentibus creatis per hoc, quòd Deus ad omnes nostras actiones, tùm immanentes, tùm transeuntes physicè acceptas concurrat ; nam axioma illud : *omne, quod mouetur, &c.* non intelligitur priuatiuè, quasi numquam sit verũ, (quod mouetur, mouetur à se ipso) cum oppositum pateat in actionibus immanentibus saltem ; sed intelligitur positiuè, quatenus scilicèt, etiam si à se ipso moueatur, simul etiam mouetur ab alio.

Tercia demonstratio sumitur ex contingentia rerum, ex qua via demonstrat D. Thom. dari ens necessarium ; quia implicat contradictionem, dari ens, quod neque sit contingens, neque necessarium : cum inter contingēs, & necessarium non possit dari medium ; & quia non omne ens, quod de facto existit, est contingens, sequitur, quòd aliquod ens existit non contingens : sed ens non contingens est necessarium, sequitur debere dari ens necessarium, quod est Deus.

Dices I. licèt cōtingens nequeat dare esse sibi, supposito autem, quòd sit, potest dare alteri esse ; ergo non est necesse, admittere aliquod ens per se necessarium, quod det entibus contingentibus esse. *Respon.* quòd si omne ens esset contingens ; sequeretur, omne ens esse possibile ad essendum, & non essendum ; sed ex possibili posito in actu, nullum ; sequitur absurdum ; ergo, si supponamus, nullum ens de facto esse, nullum absurdum sequeretur ; quia quod non est, non potest transire ad esse, nisi reducatur ab aliquo ente in actu : quale non daretur, si omnia essent contingentia, & sic quandoque non essent.

Dices II. non valet, si nullum daretur ens necessarium, & nullum contingens existeret, omne esset impossibile ; ergo corrumpit demonstratio. *Respondetur*, negando antecedens ; quia cum omne ens contingens sit ex suis intrinsicis essentialiter connexum cum Deo ; facta suppositione, quòd Deus non esset, omne contingens perderet prædicatum quoddam transcendentale, & essentialè : ex cuius deperditione euaderet intrinsecè chymericum, & implicatorium.

Ex ijs autem rationibus benè deducitur, quòd Deus sit actus purus, in actu puro autem inueniuntur duo prædicata veluti generalia includentia omnia ; alterum negatiuum, nempe indefectibilitas, sub quo prædicato continentur omnia prædicata negatiua ; alterum positiuum, videlicet cōtinens cumulum omnium perfectionum, ex ijs autem conceptibus deducitur I. quòd Deus est vnus ; nam carens omni defectu non est nisi

unicum ; quia si essent duo, vnus careret perfectione alterius, & quidem essentiali ; & sic vterque esset imperfectus . II. si Deus excludit omnem imperfectionem , est ens simplicissimum excludens à se omnem compositionem , tum ex partibus integralibus, tum ex partibus essentialibus, materia videlicet, & forma ; nam compositum integrale est in potentia ad diuisionem, & consequenter ad sui destructionem ; quod pugnat cum ratione actus puri . Compositum autem ex materia, & forma, cum includat materiam , quæ est potentia passiva, & perfectibilis ; sequitur, etiam ipsum compositum esse imperfectum , quod repugnat Deo . Quando autem in Scripturis tribuitur Deo longitudo , profunditas, ac membrum, vt oculus , brachia, vel anima, vel passiones corporales iræ, doloris, &c. intelligenda sunt omnia metaphoricè .

Ob eandem rationem excluditur etiam in Deo compositio ex substantia , & accidente : ex essentia, & suppositualitate : & esse, sed existentia, & essentia ; omnes enim hæ compositiones inuoluunt imperfectionem potentialitatis saltè in alteram ex illis, & in altera saltè rationem actus imperfecti, & limitati ; quinimò Angelicus præceptor excludit à Deo compositionem ex genere, & differentia : sed nomine differentie intelligit limitatum entis ad aliquam speciem, & consequenter restrictum rationis entis, & exclusum alicuius perfectionis .

III. deducitur , Deum esse summum bonum : quinimò esse bonum per essentiam ; cum enim vnumquodque tantum habeat bonitatis, quantum habet entitatis, & perfectionis : cum Deus sit perfectissimus omnium entium, quinimò contineat eminenter perfectiones omnium aliarum rerum ; manifestum est, Deum non solum esse bonum, sed etiam summum bonum ; quinimò cuiuslibet creature bonitas est quid participans diuinæ bonitatis : & sic omnes creature sunt bonæ bonitate diuina .

IV. si Deus est optimus , est profectò infinitus ; non loquimur autem de infinito quò ad durationem, neque quò ad quantitatem molis, (quæ in Deo non est,) sed perfectionis ; & sic dicimus, quod Deus est infinite perfectionis essentialis . Nam ad producendum ex nihilo, opus est potentia infinita ; sed Deus produxit aliqua ex nihilo per creationem in hoc vniuerso ; ergo habet potentiam infinitam, ac proinde essentiam ; cum virtus infinita esse nequeat, nisi ab essentia infinita .

Ex eadem infinitate suæ essentialis deducitur, quod Deus sit vbique . Est igitur Deus immensus essentialiter exigens habere sibi præsentem omnes res existentes ; & sic est secundum suam substantiam illis præsens : & ab eis, & ab vnaquaque earum nulla ratione distans , iuxta illud *Apostolus* 17. *Non longe est ab vnoquoque nostrum ; in ipso enim vivimus, mouemur, & sumus* . Ante creationem mundi erat Deus in seipso, quia est sua immensitas, seu vbiquitas, sicut est sua cognitio . Mundo autem condito, Deus est extra mundum per præsentiam omnino absolutam : & quæ sit locus essentialiter primus, & prima regula, & mensura omnis vocationis .

Deus insuper est in omnibus rebus per præsentiam, potentiam, & essentiam; per præsentiam, quatenus quælibet res, quæ est in rerum natura, conspicitur à Deo: & sic est in præsentia ipsius; per potentiam, quia quælibet res subest potestati diuinæ; per essentiam, quia Deus non distat ab illis secundum suam substantiam. Esse ubique, est proprium Dei: quatenus nulla potentia dari possit locus, in quo non sit Deus: hoc autem nulli præter Deum conuenit; nam dato, quod aliquod creatum possit esse ubique, non tamen in omni suppositione possibili est ubique necessarium: potest enim non esse, & tunc non erit ubique.

VI. ex eo, quod Deus sit ætus purus, excludit à se omnem mutabilitatem: non solum, quia subiectum valeat transire de vno ad aliud oppositum, quod supponit in subiecto imperfectionem entis in potentia: sed etiam excludit mutabilitatem, qua subiectum incipiat de nouo, vel desinat esse, quod supponit illud esse contingens, & sic est propria solius Dei immutabilitas. Cum hac summa immutabilitate Dei est coniuncta æternitas, id est duratio: quæ neque secundum se totam, neque secundum aliquam sui partem, neque actu, neque potentia terminum habet; hæc autem æternitas, in hac propriissima significatione accepta, est ita propria solius Dei: ut neque diuina potentia conuenire possit ulli creaturæ. Et definitur à Boetio, 5. de consolat. *prosa ult. est interminabilis vite tota simul, & perfecta possessio*. Dicitur primum, *Interminabilis*, ut excludatur omnis duratio habens principium, aut finem. Secundò per ly, *Tota simul*, excluditur duratio successiua, quæ caret terminis: ut esset tempus, si motus fuisset ex æternitate, & duraret in æternum. Tertiò per ly, *Perfecta possessio*, excluditur æuum infinitum, quale esset, si Angelus productus esset ex æternitate, & duraret in æternum: quia est coniunctum cum variatione, & mutatione accidentaria eius substantiæ, in qua existit, quia, quod terminari, ac desinere potest, non perfecte possidetur. Quarto additur, *Vita*, quia æternitas non est duratio cuiuscunque entis, sed viuientis, cuius esse, & duratio est vita.

Quod nam sit speciale constitutum Deitatis?

PRædicatum constitutum diuinæ essentia, logicè, seu metaphysicè consideratum, seu, quod idem est quò ad nos, ut sic, est: *Qui est*. Hanc conclusionem docet D. Th. 1. par. q. 3. art. 4. in corp. ubi ait, quod Dei essentia est eius esse, & sequuntur hanc conclusionem multi Recentiores. Antequàm autem probem conclusionem, suppono tanquam certum: quod conceptus, quò ad nos, & logicè, essentialis diuinæ nature debet esse ita proprius Dei, ut sit primus, & radix aliorum, ac proinde positius, & absolutus, non verò negatiuus; quia negatiuus supponit positium, in quo radicetur; sicut relatiuus supponit absolutum: conceptus autem absoluti, & in alio radicari sunt potius proprietates.

Secundò conceptus positivus est ille, per quem significatur aliqua perfectio positiva, ut bonitas, sapientia, &c. Negativus est, quo excluditur potius à Deo imperfectionem aliquam limitationis, mutationis, &c. ut sunt infinitas, immutabilitas, &c. ut supra notavimus.

Probatum conclusio. Hic conceptus, *Qui est*, est proprius Dei, est primus, absolutus, & radix aliorum; ergo est conceptus, logicè, seu metaphysicè, essentialis Dei. Est enim proprius Dei: quia per hanc propositionem: *Deus est, qui est*, significamus, Deum esse absolute pro quocumque statu, cum summa amplitudine: quod est proprium solius Dei; est etiam primus: quia est absolutus, non negativus: tum quia, ipsum esse, est conceptus absolute primus: cum omnes alij conceptus, qui non sunt ipsum esse, debeant fundari in ipso esse, à quo veluti determinantur ad essendum; ergo est conceptus primus; ergo habet omne id, quod requiritur ad constitutum logicum divinæ naturæ. Vnde *Exodi, nu. 3.* dicitur: *Ego sum, qui sum, qui est, misit me ad vos*; super quæ D. Th. qu. 13. art. 12. ait: *Hoc nomen, qui est, esse maxime proprium Dei*; quasi diceret, *Qui est*, distinguit Deum primò, à quocumque alio: & est prima radix attributorum, quæ propria sunt ipsius Dei; sed primum distinctivum, idem est, ac ultimum essentialis constitutum, in quo proprietates radicantur, ergo &c.

Ex quo benè excludendi sunt I. à ratione constitutiva naturæ divinæ conceptus, *omnipotentis, intellectui, volitui, &c.* quia hi conceptus sunt relativi, fundati in aliquo alio absoluto. II. conceptus, *intellectui, volitui*, sicut etiam ratio substantiæ, non descendunt ad peculiarem modum, sub quo competunt Deo, nisi præintelligantur cōtrahi ad hanc: *Qui est*. Nam quævis alia ratio prior præscindit à creatâ, & increatâ: posterior verò imbibit ipsum esse Dei absolute dictum. Neque potest esse constitutum Dei hic alius conceptus: *Deus est omnis sua perfectio*; quia *ly, omnis*, indicat quamdam integritatem ex pluribus compactam; conceptus autem totius non est primus omnium, cum supponat conceptum partium. III. *ens à se*, neque potest esse constitutum divinæ naturæ: præcipuè si aliteras, quam dicit *ens à se*, non sit ab alio; quia hic est conceptus negativus. Hinc est, quod aliqui concedunt, quòd ratio essendi à se, si importet quid negativum, solum quò ad modum significandi, non verò quò ad modum essendi, concedunt, quòd sit constitutum Deitatis. Nam in hoc conceptu, (essendi à se) est quid positivum, quidquid sit, si per modum negativi explicetur. IV. excludendi sunt à ratione constitutiva Deitatis omnes isti conceptus, *Ens primum: Ens eminenter, & æquivalenter omnia, & terminus ille, Necessarius essendi*. Nam, *ens primum*, si excludat aliud prius, est conceptus negativus: si limitatur positivè per respectum ad superiora, est conceptus relativus. Si autem etiam, *Ens eminenter, & æquivalenter omnia*, sicut terminus, *necessarius essendi*, sunt conceptus relativi.

Notabis hic, quod constitutivum Deitatis diximus, quod debet esse distinctivum, & radix aliorum. Vnde dato, quod possit dari aliquod, quod sit distinctivum, & non constitutivum: ut volunt aliqui, esse materiam celi, quæ est primum distinctivum celi, & non adequatè constitutivum in sententia eorum, qui volunt eam differre à nostrate, per quod sibi vendicet determinatam formam celi, non sequitur, quod ipsum esse Dei non sit speciale constitutivum ipsius. Nam materia, celi ideo non esset speciale constitutivum in illa sententia: quia non est radix omnium, quæ sunt in cælo. II. omnia attributa continentur in hoc prædicato: *Qui est*: & quidem pro statu reali continentur formaliter, pro statu vero intentionali explicite præcontinentur virtualiter. III. falsum est, quod gradus, intellectui sit perfectior, quàm prædicatum illud: *Qui est*. Solum enim in creatis, qui carent illo absoluto, intellectivum est esse perfectissimum. IV. ipsum esse Dei absolutum convenit attributis, & personalitatibus, non in quantum contradiistinguuntur ab essentia: sed quatenus in eis imbibitur essentia; eadem enim formalissima ratio essendi: *qui est*, quæ constituit essentiam, intelligitur imbibitur attributis, & personalitatibus. V. quando D. Thomas, 1. *contr. Gent. cap. 41.* colligit, intelligere divinum esse, eius essentiam, loquitur de essentia adæquata, constante ex ultimo, quasi genere, & ultima, quasi differentia; & vult, quod intelligere se habet, ut genus: *divinum* verò, ut differentia. Addo tamen, *divinum*, in hac restrictione acceptum, nihil aliud significare, quàm esse Dei absolutum. VI. ideo existentia in rebus creatis supponit earum essentiam ultimò constitutam; quia illis competit accidentaliter; contra verò, in Deo est speciale Deitatis constitutivum pariale; quia illi competit essentialiter.

Dices: si esse, absolutè dictum per exclusionem omnis limitationis, esset constitutivum Deitatis, eo ipso, quod scimus, Deum esse, deberemus etiam scire, quid Deus sit; sed scimus Deum esse, nescimus autem, quid sit; ergo prædicatum quiditativum Dei non est: *Qui est*.

Respondeo, distinguendo sequelam: deberemus etiam scire, quid Deus sit, seu quid sit ipsum esse divinum, clarè, & intuitivè, nego: sub conceptu confuso existentis, concedo. putamus igitur, primum prædicatum essentiale Dei esse illud: *Qui est*. quid autem sit ipsum esse divinum, non cognoscimus clarè, sed confuse sub conceptu existentie: ideoque non absolutè cognoscimus quiditatem, idest, quid sit Deus.

Quomodo inter se distinguantur Attributa, & Perfectiones absoluta in Deo?

Loquimur primò de attributis absolutis, quæ sunt Iustitia v. g. Misericordia, Pietas, &c. & inquirimus, an distinguantur inter se virtualiter, an formaliter ex natura rei, ut volunt Scotistæ. Hæc quaestio

o est nostris hisce temporibus alicuius momenti; nam etiā inter Thoma-
istas ipsos controuertitur, non distinguentes aliquos ex ipsis, quinimō
etiam ex nostris, inter distinctionem virtualem intrinsecam, & ex-
trinsecam: putantes, eandem esse distinctionem virtualem intrinsecam,
quæ est capacitas ad suscipienda prædicata, quantum sunt ex se contra-
dictoria, ac illam, quæ cum in sola æquiualentia consistat, solum virtua-
lem extrinsecam meritò Theologi perspicui appellant. His positis.

Dico I. inter attributa, & perfectiones absolutas in Deo non esse ad-
mittendam distinctionem aliquam realem, ut est certum de Fide neque
modalem, quæ habetur inter rem, & modum: pugnant enim huiusmo-
di distinctiones cum perfectissima Dei entitate, & simplicitate.

Dico II. neque admittendā esse inter attributa absoluta distinctionem
formalem ex natura rei. Hanc distinctionem, dicunt Scotistæ, esse inde-
pendenter ab intellectu; non tamen realem, sed mediam inter distinc-
tionem realem, & rationis, & maiorem hac, minorem verò illa: & co-
gnoscunt ipsam ex quatuor capitibus; nempe ex exclusione: inquantum
vnum, aliud excludit à sua ratione formali; ex definitione: quia diuer-
sa definitione definitur vnum, ac aliud; ex demonstratione: quia de
vno aliquid demonstratur, quod non demonstratur de alio; & redupli-
catione tandem: quia de vno, in quantum tale, dicitur aliquid, quod
non dicitur, in quantum tale, de alio; ita dicunt, distingui animal à ra-
tionali, dicentes, animal excludere à sua ratione formali rationale; ani-
mal enim non est rationale; item diuersa definitione definitur animal,
ac rationale; posset etiam aliquid demonstrari de animali, quod non
demonstratur de rationali; & animal, ut animal, est principium sen-
tiendi; rationale verò, ut rationale, est principium discurrendi.

Probatur igitur conclusio; quia non verificatur de attributis absolutis
secundum id, quod dicunt ex parte obiecti, quod diuersa definitione
definiuntur; quia ex parte obiecti misericordia est principium puniendi,
& miserendi: & iustitia principium miserendi, & puniendi. Neque
ex parte obiecti sunt diuersæ formalitates, neque vnum attributum ex-
cludit aliud, neque ex parte obiecti potest demonstrari aliquid de vno,
quod non potest demonstrari de alio; sed Scotistæ non ex alio capite, ut
dictum est, cognoscunt, & deducunt hanc distinctionem formalem ex
natura rei, ergo &c.

Dico III. neque distingui attributa absoluta distinctione virtuali intrin-
seca; sicut volunt Thomistæ nonnulli, distingui attributa absoluta inter se, &
ab essentia, & in creatis animal, & rationale, hæc enim distinctio vir-
tualis intrinseca, ut supra diximus, est capacitas ad suscipienda prædica-
ta, quantum sunt ex se contradictoria, quæ in alijs fundant distinc-
tionem realem, ita ut de vna, eademque indiuidua entitate, secundum
vnam rationem negetur aliquid, quod affirmatur de eadem secundum
aliam rationem. Hoc enim modo solum distinguuntur in diuinis Na-
tura

tura diuina; & Paternitas; quia sunt vna indiuidua entitas realis; & tamen de natura verificatur, quòd sit communis tribus personis, quod non verificatur de Paternitate; & de hac, quòd generet, & referatur ad Filium, quod non conuenit naturæ. Huiusmodi autem prædicata propter distinctionem virtualem non sunt contradictoria, eo quòd non conueniunt vni entitati, omninò eidem, sed virtualiter distinctæ; ideo dixi, quòd distinctio virtualis sit capacitas alicuius entitatis, vt duo verificentur prædicata, quantum sunt ex se contradictoria, non autem capacitas ad suscipienda duo prædicata absolutè contradictoria.

Probatur conclusio. Nam illa, quæ distinguuntur distinctione virtuali intrinseca, non identificantur omnimodè: sicut homo, & animal rationale, quæ habent omnimodam identitatem: & omnia, quæ dicuntur de vno, dicuntur de alio; sed habent aliquam distinctionem realem, quam aliqui vocant inadæquatam, vel mediatam, vel intertuo; & hoc modo prædicata, quæ essent contradictoria, non sunt omninò contradictoria; quia non verificantur de omninò eadem: vt Fides docet, distinguere in diuinis Naturam, & Paternitatem, & omnes perfectiones relativas ab essentia; quia datur aliquod tertium, nempe Filiatio, cum qua identificatur Natura, & non Paternitas; sed attributa absoluta non possunt hoc modo distinguere inter se, cum non detur aliquod tertium, cum quo identificatur vna perfectio, & non alia: cum essentia in Deo, & attributa absoluta sint communia omnibus, & essentialia vnicuique; ergo &c.

Distinguuntur igitur attributa absoluta in Deo, vt sunt Misericordia, Iustitia, Omnipotentia, &c. distinctione virtuali extrinseca, quæ dicitur æquiualentialis, & per diuersa connotata. & cognitiones; & sic per æquiualentiam, & connotationem ad diuersos effectus, quos aliqua causa potest producere; & sic in Deo eadem indiuisibilis entitas, & vnica, & realis formalitas iustitiæ, & Misericordiæ, æquiualeat iustitiæ, & misericordiæ creatæ, quæ sunt realiter distinctæ; & est principium producendi effectus specificè diuersos, & sic eadem realitas comparata ab intellectu, (quæ comparatio est aliquod extrinsecum,) cum vno termino, nempe cum iustitia creatâ, distinguitur veluti virtualiter à se ipsa, comparata cum alio termino, nempe cum misericordia creatâ. Cæterùm eadem entitas Dei, eadem realis formalitas est Misericordia, & Iustitia; & Misericordia est principium puniendi, & miserendi: & Iustitia principium miserendi, & puniendi. Illæ autem propositiones: *Deus iustitia punit, misericordia non punit*, non sunt veræ in sensu reali: sed solum in sensu intentionali, idest, in ordine ad nostros conceptus, nempe per meram comparisonem intellectus ad illos terminos distinctos iustitiæ, & misericordiæ creatæ; vnde sensus illarum propositionum est, quòd entitas Dei cognita a nobis ad instar iustitiæ creatæ, cum qua comparamus illam, punit, & non miseretur; cognita vero ad instar misericordiæ creatæ,

creaturæ, miseretur, & non punit. Exemplum totum declarat animalitatem, & rationalitas in Petro, quæ sunt una, & eadem realis formalitas: distinguuntur tamen virtualiter extrinsecè, scilicet per æquivalentiam; quatenus animalitas est principium sensationum, pro ut est in brutis, discursus, prout est in homine; à parte rei autem, & in statu reali animalitas in Petro est principium discursus, & sensationis, & rationalitas principium sensationis, & discursus; & Petrus in statu reali non minus rationalitate, quàm animalitate discurret. Hoc modo discurrendum est de attributis.

Nota I. quòd absolutè, & ex parte obiecti istę propositiones: *Deus intellectus intelligit, non voluntate*: sicut *voluntate vult, & non intelligit*, sunt falsæ; quia Deus per formalitatem tum realiter, tum virtualiter indiuisibilem ex parte obiecti, est intellectus, & voluntas; & sic intellectus diuinus vult, & intelligit: & voluntas diuina etiam intelligit; possunt tamen habere aliquam veritatem: quatenus per intellectum exprimimus nostros modos imperfectos concipiendi Deum per analogiam ad creaturas: & sic per similitudinem ad intellectum creatum formamus de eadem indiuisibili entitate, & formalitate conceptum intellectus, & non voluntatis. Vnde assero, quòd tum Filius, tum Spiritus sanctus, procedunt virtualiter, tamquam à principio virtualiter distincto, & à cognitione, & à volitione essentiali.

Nota II. quando SS. Patres, & Concilia dixerunt, quòd verè, & realiter Filius procedit per intellectum, & Spiritus sanctus per voluntatem, est verum: sed non sequitur, quòd verè, & realiter in diuinis non sit idem intellectus, & voluntas. Dicitur enim, quod Verbum procedit per intellectum, & Spiritus Sanctus per voluntatem; quia Verbum procedit, ut intellectio passiva, quæ spectat ad lineam intellectui: & Spiritus sanctus, ut amor passivus, qui spectat ad lineam voluntatis.

III. Neq; per hoc, quòd Verbum, & Spiritus sanctus procedunt ab utraq; perfectione essentiali, sequitur, quòd Verbum sit etiam Spiritus sanctus, & Spiritus sanctus sit etiam Verbum; quia non omnis vnitas principij infert vnitatem in terminis, si præcipuè vnus terminus sit ab alio, ut euenit in casu nostro.

Miror, aliquos probare, attributa absoluta non distingui virtualiter extrinsecè, ex eo; quia putant, Misericordiam, v.g. & Iustitiam significare prædicata intrinseca, & identificata Dei: eodem modo, quo animal, & rationale in homine, dicunt, significare prædicata intrinseca ipsius. Hoc enim est falsum; quia hæc nomina, nempe Misericordia, & Iustitia solum denotant distinctas, & diuersas cognitiones; possunt enim de eodem obiecto dari diuersæ cognitiones. Petrus enim v.g. cognitus cognitione, qua distinguatur à non entibus, dicitur ens; & eadem entitas Petri cognita alia cognitione clariori, qua distinguatur ab accidentibus, dicitur substantia; &c. & sic entitas Petri cognita cognitione distinguente,

ipsam ab accidētibus, dicitur clarior cognita, quàm sit eadem entitas cognita cognitione distinguente ipsam à non entibus. Vndè ex diuersitate cognitionum non possumus arguere diuersitatem obiecti, vt æquiuocati sunt aliqui ex Thomistis. Hæc igitur duo attributa, nempe Misericordia v.g. & Iustitia sunt duo concreta distincta, non quidem ratione subiecti, sed ratione formarum, idest diuersarum cognitionum.

Admoneo etiam hic, malè ex diuersitate effectus arguere Scotistas diuersitatem causæ; Nam licet verum sit, intellectiōem, & sensationem, v.g. in homine esse effectus diuersos: ex hoc autem non possumus arguere, animalitatem, & rationalitatem esse diuersa principia; non enim possumus ex diuersitate effectuum arguere diuersitatem causæ; potest enim eadem causa producere plures effectus realiter distinctos: sicut de eodem obiecto possunt dari diuersa iudicia distincta. Nam iudicia: *Petrus est homo, & Petrus est animal rationale*, sunt diuersa: vnum altero clarius, & tamen non habent obiecta diuersa; ita etiam à pari de eodem obiecto possunt dari diuersæ cognitiones vna clarior altera, absquè eo, quòd obiectum sit diuersum. Vndè ob hanc rationem dicuntur, attributa absoluta distingui ratione inter se, & ab essentia; nam sicut in statu reali, duo distingui, est, vnum non esse aliud realiter: ita, duo distingui intencionaliter, est, vnum non esse aliud intencionaliter, scilicet in intellectu; hoc autem non importat, quòd intellectus affirmet, vnum non esse aliud: sed quòd vna cognitio non sit alia, sed sit diuersa ab alia; sic animal distinguitur intencionaliter à rationali: quia est diuersa cognitio animæ, quod est idem cum rationali, à cognitione rationalis, quod est idem cum animali. Ex eo autem, quòd cognitio, qua cognoscitur Misericordia v.g. sit diuersa à cognitione, qua cognoscitur v.g. Iustitia, sequitur, esse falsum, quòd entitas Dei cognita per cognitionem denotatam per nomen, *Misericordia*, sit eadem entitas cognita per cognitionem denotatam per nomen, *Iustitia*.

Talibus fortasse rationibus moti explicant aliqui distinctionem rationis ratiocinatæ, qua, volunt, attributa distingui; dicentes, esse illam, per quam obiectum, secundum quod habet in se, præbet intellectui fundamentum eliciendi diuersas cognitiones in repræsentatione obiecti, per quas illud intencionaliter distinguitur veluti in duas formalitates, quarum vna repræsentatur per vnā cognitionem, & altera per alteram.

His tamen non obstantibus; quia Scotistæ argumentorum arma minime deponunt, dicentes: attributa absoluta debere distingui inter se, & ab essentia, quia diuersa definitione definitur Misericordia v.g. ac definitur Iustitia. *Respondebis*, vel negando causalem, vel melius, ipsam distinguendo: diuersa definitione definitur Misericordia, ac Iustitia, si definitiones sunt adæquatæ, concedo: si sunt inadæquatæ, subdistinguo: definitur diuersa definitione inadæquata, inadæquatione se tenente ex parte obiecti, nego: se tenente ex parte actus, concedo. Daro ergo, quod

erfis definitionibus definiatur Misericordia, ac definitur Iustitia: quia eam definitiones istæ sunt inadæquaræ, inadæquatione se tenente ex te actus, non sequitur, debere distingui ex natura rei formaliter.

Reijcimus ergo hanc distinctionem formalem ex natura inter attributa diuina absoluta, & ab essentialia: nam talis distinctio, vel stare potest in identitate reali, vel non; si primum, ergo virtualiter distinguuntur, quia distinctio virtualis est inter illa, quæ realiter identificantur; si non, stat cum identitate reali; ergo distinguuntur realiter: nam distinctio realis inuenitur inter ea, inter quæ dantur prædicata contradictoria. Ex hoc autem, quod attributa, & essentia diuina sint vna, & eadem diuisibilis entitas, & formalitas, non sequitur: quod attributa sint vna; quia illa non cognoscimus, nisi per comparisonem ad creaturas, in quibus sunt realiter, & quiditatiuè distincta.

Non valet: in creaturis amor distinguitur ab intellectu; ergo etiam diuinis amor, seu volitio debet distingui ab intellectu. Nam in creaturis intellectio, & amor, ut potè creata non sunt à se, sed ab alio; intellectio siquidem est ab intellectu, & ab obiecto proximè intelligibili, quod constituitur tale per speciem impressam; amor autem est ab obiecto proximè amabili, quod fit tale per cognitionem; ergo non possunt cum illa identificari: aliter esset à se. At intellectio, & amor sunt à se, & prima realitas identificans sibi primum intelligi- & primum amabile.

quis nobis obiiciet: essentia diuina, & relationes distinguuntur se virtualiter intrinsecè, quò ad prædicata realia communicationis, productionis, ut supra dictum est; ergo à pari, Iustitia, & Misericordia eo poterunt distingui similiter virtualiter intrinsecè quò ad prædicatum saltèm intentionale cognitionis. Respondemus, concedendo autem, & negando consequentiam; disparitas est Sole clarior; admittimus enim Fide edocti distinctionem virtualem intrinsecam inter attributa relatiua, & essentiam tantum quò ad prædicata realia ab eadem determinata; quæ prædicata relatiua, & essentia, licèt immediatè, aliter sint idem: duo tamen ex illis, nempe essentia, & Paternitas distinguuntur realiter mediatè, & in tertio; quia scilicet datur tertius ceptus, nempe Filiatio; cum quo immediatè, & realiter identificatur essentia, & à quo immediatè, & realiter distinguitur Paternitas. Quod autem non docet nos distinctionem aliquam intrinsecam virtualem Iustitiam, v. g. & Misericordiam, etiam quò ad prædicatum cognitionis intentionale, vnde absolutè ipsam negamus inter attributa absoluta: & admittimus inter attributa relatiua, & essentiam quò ad prædicata realia.

Ac autem est maximè notandum I. quòd essentia diuina, & relationes non idèò distinguuntur virtualiter intrinsecè, quia sunt infinitæ in entitate sua; ita ut infinitas sit ratio trahens huiusmodi

distinctionem: sed potius, quia est ratio tolerans illam distinctionem, sine qua scilicet non esset in Deo fecunditas generationis, & processiois.

II. neque soluimus difficultatem mysterij Trinitatis ex distinctione virtuali: ita vt assumatur distinctio virtualis, quasi medium certum, & aliunde notum ad explicandam difficultatem huius altissimi mysterij; damus autem, quod tunc mysterium ipsum, tunc distinctio virtualis in eo inclusa superat captum nostrum: quare in nostra sententia nullum est periculum circuli, aut petitionis principij.

Ex his inferes, nullam admittendam esse præcisionem obiectiuam inter attributa absoluta, taliter, vt non possit intellectus attingere vnum attributum diuinum, & non aliud cum eo identificatum, quod est obiectiue præscindere; sed visa vna perfectione debent, & alia videri. Hæc enim veritas infedit præsertim hodiè sapientioribus, vt præcisionem hanc dicunt inintelligibile, ne dum aperire fallam: ita vt Auctores, si qui fuerint affirmantes, iaceant derelicti. *Probatnr conclusio*; nam ea, quæ identificantur, & idem esse habent, seu indistinctum, ita se habent: vt quidquid conueniat vni, conueniat & alteri: & omne, quod prædicatur de vno prædicetur de altero: & quod affirmatur de vno, affirmetur etiam de alio; sed perfectiones diuinæ absolutæ inter se identificantur, & idem esse habent: imò sunt vna, & eadem indiuisibilis emitas, & formalitas, vt supra diximus: ergo omne illud, quod prædicatur, & affirmatur de vna, affirmatur, & prædicatur etiam de alia; ergo si affirmatur de vna, quod cognoscatur, debet etiam affirmari de alia.

Itaque neq; distinctio virtualis extrinseca, seu æquiualentialis, neque distinctio formalis, & rationis ratiocinatæ cogit nos ad hæc præcisionem obiectiuam admittendam inter huiusmodi attributa absoluta; quia prima non est propriè distinctio, vt diximus: sed appellatur sic per æquiuocationem; neque secunda: nam quando aduersarij dicunt, quod Misericordia, prout formaliter distincta à Iustitia, potest se sola terminare cognitionem: vel ly, *formaliter*, est aliquod in obiecto, vel tantum in intellectu cognoscente. Non primum: alioquin esset in diuina Iustitia intrinsecè aliquid, per quod distingueretur à Misericordia; & sic admitterent inter Iustitiam, & Misericordiam Diuinam distinctionem virtualem intrinsecam, vel saltem distinctionem ex natura rei Scotticam, quod est aperte falsum. Si secundum, nempe, quod ly, *formaliter*, est aliquod tantum se tenens ex parte intellectus cognoscentis; ergo iam aringitur Iustitia secundum id, quod nullo modo differt à Misericordia, seu secundum quod est ipsa Misericordia, quod idem est, ac dicere, quod attingitur etiam Misericordia.

Sciendum autem hic est, quæstionem hanc de præcisionibus habere etiam locum in cognitione intuitiua; & sic non solum negamus præcisionem obiectiuam inter attributa diuina absoluta cognita per cognitionem abstractiuam: sed etiam inter ipsa cognita cognitione intuitiua.

Nam

am repugnantia præscindendi per cognitionem abstractiuam desumi-
 ex indiuisibilitate obiecti, & ex eiusdem incapacitate admittendi
 se, vel circa se duo prædicata contradictoria. Iam verò tam sunt
 prædicata contradictoria, cognosci abstractiuè, & non cognosci abstracti-
 : quàm, cognosci intuitiuè, & non cognosci intuitiuè. Vnde sicut
 cognitio abstractiua præscindit solum ex parte actus; ita cognitio intuiti-
 ua, quæ præcisio ex parte actus nullam importat diuersitatem in obie-
 o, sed tantum in cognitione: quatenus scilicet cognitio, qua cognos-
 o vnâ perfectionem, non est eadem cognitio, qua cognosco aliam;
 quia vna cognitio est clarior altera.

Vnde intelliges, quod cognitiones abstractiue specificantur, & disse-
 nt ex parte obiecti motiui, seu similitudinis, non autem ex parte obie-
 terminatiui. In cognitionibus verò intuitiuis, vna est clarior altera;
 ia magis intensiue penetrat idem obiectum, distinguendo illud à plu-
 ribus, quod non sunt ipsum. Sic Beati, quò plures effectus vident in Deo,
 clariùs cognoscunt ipsum Deum; hoc tamen non prouenit ex eo, quia
 vnum prædicatum cognoscatur: sed quia plures effectus Dei cognos-
 untur; & sic attingitur per quamlibet cognitionem intuitiuam totus
 deus, sed non totaliter; quia non attingitur ipse per respectum ad om-
 nes creaturas: sicut omnes Beati cognoscunt eandem Omnipotentiam
 sed ad intra; dicitur tamen eadem Omnipotentia, perfectiùs ab vno,
 quàm ab alio cognosci, eò quia eam cognoscit in ordine ad plures effectus
 semper possibiles.

Obijciat fortasse aliquis aduersus dicta: Potest intellectus aliquandò
 affirmare, quòd Deus sit iustus; & non affirmare, quòd sit misericors;
 animò potest negare, prout faciunt aliqui Hæretici; ergo potest in-
 lectus præscindere obiectiuè. *Respondeo*, quòd si hoc argumentum
 haberet vim: possem ego probare, rusticum affirmantem, Petrum esse
 minem, & negantem, ipsum esse animal rationale, præscindere obie-
 tuè hominem ab animali rationali: quod est ridiculum. *In forma igitur*
Respondeo, negando consequentiam. In casu enim posito, hæretici
 ille eadem claritate, qua attingit Iustitiam, attingit etiam Miseri-
 cordiam; quatenus scilicet in obiecto non est aliud, & aliud: sed eadem,
 vnica realis formalitas. Quòd autem non affirmet de Deo etiam Mi-
 ricordiam, est: quia obiectum, nempe Deum, non cognoscit omninò
 are, & distinctè, nimirum per respectum ad omnes effectus, & ad
 omnia connotata, prout foret opus ad discernendum Deum ab omni eo,
 quod non est Deus; sed tantum attingit per respectum ad aliquem effe-
 ctum, nempe ad actum vindictæ, in ordine ad quem eandem realem
 formalitatem obiecti appellamus Iustitiam: & non attingit per respec-
 tum ad alium effectum, nempe ad actum miserationis; in ordine ad
 quem, eandem realem formalitatem obiecti appellamus Misericordiam.
 Petes, an inter prædicata Dei inter se virtualiter distincta, sicut est
 essen-

essentia respectu relationis, possit fieri præcisio obiectiua? *Respondeo*, quod non solum inter prædicata Dei inter se virtualiter distincta, verum etiam circa relationes diuinas, inter se realiter distinctas, non potest dari cognitio absolute præcisiva; sed, cognita vna, debet etiam & alia, cognosci. I. quia distinctio virtualis intrinseca in essentia diuina, & relationibus in ordine ad terminos illos contradictorios, *communicari*, & *non communicari*; *produci*, & *non produci*, non cogit nos ad similem distinctionem in ordine ad hos alios terminos, *cognosci*, & *non cognosci*; & sic admittimus Fide edocti distinctionem virtuales intrinsecas, in ordine ad prædicata realia, *produci*, & *non produci*; &c. non vetò quò ad prædicata intentionalia, *cognosci*, & *non cognosci*; quia Fides ad id nos minimè cogit. II. etiam si cognoscereimus essentiam, non cognitis relationibus: vel è contrà; vel quòd cognoscatur Paternitas, & non Filiatio, quod est falsum; non ideò propriè loquendo præscinderemus obiectiue. Quia tunc, non ipsa cognitio præscindit, sed potius supponit præcisum, seu distinctum; nam præscindere non est, cognoscere quomodocumque vnum, & non aliud; sed importat, vt in obiecto distinctio prædicati cogniti à prædicato incognito habeatur ex vi cognitionis; & sic ob hanc rationem cognitio attingens, v.g. Petrum, & non Paulum, non præscindit; quia supponit Petrum præcisum, seu distinctum à Paulo. Sic à pari, cognitio attingens Paternitatem v.g. & non Filiationem, non ipsa præscinderet, & distingueret in obiecto rationem, quam attingeret, & quam ignoraret: sed præsupponeret iam distinctam.

Dices, conceptus explicatus per vocem, *Essentia*, siue sit creatus, siue diuinus, aliter significat in recto: ac significat in recto conceptus explicatus per vocem, *Paternitas*, aut *Filiatio*; ergo præscindetur obiectiue. *Resp.* quòd licet antecedens sit verum; quia tamen ille primus conceptus attingens in recto essentiam, & non Paternitatem, aut Filiationem, attingit in obliquo ipsam Paternitatem, aut Filiationem, propter idemtitatem essentiae cum Paternitate, & Filiatione; hoc sufficit ad negandam præcisionem obiectiuam inter essentiam diuinam, & relationes, quò ad terminos, *cognosci*, & *non cognosci*; & sic qui cognoscit essentiam, cognoscit etiam relationes, & qui vnā relationem cognoscit, cognoscit & aliam: ex illo Ioan. vbi Christus inquit: *Philippe, qui videt me, videt & Patrem meum: quia ego in Patre, & Pater in me est.* ideoq; S.P. Augustin. in lib. *quest. noui testam. quest. 43.* loquens de Patre, & Filio: *In diuinis*, ait, *per id, quod vnum in substantia sunt: qui vnā videt, & ambas videt.*

Nota, quòd si aliquis Scotista distinctionem hanc virtuales intrinsecas, quæ reperitur inter attributa relatiua, & essentiam, vult appellare formalem ex natura rei; & alius fortasse vult illam dicere eminentialem; nolo de voce contendere. Ego enim cum communi sensu Philosophorum, & Theologorum illam appello virtuales intrinsecas, ad disse-

ferentiam distinctionis virtualis extrinsecæ : quæ reperitur inter attributa absoluta , & essentiam .

Vtrum intellectus creatus possit Deum videre per essentiam ?

Oquimur de cognitione quiditativa , & per essentiam ; qua in Patria, juxta dictum Ioan. *videbimus Deum, sicuti est* : non verò de cognitione , quam in hac vita habemus per res creatas, quam D. Thom. appellat cognitionem : *an est* . Nam cognitione, quam de Deo, & attributis diuinis per res creatas in hac vita comparamus, potius cognoscimus, quòd sint, quàm quid sint.

Fuit error quorundam hæreticorum, quos suppresso nomine refert Gregor. negantium, Deum, vt est in se, nullo modo videri posse ab intellectu creato : sed quemdam illius fulgorem, & claritatem ; atque huius fulgoris visione, dicebant, positam esse nostram beatitudinem. Veritas autem veritas, non solum definita in Extrauag. Benedicti XII. sed etiam de Fide, intellectum creatum, non solum Angelicum, sed etiam humanum, videre posse Deum per essentiam, vt constat ex illo Ioan. 3. *si uultis ei erimus; quoniam uidebimus eum, sicuti est*; Apocal. 22. *Serui eius uident eum; & uidebunt faciem eius*, & Matth. 5. *Beati mundo corde; quoniam ipsi Deum uidebunt*.

Nullum igitur est dubium, non solum omnem substantiam de facto creatam intellectualem, verum etiam possibilem, esse capacem cognoscendi supernaturaliter Deum, sicuti est in se. Natura enim intellectus pro suo conceptu est potentia uniuersalis ad omne intelligibile; hinc quamlibet posse eleuari ad intuendum Deum; quia capacitas hominis, vel Angeli de facto existentis, ad videndum Deum, non in alio fundi potest: nisi, quia sunt potentie uniuersales ad omne intelligibile. Probat D. Thom. alijs duabus rationibus hanc eandem conclusionem. Prima est, quia beatitudo hominis consistit in perfectissima operatione, & perfectissimum obiectum: hæc autem est operatio intellectus. Si ergo intellectus creatus nunquam posset videre diuinam Essentiam: vel tunc nunquam obtineret suam beatitudinem; vel in aliquo alio, quàm in Deo, posita esset hominis beatitudo. Secundam rationem sumit D. Thom. ex appetitu, quem habemus, videndi causam, visis effectibus; ex quo patet, quòd cum nos plures effectus Dei videamus, nascatur in nobis appetitus videndi Deum; ergo debet esse possibilis talis visio; aliter, vel desiderium nostrum maneret inane, vel natura indidisset nobis appetitum ad impossibile. Verum D. Thom. argumentatur aduersus Christianos, admittentes Scripturas sacras; idcirco infert, esse alienum à fide: quòd vel homo consequi non possit suam beatitudinem, vel beatitudo hominis in alio posita sit, quàm in Deo; & ea de causa his rationibus utitur S. Doctor, quæ ad fidem pertinent.

Est etiam hic de fide definitum, visionem beatam non differri necessario hominibus usque ad diem Iudicii, quinimo animas multorum hominum statim post egressum à corpore Deum videre. *Nota* autem hic; quòd, licet Deus sit obiectum infinitum, non sequitur; quòd non possit videri à creatura, quæ est finita. *Nec* vrget, si dicas, quòd inter infinitum, & finitum non datur proportio; *Nam* hoc, licet sit verum de infinito, & finito eiusdem ordinis v.g. quantitativo: non autem de infinito, & finito diuersi ordinis, vt est Deus, & creatura; nam inter ea potest esse proportio secundum virtutem, & perfectibilitatem: vnde creatura finita, vt notat D. Thom. hic *quæst.* 12. *art.* 1. *ad* 4. vt potentia perfectibilis comparatur ad Deum, tamquam ad actum, saltem actiue perfectiuium. Et si inter obiectum & visionem debet dari proportio, vt aliqui clamitant: hæc non debet esse Arithmetica, sed Geometrica. Effet Arithmetica: si diceretur, quòd eodem modo obiectum, nempe Deus, excedit cætera obiecta; sicut visio Dei cæteras visiones. Geometrica, autem: si diceretur; quòd, sicuti Deus excedit cætera obiecta ita vt nullum obiectum attingat perfectionem diuinam: ita visio Dei excedit alias visiones: ita vt nulla alia, illius perfectionem attingat; vnde melioris obiecti melior est visio cum proportionem Geometrica, non autem Arithmetica.

Sancti Patres, si quid in contrarium dixisse, videntur, ex illo forsitan ad Thimot. 1. *Regi seculorum immortalis, & inuisibili, & cap. 6. Lucem inhabitat inaccessibilem, quam nullus hominum vidit: sed neque videre potest, &c.* vel intelligendi sunt de cognitione comprehensua: vel de cognitione materiali. His autem tamquam de fide certis, oritur dubium de potentia aliqua materiali, & præcipue de oculo corporeo. Vnde inquitimus,

An possit potentia aliqua materialis eleuari ad Deum videndum?

Dico, nullam potentiam materiale, etiam miraculosè posse vitaliter attingere obiecta spiritualia. Suppono autem ex philosophia, nomine rei materialis venire rem impenetrabilem; quia idem est, rem esse materiale, & corpoream: ac esse impenetrabilem, siuè proximè, siuè remotè: conceptus autem rei impenetrabilis, siuè materialis, est diuisibilitas materiæ in partes homogeneas; experimur enim, quòd elementa, & mineralia, quæ constant partibus omnino homogeneis, & impenetrabilibus, excludunt non solum vim cognoscitiuam, sed etiam vitam; plantæ verò, quæ incipiunt recedere ab illa homogeneitate, participant gradum vitæ vegetatiuæ; bruta tandem, quæ magis recedunt, participant gradum vitæ etiam sensitiuæ. Res igitur, quæ maxime distant à dictis ordinibus materiæ, & vitæque materia depurantur, sunt intellectiuæ: vnde bene explicatur è conuerso con-

ceptus

ceptus rei spiritualis, per hoc, quod sit substantia simplex, & non composita ex partibus homogeneis; quod minus ergo res spirituales sapiunt de imperfectione materiæ, eo sunt longè perfectiores in cognoscendo. Hoc posito:

Dico, Nullam potentiam materiale[m] posse vitaliter attingere objecta spiritualia, etiam miraculosè. Quia purè intelligibile non potest vitaliter percipi à potentia materiali: sed spiritus est purè intelligibilis; ergo spiritus non potest vitaliter percipi à potentia materiali. Est probandum maior, & minor huius argumenti; probo primò maiorem, & postea minorem. Insensibile non potest vitaliter percipi à potentia materiali; quia potentia cognoscitiva materialis est potentia pure sensitiva; & sic nō potest percipere, nisi sentiendo; sed purè intelligibile est purè insensibile: aliter si in linea cognoscibilis, purè intelligibile non esset purè insensibile, non esset purè intelligibile; sed etiam in ea linea esset sensibilis; ergo purè intelligibile non potest vitaliter percipi à potentia materiali. Probo nunc minorem, quod scilicet spiritus est purè intelligibilis; nam spiritus excludit partes impenetrabiles; ergo non est obiectum sensibile, quod includit omne impenetrabile; ergo est purè intelligibile.

Nota I. quod hoc argumentum probat potentiam materiale[m], ne supernaturaliter quicquam attingere posse obiectum spirituale, quia probat, inesse illi exclusivum essentialiter potentie intellectus: qualis est materialitas. Nam imperfectio materiæ in eo essentialiter sita est, quod sit ens in potentia, constans multitudine partium homogenearum, & impenetrabilium, ut diximus. **Nota II.** ad tollendam æquivocationem de nomine: quod, nomine potentie materialis, intelligo potentiam operantem per actum materiale[m], & dependentem ab organo corporeo, & ad dictum materiæ corporeæ; suè de reliquo ea potentia sit entitativè materialis, ut evenit in brutis: siue entitativè spiritualis: ut esset potentia virtus in homine in eorum sententia, qui ponunt idem virtutem potentiarum in animam; nam etiam in hac sententia est semper verum, quod si homo per actum vitalem procedentem ab organo oculi attingeret v.g. substantiam Angelicam, diceretur utique, potentiam materiale[m] attingere obiectum spirituale.

Impugnant aliqui hanc conclusionem dicentes: Potentia spiritualis potest attingere res etiam materiales; ergo potentia materialis poterit etiam attingere spiritum. *Negatur consequentia*: disparitas est clara; quia res materialis, sicut est ens, ita est intelligibilis; idè mirum non est, si possit reddi proximè intelligibilis, & intelligi à spiritu; res autem spiritualis, sicut non est materialis, ita neque est sensibilis.

Dices: verum est, quod potentia materialis sit imperfectior spirituali; sed potest dari, quod eius imperfectio tota sit in eo, quod potentia materialis possit attingere unum tantum spiritum; spiritualis autem

possit attingere omnes; quid implicans? *Resp.* implicantiā consistere in eo, quod actus ille materialis semper contrahit ex materialitate impedimentum, ne possit esse repræsentatio spiritus: insuper si potentia materialis potest habere proportionem ad attingendam vnā rem spiritualem: non est, cur non possit attingere omnes. Vnde si semel est intellectiua, cum in qualibet re inueniat intelligibilitatem, iam erit potentia vniuersalis, sicut est intellectus.

Nec refert, si dicas: Ignis inferni materialis eleuatur à Deo ad torquendos Spiritus: & aqua baptismatis ad producendam gratiam; ergo etiam poterit res materialis eleuari a Deo ad videndam rem spirituale. Nam ignis, & aqua concurrunt instrumentali: non verò, vt causa principalis; quia de ratione causæ instrumentalis est, posse eleuari extra suum obiectum specificatiuum.

Vrgebis adhuc: Deus continetur sub latitudine obiecti potentiae cognoscitiuæ, vt sic, sub qua continetur potentia visuæ. *Resp.* Deum contineri sub latitudine potentiae cognoscitiuæ, sumptæ in suppositione simplici: non autem suppositione absoluta; idest, non continetur Deus sub obiecto potentiae cognoscitiuæ, vt descendens ad hanc, & illam potentiam cognoscitiuam: sed solum, vt descendens ad determinatam potentiam; continetur autem idem Deus sub obiecto potentiae intellectiue, sumptæ suppositione absoluta: hoc est, sub obiecto huius, & alterius potentiae intellectiue.

Quando SS. Patres asserunt, Deum videri oculis corporeis. Hoc, vel intelligi de visione Dei in specie corporea, vel de Deo in humanitate assumpta. Vel videre Deum per accidens in aliquo eius effectu; Sicut oculi nostri dicuntur, videre alicuius vitam: quando vident motus sensibiles, & corporeos procedentes ab illa; vel intelligi debent non de oculo corporeo, sed spirituali: scilicet de Fide, quam D. Bernard. ser. 3. ad Ephes. vocat oculatam, *Videte*, inquit, *quā oculata sit Fides; quā lyceos oculos habeat, diligenter considerate.*

Circa sensum S. P. N. August. & S. Thom. dico: hanc conclusionem esse ad mentem vtriusque S. Doctoris; & D. P. Augustinus expressis verbis dicit, Deum non solum non fuisse visum: sed nec etiam posse videri oculis corporeis; præcipue lib. 1. de Trinit. cap. 6. ad illud lob. *Quem nemo hominum vidit, nec videre potest*, dicit: *Videri autem Trinitas, vel vt alij legunt, Diuitias humano visu, nullo modo potest: sed eo visu videtur, quo iam, qui vident, non homines, sed ultra homines sunt; similia habet lib. 2. cap. 8. & lib. 8. super Genes. ad litteram, cap. 26.*

Vtrum Intellectus creatus possit naturaliter Deum videre?

ID, quod in præsentī quæritur, est: num ex solis nostris viribus naturalibus possimus videre diuinā essentiam; an verò ad id indigeamus

mus auxilio, & concursu supernaturali. Est de Fide, intellectum creatum ex solis naturalibus videre non posse diuinam essentiam; vnde repugnat intellectui creato defacto existenti virtus naturalis Deum intuitiue videndi. Ostenditur ex illo *Psal. 83. Gratiam, & gloriam dabit Dominus*; & *Isaie 64. Oculi non vident Deum absque te, quæ preparasti expellantibus te &c.* Rationes etiam id suadent. Quia ad hoc, vt aliqua potentia cognoscitiua possit connaturaliter ferri in aliquod obiectum, non solum requiritur, quod illud contineatur intra limites obiecti adæquate terminatiui, seu specificatiui: sed etiam requiritur, quod sit intra obiectum connaturale, & proportionatum; & quia Deus continetur solum intra limites obiecti specificatiui, & terminatiui; non verò connaturalis, & proportionati; hinc est, quod requirit intellectus lumen gloriæ ad hoc, vt reddatur proportionatus ad Deum intuitiue videndum. Obiectum autem proportionatum intellectus humani, & Angelici est ens, vt sic, commune ad creatum, & increatum, naturale, & naturale; obiectum proportionatum intellectus humani est ens cognoscibile per conuersionem ad phantasmata, quod *Calet.* vocat *ens phantasia*; obiectum proportionatum intellectus Angelici est propria substantia, ad cuius modum omnia cognoscit. Et, quamuis cognitio intuitiua Dei in gradu abstractionis non transcendat modum essendi intellectus creati, transcendit illum quò ad ordinem, quia cognitio est supernaturalis; intellectus verò non eleuatus est in ordine naturali.

Indiget ergo intellectus auxilio, & concursu supernaturali Dei, vt diuinam essentiam videre possit; *Nec* per hoc, quod intellectus in visione beata agit, vt motus, & eleuatus, sequitur: quod se habet, vt causa instrumentalis. *Nam* hoc esset verum, si moueretur, & eleuaretur ad aliquod, quod non continetur intra limites sui obiecti adæquati; non verò si continetur intra latitudinem sui obiecti adæquati, sicut contingit visio beatifica.

Dices: causa instrumentalis est illa, quæ habet effectum excedentem naturam eius virtutem; hoc modo se habet res in visione beata respectu intellectus creati; ergo &c.

Respond. distinguendo maiorem: quæ habet effectum excedentem naturam eius virtutem, tam radicalem, quam proximam, concedo; proximam, non radicalem: nego. Quando *D. Thomas* dixit, quod causa principalis est illa, quæ operatur per propriam formam proportionatam effectui; nomine *propria forma* non intelligit tantum illam, quæ competit rei ex proprijs principijs naturæ: sed etiam illam, quæ licet sit supra eius naturam; perficit tamen potentiam per modum propriæ naturæ; vnde cum hoc modo lumen gloriæ perficiat intellectum, intellectus debet habere rationem causæ principalis.

Nota, quod licet intellectus secundum se sit improporcionatus ad visionem, non tamen, vt eleuatus: sicut causæ secundæ, si considerentur

secundum se, idest, separatæ à concursu Dei, sunt improporzionatæ: non tamen cum concursu Dei. Est ergo certum, nullam substantiam ex iam creatis, nullam animam, vel hominem, vel Angelum viribus solius naturæ, aut auxilijs illi debitjs Deum videre vnquâ posse; iuxta illud *Matth. 11. Nemo nouit Filium, nisi Pater; nec Patrem quis nouit, nisi Filius; & cui uoluerit Filius reuelare*. O itur autem hic dubium de substantijs possibilibus: vadè inquitimus:

Verum aliqua substantia ex possibilibus possit naturali uirute Deum intuituè cognoscere?

LOquimur de creatura substantiali uisua Dei: & de illa, quæ per uisionem diceretur *uidens*, ut quod; nam vterò conceitur acciden-
ti, v g. gratiæ, & lumini gloriæ suo modo, connaturalem esse illius uisionem Dei; & sensus quæstionis est: an sit possibilis aliqua creatura substantialis intellectiua supernaturalis, quæ exigeret lumen gloriæ, vel aliud prædicatum idemintincatum petens, ut Deus particulariter concurrat, siue per se, siue per speciem ad uisionem. Arriaga 1. par. *disput. 5. num. 34. de Deo*, ait: non esse cur rimatur scrupulus in hac sententia defendenda; eamque defendere multos recentiores doctos, & incognitos; & Valentia 1. par. *quest. 12. ait*: difficile esse ostendere in hoc repugnantiam; citatur etiam pro hac sententia Ripalda, Ioannes Maior, Fonseca, & alij: nec non Quirós, qui liberam hanc sententiam dixit ab omni censura; & alij, omnino esse probabilem, asserunt: quidquid tamen sit de ijs, sentio, quòd

Sistendo rationibus, nullo modo conuincitur falsa sententia illorum, qui asserunt, non implicare substantiam aliquam creatam intellectiuam supernaturalem, cui uirtute diuina sit connaturale lumen gloriæ: siue exigitiuum luminis gloriæ, vel alterius prædicati: & consequenter uisio Dei. Quia ista creatura substantialis supernaturalis exigitiua naturaliter luminis gloriæ, vel alterius prædicati: vel repugnat, quia importaret aliquam insuitatem in suo conceptu: vel implicantiam in suis prædicatis. Non primum; quia anima illuminata per lumen indebitum, habet eandem exigentiam ad uisionem; & tamen non est infinita. Neque potest dici secundum, quòd scilicet inuoluat repugnantiam in suis prædicatis: siquidem, vel repugnat, quia est substantia: & hoc est falsum; quia Deus est substantia, non solum naturaliter intuitiua, sed etiam uisua sui ipsius; neque, quia est supernaturalis; nam dantur accidentia supernaturalia, ut lumen gloriæ, gratia, &c. dantur habiūs supernaturales, ut habitus fidei, charitatis, &c. dantur modi supernaturales, ut uibrationes Eucharisticæ Corporis Christi. Neque demum, quia est substantia supernaturalis simul; quia vnio hypostatica est substantia supernaturalis creata, exigitiua donorum supernaturalium. & si hec compe-
tit

in substantiæ modali, quæ est inferior: potest multò magis hoc competere substantiæ absolute.

Nota hic, nos non probare possibilitatē huius creaturæ substantialis exigentiæ visionis Dei, quia datur accidens supernaturale exigentium visionis, præcisè, quia substantia est perfectior accidente, sed ex eo, quòd, si esse visum potest competere limitationi, & imperfectiori accidenti, & non assignatur peculiare motuum, & incognoscibilitas; non erit denegandum substantiæ possibili. *Aduersarij* igitur volentes percipere vim nostri argumenti, & impugnare nostram conclusionem, debent assignare implicantiam specialem: quare creaturæ intellectualem defacto existenti, per lumen indebitum cõpetat naturaliter visus Dei, & non possit in republica possibilitium dari aliqua substantia intellectualis, cui naturè cõpetat id, quod hæc existentiis datur supernaturaliter, id est, ratione luminis indebiti? & sicut datur accidens quod, est entitas creata, quæ posita, exigitur à Deo concursus ad visionem: cur hoc prædicatum non potest in ipsa substantia, & pro se ipsa haberi?

Dices I. Talis visio habita per lumen indebitum esset semper indebita creaturæ: posita autem tali creatura de possibili, visio beata esset illi debita. *Respondeo*, quòd licet, posita tali creatura cum ea exigentia, non sit illi indebita talis exigentia, & visio relatiuè; quia ipsa non ordinaretur ad aliud subiectum; esset tamen illi indebita talis exigentia, seu visio existentialiter: in quantum posset Deus non producere talem substantiam intellectualem, & per hoc obligari consequenter à Deo ad gratias agendum; licet Deus obligaretur, ut auctor naturæ ad visionem; & sicuti nunc non teneretur ad dandam visionem, nisi posito fauore luminis gloriæ: ita tunc non teneretur dare visionem, nisi gratuito daret existentiam illi substantiæ.

Auerte, quòd in ista creatura substantiali naturaliter visus Dei, intuitio ipsius Dei non excederet modum essendi ipsius naturæ cognoscētis: Quia iam in ista creatura supponeretur lumen gloriæ, ad quòd diceret naturalem exigentiam, & sic ista haberet omnem proportionem, ad Deum intuitiuè videndum. II. Ad saluandum conceptum supernaturalitatis in ista substantia sufficit dicere, quòd habeat talem exigentiam naturalem ad lumen gloriæ: & non requiritur, quòd sit principium actiuum donorum, & operationum supernaturalium; ultra quamquòd etiam intellectus illuminatus lumine indebito, est principium actiuum operationum supernaturalium, nempe visionis beatæ, sine implicantia; & sic dato, quòd talis substantia sit principium actiuum huius doni supernaturalis, nempe visionis beatæ; non sequitur, quòd esset, sicuti Deus; quia ratione creationis semper esset dependens, & subiecta Deo, & etiam ratione ipsius beatitudinis, quæ esset participata, & accidentalis: illa verò Dei, esset essentialis, & imparticipata. Unde de hac beatitudine essentiali, & imparticipata loquuntur SS. Patres, quando dicunt, quòd nulli creaturæ competere potest naturaliter.

Dices II. Talis creatura substantialis intellectuiva esset infinita; quia haberet cognoscere naturaliter, & perfectè l eum infinitum. *Resp.* negando antecedens; nam talis creatura non esset infinita ratione termini, nempe visionis beatæ; quia est forma finita: neque ratione exigentiæ, cum eam etiam habeat lumen gloriæ, ut supra dictum est: neque, quia, ut dicunt Aduersarij, haberet cognoscere naturaliter, & perfectè Deum infinitum: quia datur cognitio substantiæ absque eo, quod ipsa sit entitas substantialis, cognitio futuri, sed non futura, cognitio intencium, sed non iurealis; ita cognitio infiniti; licet non infinita.

Replicabis; Saltèm talis creatura esset essentialiter impeccabilis. *Possum* negare antecedens; nam in probabili sententia, cum impeccabilitas procedat ex amore beatifico, non autem ex visione, & cum Deus possit in tali casu denegare concursum ad amorem: in tali casu talis creatura substantialis esset visiva Dei, & peccabilis.

Dices III. Talis creatura visiva Dei, si esset peccabilis, sequeretur, quòd amaret, & odio haberet Deum: esset amica, & inimica Dei. *Negatur* sequela; quia visio, neque dicit essentialem connexionem cum gratia, neque cum amore, & amicitia Dei; aliter eo ipso, quòd daretur gratia in aliqua creatura, daretur exigitium visionis, quòd est falsum; quia potest dari creatura aliqua cum gratia, & non exigitiva visionis; sed alicuius doni supernaturalis, nempe Fidei, vel scientiæ infusæ. *Addo*, quòd potius gratia exigit visionem, quàm visio gratiam. *Insuper*, quia etiam personæ non amicæ potest esse non indebita intuitio Principis.

Insurges: Ista creatura saltem esset filia adoptiva Dei propriè; ergo non posset esse peccabilis. *Resp.* quòd ad hoc, ut creatura aliqua dicatur propriè filia adoptiva Dei, requiruntur tres conditiones; prima, quòd sit similis in natura: secunda, quòd sit amata, & dilecta à Patre: & tertia, quòd habeat ius ad hereditatem. In casu autem, quòd Deus huic creaturæ peccabili denegaret concursum ad amorem, quòd non implicare est certum, deficeret secunda conditio; deficeret etiam tertia conditio; quia creatura visiva Dei naturaliter non habet ius ad hereditatem, sinè nouo decreto; quia non omnis gratus est heres: aliter si gratia poneretur in lapide, lapis diceretur heres.

Ista propositio: *dispositio ad aliquam formam non potest esse naturalis alicui, nisi habenti naturaliter eam formam* est vera; si sensus sit de dispositione ad habendam formam in esse rei: sicut calor est dispositio ad formam ignis; non verò de dispositione ad habendam formam tantum in esse intelligibili.

Nota I. Quòd licet donum visionis debitum huic creaturæ non possit dici gratia negatiuè, pro ut dicit donum non debitum; esset tamen gratia positiuè, prout dicit excellentiam. II. Licet exigere nativa virtutis habere Deum præsentem obiectiuè, stet sub libertate Dei absoluta; in quantum Deus potest non producere antecedenter eam substantiam, non

autem

tem in voluntate connaturalis; nam posito, quòd velit connaturaliter operari, non potest, non velle cooperari: sicuti nec posito lumine, necculo expedito, aut igne approximato, potest non concurrere. III. Iusud, quòd haberet in gloria creatura ista, non esset ius strictum, & rigorosum; quia omne ius adhuc supremo iuri subijcitur. IV. Quando Ioan. dixit: *Hac est vita æterna, ut cognoscant te solum verum Deum, quod est gratiæ munus*; nomine, *gratiæ*, intelligitur qualecumq; Dei beneficium. V. Non valet hoc argumentum: intellectus non potest esse principium intellectionis infinitæ; ergo, nequit versari circa obiectum infinitum. *Primo* enim implicat ex eo, quòd omnis potentia actiua debet continere in se virtualiter effectum; & sic, cum sit finita, non potest continere perfectionem infinitam: obiectum verò non debet continere, neque producere; sed solum attingere per actum, seu tendentiam. *Insuper* si hoc argumentum probaret, excluderet visionem ab intellectu illuminato, etiam lumine indebito. VI Est notandum, quòd lumen gloriæ, sine fundamento asseritur ab aliquibus, quòd sit connaturale Deo: cum si res creata, atque accidens quoddam, quòd Deo repugnat. Unde non recte inferitur, quòd si lumen gloriæ connaturale esset rei creatæ, illa necessario deberet esse Deus.

Vtrum concurrant ad visionem beatam intellectus, & lumen?

Loquimur in præsentia de causa efficiente visionis beatæ; & dicimus, causam efficientem visionis beatæ esse intellectum, qui concurret ad ipsam visionem beatam, non solum passivè, sed etiam activè; passivè quidem; quia visio est accidens ordinatum ad perfectionem intrinsecam intellectus: quòd saltem naturaliter nequit extra illum existere, ac supponit eundem in priori signo; ergo verè passivè ab illo causatur; non enim ex alio capite communiter dicimus, formas materiales causari à materia; & sic quòd respectu alicuius subiecti habet supradictas duas conditiones, supponitur ex communi sensu ab illo passivè causatum. Concurrit etiam intellectus activè ad visionem beatam; quia intellectus videndo Deum, vivit; ergo se movet ab intrinseco; ex communi enim sensu vita in actu secundo est motus ab intrinseco; ergo activè concurret: si enim merè passivè se haberet, non se moveret ab intrinseco: sed moveretur, & exerceretur ab alio. Ulrà quàm quòd, ut benè notat D. Thom. *1. 2. c. 5.* lumen augeat virtutem intellectus; ergo supponit in intellectu aliquam virtutem activam. Nomine autem *intellectus* intelligitur, vel ipsa potentia intellectiua, distincta à substantia: vel ipsa substantia intelligentis.

Per hoc autem, quòd intellectus activè concurret, non sequitur: visionem non esse raptè naturalem; nam *supernaturale*, non est, quòd excludit omne principium naturale; sed quòd superat vires totius natu-

re; Et sic, quamvis ad visionem concurrat aliquod principium inadæquatum entitati naturalis, quod est intellectus; quia aliud comprincipium, nempe lumen, quod concurret ad visionem, est toti naturæ indubitum: merito visio est supernaturalis.

Præter intellectum igitur, necessario requiritur ad visionem beatam, aliud comprincipium particulare; quia visio beata, sive potè supernaturalis, est supra vires intellectus; ergo non potest intellectus esse principium adæquatum visionis beatæ; ergo præter illud debet dari aliud principium parziale visionis; hoc autem principium est aliquod accidens intrinsecè supernaturale, inherens intellectui beato: & hoc est lumen gloriæ. Est igitur veritas apud Theologos indubitata, præcipuè Angelici præceptoris, Caietani, Capreoli, Ferrariensis, & Maioris, admittendum esse lumen gloriæ, tamquam habitum, aut qualitatem, omnino necessariam, ut intellectus eleuetur ad videndum Deum; quinimò affirmat Caiet. in Concil. Vien. definitam fuisse sententiam D. Thomæ; quare temerarium, & periculosum iudico, post definitionem illam Ecclesiæ discedere à sententia D. Thomæ; cum sit valdè probabile, eo in loco Patres Concilij eam definire voluisse dicentes, constituendum esse lumen gloriæ: quo anima eleuetur ad visionem beatificam. *Etsi* Theologi ad hoc, ut actus supernaturales procedant connaturaliter ab homine, admittunt in illo habitus supernaturales, tamquam comprincipia supernaturalia permanentia; ergo a fortiori simile comprincipium admitti debet in Beatis in ordine ad visionem.

Concurret lumen gloriæ actuè, seu efficiens ad visionem: nam tota ratio constituendi lumen gloriæ est, ut per illud intellectus, qui est impotens, & imbecillis ad eliciendam visionem reddatur potens ad eam effectum, & consequenter, ut efficienter induat cum intellectu ad eliciendam visionem; *Insuper* constat ex ipsa definitione Ecclesiæ: nam animam elevari per lumen gloriæ ad videndum, non solum elevari ad suscipiendam visionem; sed ad eam efficienter eliciendam; non enim suscipit lumen visionem; quia non est subiectum visionis, cum non debeat reddi videns, & consequenter vniui visioni: neque est subiectum sustentationis; quia sustentatio ordinatur ad visionem, ut suppono ex phisicis.

Non nego tamen cū Ferrariensi, & Capreolo, lumen gloriæ esse etiā dispositionem passivam intellectus ad visionem; quia in hæc et intellectui, & determinat illum ad recipiendam, cum exigentia, visionem beatam: sicuti frigus, & humiditas in gradu debito, idè disponunt materiam ad formam aquæ; quia intrinsecè inherentes materię, determinant illam ad recipiendam dictam formam. *Addo*, quòd etiā ipsi adversarii debent fateri, hoc patere inductione, etiam de ipsis actibus supernaturalibus. Nam si sunt actus voluntatis, procedunt à voluntate intrinsecè inclinata per cognitionem; si sunt actus intellectus, procedunt à

specie,

specie, vel alio principio determinante : & non procedunt , nisi innaturaliter, nulla prævia dispositione .

Nota I. Quod per hoc, quod lumen gloriæ se habet, vt dispositio , non sequitur, quod ad recipiendum ipsum lumen gloriæ requiratur alia dispositio ; nam ad primam qualitatem supernaturalem , non debet homo disponi per aliam qualitatem supernaturalem intrinsecam : aliter ipsa non esset prima . Visio beata in ordine supernaturali creato , & accidentali est veluti vltima perfectio . II. Ex intellectu , & lumine gloriæ fit vnum quoddam totum agens, ex pluribus partibus conflatum, quarum neutra sine altera est satis .

Qui sentiunt intellectum non concurrere actiuè , & efficienter ad visionem, obiciunt : Deus virtute sua producit lumen gloriæ ; ergo etiam, & visionem, quæ est eò longè præstantior : ergo intellectus non concurrat efficienter . Respondetur negando consequentiam ; disparitas est : quia in tantum Deus producit lumen immediate, quia est principium, quo eleuatur potentia ad actus supernaturales , ad quod non potest potentia concurrere ; nam vel concurreret se sola : & sic lumen non esset forma supernaturalis ; vel produceretur, concurrentibus alijs formis : & sic dandus esset processus in infinitum, vel deueniendum esset ad principium supernaturale à solo Deo productum . Visio autem beatifica, quamuis sit longè præstantior lumine ; quia suapte natura est operatio vitalis, non potest haberi, nisi ad ipsam concurrat etiam intellectus .

Replicabis : Anima, quæ est suprema formarum naturalium, producit à solo Deo ; ergo etiam visio beatifica, quæ est suprema formarum supernaturalium . Respondetur, negando consequentiam : disparitas est clara ; quia anima rationalis producit ex nihilo per creationem , quod a solo Deo fieri potest : Visio verò producitur , præsupposito subiecto, à quo pendet vel ex natura suæ . Insuper cum visio sit actus vitalis, implicat contradictionem, posse haberi sine operatione intellectus .

Aduerte I. quod testimonium Scripturæ dicentis : *Gratiam, & gloriam dabit Dominus*, non impugnat, intellectum efficienter ad visionem concurrere . Nam adhuc, vt visio dicatur à Deo, sufficit, quod sit à Deo, tamquam à prima, & principali causa, conferente principia ad visionem beatam, & ad eam potentiam eleuante .

II. Visio beata est actio supernaturalis, ad quam concurrunt duo principia, vt supra diximus, nempe intellectus, & lumen : intellectus ad vitalitatem visionis ; lumen verò ad supernaturalitatem ipsius, quæ principia attemperant ad iunctum concursum ; vt patet in eo, qui habet virtutem, vt duo, ad trahendam nauim resistentem, vt quinque ; nam eadem virtus, vt duo, adiuta virtute, vt quatuor, potest trahere nauim, quæ antequam adiuuaretur, eam trahere non poterat .

III. Si naturale accipiat pro eo, quod excedit facultatem causæ operantis : visio est naturalis lumini, & supernaturalis intellectui præci-

sè consideratō; est autem naturalis toti coniuncto, nempe intellectui illuminato; nam licet visio beatifica excedat facultatem intellectus præcisè considerati, non autem excedit facultatem totius coniuncti, nempe intellectus illuminati.

Est satis probabile contra multos Thomistas, posse influxum luminis gloriæ à Deo suppleri per meram elevationem extrinsecam: vnde visio beata de potentia absoluta potest causari ab intellectu non adiuto lumine gloriæ. Tunc enim Deus non potest supplere defectum causæ secundæ per suam omnipotentiam, quando effectus est actuale exercitium alicuius causæ creatæ, vel aliundè supponit in causâ imperfectionem; sed visio beata ex conceptu suo non est actuale exercitium luminis, cum non sit visio, quæ videt lumen: sicut est, quæ videt, & exercet se intellectus; neque supponit essentialiter ratione suæ supernaturalitatis in principio adiuuante intellectum, imperfectionem; sed exigit, ut intellectus compleatur per aliquod intrinsecum, quod videlicet connaturaliter ab illo procedat; ergo in ordine ad visionem beatam, potest Deus supplere defectum luminis, & extrinsecè eleuare intellectum ad illam.

Nota, per hoc, quod Deus sine lumine gloriæ possit per suum concursum efficere, ut intellectus videat; non sequitur per hoc, quod lumen gloriæ ponitur sine causâ; quia non consuevit Deus facere per se ipsum solum, quod per causas secundas potest efficere.

*Utrum Diuina Essentia suppleat vicem speciei impressæ
in visione beata?*

Loquimur primò de factō, relinquendo vterius examinandam questionem de possibili; & inquirimus, vtrum de factō detur species impressa creata in visione Dei, an verò diuina essentia suppleat vicem speciei impressæ in eadem visione beata? Et præmitto pro explicatione præsentis difficultatis, Beatos non videre diuinam essentiam per visionem increatam, quæ Deus se ipsum videt, ut melius videbitur in tractatu de Beatitudine: ut voluerunt Ioannes à Ripa, & alij; sed per visionem creatam in ipsis de nouo productam per intellectum, & lumen gloriæ, ut supra visum est.

Est sententia communis Thomistarum, ac ferè omnium Scholasticorum, quidquid in oppositum sentiat Riccardus cum alijs relictis ab eo, & à Durando, non videre Beatos de factō Deum in Patria per aliquam speciem creatam: sed diuinam essentiam supplere vicem illius. Quia obiectum, quod est de se immediatè proximum, & vnitum potentia, non indiget specie impressa distincta; nam species impressa est instituta à natura ad supplendum defectum obiecti, quod simul cum potentia debet quidem ingerere notitiam sui, quam per se immediatè non potest; sed Deus est immediatè proximus, & vnitus cum intellectu illuminato lumine

mine gloriæ, & est ex se potens immediatè concurrere ad visionem; ergo connaturaliter loquendo, etiam quòd species impressa Dei creata, non implicet, nulla defaciò in beatis admittenda est. Hinc est, quòd potentia, naturales, quæ non percipiunt, nisi objecta sibi immediatè proxima, vt patet in gustu, odoratu, & tactu, nulla datur species; sed ipsa objecta per se immediatè concurrunt, cum nulla sit necessitas talem speciem distinctam admittendi; requiritur autem hæc species in oculo, qui nisi ab albedine moueatur, & excitetur per diffusionem speciei impressæ sui per aerem, non erit completè potens, & determinatus elicere visionem albedinis.

Dices Quamuis connaturalis concurrat per se ipsum, & immediatè obiectum necessarium, non tamen obiectum liberum, quale est Deus: unde Deus, cum sit obiectum liberum, nò connaturalis concurreret cum potentia cognoscitiua per se ipsum, & immediatè: sicuti propter modum connaturaliter operandi supernaturaliter, quamuis possit Deus per se ipsum nobiscum immediatè concurrere; tamen per habitus supernaturales concurrat, vt visum est in lumine gloriæ; ergo à pari in visione beata debet per speciem impressam creatam concurrere. *Respondeo*, quidquid sit de antecedenti, negando paritatem, disparitas est: quia habitus supernaturales solum se tenent ex parte potentia, suppletes defectum illius in linea potentia se continentis; at verò species impressa se tenet etiam ex parte obiecti, supplens vices illius, vel non potentis immediatè concurrere, vel saltem nolentis.

Neque suffragatur dicere, quòd Deus agit per causam secundam connaturaliter id, quod per se immediatè potest; *Nam* hoc est verum, quando causæ secundæ proprio nomine operantur, vt est ignis respectu caloris, v. g. non verò quando non operantur proprio nomine; & cum concursus Dei in visionem, vt obiecti primò, & per se pertineat ad ipsum Deum, qui est obiectum: ad speciem autem pertineat, vt ad agentem vices Dei: non debemus, præsentem Deo, potente per se primò id præstare, substitutum, & vicarium assignare.

Nota I. Quando dicimus, Deum præstare per se ipsum id, quod præstaret species impressa creata: est intelligendum, quòd ad illa, quæ competunt essentialiter speciei, quæ sunt facere obiectum præsens, & concurrere cum intellectu ad intellectionem non præstaret autem ea, quæ competunt accidentaliter speciei, vt est inhære, & actuare, tanquam forma; quia hæc munera conueniunt speciei per accidens, quatenus accidens est: & sic necesse est, vt existat in intellectu, tanquam forma ipsius, cum non possit naturaliter existere sine subiecto. II. Quamuis sit verum, quòd non possit haberi visio absque eo quod Deus vnatur intellectui in ratione intelligibilis; non sequitur, quòd hæc visio debeat haberi per se, etiam creatam, *Nam* vnio Dei in ratione intelligibilis cum intellectu, posita eleuatione ipsius per lumen, non est realis, & intrinseca.

sed intentionalis in ratione principij productiui intellectiōis : quæ vnlo importat intimum illapsum Dei in potentiam. III. Quando Deus concurret ad visionem beatam per speciem creatam, concurret per suam omnipotentiam; hæc autem non debet per se primò influere tamquam obiectum motuum primarium; sufficit enim, si per se primò influat quatenus virtualiter continet similitudinem expressam diuinæ essentia; ; sicuti per se sufficeret, si hoc modo influeret species creata.

Probant aliqui speciem impressam creatam, defactò, hoc argumento, dicentes : Non potest Deus intelligi in actu secundo visus sine specie expressa creata; ergo neque in actu secundo visibilis sine specie impressa creata. *Sed negatur* in hoc argumento consequentia; ideo enim Beati intuentes diuinam essentiam formant Verbum, atque imaginem diuinæ essentia, quæ per nos est imago, & similitudo formalis, & pertinens ad prædicamentum qualitatis : vt suo loco videbitur; quia cognoscere nihil aliud est, quam exprimere vitaliter imaginem rei cognoscendæ; vnde cognosci importat essentialiter speciem expressam creatam : at verò Deum reddi visibilem in actu primo est, Deum esse intelligibilem; intelligibilis autem pertinet ad perfectionem obiecti, & non intellectus, & cum Deus in ratione intelligibilis sit summè perfectus, non est cur debeat reddi talis per aliquod creatum; vnde fit, quòd species impressa non producitur vitaliter ab ipsa potentia: sed semper immittitur ab aliquo agente externo ab ea recipitur: & cum hoc agens externum sit Deus in visione beata, qui per se ipsum est immediate potens concurrere ad visionem, vt supra diximus, sequitur, quòd sit superflua species impressa creata.

Utrum in visione Dei sit possibilis species impressa creata?

PVnctum difficultatis est, utrum sit possibilis species aliqua creata in visione Dei, quæ faceret totum id, quod defactò fecit essentia diuina, quando per se ipsam immediatè concurret ad visionem. Prima sententia communis inter Thomistas vult intellectum beatum moueri essentialiter ab essentia diuina, tamquam ab obiecto immediato; vnde negant possibilitatē speciei impressæ creatæ. Alij tamen ex opposito hanc speciem creatam defactò admittunt; sed hæc sententia ex supradictis satis confutata remansit. Ægidius autem cum alijs ex nobilioribus Theologis, & ex schola Thomistica P. Victoria, & Palud. in 4. dist. 49. defendunt possibilem esse talem speciem impressam creatam in visione Dei: vnde

Puto probabiliter, non implicare speciem impressam creatam de possibili representatiuam Dei; Non enim potest assignari ratio conuincens impossibilitatem huius speciei. In primis non impugnatur illius possibilitatem illa vulgata ratio aduersariorum: Quòd per speciem interioris ordi-

ordinis, sicut esset ista species, non possit representari Deus, qui est ordinis superioris. Nam I. Valet argumentum de specie inferioris ordinis in esse representatio, non verò in esse entis; & licet species ista esset inferioris ordinis in esse entis, non esset inferioris ordinis in esse representatio; ut bene notat Angelicus præceptor quol: 3. art 4. dicēdo, quod *Species intelligibilis est similitudo ipsius essentia rei, & est quodam modo ipsa quidditas, & essentia rei secundum esse intelligibile, non secundum esse naturale, & pro ut est in nobis*; ergo per D. Thomam species impressa habet duo esse, seu duos ordines, & abstractiones, nempe esse physicum, seu secundum entitatem, & esse intentionale, seu in representando, & quo ad hoc secundum vult convenientiam speciei cum obiecto; & sic non repugnat, rem inferioris ordinis in ratione entis representare rem superioris ordinis.

Confutatur II. idem argumentum; nam si haberet vim, & esset verum uniuersaliter, quod nulla res inferioris ordinis potest absolute representare rem superioris ordinis: impugnaret in primis concursum uniuersalem specierum, & sic numquam posset cognosci substantia: quia species representans ipsam, ut potè accedens, est inferioris ordinis; neque posset dari visio beata; quia hæc ut potè similitudo formalis Dei, esset inferioris ordinis, quam ipse Deus; impugnaret etiam lumen gloriæ; quia hoc habet perfectiorem modum operandi, quam essendi. Nec vnus Angelus cognosceret alium Angelum superiorem per speciem accidentalem, quæ est inferioris ordinis, quam ipse Angelus.

Alij ad hoc idem argumentum desumptum ex D. Dionysio, nempe, *Nulla species inferioris ordinis potest representare rem superioris ordinis. Respondent* alio modo, dicentes: per speciem inferioris ordinis, idest per naturam specificam ordinis inferioris, ut est equus respectu leonis, non potest representari res superioris ordinis; concedunt: quia ens perfectius per id, quod minus perfectum est, dignosci non potest, cum ipsum habet in sua entitate contineat: per speciem intelligibilem ordinis inferioris subdistingunt: si sit ordinis inferioris in essendo negant: in representando, concedunt.

Dices I. Ista species, tum in essendo, tum in representando, est limitata, & finita; ergo non potest representare Deū infinitum. Retorquetur argumentum. Lumen gloriæ est finitum ex omni capite: ergo non potest eleuare intellectum ad videndū Deum infinitum. Resp. in forma antecedens esse verum in hoc; quia ista species, quamuis infinitum representet; non potest tamen infinito modo representare; de reliquo, licet species sit finita, & Deus infinitus: potest tamen species infinitum representare sub ratione infiniti, sed non modo infinito, & hoc modo datur proportio. Vel respondebis, dicendo iuxta supra dicta, hanc speciem habere modum sublimiorem in representando, quam in essendo.

Replicabis; Nulla species naturalis potest habere modum abstractionis
rem

rem in repræsentando, quàm in essendo; ergo neque species supernaturalis.

Respondeo dato antecedente aduersario; de quo nolo controuertere, negatur consequentia. Disparitas est: quia species naturales sunt debitæ potentijs naturalibus, quas vltimò complent ergò debent se conformare cum modo essendi illarum: & cum potentia naturalis, quæ defacto est in hac rerum serie, non habeat modum cognoscendi perfectiorem modo essendi, hinc neque species ipsius: species verò supernaturales solum sunt debitæ potentijs supernaturalibus, intellectui nempe eleuato luminæ gloriæ: & proinde debent se conformare cum modo cognoscendi ipsarum; & cum talis modus sit abstractior modo essendi, vt est certum de fide; ergo etiam, & species habebit modum abstractiorem in repræsentando, quàm in essendo.

Dices II. Est possibilis species impressa creata ad cognoscendū Deum; ergo etiam erit possibilis ad ipsum comprehendendum. *Retorquetur* argumentum: Deus mouet defacto per se ipsum intellectum Beati ad cognitionem intuitiuam; ergo etiam ad cognitionem comprehensiuam.

Respondeo in forma, negando consequentiam; quia ad hoc, vt species sit comprehensiuæ Dei, debet esse debita alicui potentiæ comprehensiuæ, cum sit perfectio potentiæ cognoscitiuæ; & cum nulla detur potentia comprehensiuæ Dei, neque erit possibilis species comprehensiuæ Dei.

Dices III. Obiectum, quod per se ipsum est intelligibile, non potest reddi tale per aliam formam; sed Deus est per se ipsum intelligibilis; ergo non potest reddi talis per speciem. *Retorquetur* etiam argumentum: Deus est per se ipsum eleuatius potentiarum ad actus supernaturales; ergo est superfluum ponere influxum luminis gloriæ ad eleuandum intellectum. Insuper Omnipotentia Dei est de se proximè productiua, v. g. caloris, vel cuiusque effectus creati; ergo est superflua quælibet causa creata ad producendum effectum.

Respondeo in forma distinguendo maiorem: obiectum per se ipsum intelligibile, non potest reddi tale per aliud; si obiectum non est liberum, concedo: si est liberum, subdistinguo, non potest reddi tale intrinsecè, concedo, extrinsecè, nego; & cum Deus sit obiectum liberum, sequitur, quod possit reddi intelligibilis extrinsecè per speciem, quamuis sit per se ipsum intelligibilis intrinsecè: vnde potest dicere, *Nolo per me ipsum immediate concurrere ad visionem*, & in isto casu reddi intelligibilis extrinsecè per speciem.

Replicabis; Non potest Deus reddi sapiens, omnipotens, &c. per aliquod creatum, ergo neque intelligibilis per aliquod creatum. *Resp.* negando consequentiam: disparitas est; quia intelligibilitas Dei est ipsa intellectiuitas intellectus creati. Nō potest autem Deus reddi intelligens, sapiens, omnipotens, &c. per aliquod creatum, quia Deus est intrinsecè completissimus in ratione intellectiui, sapientis, &c. Vnde propter
suam

in summam perfectionem non potest compleri per aliquod creatum. *Ad nota*, quòd diuina essentia est intelligibilitas Dei intrinseca; species verò creata intelligibilitas Dei extrinseca.

Dices VI. Est possibilis species impressa Dei creata accidentalis; ergo etiam substantialis. *Retorquebis* argumentum: dari potest, sicut datur lumen gloriæ accidentale; ergo debet etiam dari lumen gloriæ substantiale. Insuper actio, qua producit Deus creaturas per instrumenta creata, est accidentalis; ergo poterit etiam dari actio substantialis. *In forma*, negatur consequentia; quia species Dei creata non debet transcendere esse proprium aliarum specierum, quæ sunt accidentales. Replicabis: ista species iam est infinita, ergo transcendit esse proprium aliarum specierum. *Resp.* distinguendo antecedens; est infinita intrinsecè, nego: extrinsecè, & in representando, idest ratione obiecti infiniti, quod repræsentat, concedo; ex hoc solum infertur infinitas obiectiua, si est infinitas peccati.

Notabis I. Quòd hæc species non est instrumentum connaturale Dei, sed solum instrumentum obedientiale; in quantum Deus ita vult efficere visionem, ut nolit ei concursum obiectiuum immediatè per se ipsum præbere; sed mediante ipsa specie creata. Undè ratione huius instrumentalitatis dicitur species impressa instrumentum obedientiale Dei. II. Talis species, neque est contra naturam subiecti, neque obiecti, non subiecti, quia species impressa creata Dei complet intrinsecè potentiam intellectiuam in ratione potentis elicere visionem; & sic est intrinsecè effectiua illius, licet minus, quàm essentia diuina. Neque contra naturam obiecti; quia, quod est contra naturam alterius, est illi violentum; violentum verò definitur, quod est à principio extrinseco nullam vim ferente passio; sed essentia diuina non est passum, in quo species creata recipiatur; sed se habet, ut agens. ergo &c. III. Potest Deus perfici extrinsecè per speciem intelligibilem, quatenus per speciem redditur motus intellectus ad visionem: Neque hoc implicat; Nam licet Deus sit omnimodè perfectus in ratione causæ efficientis; perficitur tamen extrinsecè per instrumenta creata, quibus mediantibus aliquando agit. Neque per hoc, quòd Deus perficiatur, & veluti compleatur extrinsecè, sequitur, quòd indigeat tali complemento; Nam anima Christi Domini est perfecta per sanctitatem accidentalem, qua tamen non indigebat, utpote in priori iam sancta substantialiter; indigentia enim supponit carentiam, non cuiuscumque perfectionis; sed perfectionis debitæ.

IV. Quando dicimus, quòd species impressa repræsentat Deum adæquatè, intelligitur pro ut est in se, non verò comprehensiuè. V. Species impressa non supplet essentialiter defectum obiecti improporcionati, & obfensis; sed potest dari de obiecto præsentis, & proportionato; ex se tamen nolente defectò concurrere. VI. Licet species impressa creata non sit simpliciter necessaria; est tamen necessaria ex suppositione, nempe
sup

supposito, quòd Deus nolit per se ipsum immediatè concurrere ad visionem. Neque species ista supponit defectum in obiecto, sed supponit perfectionem libertatis quia est species obiecti liberi. Sicut Vicarius nullum supponit defectum in principali: sed facit ea, quæ principalis per se ipsum facere non vult; & licet instrumentum necessarium supponat defectum virtutis in principali agente: non tamen instrumentum liberum, seu causæ principalis, quæ ex sua libertate potest vti instrumento. *Ultimò* est notandum, quòd visio Dei proueniens à specie creata esset immediata, loquendo de medio, *ut quod*, quod est obiectum primum; quia non terminaretur ad aliud obiectum, & eo mediè ad Deum: esset etiam mediata, loquendo de medio, *ut quo*, quia inter ipsam visionem, & obiectum intercederet ipsa species, quæ verè esset medium motuum, *Quo*: Vnde non sequitur, admissa tali specie, quòd Deus videretur, & non videretur per essentiam; videri enim per essentiam excludit solum medium, *quod*, non autem medium, *quo*: vnde stat cum hoc, quòd Deus videatur per speciem, & simul per suam essentiam.

Placet ultimo loco soluere argumentum dicentium: Implicat effectum connaturaliter exigentem causam superiorem, produci ab inferiore supplente vicem superioris: sed visio Dei exigit connaturaliter immediatè produci ab essentia diuinæ: ergo &c. *Resp.* maiorem esse veram, quando exigentia illa oritur primò, & per se ab essentia effectus: non autè si aliundè prouenit: & quia existentia, quam habet visio procedendi & produci immediatè ab essentia diuina, non oritur primò, & per se ab essentia visionis, sed radicatur primariò in ipsa essentia diuina, vnde sequitur posse produci visionem à specie; & sic concursus in visionem non est præstandus à Deo, *ut* à causa particulari immediatè, sed est immediatè præstandus à specie determinatè, vel indeterminatè, seu, aut à specie, aut ab essentia diuinæ: licet concursus in actus nostros non est præstandus ab obiecto immediatè, sed à specie.

Replicant: Deus non potest producere creaturam, quæ valeat producere suum effectum, quem debet Deus immediatè producere, ergo neq; producere speciem immediatam creaturam, abdicando à se dominium obiectuum, & immediatè motuum. *Resp.* negando consequentiam, id. s. arietas est clara; quia creatura in primo casu supplens primam causam, influet ubique actuali dependentia à Deo; in secundo verò casu nihil detrahatur virtuti Dei; quia concursus præstandus ab essentia diuina suppletur ab omnipotentia; & sic conceditur omnipotentia id, quòd ipsa petit, nimirum vis supplendi concursum cuiuscumque causæ: & hic concursus subditur voluntati diuinæ; vnde non currit arietas.

Aduerte, quòd species ista impressa creata se tenet ex parte obiecti, & ex parte potentia; se tenet ex parte potentia; quia complet ultimò potentiam ad concurrendum obediencialiter ad actum visionis: se tenet etiam ex parte obiecti, quatenus est ultimum complementum potentia; præstandum

ab obiecto, nempe per immiffionem eiusdem speciei.

S. D. Thomas visus est, negare speciem impressam creatam in visione: loquutus est defacto; sicut sentit Paludanus ex Dominicana fami-
 liâ, vel negavit S. Doctor speciem obiectiuam creatam intermediari-
 am, qua tanquam in speculo cognoscatur Deus: quod & nos fatemur, ne-
 gantes speciem expressam creatam, quæ sit similitudo obiectiuæ; vt ir-
 ra videbitur. Illud autem, quod dixit idem Angelicus in *quæst. 12. art. 2.*
ut per speciem corporis non potest cognosci essentia rei incorporea, multo
minus per speciem creatam potest essentia Dei videri. Non est con-
 tra nos; quia certum est, quod per speciem corporis; idest per speciem
 missam à corpore non potest cognosci res incorporea, sed ipsum cor-
 pus; quia species debet repræsentare obiectum, cuius est species; ergo
 est species corporis, non potest repræsentare, nisi ipsum corpus: ita à
 ri per speciem creatam, idest, per speciem-rei creatæ, non potest re-
 præsentari essentia Dei: cum autem species in casu nostro non sit spe-
 cies rei creatæ, quantumvis creata, sed sit species Dei: poterit repræ-
 sentare ipsum Deum. Fundamentum huius doctrinæ est; quia nulla
 species propria vnus obiecti potest alterum repræsentare, vt est in se, si
 est aliena illius: & sic per speciem impressam corporis non potest repre-
 sentari Angelus, vt est in se; quia talis species est propria corporis, &
 aliena respectu Angeli: & species propria accidentis non potest repræ-
 sentare substantiam, vt est in se, nec continetur sub obiecto, quod re-
 præsentat illa species.

*Virum in visione beata detur verbum, seu species expressa
 creata?*

A Dhòc, vt distinctè, & clariùs procedamus, & ne inutiliter tem-
 pus conteramus, Aduertendum puto: quod verbum mentis, seu
 species expressa ex S. Thoma, est aliquod emanans per modum mani-
 festationis: dupliciter autem, vt notavi in tract. de Anim. potest aliquod
 procedere ab alio per modum manifestationis: aut formalitèr, aut obie-
 ctue. formalitèr, in quantum ipsa res, quæ producitur, est formalitèr
 manifestatio, & cognitio: obiectiue, in quantum est imago, & figu-
 ra, in qua res cognoscatur. Si igitur nomine *verbi* volunt, quod veniat
 sub primo modo sumptum, prout scilicet est cognitio: pacem habe-
 as cum aduersarijs: cum certum sit non minùs in intellectu creatura
 naturali, quam in diuina, seu supernaturali, dari verbum; cum non
 minùs intellectio creatura naturalis in creaturis sit cognitio, quàm intel-
 lectio supernaturalis, seu visio beata; & sicut datur cognitio in intelle-
 ctione naturali: ita in visione beata, seu cognitione supernaturali: &
 consequenter species expressa creata.

Cardo igitur difficultatis præsentis est: an detur defacto in visione
 F beata

beata verbum; seu species expressa, sumpta secundo modo: prout scilicet est manifestatio obiectiua, & obiectum à cognitione distinctum; in quo veluti in imagine cognoscatur obiectum. Aliqui enim ex Thomistis acerrimè negant huiusmodi speciem: dicentes, diuinam essentiam, in visione beata non minùs supplere vicem speciei impressæ, ac expressæ; alij verò illam admittunt; non explicantes tamèn, quid sentiant nomine verbi: an scilicet veniat ipsa intellectio, an verò imago per ipsam producta?

Vnica conclusio: Implicat species expressa Dei creata; seu verbum obiectiuum, nempè imago, & similitudo, in qua prius cognita obiectum cognoscatur: vnde ineptè sùstinent aliqui diuinam essentiam in visione clara Dei supplere vicem speciei expressæ: cum in ipsa non detur verbum obiectiuum, seu imago quædam, in qua res cognoscatur. Ratio est, quia intellectus nullam habet necessitatem huius medij: & si haberet, esset, vt dicunt aliqui, vel distantia obiecti, vel vt putant Conimbr. ratio actionis; sed neutra ratio vrget; non prima, quia obiectum in ordine ad cognitionem: Vel se habet, vt terminus, vel vt mouens; vt terminatiuum autem non requirit præsentiam; quia terminus, vt terminus, etiam si valdè distet à re, quam terminat; potest rectè suum munus præstare: vt de termino relationis patet; si autem accipiatur, vt mouens; licèt requirat præsentiam: habet tamèn eam, ratione speciei impressæ; quia species impressa repræsentat obiectum in ratione principij; expressa verò in ratione termini, seu obiecti; cum igitur tota necessitas refundatur in obiectum, vt terminatiuum: sequitur, nullam admittendam esse speciem distinctam. Quinimo addo, quòd verbum per ipsos aduersarios terminatur ad obiectum distans per se ipsum, sine alio verbo; ergo etiam posita quacunque distantia, poterit cognitio per se ipsam terminare ad obiectum; quia sicuti distantia non impedit terminationem immediatam verbi ad obiectum: ita nec impedire debet terminationem immediatam cognitionis ad obiectum.

Neque vrget ratio Conimbr. Siquidem intellectio non est actio prædicamentalis, quæ essentialiter ordinatur ad terminum producendum; sed grammaticalis: inquantùm est actualis ratio, cuius beneficio intellectus veritatur circa suum obiectum: & sic non eget termino, quem producat: vel, vt alij dicunt, intellectio est actio immanens, non de prædicamento actionis, sed de prædicamento qualitatis, quæ non debet producere terminum: cum hoc faciat solum actio transiens, & de prædicamento actionis: nam actus immanentes, vt docent philosophi, licèt virtualiter, & eminenter habeant rationem actionis: quatenus sunt actus secundi potentie operatiue; formaliter tamèn non sunt actiones, sed qualitates; nec consistunt in via, & tendentia ad terminum; sicut actiones transientes: sed sunt actus perfecti, & completi; ac proinde non debent necessariò producere aliquem terminum: nec indigere alia actione, qua

ducantur; sed emanant ab operante, sine alia causalitate distincta a scienti ipsa actio transiens; quia est formaliter actus secundus agentis, non emanat ab illo per aliam actionem, seu causalitatem, sed per se ipsam immediate dimanat. Unde bene concludimus, in nulla intellectio creata sine naturali, sine supernaturali admittendam esse speciem, prestatam, seu verbum obiectivum: sed solum formale, quod est ipsa, quæ producitur, nempe intellectio: & sic sine rationabili fundamentum defendunt aduersarij: divinam essentiam supplere vicem speciei exesse in visione beata.

Dices I. In divinis intellectio notionalis producit terminum distinctum; nempe Verbum; ergo etiam intellectio creata debet producere terminum.

Respondetur, negando paritatem: disparitas est; quia per intellectioem notionalem Pater loquitur alteri, nempe Filio, & ordinatur ad manifestandum alteri, nempe Filio omnia, quæ Pater scit; nemo autem potest alteri loqui: nisi prius cognoscat ea, quæ debet loqui: & sic debet manifestare alteri verbum ipsum mentale: & sic Verbum divinum, producitur à Patre ad manifestandum alteri, nempe Filio omnia, quæ Pater scit, non instrumentaliter, sed formaliter: hoc est, dando illi suam meritam, & scientiam: ad differentiam verbi vocalis nostri, quod manifestat, & exprimit obiectum instrumentaliter.

Replicabis: Per loquutionem externam producitur verbum externum vocale; ergo à pari per loquutionem internam mentalem debet produci verbum. *Respondetur*, negando consequentiam: disparitas est; quia verbum externum vocale est ordinatum ad manifestandum alteri nostrum verbum mentale; quod cum non possimus in intellectu audientis imprimere, neque eius species producere: necesse est, ut utamur aliquo signo, cuius cognitio ducat audientem in cognitionem nostri conceptus. Per verbum autem mentale loquimur nobis ipsis; ad quod præstandum non est ipsa cognitio, hoc ipso, quod de se est manifestatio sui obiecti; nostrum intellectum à quo procedit, informat: & ob eandem rationem non debet verbum mentale duci in cognitionem obiecti, ut prius dicitur: sicut verbum vocale, hinc est, quod per verbum mentale debet produci verbum.

Dices II. Pater æternus per intellectioem notionalem producit Verbum, ut dictum est; ergo etiam, & reliquæ duæ personæ debent producere Verbum.

Respondetur, negando consequentiam: disparitas est; quia reliquæ duæ Personæ non habent vim producendi ad intra per intellectum, quam habet Pater: & idcirco cognoscendo essentialiter, nihil producunt à se ipsis disjunctum. Hinc est, non bene Caeteranum dixisse: tunc solum produci verbum, quando obiectum cognoscendum non est præsens. & conjunctum cum potentia cognoscente; nam Pater æternus, intuendo se

ipsum, producit naturaliter Verbum; & tamen nihil potest esse coniunctius, quàm sit Pater cum suo intellectu.

Replicabis: Amor diuinus producit terminum, nempe impulsu; ergo &c. *Respondetur*, quòd licet amor diuinus producat terminum, nempe impulsu; ipsum tamèn non immediatè respicit; quia id, quod immediatè respicit, & ad quod immediatè terminatur, est obiectum diuinum; non verò terminum à se distinctum. *Insuper* impulsus, qui est terminus voluntatis, non est vltima actualitas obiecti amari; sed ponitur, vt voluntatem completè, & perfectè in obiectum inclinet: & ideo quantumcumque perfectum sit obiectum amatum, adhuc impulsus voluntatis admittitur. Verbum autèm ponitur, vt vltima actualitas obiecti intellectui: vnde quando, se ipso, obiectum est in vltima actualitate, verbum non producit. Denique quia impulsus non petit esse eiusdem naturæ cum obiecto dilecto; quia voluntas non est assimilatiua: & ideo non repugnat impulsus productus, erga summum bonum. Verbum autèm id postulat: & ideo in visione beatifica nullum verbum creatum dari potest.

Nota, quòd cognitio notionalis in Patre est dictio; quia est productio Verbi, & distinguitur ab essentiali, per cōnotationem ad personalitatem; & Verbum ipsum est terminus productus per dictionem; cognitio verò essentialis non est dictio; quia cognitio essentialis non est productio: neque habet terminum productum; in intellectione verò creata, dictio, & verbum, non distinguuntur; quia non distinguitur qualitas ab actione productiua.

Ad loca SS. Patrum, vbi videntur admittere in cognitione Dei aliquam similitudinem, & imaginem: Non loquuntur de imagine, & similitudine obiectiua; sed de formali; sicut etiam quando admittunt in visione Dei verbum, loquuntur de verbo formali, non verò obiectiua. Ad illam autem auctoritatem D. P. Augustini desumptam ex lib. 14. cap. 17. vbi loquens de visione ait: *In hac imagine tunc perfecta erit similitudo, quando Dei perfecta erit visio*; *Respondetur*, quòd loquitur de imagine naturali, nempe anima nostra, quæ dicitur facta ad imaginem Dei, quam dicit perficiendam per visionem beatificam.

Quanam vident Beati in visione Dei?

EST communis Theologorum sententia: Beatos omnes videre omnia, quæ sunt formaliter in Deo: licet singula plus, aut minus penetrent, pro vt plus, aut minus luminis gloriæ participant; & sic representat quælibet visio omnes perfectiones, quæ sunt formaliter in Deo; nisi enim visio repræsentet omnes perfectiones Dei, non representat quiditatem Dei; & quidquid ad quiditatem primariò per se spectat, ed nisi repræsentetur quiditas alicuius, & quidquid ad quiditatem primariò,

, & per se spectat: utique ipsum non repræsentat, sicuti est; ergo, si non videntur perfectiones omnes, quæ sunt formaliter in Deo, non videtur Deus, sicuti est: contra illud Ioannis in epist. 1. canon. cap. 3. dicens: *Cum apparuerit, similes ei erimus, quoniam videbimus eum, sicuti est.* Qui ergo clarè videt diuinam essentiam; necessariò videbit omnia, quæ in Deo sunt formaliter: cum omnia sint idem omninò cum diuina essentia ex natura rei. Quod totum confirmat definitio Concil. Florent. de purgat. statuentis: *Animas iustorum statim, ac nihil habent purgandum, recipi in cælum, & intueri clarè ipsum Deum trinum, & unum, uti est.*

Videbit igitur quilibet Beatus omnia, & singula dogmata fidei novæ, v.g. vnionem hypostaticam, per quam Verbum diuinum terminat, coniungit sibi humanitatem Christi Domini: item præsentiam definitam Christi in Eucharistia, &c. et hæc omnia videntur clarè, & distinctè æqualiter ab omnibus Beatis; cum hac tamen æqualitate, veluti intensiva in visionibus Beatorum, stat inæqualitas, veluti intensiva; quāquidem licet singuli Beati totum Deum, seu omnes, & singulas perfectiones diuinas attingant clarè, & distinctè: non tamen eadem claritas, sed vnā clarius, ac alteram.

Nota, Quòd quando dicimus, Beatos videre in Deo omnia, quæ sunt in eo formaliter: id intelligendum est quoad id reale, quod dicunt in Deo: non verò quò ad habitudinem rationis, quam dicunt ad creaturas in particulari. Vndè, qui videt idæas in Deo; non est necesse, cognoscere idæas singularium creaturarum: cum neque sint plures idææ in Deo, nisi ratione diuersorum respectuum: sicut etiam, qui videt scientiam diuinam, intuetur Deum per illam scire omnia: non tamen hæc, ut illa in particulari; quare Beati ignorant quando futura sit dies iudicii: neque vi solius luminis gloriæ possunt id cognoscere; nisi peculiariter à Deo manifestetur: cum hoc pendeat ex decreto diuinæ voluntatis.

Qui intuituè videt Deum, necessariò debet in eo cognoscere creaturas possibiles, sub quibusdam conceptibus generalibus; qui enim intuituè videt Deum, videt, ipsum esse omnipotentem; ergo posse causare omne causabile, & finita in infinitum producere; sed sub conceptu omnis causabilis, & finitorum in infinitum, & quidem liberè à Deo produci possum, continentur omnes creaturæ, ergo &c. Necessè est etiam, ut qui intuituè videt Deum, distinctè attingat aliquam creaturam: aliter flet possibilis visio beata omnium infima: quòd probabile est repugnare, ut suppono ex Philosophia: sicuti probabile est, repugnare meritum minimum minutorum, & visionem omnium maximam. Sequela patet, quia idææ visiones videntes determinatè aliquam creaturam, essent perfectiones ista; ergo ista, quæ nullam videt esset omnium minima.

Dices: ergo visio, quæ attingit vnā tantam creaturam, esset omnium

imperfectissima. *Respondetur*, negando sequelam; quia potest dari alia visio imperfectior illa, quæ videlicet attingat aliam vnâ creaturam, imperfectiorem; creaturæ enim imperfectiores, & imperfectiores sunt in infinitum possibiles: vnde non est principium vniuersaliter verum: perfectiorem visionem necessariò exprimere plures creaturas; sufficit enim, si vel plures, vel perfectiores æquivalentes pluribus attingat: in quo sensu accipiendus est D. Thomas.

Licet sit certum, Beatos non videre omnia, quæ sunt in Deo eminenter: vident tamen aliqua, quæ eis conueniunt, vt benè notat hoc loco D. Thomas in *respons. ad 4. & 3. cont. gent. cap. 19.* vbi asserit: singulos Beatorum re ipsa videre in diuina essentia omnes naturas genericas, & específicas rerum naturalium; quia hoc videtur necessarium ad satiandum appetitum Beati. Videt etiam quilibet in particulari, quæ ad ipsius statum pertinent, v.g. Fundatores religionum, ea quæ in religione ipsorum euenient; ipsum totum ordinem celestis, & Ecclesiasticæ hierarchie, præces omnes ad illos fundendas: cum ijs tamen semper sit inæqualitas visionis. Anima insuper Christi Domini, iuxta probabiliorē S. Thomæ sententiam: videt, pro sua dignitate, simul in verbo infinita; penetrando lumine gloriæ cetero, & finito essentiam diuinam, vt causa, & eminenter continens, non solum omnia tñ in genere, specie. & individuo; sed etiam multa alia, quæ nunquam erunt: vnde Christus etiam vt homo, nouit, quando futura sit dies iudicii; & contra ium asserere, est falsum, & temerarium. *Neque* vrgèt dicere, Christum Dominum dixisse: *Neque Filium id scire*; nam intelligitur in hoc sensu, vt dicat, & reuelet; & sic sine mendacio dixit, se nescire, vel dic, quòd nescit à se, sed scit reuelatum à Patre.

Utrum inæqualitas visionis procedat à lumine?

Suppono tanquam certum de Fide; Beatos non omnes esse æquales, quò ad præmium essentiale sed pro quantitate meritum, vnum esse alio beatiorem: hinc est quod vnus Beatorum perfectius alio intuetur diuinam essentiam: legitur enim in *Epist. ad Corinth. 15.* *Stella à stella differt in claritate, sic & resurrectio mortuorum.* Neque officit parabola illa *Matth. 20.* de denario diurno æqualiter soluto omnibus operarijs, qui inæqualiter laborauerunt: Nam ibi iubetur, reddi æquale præmium, pro imparibus laboribus, non pro imparibus meritis: nam breuiori tempore potest aliquis plus mereri, quàm alius, qui longo tempore vixit, & plus laborauit, sed minùs meruit: & hoc prouenit ex abundantia gratiæ, quæ confertur hominibus: & propter auxilia Sacramentorum, per quæ nobis merita Christi applicantur.

Inæqualitas visionis, est certum, quòd non est ex parte obiecti formalis: quasi dicatur, quòd aliquid obiecti attingatur per vnâ visionem, quàm

am non attingatur per aliam. Principium igitur effectuum proximum taxans inæqualitatem formalem visionum, est solum lumen gloriæ, non verò inæqualitas intellectus; quia visio intuitiva Dei est formaliter atificans, & est consequenter expressio immediata diuinæ naturæ, &ensus in illam; sed quolibet perfectio maior, vel minor intellectus creati est impotens determinare maiorem, vel minorem expressionem diuinæ naturæ, & immediatum assensum; quia talis expressio est extrinsecam potentiam intellectiuam: maior igitur, vel minor perfectio intellectus creati materialiter se habet ad maiorem, vel minorem perfectionem visionis taxandam: Sicuti ad imprimendum impulsus maiorem, vel minorem in lancem, materialiter, & impertinenter se habet, quod materia sit ferrea, vel aurea: dummodò pondus sit æquale, vel inæquale: è contra verò lumen gloriæ, sicuti habet proportionem cum illis predicatis visionis beatæ; ita maior, vel minor luminis perfectio habet determinare maiorem, vel minorem perfectionem eorundem predicatorum. Nota, quòd quæcumque additio luminis non efficit, ut semper dura videantur; sed aliquando solum facit, ut ea, quæ antea videbantur, videantur melius, quàm antea viderentur.

An sit possibilis comprehensio Dei?

Comprehensio, prout sumitur in hoc loco, non potest meo iudicio, explicari meliori modo, nisi per hoc: quòd sit cognitio proportionata obiecto: hoc est, quòd per se oritur à principio tam perfectio, quàm perfectum est obiectum: vnde repugnat, etiam de potentia Dei absoluta, comprehensio Dei in visione beatâ. Quia implicat cognitio creatâ adæquata obiecto increato; ergo implicat cognitio creatâ comprehensiuâ Dei; antecedens probatur; quia implicat cognitio creatâ æqualis perfectionis, ac increata; sed cognitio adæquata obiecto increato est æqualis perfectionis, ac increata; quia cognitio increata est æqualis, & adæquata obiecto increato, nec excedens eius intelligibilitatem; ergo implicat cognitio creatâ adæquata obiecto increato.

Ad perfectam igitur comprehensionem requiritur cognitio quæ non solum sit cognoscitiua omnium, quæ sunt in obiecto; sed etiam sit proportionata arithmeticè cum obiecto: videlicet sit tam perfecta in ratione cognitionis, quàm est ipsum obiectum in ratione cognoscibilis. Hac autem adæquatio cum obiecto non debet esse in essendo, sed in repræsentando: quæ requirit, ut exprimat omnia, quæ sunt in obiecto, cum tanta claritate, & euidencia, quanta exigunt exprimi. Et hoc fortasse voluit D.P.N. August. in *epist. 112. cap. 9.* quando dixit: *Totum comprehenditur videndo, quod ita videtur, quod nihil eius lateat videntem: aut minus fines conspici, vel circumscribi possunt.*



TRACTATUS II.

De Scientia Dei.

QUÆRITUR hic I. Vtrum in Deo sit scientia? Nomine autem scientiæ intelligimus hic perfectam, infallibilem, comprehensiuam, & euidentem rerum omnium cognitionem, entis scilicet creati, vel increati: non autem intelligimus more nostro habitum, seu qualitatem accidentalem, & discursum: Vnde dicimus, esse de Fide, in Deo esse perfectissimam scientiam quò ad actum. Ostenditur 1. ex illo ad Roman. 11. *O altitudo diuitiarum sapientiæ, & scientiæ Dei: Esther. 14. Deus, qui habes omnium scientiam.* Ostenditur etiam hæc veritas ratione desumpta ex D. Thoma; Nam quò res cognoscentes nobilius, & perspicacius cognoscunt, eò plius à materia recedunt: idest, quantò magis res est immaterialis, tantò magis est cognoscitiua; sed Deus est infinitè immaterialis; ergo est infinitè cognoscitiuus. Accipitur autem hic immaterialitas, non prout est mera negatio; sed pro vt est includens ipsam spiritualitatem, quæ importat positiuam perfectionem, eò maiorem, quò propinquius accedit ad actum purum.

QUÆRITUR II. Vtrum Deus intelligat se? Respondetur affirmatiuè. Est de Fide; patet ex 1. ad Corinth. 2. *Spiritus Dei omnia scrutari, etiã profunda Dei:* & infra: *Quæ sunt Dei, nemo cognoscit, nisi Spiritus Dei.* Probatur II. ratione: Quia Deus est summum, & perfectissimum cognoscens: vt est certum ex dictis; sed summo, & perfectissimo cognoscenti conuenit sùma, & perfectissima cognitio, qualis est nobilissimi obiecti, nempe Dei; ergo Deus se ipsum cognoscit. Nota autem hic, quòd Deus non est in potentia ad intelligendum se ipsum; ita vt indigeat aliquo alio, per quod redigatur de potentia in actum; sed semper in actu se ipsum intelligit per se.

QUÆRITUR III. Vtrum Deus comprehendat se ipsum? Ex dictis in visione beata colligitur, Deum se ipsum comprehendere; nam vt diximus, ad conceptum comprehensionis requiritur, vt cognitio sit proportionata suo obiecto: idest, vt oriatur à principio tam perfectò, quàm perfectum est ipsum obiectum: hoc rotam verificatur, quando Deus se ipsum cognoscit; nam esse intellectiuum in Deo prouenit ex eo, quòd sit actus purus; ergo virtus intellectiua Dei tanta est, quanta est eius actualitas: & sic semper verificatur, quòd eius cognitio sit proportionata suo obiecto.

QUÆRITUR IV. Vtrum intelligere Dei sit eius substantia? Respondetur affirm-

firmatiuè. Nam si intelligere Dei esset distinctum ab eius substantia, et ab eius essentia; cum intelligere sit actus, & perfectio intelligentis: sequeretur, substantiam Dei habere potentiam ad aliquam perfectionem in se non existentem: & sic haberet se veluti actus ad potentiam, comparatione essentiae diuinæ; & sic essentia non esset actus purus: quod non est dicendum. Ex eo autem, quòd Deus se ipsum, & per se ipsum cognoscat: sequitur, scientiam Dei respectu sui ipsius, nec esse a posteriori, nec a priori; quia neque per effectum, nec per causam se ipsum cognoscit. Si autem aliquando à Patribus negatur, in Deo esse scientiam; loquuntur de scientia modo nostro, quæ est operatio accidentalis creatæ, transiens à potentia intellectiua distincta.

Queritur V. Quòdnam sit obiectum motiuum, & formale diuinæ scientiæ? Est certum, obiectum motiuum non esse diuinam essentiam, et cognitam; quia diuina essentia, vt cognita in passiuo, dicit Verbum: quod est virtualiter posterius scientiæ, & natura diuina. Obiectum igitur motiuum scientiæ diuinæ, est ipsamet Diuina essentia, cum eadem scientia, etiam virtualiter identificata; quia ipsamet scientia, & diuina essentia est obiectum, quod determinat existentiam eiusdem scientiæ; ergo c. Vnde colligitur, quòd eadem Diuina essentia est obiectum formale specificans, & determinans suo modo per identitatem perfectissimam perfectiones scientiæ Dei: & sic eadem essentia diuina est obiectum formale specificarium scientiæ Dei; nam illud, quod primariò exprimit; in quo veluti primariò quiescit diuina cognitio, est obiectum formale specificarium ipsius; sed illud, quod primariò exprimit, & in quo veluti primariò quiescit diuina cognitio est essentia diuina; ergo ipsa est obiectum formale specificarium scientiæ Dei. Creaturas autem non contingit scientia Dei, nisi vt purum terminum suæ perfectionis; & sic se habent, vt obiecta indirecta, & obliqua. Neque per hoc, quòd Deus habeat creaturas secum connexas: sequitur, quòd ratione talis connexio creaturæ se habeant, vt obiectum motiuum; nam talis connexio non apta mouere ad cognitionem Dei: mouet solum intellectum imperitum; non autem perfectissimum: qualis est diuinus, qui habet in se solum anticipatam rerum omnium cognitionem: vt loquitur S. Dionysius. Ex his colligo, quòd Deus in cognitione sui ipsius, nullo modo vti-
Creaturæ, tamquam medio in quo, seu prius cognito: id est non cognoscit se per creaturas, ac proinde nullo modo dici possunt medium diuinæ cognitionis; nam ex D. Thom. hic artic. 2. habetur, Deum se per se ipsum cognoscere; ergo se per creaturas minimè cognoscit. Et, tam si creaturæ dicant relationem dependentiæ à Deo, & Deus hanc relationem videat: non aliter creaturæ cognoscuntur à Deo, quam in essentia, tamquam in causa prius cognita: vnde ducunt in notitiam; tamquam obiectum merè materiale.

Quotuplex sit in Deo scientia rerum?

Solet diuidi scientia Dei à Theologis in varias, quasi species: non ex parte ipsius Dei; quia est vnica, & simplicissima; vtpotè infinita, & illimitata: sed ex parte creaturarum, & obiectorum materialium, circa quæ versatur. Prima igitur diuisio valde celebris, & ab omnibus Theologis recepta, est illa: in scientiam simplicis intelligentiæ, & visionis. Scientia simplicis intelligentiæ est cognitio illa diuina, quæ habetur vi solius intellectus independenter à voluntate, & terminatur ad res possibles, vt possibles sunt: idest, versatur circa ea, quæ nec sunt, nec fuerunt, nec erunt. Hæc vocari solet scientia abstractiua. Scientia verò visionis est, cognitio illa Dei, quæ terminatur ad res, vt existentes in aliqua differentia temporis: idest, attingit ea, quæ sunt, fuerunt, vel erunt. Hæc scientia dicitur visionis per quamdam analogiam ad visionem, & oculum corporeum, qui non nisi præsentia, & existentia videt; vnde hæc scientia appellatur intuitiua: & sic scientia de obiecto possibili, dicitur scientia simplicis intelligentiæ; scientia verò de obiecto existente in aliqua differentia temporis; dicitur scientia visionis.

II. Diuiditur scientia Dei in speculatiuam, & practicam. Speculatiua est illa, quæ fertur in obiecta; non sub ratione existendi, & sub ratione factibilitatis; sed in obiecta, vt cognoscibilia tantum; qualis est illa, quæ versatur circa res merè possibles, quas Deus potest quidè facere, sed non facit. Practica verò dicitur illa, quæ etiam fertur in rem, quatenus est factibilis; qualis est scientia visionis, vt applicata per decretum: vt infra videbitur.

III. Diuiditur in scientiam necessariam, & liberam. Necessaria est illa, quæ antecedit decretum, & liberam determinationem voluntatis diuinæ; hæc autem non attingit existentiam rerum; sed tantum earum essentiam, & quiditatem, quæ aliter se habere non potest. Scientia verò libera est illa, quæ supponit decretum, ac in eo fundatur: & ista versatur circa res existentes, aut futuras.

Nota, quod scientia visionis dicitur etiam approbationis: quatenus versatur circa bona, & supponit decretum, & approbationem voluntatis diuinæ. Dicitur etiam reprobationis: quatenus fertur in mala, & in peccata, quæ Deus non approbat, sed permittit: & supponit decretum tantum permissiuum, non autem positiuum.

Quodnam sit Obiectum scientiæ Diuinæ necessariæ?

Suppono tamquam certum ex dictis: obiectum primum diuinæ cognitionis esse solum Deum: & sic Deus secundum suam prædicatam necessariam est obiectum scientiæ necessariæ; cum enim scientia Dei ne-

essaria sit perfectissima, non potest non intelligere necessarium, & perfectissimum intelligibile; id enim esset magna imperfectio. Ex quo et congruè colligitur, eam scientiam, quæ est simplicis intelligentiæ, exprimere perfectissimè possibilitatem, & impossibilitatem omnium possibilem, & impossibilem: ac proinde conceptus omnes posibles, & impossibiles, siue positivos, siue negativos: inter quos procul dubio includuntur mala possiblea, utcumque, & carentiæ omnes, (si sint aliquæ possiblee contradistinctæ ab omni conceptu positivo.) Quia Deus suam essentiam est possibilitas, & impossibilitas omnium possibilem, & impossibilem; ut ostendi in metaphysicis; sed Deus per scientiam necessariam, & simplicis intelligentiæ attingit suam essentiam; et per eam scientiam perfectissimè attingit possibilitatem, et impossibilitatem omnium possibilem, & impossibilem; ergo attingit omnia possiblea, & impossiblea: siue sint conceptus positivi, siue negativi, siue sint bonum, siue malum culpæ, aut pœnæ. Et quamvis creaturæ possiblee careant vi motiua, & intelligibilitate actiua intrinseca: possunt tamen terminare diuinam scientiam: ad quam Deus determinatur sua essentia, quæ est intelligibilitas extrinseca illarum.

Ex his infero contra Epicureos: Deum perfectè, & distinctè cognoscere omnes res creatas, tam in communi, quàm in particulari; ut probat hic D. Thomas artic. 5. & 6. Et colligitur ex varijs Scripturæ locis, *Genes. 1. Vidit Deus cuncta, quæ fecerat, &c. ad Hebr. 4. Omnia nuda, & aperta sunt oculis tuis; Et sic habet Deus perfectissimos conceptus, veluti vniuersales entis, substantiæ, accidentis, & similes; videt enim, perfectissimè in sua essentia, quid sit substantia, quid ens: &c.*

Non ens, si sumitur, prout opponitur enti existenti actu: est de Fide; Deum cognoscere non entia, ut constat ex illo *ad Roman. 4. I vocat ea, quæ non sunt, tamquam ea, quæ sunt*. Entia autem rationis metaphysica, quæ cogitantur ab homine, & nulla ratione esse, & coherere, efficiuntur, ut chylæra, homo, lapis, &c. concipiuntur per vera entia realia; nam Deus non solum cognoscit omnia, quæ quacumque ratione esse possunt; numquam menterunt: sed etiam ea, quæ fingi, ac cogitari possunt, sed nullo modo esse possunt. Vtrum autem dentur entia rationis metaphysica, quæ debeant esse obiectiue tantum in intellectu: suse ostendi in Logica, non esse dari: probando, omnem cognitionem possibilem attingere obiectum reale: id est, omne cognoscibile esse reale: & impossibile, seu chylæram esse terminum secundæ intentionis, & denominationem extrinsecam, quæ constituitur ex extremis realibus, tamquam ex subiecto, & nunquam a forma: et cognitione essentialiter falsa, & distorta obiecto; quia, vel repræsentat modo compositiuo extrema inter se essentialiter distincta, ut cum dicitur: homo est equus; vel quia repræsentat modo compositiuo extrema essentialiter identificata, ut cum dicitur: homo non rationalis: vnde si omnis cognitio creata possibile non attingit, nisi

obiecta realia : cum impossibile nihil aliud importer , nisi obiecta realia ; multò magis cognitio diuina ea , quæ nulla ratione esse possunt , concipit per vera entia realia .

Nec etiam salua Fide negari potest , Deum cognoscere mala . Malum autem potest sumi multipliciter : primò , prout essentialiter est priuatio boni creati ; vt est carentia , & priuatio gratiæ in anima , quæ dicitur malum pœnæ : vel priuatio visus in oculo , quæ dicitur malum naturæ . Hoc ergo malum , docet D. Thomas , à Deo directè non cognosci , quasi ipsum malum per se ipsum terminet cognitionem diuinam ; sed indirectè : quatenus cognoscitur bonum , cui malum opponitur ; & sic Deus per bona creata , quæ in se ipso cognoscit , vltèrius mala opposita cognoscit : cernens eorū absentiam in subiecto , cui erant debita , aut saltem apta inesse . Per hoc autem , quòd Deus vtitur bono creato ad cognitionem mali : non sequitur , bonum creatum habere rationem speciei , vel obiecti formalis respectu intellectus diuini ; sed quòd habeat rationem obiecti materialis cogniti in diuina essentia : & in eo sic cognito , vt obiecto materiali : asserimus , cognosci malum creatum . Datur insuper aliud malum , quod dicitur malum culpæ ; & hoc etiam cognoscit Deus : ex illo *Amos* 5. *Cognoui scelera vestra* ; & *Iob* 14. *Signasti quasi in sacco delicta mea* . Quod cognoscat mala naturæ : ostenditur ex illo *Sapien.* 8. *Monstra scit , antequam fiant* . Quod verò attinet ad mala pœnæ : est manifestum , ex illos *Amos* 3. *Si erit malum in Ciuitate , quod Dominus non fecerit* .

Quando scriptura asserit , Deum non cognoscere mala , iuxta illud *Habacuc* 1. *Mundi sunt oculi tui , ne videant malum , & respicere ad iniquitatem non poteris* . Hoc est intelligendum de scientia approbationis . Vnde D.P. Aug. ad illud *Matth.* 25. in quo habentur hæc verba : *Non noui vos* , addit : *Ars rectè dicitur , nescire vitia ; cum improbat viuam* . Et si D. Hieronymus super illud *Habacuc* relatum : *Mundi sunt oculi tui , ne videant malum* , ait : *Absurdum esse ad hoc Dei ducere maiestatem : vt sciat per momenta , quot nascentur pulices* . Respondetur , sensum esse : vel , quòd intellectus diuinus non sumat cognitionem à rebus vilissimis per species ab illis desumptas ; vel , quòd non habeat de illis specialem curam , ac prouidentiam , sicut de homine , iuxta illud 1. *Corinth.* 9. *Numquid de bobus cura est Deo ?*

Cognoscit etiam Deus singularia : & est de Fide ; habetur enim *Proverb.* 6. *Omnes via hominum patent oculis eius* . Ratio est , quia omnium singularium rationes sunt in diuina essentia eminentissimo modo : & omnium Deus est causa ; ergo omnia videt . Per hoc autem , quòd intellectus humanus non cognoscat singularia : non sequitur , quòd neque diuinus intellectus possit illa cognoscere ; nam ratio , cur intellectus humanus non cognoscat singularia : non est ; vt aliqui putant , simpliciter immaterialitas speciei intelligibilis ; sed immaterialitas talis , nempe proueniens ex abstractione ; cum species illa intelligibilis , per quam intel-

lectus

us humanus intelligit, sit immaterialis: prout est à singularibus
ratiis, quæ immaterialitas per abstractionem non est in diuina essen-
tia, cum intellectus diuinus sit immaterialis per se ipsum, seu per suam
naturam.

Est etiam Conclusio D. Thomæ hic articuli 12. Deum cognoscere infi-
nitum; tum per scientiam simplicis intelligentiæ, tum per scientiam visionis.
Per primam enim comprehendit Deus actum, & simul omnia, ad
quæ, tum potentia creaturarum, tum ipsius omnipotentia sese extendit:
hæc sunt infinita; nam diuina omnipotentia, cum sit simpliciter in-
finita; potest producere perfectiores, & perfectiores creaturas in infini-
tum: aliàs posset dari creatura omnium perfectissima, qua maior dari non
posset; quod repugnare, probaui in physicis. Insuper in potentia intel-
lectiva, & volitiva hominum, & Angelorum continentur infinitæ co-
gitationes, & affectiones cordium, quas Angeli, & Beati successiue pro-
ducunt per totam æternitatem: quæ licet non possint in propria men-
te esse simul; in æternitate autem simul existunt: vt infra videbitur;
ergo per scientiam simplicis intelligentiæ cognoscit Deus actum infinitum.
Tum autem ad hæc infinita, etiam se extendat scientia diuina, pro vt ha-
beat rationem scientiæ visionis: sequitur, Deum eadem scientia visionis
cognoscere etiam infinita: quæ fuit secunda pars conclusionis. Nam
scientia visionis terminatur ad res præteritas, & futuras; vt præsentia in
æternitate, quæ est mensura diuinæ cognitionis; & cum in illa simul
stant omnes cogitationes infinitæ, quas Angeli per totam æternita-
tem eliciunt: sequitur, Deum cognoscere infinita etiam scientia visionis.

Utrum scientia Dei sit causa rerum?

Respondetur hic I. Utrum actualis productio creaturarum sit à
scientia Dei? Non loquimur hic de causa directiua; regulando
necesse opus, ostendendo finem, & modum producendi illas; nam ne-
mo negat, scientiam Dei, saltem directiue concurrere ad productionem
creaturarum: ne dicatur, Deum eodem modo procedere in rerum produ-
ctione: contra illud *Psal. 103. Omnia in sapientia fecisti. Respondeo igitur,*
Deum efficienter concurrere sua scientia ad productionem crea-
turarum: vel applicando potentiam executiuam ad opus, vel imme-
diatè imperando earum productionem. Vnde scientia Dei est, non so-
lum directiua, sed etiam effectiua productionis creaturarum: & sic im-
perat, & exequitur immediatè earum productionem per actum impe-
rii formaliter immanentem, & virtualiter transeuntem. Nam actus im-
perij pertinet ad intellectum: cum imperare nihil aliud sit, quàm or-
dinare vnum ad aliud; ordinare autem vnum ad aliud pertinet ad intel-
lectum: sicut inferre vnum ex alio pertinet ad scientiam; sed Deus
producit creaturas ad extra per actum imperij formaliter immanentem,

& virtualiter transeuntē: vt patet ex Testimonijs Sacræ Scripturæ, vt habetur ex *Gen. 1. Fia lux: & facta est lux.* & *Ps. 148. Ipse dixit, & facta sunt, ipse mandauit.* & creata sunt ergo scientia Dei est causa rerum, non solum directiua, sed etiam effectiua; ideo D.P. August. *lib. 5. de Trinit. cap. 15. dixit: Vniuersas creaturas spirituales, & corporales, non quia sunt, ideo nouit Deus; sed ideo sunt, quia nouit.*

Quæritur II. Vtrum scientia, quæ est causa in actu secundo futuritionis, & existentie rerum: idest, quæ concurrat ad productionem rerum directiue directione proxima, & immediata, & etiam efficienter, sit scientia visionis? *Respondeo*, esse scientiam visionis. Nam scientia simplicis intelligentiæ, solum ostendit factibilia, cum sit cognitio rerum, vt merè possibile, non vt futurorum, ac existentium; ergo hæc casualis solum competit scientiæ visionis; solum ergo scientia simplicis intelligentiæ concurrat ad productionem rerum directiue solum directione remota.

Nota I. Quod quando dicimus, quod scientia visionis est causa proxima, & immediata efficiens creaturarum: non loquimur de scientia visionis, vt visionis est; sed de scientia visionis, quatenus approbationis est, & approbata per decretum efficax diuinæ voluntatis: & ob hanc rationem verificatur, Deum non esse causam peccati: quamuis ea cognoscat per scientiam visionis, nam non cognoscit illa per scientiam visionis, quatenus est approbationis; cum nullum supponant in Deo decretum, positium, quo velit; & approbet eorum existentiam. Nota II. Quod quando legitur: *Non ideo res esse futuras, quia sciuntur à Deo*, vel hoc intelligendum est de peccatis: nam verum est dicere, peccata non esse futura: quia sciuntur à Deo per scientiam visionis, vt dictum est; vel intelligendum est de scientia, vt sic, secundum rationem generalem scientiæ, cui vt tali non competit ratio causalitatis; non autem de scientia, vt habet adiunctam voluntatem, & connotat decretum. E' contra autem, quando legitur: *Ideo præscit Deus aliqua, quia sunt futura*, est vera hæc propositio in sensu illatiuo, non causali: sicuti ista propositio: *Quia Petrus est risibilis, est rationalis*: est vera in sensu illatiuo, non causali. III. Est notandum, ratione decreti, & voluntatis Dei res non sunt futuræ, nisi inchoatiue, & incompletè, non totaliter, & completè; quia, vt dictum est, principium immediatè productiui rerum non est diuina voluntas, sed intellectus practicus, qui producit efficienter res ad extra per actum imperij formaliter immanentem, & virtualiter transeuntem. IV. Quando dicitur scientiam visionis supponere res existentes, & futuras, est semper negandum: solum ergo scientia intuitiua quæ est merè speculatiua, supponit suum obiectum factum, & existens; non autem scientia, quæ est eminenter speculatiua, & practica.

Virum Deus cognoscat futura contingentia ?

Antequam ingrediamur ad examinandam celeberrimam illam questionem de futuris contingentibus ; cuius difficultas, & labor, est concilianda contingentia, & libertate futurorum contingentium, cum omnia certitudine, ac infallibilitate diuinæ scientiæ ; oportet prius videre, quid, & quotuplex sit futurum contingens ? Et postea, an Deus futura contingentia cognoscat ? Et incipiendo à primo : dico.

Futurum definiri potest: quod est determinatum in causa ad habendam existentiam pro duratione sequenti. Contingens in præsentī sumitur pro eo, quod in vtramque partem potest naturaliter accidere, siue in esse entis, siue in esse effectus, siue ab intrinseco, siue ab extrinseco. Unde potest sic breuiter definiri contingens: est id, quod habet esse in causa impeditibili, siue ab intrinseco, siue ab extrinseco.

Diuiditur primò futurum contingens, in absolutum, & conditionatum. Futurum contingens absolutum est illud, cuius futuritio à nulla conditione dependet; quæ non sit futura, & purificanda; vt patet in futuritione Incarnationis Verbi, quæ habuit nexum cum conditione futura peccati Adæ; Ideo dixi: *Quæ non sit futura*; nam si conditio, à qua pendet, futura sit: non ideo amittit rationem futuri absoluti; vt patet in exemplo allato. Futurum conditionatum est, cuius futuritio dependet à conditione non futura, seu nunquam purificanda; vt si Christus prædicasset Euangelium Tyrijs, & Sidonjs; illi credidissent, & agnoscissent pœnitentiam.

Futurum conditionatum subdividitur iuxta varias connexiones, quas habet conditio cum euentu; primum dicitur disparatum, quod nullam connexionem habet ab intrinseco cum euentu: sed solum ab extrinseco: quale fuit illud, quod 4. Regum 13. prædixit Elifusus Regi Ioas: *Sed percussisses quinquies, aut sexies, siue septies, percussisses Syriam usque ad consumptionem*; hoc enim futurum nullam habuit connexionem ex natura rei cum euentu. Iuxta igitur varietatem connexionum variatur futurum. Vnde si est connexum cum conditione metaphysica certitudine, erit metaphysicè futurum; huiusmodi est illud in nostra sententia: *Deus voluntatem creatam ad pœnitendum præmoneat, pœnitebit*. Si vero erit moraliter connexum, certum erit futurum moraliter. Si denique probabiliter, vt esset, si quis diceret: *Si Petrus elemosinam petit à paupere sibi amicissimo, accipiet*; hoc futurum erit certum probabiliter, seu coniecturaliter. His autem stantibus, videndum nunc est: an Deus futura contingentia cognoscat?

Procedit præsens difficultas, tum de futuris contingentibus absolutis, tum de conditionatis. Et dicimus Deum ex æternitate sua certissime futura contingentia absoluta perfectissimè cognoscere. Hæc sententia,

tia, quam omnes ferè Philosophi, paucis exceptis, tenuerunt: potest primò probari ex multis sacræ Scripturæ locis; dicitur enim *Sap. 8. Signa, & monstra scilicet, antequam fiant: & euentus temporum, & seculorum: & cap. 41. Cognoscit Dominus omnem scientiam annuncians, quæ praterierunt, & quæ superuentura sunt. Isaï cap. 41. Prædixi tibi ex tunc, antequam venirent, indicavi tibi. insuper Ioan. 14. Et nunc dixi vobis, priusquam fiant: ut cum factum fuerit, credatis; vnde meritò Tertullianus 2. contra Marcion. dixit, quòd: Præscientia Dei tot habet testes, quot sunt Prophetæ. His positis: Probatur conclusio ratione. Nam, ut constat, certum est, Deum futura contingentia cognoscere: sed non incipit illa scire, quando sunt actu: aliter acquireret scientiam, quam antea non habuit: & sic mutaretur à non sciente in scientem, & caderet in Deum vicissitudinis obumbratio; ergo scit futura contingentia antequam fiant.*

Circa futura conditionata: dico etiam, Deum habere de illis certam scientiam, quantumvis futura conditionata sint disparata: I. Quia multa illorum reuelauit Deus Prophetis: ut illud Elisëi supradictum: *Si percussisses terram &c.* Sed reuelationi Dei non potest subesse fallum; ergo, &c. II. Quia omnia futura conditionata sunt certò scibilia, sed quidquid est certò scibile, certò attingitur ab omniscientia Dei; ergo, &c. maior, in qua est difficultas, probatur; nam futura contingentia conditionata habent determinatam rationem veri, cum habeant determinatam rationem entis; quia ratio veri consequitur ad determinatam rationem entis; ergo futura conditionata sunt à Deo scibilia.

Utrum Deus cognoscat futura contingentia antecedenter ad futurum decretum?

IAm incipiunt mysteria; ingredimur enim disputationum pelagum: ubi plures Theologi ducentes per tot annos cimbam ingenij in altum scientiæ Dei, nihil cepisse exclamare cum nigrore possunt: in tenebris enim tam inscrutabilis scientiæ ambulantes facile caligabit ingenium; nisi ad illam diuinæ voluntatis, & decretorum abyssum, quæ lucem inhabitat inaccessibilem, sua lumina figat. Cum igitur sit manifestum, ut patet ex dictis, Deum habuisse ab æterno omnium futurorum præscientiam: Difficultas, & controuersia, quæ ad præsens grauissima est inter Theologos, est de modo, seu medio, in quo Deus futura contingentia absoluta, & conditionata ab æterno cognoscit; sed quia ad explicandum hunc modum, seu medium diuersis vijs procederunt vsque adhuc Theologi; necessarium putavi eorum sententias, (breuitate non prætermittenda) referre, & impugnare. Aduerto tamen, sermonem esse de futuris contingentibus absolutis, postea aliquid addendum de conditionatis.

Prima igitur sententia, quæ se offert, examinanda, est P. Molinæ, & ecani; qui putant, Deum cognoscere futura contingentia antecedentia ad decretum in suis causis liberis, & contingentibus, ut super comprehensivis; vno verbo: putant, Deum comprehendendo liberam arbitrium creatum positum sub talibus conditionibus, certò cognoscere futurum eius actum. Verùm hæc sententia ex illo testimonio D. Thom. *2. 2. q. 14. art. 13.* facillè impugnatur; dicit enim in illo Angelicus Præceptor: *In causa contingenti non potest certò cognosci futurum*; & sic per Thom. effectus contingentes, aut liberi non possunt certò à Deo cognosci in causa indifferenti, & indeterminata; sed causæ creatæ, etiam supercomprehensivæ, sunt indifferentes ad vtrumlibet ante omne decretum Dei; nam sicut diuina omnipotentia est prima radix possibilitatis rerum: ita decretum Dei est radix futuritionis, per quam res transeunt a statu possibili ad statum determinationis, ad fore; ergo in illa causa differenti, & indeterminata, etiam ut supercomprehensa, non cognoscitur effectus determinatè futurus. Neque supercomprehensio iuvat ad idendum id, quod non est visibile; sed ad melius, ac perfectius videntum id, quod est visibile; & sic, quo magis Deus causam contingentem supercomprehensivè penetrat, eò magis eius indifferentiam, & indeterminationem cognoscit. Independentem igitur à prima causa, quæ est divina voluntas, non potest voluntas creata, ut habens adiunctum consensum Dei simultaneum, esse medium, in quo Deus certò & infallibiliter cognoscat eius actus liberos futuros; neque à fortiori eadem volūtas sine concursu Dei considerata poterit habere rationem medij ducens in certam, & infallibilem notitiam suorum actuum futurorum: ut docuit Theophylus quidam Raynaudus. Supponit enim hic Auctor impossibile ex duplici capite in ista sua sententia: I. dicit Deum explorare sententia media, quid voluntas nostra factura esset, si posset agere absque vno concursu; quod, quam sit falsum, manifestè videbitur ex reiectione scientiæ mediæ. II. supponit, quod possit dari, & assignari certitas futurorum sine decreto libero diuinæ voluntatis determinanti, vel permittente ipsa, ut sint; quod est falsissimum, & absurdum; negaretur enim causalitas prima diuina.

Secunda sententia, quæ est Ægidij Romani asserentis futura contingentia cognosci à Deo in sua essentia, ac idæis antecedenter ad sua decreta; facillè etiam impugnatur ex dictis I. quia in essentia, & idæa diuina, futura non repræsentantur, nisi ut possibilia, II. essentia diuina, & idæa antecedenter ad decreta sunt indifferentes ad repræsentandam futuritionem, vel non futuritionem creaturarum; ergo implicat, quòd in causa & medio indifferenti, ut tali, cognoscatur vnum determinatè potius, quam aliud; nam indifferens, ut tale, non continet determinatè vnum potius, quam aliud.

Tertia sententia est P. Suarez, putantis, Deum cognoscere futura contingentia-

ringentia, & libera in ipso decreto non exercitè existente: sed cognito, vt futuro. *Set* hæc sententia est etiam apertè falsa, & improbabilis. I. quia Deus cognoscit sua decreta intuituè; ergo non cognoscit, vt futura; ergo si non potest cognoscere sua decreta, vt futura: neque poterit cognoscere futura in suo decreto, vt futuro. II. cum decreta Dei sint æterna, semper videntur à Deo, vt præsentia: nam futuritio repugnat æternitati. *Neque* valet dicere, decretum concipi, vt virtualiter futurum, ad quod sufficit posterioritas à quo, & naturæ. Nam falsum est, ad futuritionem virtualem sufficere prioritatem tantum à quo; sed necessariò requiritur prioritas existentiae, & instantis in quo, quæ non potest reperiri in Deo. *Insuper* Verbum, vt communiter tenent Theologi, procedit ex cognitione intuitiua Spiritus sancti, tamèn cognitio intuitiua, quæ processit Verbum, habebat semper sibi præsentem Spiritum sanctum; quia coexisteat cognitioni, qua processit Verbum in eodem instanti in quo, quantumuis Spiritus sanctus sit posterior origine, ac natura Verbo: hoc dicendum de decreto illo, vt futuro virtualiter.

Quarta sententia est P. Vasquez, qui volens assignare medium, quo Deus futura contingentia cognoscat, dixit: Deum cognoscere futura contingentia pro priori ad decretum in veritate obiectiua illorum. Vndè dicit, quòd ratio prima certitudinis, ob quam futurum illud sit certò à Deo cognoscibile, non est decretum diuinæ voluntatis: sed illa determinata veritas, quam habet futurum in se ipso; explicans autem quid sit ista determinata veritas obiectiua antecedenter ad decretum, dicit; quòd est quædam aptitudo, seu non repugnantia, quam habet intellectus concipiendi de futuro contingentia propositiones contradictorias antecedenter ad decretum, determinans rerum futuritionem: v. g. *Petrus conuertetur, Petrus non conuertetur*; quarum vna est determinatè vera, altera falsa. Vndè colligit, quòd obiectum earum propositionum sit determinatè futurum, vel non futurum ante decretum in veritate obiectiua, nempe, in suppositione, quòd aliquando erit, vel non erit, vel clariùs in ipso esse, quod res illa tali tempore est habitura.

Sed ex multis impossibilitatibus, quæ secum trahit ista sententia, puto, esse reiiciendam, tamquam fictitiã, & insufficientem ad fundandam certam noticiã futurorum contingentium in Deo. I. enim impossibile est; quia per talem dicendi modum, nempe si futurum contingens ante decretum diuinæ voluntatis haberet obiectiuam veritatem, qua certò posset terminare diuinam cognitionem, tolleretur de medio rerum contingentia, & libertas. & sic nihil esset ad vtrumlibet contingens; sed omnia ex necessitate euenirèt. Nam per ipsos futura contingentia habent determinatam veritatem ante decretum, vt sint, vel non sint; ergo de ipsis fuit verum dicere, quòd determinatè erunt, vel quòd determinatè non erunt; sed quòd determinatè erit, non potest non esse, & non fieri: ergo, si futurum determinatè erit ante decretum in veritate obiectiua, non

est non esse, & non fieri; ergo necesse est, esse, & fieri; nam quod possibile est, non esse, & non fieri: necesse est esse, & fieri; & sic necesse est, esse, & fieri omnia, quę futura sunt.

II. Talis sententia tolleretur medio diuinam prædestinationem; nam queretur, quod ad prædestinandum, vel non prædestinandum Petrum, g. nihil libere diuina voluntas operaretur; quod est, negare diuinam prædestinationem; quod ostenditur; quia per aduersarios, propositiones de futuro contingenti singulari sunt determinatę verę, vel determinatę falsę, per obiectiuam veritatem ante decretum diuinę voluntatis; ergo necessarium fuit absolutę ante decretum, vel quod Petrus esset, g. prædestinatus, vel quod non esset prædestinatus; ergo ad illum prædestinandum, vel non prædestinandum, nihil diuina voluntas est operata; ergo tolleretur de medio diuina prædestinatio. Eo ipso enim quod ipsi aduersarij non negant, quod ista propositio: *Petrus erit prædestinatus*, sit ante decretum diuinę voluntatis, vel determinatę vera, vel determinatę falsa; si est determinatę vera, necesse est, quod ita sit; cum illa determinata veritas ex sua natura postulat; ergo non poterit Deus illum non prædestinare: quod est, negare diuinam prouidentiam, prædestinationem.

Reijcitur III. hæc sententia ratione fundamentali. Nam ante decretum, prædefinitionem diuinę voluntatis determinantis extrahere res est statuerę possibilitatis, & dare illis existentiam, nihil est determinatę futurum; ergo neque determinata veritas in ipsis futuris; nam veritas obiectiuam determinata de obiecto futuro præsupponit ipsum futurum: ergo si ante decretum nullum est futurum: nulla etiam erit veritas obiectiuam in illis; ergo non possunt futura contingentia pro priori ad decretum cognosci à Deo in sua veritate obiectiuam determinata. Decretum autem Dei est prima radix, & primum principium determinatę futuritionis in rebus: cum ipsum sit primum determinans, primum principium possibilitatis illarum, nempe diuinam omnipotentiam. Vnde si futura illum habent esse ante prædictum decretum, nullam etiam veritatem habebunt: cum veritas fundetur in esse.

Nota hic primò pro solutione multarum obiectionum: quod lex propositionum contradictoriarum exigit, vt vna sit quidem determinatę vera, & altera falsa; sed pro omni instanti reali post decretum diuinę voluntatis: non autem pro instanti rationis ante decretum; nam propositiones contradictorię de futuro contingenti ante decretum, non sunt reuera contradictorię; sed tantum materialiter, & in apparentia; nam tunc ante decretum non intelligatur verum, vel falsum, nec consequenter potest intelligi optoni in veritate, & falsitate, & esse contradictorias. Propositiones igitur illę: *Antichristus erit, Antichristus non erit*, pro signo priori rationis ante decretum sunt falsę: & sic non sunt, & esse possunt contradictorię; nam idem est dicere ante decretum; *Antichristus*

ichristus erit, Antichristus non erit, ac Antichristus possibiliter erit; Antichristus possibiliter non erit, quæ nullo modo sunt contradictoriæ. Nota II. quod neque pro illo priori rationis ante decretum diuinæ voluntatis futurum creatum est determinatè hoc, vel illud ens; quia vtrumque à diuina voluntate liberè potest fieri. Vndè sicut non est verum, quod detur propositio, quæ ante decretum sit vera, vel falsa determinatè; nec etiam erit verum, quod in illo priori rationis ante decretum, nullum detur medium inter ens, & non ens.

Colligitur ergo futura contingentia, retenta contingentia, & libertate proueniente ex illa prima radice contingentia, quæ est determinatio diuinæ voluntatis, certò à Deo cognoscuntur; quia certam, & determinatam veritatem habent cum perfectà ipsorum libertate, & contingentia; nam, vel est determinatum à Deo, vel ab ipso permissum, vt fiat, vel non? Si est à Deo determinatum: ita eueniet; & consequenter propositio id significans, erit determinatè vera. Si autem non est determinatum à Deo, vt fiat: nec eueniet; & consequenter propositio id affirmans, erit determinatè falsa. Vndè pro nullo signo rationis priori ante decretum liberum diuinæ voluntatis, propositiones illæ possunt habere determinatam veritatem, seu falsitatem.

Verum Deus cognoscat certò futura contingentia, & libera, quia physicè existunt in æternitate?

VT methodicè, & solita claritate hanc quæstionem explicemus necessarium puto, antequam decidamus, quod Deus certò cognoscit omnia futura, vt sibi in sua æternitate realiter, & physicè præsentia, examinare: verum futura contingentia sint realiter, & physicè secundum suas proprias existentias, præsentia æternitati; an verò obiectiue tantum, idest, ratione suæ præscientiæ?

Dico igitur, futura contingentia esse realiter, & physicè secundum suas proprias existentias præsentia æternitati. Est ferè omnium SS. PP. sententia; qui constanter asserunt, respectu Dei, eiusque scientiæ, nihil posse dici futurum. Nam quidquid per totum decursum temporis agitur diuinus intellectus in tota sua æternitate intuetur, quasi præsens; ita D. Ambros. lib. de Fide cap. 7. S. Hieron. in prior. Comment. in epist. ad Ephes. S. Hilar. de Trinit. S. Gregor. lib. 20. moral. cap. 23. & omnes alij, præcipuè fulgentissimum Ecclesiæ lumen S. P. Augustinus, quem sequutus est S. Thom. eius fidelissimus discipulus, & omnes alij Thomistæ. Probat enim physicam, & realem præsentiam futurorum in æternitate S. Pater pluribus in locis præcipuè lib. 11. de Cinit. Dei cap. 21. alio loco lib. 2. ad Simplic. quest. 2. & pluribus alijs in locis. Sufficiat solum breuitatis gratia ostendere illud, quod S. Doctor, & Pater ser. 2. de verb. Apost. in explicatione illius ad Ephes. 2. elegit nos, habuit, nempe: Non vanè elegit

*nos, quos ab æterno habuit in sua præscientia, & in sua præsentia: sed præscientia pertinet ad præsentiam obiectiuam: & præsentia addita ad præsentiam dicit præsentiam realem per realem coexistentiam; ergo S. Patrem, futura non solum coexistunt æternitati per obiectiuam præsentiam: verum etiam per physicam, & realem eorum præsentiam. Hæc sententia, post testimonia SS. Patrum, quæ ostendunt, esse ab omnibus Theologis tenendam, & defendendam: suadet etiam ratio. Nam æternitas definitur à Theologis: *Interminabilis vite tota simul, perfecta possessio*; id est, est duratio quædam tota simul sine ullo termino perfectissimo modo indiuisibili; ergo simul continet omnem anteriorem durationem, excludens à se omnem partium successionem; ergo simul continet omne tempus præteritum, præsens, & futurum: id est, quidquid est, vel fuit, vel futurum est in quacumque differentia temporis comprehenditur, & concluditur ab illa: ergo simul continet omnia, quæ erunt tempore futuro. Nam sicuti corpus infinitum in ratione extensionis omnibus alijs, quantumcumque distantibus inter se, simul adest; ita æternitas, quæ est infinita in duratione, omnibus durationibus, quantumcumque inter se distantibus coexistere debet simul, & absque ulla successione etiam extrinseca; sed distantia in ratione durationis attenditur penes præteritum, præsens, & futurum; ergo æternitas ob infinitam suam durationem actualem indiuisibilem, & tota simul, debet ex necessitate comprehendere simul, & actualiter omnem durationem temporis futuri.*

Aduerte hic I. Quod, quando nos dicimus, futura contingentia habere physicam, & realem existentiam in æternitate: non intelligimus, futura prius coexistere in æternitate per quamdam anticipationem, quam habitura existentias suas in tempore; ita ut prius intelligantur, futura habere esse extra suas causas in æternitate, quam in tempore habitura sint suum esse; nam hoc modo admitteretur duplex productio eiusdem rei: scilicet illud esse futurorum, bis produceretur: prius in æternitate, deinde in tempore; quod est absurdum. Unde non ideo futura habitura sunt esse in tempore: quia illud prius habuerunt in æternitate; sed potius dicendum: Quia futura habitura sunt esse in tempore, ideo illud habent coexistens æternitati.

Aduerte II. Quod maximè iuuat ad soluenda plura argumenta aduersariorum; quod, quando dicitur: Futura contingentia nunc coexistunt æternitati: Futura contingentia simul coexistunt æternitati: Futura contingentia fuerunt ab æterno obiectiuè in mente Dei, & etiam in seipsis physicè, & realiter existentia: est cum maxima cautela procedendum. Nam si in bono sensu accipiantur, sunt verè: malè autem intellectæ, aliquid falsitatis continent; nam verbum, *est*, quantum est de creatura, non magis significat mensuram durationis creatæ, quam increatæ; & particula, *nunc*, non magis significat indiuisibile durationis fluentis, quod

quod est nostrum instans, quàm indiuisibile durationis omninò permanentis, quod est eternitas; communiter tamèn verbum, *est*, usurpatur pro mensura durationis creatæ; præsertim quando loquimur de existentia creaturarum; & particula, *Nunc*, usurpatur pro instanti temporis, siuè realis, siuè imaginarij. Vndè prima propositio est vera; si accipiatur coexistere in eo sensu, in quo accipiendum est, esse præsens; nemper per esse præsens increatum, quod est ipsa æternitas Dei; & *nunc* usurpatur, quatenùs *nunc* æternitatis importat. Sicuti etiam est vera secunda; si ly, *simul*, exponatur de similitudine se tenente ex parte æternitatis; falsa autem: si intelligatur de similitudine se tenente ex parte ipsorum futurorum contingentium. Tertia est etiam verissima, quatenùs in eodem *nunc* æternitatis est obiectum, & cognitio; & sic quando obiectum est in propria duratione, non potest cognitio diuina non esse: vnde non potest in ordine ad diuinam cognitionem dici obiectum absolutè futurum; quia physicè, & realiter secundum propriam existentiam est ab æterno illi præsens, & coexistens per comparisonem scilicet ad *nunc* æternitatis.

III. Est semper negandum aduersarijs, quòd creatura pro tempore, quo existit, idest considerata cum propria mensura, quòd coexistat Deo ab æterno; concedendum autèm quòd creatura, quando non existit, sed solum habens mensuram durationis diuinæ indiuisibilis, coexistat Deo ab æterno. Ultimo loco aduerto, quòd quando dicitur, *res creatæ coexistunt æternitati*, nihil aliud importatur, quam illas esse in sua propria temporis duratione, quæ verè, & propriè continetur in æternitate; ita vt productio rerum, quæ in tempore nobis futura est iam æternitati coexistit.

Urget tamen I. Scotus; non possunt aliqua plura simul coexistere vni tertio, nisi simul inter se coexistant; ex illo axioma: *Quæ sunt eadem vni tertio, sunt eadem inter se*: sed omnia futura non simul sibi coexistunt, vt patet; ergo nec simul coexistunt alicui tertio, nempe in æternitate. Sed respondetur distinguendo maiorem, si coexistunt vni tertio, sumpro adequatè secundum suam durationem, cōcedo maiorem, sumpto inadequatè nego maiorem, & cōcessa minori, negatur cōsequētia: licet enim verū sit, quod non possint res simul coexistere inter se; nam si sunt permanentes, simul essent, & nō essent: si successiue haberent omnes partes simul; non sequitur tamèn ex hoc, quòd non possint simul coexistere vni tertio, nempe in æternitate; nam non coexistunt realiter æternitati; nisi in sua differentia temporis, in qua sunt; æternitas enim, quæ ambit simul omnes diuersas partes temporis futuri: facit, quòd in ordine ad se, nimirum æternitatem, futura diuersorum temporum coexistunt: licet simul in ordine ad se ipsas coexistere nequeant; eò quod in ordine ad se ipsas diuersas habent temporis mensuras, quæ simul esse non possunt.

Urgebis II. Quod non habet nihili sui, idest in se est nihil, nec vi-
 habet durationem; non potest durationi alienæ coexistere; nam
 xistere alteri præsupponit propriam existentiam; sed Antichristus
 ab æterno nihil fuit, nec fuit in se; ergo nequit coexistere æterni-
 , nec fuit realiter coexistens Deo ab æterno. *Respondeo* concedendo
 iorem; nam coexistentia præsupponit ex necessitate existentiam, ut
 imus supra, & id, quod coexistit alteri; supponit, quod existat in
 distingo tamèn minorem, sed Antichristus v. g. ab æterno nihil
 , nec existit in se, si ly nihil fuit, nec existit in se; dicit ordine m
 tempus præsens, concedo; si verò dicit ordinem ad æternitatem,
 go minorem, & consequentiam; ex eo enim, quòd de præsentì, vel
 undum tempus præsens, non existunt modò futura; non potest infer-
 quòd neque existant in æternitate pro tempore futuro: est sicut
 per, præ oculis habenda, hæc doctrina; quòd sicut pro hoc nunc,
 existunt futura in æternitate: ita pro hoc nunc, non coexistunt Deo
 æternitate; si autem existunt in æternitate pro tempore futuro, quod
 nunc ambit æternitas; ita coexistunt Deo in æternitate pro tempo-
 futuro, quod iam nunc æternitas continet. Vnde licet res creatæ ab
 æterno non extiterint in se ipsis; quia adæquatè non mensurantur res
 æternitate: ut diximus in responsione ad argumentum Scoti; coex-
 erunt tamen Deo pro tempore, quo postea futuræ erant.

Urgebis III. Loca futura non coexistunt immensitati; nam immensitas
 Dei non fuit ab æterno replens loca futura; ergo neque tempora fu-
 a coexistunt æternitati. *Respondetur* negando consequentiam, dispa-
 as est; quia præteritum, & futurum sunt per se differentie durationis;
 sic necessariò continentur sub infinita duratione: præcipuè si sit tota
 nul; sicut est æternitas; at verò præteritum, & futurum nullo modo
 nt differentie loci.

Urgebis IV. Si futura coexisterent æternitati; sequeretur, quòd res
 producerentur; nempe semel in æternitate, & semel in se ipsis. *Re-*
ndetur negando sequelam; sicut enim res sunt in æternitate, secundum
 ud tempus, quo habuunt esse; ita producuntur in æternitate se-
 ndum illud tempus, quo producuntur in esse. Tunc autem sequeretur
 a duplex productio; si res prius essent in æternitate, quam in tempo-
 suo; ita ut ideo in tempore suo essent; quia per anticipationem præ-
 illerent in æternitate; quòd est falsum, ut supra visum est.

Urgebis V. Si futura essent præsentia æternitati; sequeretur, quòd es-
 nt simul vera duo contradictoria; nempe *Antichristus existit*, *Antichri-*
us non existit; quia essent simul in actu æternitati, existentia, & eius
 negatio. *Respondetur* negando sequelam; tunc enim convinceret argu-
 entum; si existerent æternitati per mutuam adæquationem ad ipsam,
 per æternitatem sibi intrinsecam; sed quia coexistunt æternitati, per
 tensionem æternitatis ad ipsam, ideò nullam habet vim.

Nota hic I. Pro maiori claritate huius quæstionis; Quod aliud est dicere: *Futurum est præsens realiter ab æterno*, aliud verò *futurum est præsens Deo realiter ab æterno*; primum enim est falsum; quia significat durationem æternam eidem futuro intrinsecam; secundum verò importat præsentiam respectivam ad Deum. II. Est maximum discrimen inter æternitatem creatam, & incretam; eternitas creata est æterna duratio ipsarum creaturarum; in quo sensu non sunt futura ab æterno præsentia eternitatis; æternitas autem increta est duratio ipsius Dei, qua sunt futura realiter præsentia æternitati. III. Angelus per ævum non potest cognoscere futura contingentia; quia cognitiones, quas Angelus habet de creaturis; mensurantur tempore discreto, quod successionem habet; cui propterea ea, quæ sunt successivè tempore nostro, non sunt præsentia, nec ea, ut præsentia potest intueri. IV. Ad hoc, ut futurum dicatur præsens æternitati; non requiritur, quod in ea producat; sed sufficit, quod eius productio, quæ erit in tempore, sit præsens in æternitate. V. Non valet dicere: Existere ab æterno repugnat rebus temporalibus, secundum mensuram propriam, & durationem ipsorum; ergo nec eis poterit competere ratione mensuræ superioris; Argumentum enim, hoc, pendet ex illo alio, nempe, quod Nullum prædicatum potest competere rebus in mensura superiori, quod illi repugnat in propria mensura: quod est verum quantum ad prædicata essentialia, & absoluta, vel quæ non conveniunt rei ex modo essendi, quem habet in mensura superiori; non autem quantum ad prædicata accidentalialia, vel quæ conveniunt rei, ex modo essendi, quem habet in mensura superiori.

Viso igitur, quod futura omnia, quæcumque sint; sunt realiter, & physicè æternitati coexistentia, secundum suas proprias, & reales præsentias; resoluendum remanet principale quæsitum huius quæstionis, quod erat; An physica, & realis præsentia futurorum contingentium, in æternitate sit necessaria, ut Deus habeat de illis intuitivam notitiam; licet non certam, & infallibilem; quia hæc habetur à decreto divino; ut infra videbitur. Probatur pars affirmativa; quia cognitio intuitiva, debet terminari ad obiectum physicè, & realiter existens in aliqua duratione; & non sufficit, quod terminetur ad rem obiectivè, & intentionaliter præsentem intellectui: aliter non differret cognitio intuitiva ab abstractiva; sed futura non existunt ab æterno in propria duratione; ut est de Fide; ergo necesse est, ut existant, & sint præsentia in æternitate; adhuc, ut de illis habeat Deus intuitivam notitiam. Intuitiva igitur cognitio habetur per physicam, & realem præsentiam futurorum contingentium in æternitate; cognitio autem certa, & infallibilis ipsorum, habetur per decretum: ut melius infra; nam si per impossibile illa futura non coexisterent Deo in æternitate; adhuc tamen ab illo possent certò, & infallibiliter cognosci in suo decreto efficaci: ut patet in futuris conditionatis, quorum conditio nunquam purificabitur, quæ quam-

is non sint præsentia in æternitate, defectu conditionis, quæ nunquam ponetur; adhuc tamèn cognoscuntur certò, & infallibiliter à Deo in decreto conditionato, vt clarius videbitur.

Ratio igitur à priori, ob quam Deus intuitiue cognoscit futura: est præsentia rerum in æternitate, ex parte ipsius æternitatis continentis ipsa futura, vt sibi coexistentia; taliter, vt ista causalis est vera; *Quia æternitas continet futura, vt sibi coexistentia, Deus ea intuitiue cognoscit in se ipsis, & in suis proprijs existentijs, cum æternitas ipsa futura contineat* vnde obiectum primarium illius cognitionis intuitiue futurorum, non est aliquid creatum: nec sunt res ipsæ, quæ ab æternitate continentur; sed est aliquid increatum; scilicet ipsa æternitas continens futura.

Nota, quòd ex eo quòd Deus intuetur futura; vt sibi in sua æternitate præsentia: non sequitur ex tali Dei visione tolli, aut lædi libertatem; nam Dei visio, siue intuitio, secundùm hanc rationem est pura intuitio speculatiua illius actus liberi, siue illorum contingentium; ergo vt sic, non est causa eorum, nec aliqua prioritate illa futura antecedit, nec aliqua ratione præcedit causalitatem arbitrij super talia futura: vnde sicut illa præscientia præsupponit ipsum futurum, quod intuetur; ita præsupponit ipsius libertatem; ergo talis præscientia nullo modo lædit libertatem illorum futurorum; imò illam præsupponit, & illam intuetur: vult enim infinita efficacia diuinæ voluntatis; vt non solum infallibiliter futura sint; sed simul, quòd contingentia sint; & vtrumque causat; & ad vtrumque causas secundas contingentes mouet.

Dices, Si aliquis ex hoc antecedenti, *Deus v.g. scit Antichristum futurum*: inferret hanc consequentiam; ergo *Antichristus erit*: benè inferret; sed antecedens est necessarium absolutè, & simpliciter; ergo, & illud consequens; ergo futura amittunt libertatem, & contingentiam ex præscientia Dei. Respondetur, quòd hæc propositio; *Deus scit Antichristum futurum*; *Adam peccaturum*; & similes de futuro contingenti; non est absolutè, & simpliciter necessaria ex se, quia non est necessaria ex rationibus terminorum; sicut etià necessaria, *homo est animal*, *homo est rationalis*, & similes: Vnde dicit D.Th. 1. p. quæst. 14. artic. 13. ad 2. *Si dicam, Deus scit aliquid, illud erit, consequens intelligendum est prout subest diuinæ scientiæ, scilicet prout est in sua præsentia, & sic est necessarium, sicut & antecedens*. Vbi docet, consequens esse necessarium, sicut & antecedens; sed constat consequens non esse necessarium absolutè ratione terminorum; ergo neque erit hoc modo necessarium antecedens. Secundò potest dici, quòd illæ propositiones sunt in se ipsis necessariae, ex suppositione immutabilitatis actus diuinæ scientiæ; semper immutabiliter cognoscens rem præsentem; quia semper ei præsens est. Vltimò nico, quòd absolutè sunt liberae; quia absolutè, & simpliciter fuit liberum Deo velle, Antichristum v.g. esse; quia absolutè libere Deus voluit Antichristum producere, & absolutè libere illum in tempore producere: er-

go absolutè, & simpliciter fuit liberum Deo ipsum sciuisse, aut scire futurum: & consequenter hæc propositio; *Deus sciit Antichristum futurum*; fuit absolutè libera in Deo.

Aduerte, quòd cognitio Dei, qua creaturæ producuntur, est prior existentia ipsarum prioritate naturæ, seu causalitatis; non verò prioritate temporis, seu durationis: & licet specificatiuum cognitionis puræ speculatiuæ sit prior ipsa; non tamen specificatiuum cognitionis practicæ: cuiusmodi est cognitio diuina, respectu existentiae creaturarum.

Utrum Deus cognoscat futura contingentia, in decreto efficaci sua voluntatis?

LOquimur de futuris contingentibus absolutis, liberis, & conditionatis: agendum primò de absolutis, & liberis; & postea de conditionatis. Sed oportet, vt clarè procedamus, prænotare in vestibulo quæstionis, quòd loquimur in præsentia de decreto ex natura sua, & propria virtute efficaci; antecedenter ad ipsum effectum contingentem, & determinationem eius: quòd prædeterminans appellatur; Non verò de decreto indifferenti, quòd non præbet causis liberis concursum determinationum, & causatiuum determinationis illarum; sed solum indifferentem, & ab illis determinabilem; saltèm quantum ad speciem actus: nam professores scientiæ mediæ, docent determinationem causæ liberæ esse à Deo, antecedenter præuisam per scientiam mediam: quid autem sit hæc scientia media: Et vtrum sit admittenda; inferius ad hominem, pro coronide huius tractatus, examinabitur.

II. Est prænotandum, quòd sensus quæstionis est: vtrum decretum prædeterminans deferuiat, vt medium, in quo Deus futura contingentia, & libera certò cognoscat. Ad quòd intelligendum, & decidendum, oportet obseruare, quòd adhuc vt aliquod se habeat, vt medium ducens in cognitionem alterius: oportet primò, quòd habeat infallibilem cōnexionem cū eo. Secundò Vt illud prioritate saltèm naturæ, & causalitatis antecedit. Hæc autem prioritas naturæ, dicitur prioritas *de quo*, seu causalitatis: ad differentiam prioritatis durationis, quæ dicitur prioritas *in quo*.

Dico igitur: futura contingentia, & libera non cognoscuntur à Deo: nisi in determinatione suæ diuinæ voluntatis, seu decreto efficaci: vel in essentia, & omnipotentia diuina, vt per tale decretum determinata. Hæc conclusio est iuxta mentem S. P. Augustini; eam etiam clarissimè docet D. Thomas existimans Deum cognoscere futura contingentia, non solum in præsentia, quam habent in eternitate. sed etiam in suo decreto; ait enim 1. contra gentes cap. 68. *Deus scit nostras voluntates* (id est volitiones) *videndo suam voluntatem*. Hanc sententiam defendunt etiam communiter omnes Thomistæ.

Hæc conclusio remanet I. Probata ex dictis: Eo enim ipso, quod datum est, Deum non posse certò cognoscere futura contingentia, libera ante decretum: neque in supercomprehensione causarum secundarum: neque in suis Idæis: neque in decreto, ut futuro: neque deinde in eorum veritate obiectiva: sequitur Deum debere illa cognoscere in decreto efficaci suæ voluntatis, quod efficit liberam nostræ voluntatis determinationem, & efficaciter applicat voluntatem (ad opandum: Vnde cum omnibus actibus eius liberis habet infallibilem, & inflexibilem nexum, & eos prioritate naturæ antecedit. Vnde ex hoc patet, quod tale decretum habeat totum id, quod requiritur ad rationem medij, ducentis certò, & infallibiliter in cognitionem talium futurorum; quod non præstant decreta indifferentia, quæ supponunt prædeterminationem nostri consensus per scientiam mediam; nam cum supponant reversionem futuri consensus, & determinationem voluntatis humanæ, illam non causant: nec per consequens prioritate naturæ, & causationis antecedunt: & sic non se habent, ut medium, in quo Deus certò, infallibiliter talia futura cognoscat.

Ostenditur II. eadem veritas; quia per D. Thomam Deus cognoscitur in se ipso; sicut in prima causa effectiva eorum; nam explicans Thomas locum S.P. Augustini in lib. 83. *questionum*, in quo habet, quod Deus nihil extra se ipsum intuetur: docet Angelicus quod id, quod est extra se ipsum, non intuetur, nisi in se ipso: Nam contingens, ut contingens, & ut ad utrumlibet, & non determinatum; pro ut scilicet est in suis causis contingentibus, non determinatis ad illius productionem; non subditur pro certitudine alicui cognitioni: unde sequitur, quod Deus cognoscat futura in se ipso; sicuti in prima causa effectiva eorum; sed Deus est causa efficiens eorum per suam divinam voluntatem, ut patet per D. Thomam; ergo in sua divina voluntate sicuti in prima causa, omnia futura contingentia cognoscit; hæc enim est prima radix certæ cognitionis ipsorum: & sic debent cognosci in determinatione suæ divinæ voluntatis, qua voluit futura illa fieri, si bona sunt, vel non, si permittit illa fore, si sunt mala.

Colliges ex his I. Quod per D. Tho: duplex modus cognoscendi futura contingentia, & libera tribuitur Deo. Primus est per determinationem suæ voluntatis, tanquam prima causa, & radix contingentia, & certitudinis. Secundus per intuitum, quo fertur in ea, ut sibi in æternitate præsentia.

Colliges II. Quod bene conciliatur infallibilitas divinæ voluntatis cum libertate, & contingentia rerum; quamvis Deus cognoscat futura contingentia, & libera in decreto efficaci, & absoluto: fundamentalis autem ratio talis concordia petitur ex efficacia voluntatis divinæ, quæ attingit non solum substantiam nostrorum actuum; sed etiam modum, & determinatam, qui reperitur in illis; ut docet D. Thomas: præsertim i. par.

quæst. 19. art. 8. in corpore, & in responsione ad secundum, ubi sic habet: Ex hoc, quod nihil voluntati diuinæ resistit, sequitur, quod non solum fiant ea, quæ Deus vult fieri, sed quod fiant contingenter, vel necessario; quia sic vult fieri Deus. Sed hoc fufus videbitur infra, de Voluntate Dei.

Remanent hic vltimò examinanda futura conditionata: An scilicet cognoscantur in determinatione, & decreto diuinæ voluntatis: id est, vtrum in Deo verè dentur decreta circa aliqua futura conditionata, quæ nunquam erunt: sed ad hoc concludendum, oportet prius prænotare: quod decretum aliud est absolutum, aliud conditionatum; decretum conditionatum, aliud est conditionatum ex parte actus, seu subiecti; aliud verò conditionatum ex parte obiecti. Decretum conditionatum ex parte actus, vocatur decretum potentiale, siue possibile, per quod solum explicatur connexio actus cum actu, huiusmodi esset hoc decretum, si Deus diceret, *Si ego voluero alium mundum, ipsum gubernabo*, vel *Si ego voluero hominem conuertere, ipse conuertetur*. Decretum conditionatum ex parte obiecti, est de obiecto conditionali; taliter, vt conditio non cadit supra actum diuinæ voluntatis; sed supra obiectum illius: quinimò actus volendi in se firmus, & determinatus est; si tamèn ex parte obiecti apponeretur conditio: huiusmodi esset illud decretum, *Ego sumerem humanam naturam impassibilem, si Adam non peccasset*: eodem modo est discurrendum de decretis absolutis: nam decretum absolutum ex parte actus, & ex parte obiecti est hocscum Deus decernit efficaciter hominem saluare: in his non est immorandum, cum præsens quæstio procedat de decretis conditionatis: Vtrum scilicet dentur in Deo decreta conditionata ex parte obiecti, & absoluta ex parte actus, in quibus ipse certò cognoscat futura conditionata, tum scilicet illa, quæ in scriptura reuelantur; tum etiam illa, quæ in scriptura nõ traduntur.

Aduerto hic me supponere in Deo dari decreta, circa aliqua futura conditionata, quæ nunquã erũt: hoc enim manifestè liquet ex illo 4 Reg. 13. *Si percussisses quinquies, vel sexies, siue septies, percussisses Syriam vsque ad consummationem*: item ex alio Isaia 1. *Si volueritis, & audieritis me, bona terre comedetis, quod si nolueritis, & me ad iracundiam prouocaueritis, gladius deuorabit vos*: item ex 1. Regum cap. 13. ubi Dominus per Samuelen ita dixit Sauli, quia sacrificauerat, *Stultè egisti, nec custodisti mandata Dei tui, quæ præcepi tibi. Quod si non fecisses, iam nunc præparasset Dominus Regnum tuum super Israel in sempiternum, sed nequaquam regnum tuum ultra consurget*: ubi constat habuisse Deum decreta de obiectis, & futuris conditionatis, quæ nunquã futura erant: his igitur præhabitis pro resolutione quæstionis: breuiter.

Dico, Deum cognoscere futura conditionata, quæ in Scriptura reuelata sunt in suo diuino decreto absoluto ex parte actus, & conditionato ex parte obiecti. doceat hanc conclusionem Theologi, & etiam plures Theologi ex Societate: & Probatur, quia sicuti Deus videt primo, &

per

er se res existentes in aliqua differentia temporis ; ita secundariò videtur illa , quæ reuera existerent ; si talis conditio apponeretur ; nam talia futura conditionata supposito decreto diuinæ voluntatis , quo Deus voluit , vt essent ; si talis conditio apponeretur ; iam habent certam , & infallibilem veritatem obiectiuam , quæ repræsentatur diuino intellectui ; ita certò , ac si reuera existerent in aliqua differentia temporis ; ergo per illam scientiam secundariò cognoscuntur , per quam cognoscuntur futura contingentia , & libera in aliqua differentia temporis existentia ; sed ita cognoscuntur scientia visionis in suo scilicet decreto ; ergo & illa.

Quòd autem tale decretum , in quo Deus futura ista conditionata cognoscit ; sit absolutum ex parte actus , & conditionatum ex parte obiecti ; ostenditur etiam euidenter ; nam quando Deus talia decreta conditionata pronuntiabat ; vt certò , & infallibiliter futura ; vel eius voluntas erat determinata ad illa ponenda , vel non ? Si primum , habeo intentum ; talis enim determinatio , cum sit libera , & non necessaria , erat aliquod liberum decretum : & cum non esset absoluta , sed pendens ex aliqua conditione ; non erat decretum absolutum , sed conditionatum , ex parte obiecti . Secundum non potest dici ; si enim voluntas diuina erat omninò suspensa , & indeterminata ad illam productionem ; illi etiam effectus , qui ab ea pendebant , tamquam à causa , fuissent tunc suspensi , & indeterminati ; cum non possint esse magis determinati , quàm voluntas diuina , à qua pendet illorum determinatio ; ergo frustra Deus pronuntiasset illos effectus , vt certos , & determinatos , ac infallibiliter futuros ; si posita fuisset aliqua conditio .

Dices , Futura hæc conditionata cognoscuntur à Deo scientia simplicis intelligentiæ ; ait enim D. Thomas in littera , quòd ea , quæ nec erunt , nec sunt , neque fuerunt ; non cognoscuntur scientia visionis , sed scientia simplicis intelligentiæ ; huiusmodi sunt futura conditionata ; ergo debent cognosci scientia simplicis intelligentiæ ; vel saltem , vt aliqui dicunt , si cognoscuntur , vt possibile , cognoscuntur scientia simplicis intelligentiæ ; si verò , vt futura , cognoscuntur probabiliter , seu coniecturaliter ; sicut reuera sunt . *Respondeo* , quòd quamuis ante decretum diuinæ voluntatis , ordinantis , vt aliquod certò eueniat , si talis conditio apponatur , tam conditio , quàm futurum , non aliter cognosci possit , quàm possibile ; post decretum autem diuinæ voluntatis ; licet conditio sit tantum possibilis veritas autem illorum , non est tantum de possibili , sed de futuro , quod certò esset , si talis conditio apponeretur ; ergo non possunt cognosci per scientiam simplicis intelligentiæ , per quam omne , quod cognoscitur debet esse simpliciter , & absolutè necessarium , supponens aliquod decretum liberum diuinæ voluntatis ; ergo debent cognosci per scientiam visionis , quæ dicit decretum liberum , ex parte actus , & conditionatum ex parte obiecti .

Replicabis , Scientia visionis fertur in existentia extra Deum in aliqua

qua temporis differentia; sed futura conditionata nunquam sunt; fuerunt, vel erunt in aliqua differentia temporis; ergo non cognoscuntur scientia visionis, *Respondetur* distinguendo maiorem scientia visionis fertur in existentia, siue primò, & per se solum, siue secundariò, & per aliud, concedo; semper primo, nego; & concessa minori negamus consequentiam. Deus enim scientia visionis primò, & per se solum videt, quæ sunt fuerunt, vel erunt in aliqua differentia temporis; secundariò vero, siue per aliud videntur à Deo negationes per affirmationes, mala per bona, tenebræ per lucem, &c. Et sic futura conditionata videntur scientia visionis, secundo modo; cum enim futura illa non habeant esse, nec veritatem, nisi, pro vt sunt in decreto illo libero; non debent cognosci, nisi per scientiam, qua Deus illa in decreto intuetur, & suo modo, quasi existentia in illo libero diuinæ voluntatis decreto. Patet ex hoc responsio ad testimonium D. Tho. supra allatum: quando enim, S. Doctor dicit, quòd scientia visionis intuetur ea, quæ sunt, fuerunt, vel erunt in aliqua differentia temporis: tradit id, quod propriè, & per se talis scientia cognoscit; non autem negat, quòd etiam ad illam reducuntur ea, quæ essent in aliqua temporis differentia, ex vi diuini decreti, sic ordinantis, si tales conditiones adhiberentur.

Circa futura conditionata, quæ nunquam futura sunt, nec ex diuinis litteris, nec Sanctorum Patrum interpretatione traduntur, non sunt multiplicanda in Deo tot decreta, quot possunt esse futura ista; cum enim combinationes, quæ ex his conditionalibus exprimuntur, sint in infinitum multiplicabiles; vt de se est manifestum: & cum aliundè infinitum non sit ordinabile ad finem, nec ad diuinam providentiam, quæ omnia ad finem ordinat: sequitur non esse in Deo multiplicanda tot decreta inter se diuersa, siue distincta: vnde sufficit vnum tantum decretum eminentissimum in Deo ponere, quo cognoscit, se nihil determinasse circa illa; & sic certò scit illa nunquam futura esse; sed manere tantum possibile; si enim v.g. statuit Deus, vt ego nunquam volarem, vel nunquam irem ad Indos, & similia; vt quid constituere in eo decretum; si Thomas iret apud Indos, si volaret, &c. per ipsum hoc, vel illud efficerem?

Colliges ex his; decreta conditionata à nobis posita, quæ cognoscuntur à Deo, absoluta ex parte actus, conditionata ex parte obiecti; non esse ridicula, & nugatoria; vt nobis aduersarij obijciunt, nec otiosa, & ad gubernationem rerum inutilia; cum pendeant ex conditione non repugnante in se, sed solum ab extrinseco, & ex aliqua suppositione accidentali: quinimò prudentissima, & summa veneratione digna; cum enim sæpius in scriptura tradantur, vt visum est, ob altissimas rationes sunt explicanda; vel scilicet esse ad increpandam multorum duritiam, vel ad significationem mysteriorum explanandam, vel ad diuinam efficaciam ostendendam, vel propter, alios altissimos diuinæ providentiæ fines.

Nota

Nota hic I. Non est necessarium, quòd decreta conditionata ; quæ in Deo admittimus, inferant mutationem realem, & physicam in creatura, pro aliqua differentia temporis ; vt etiam ipsi professores scientiæ mediæ debent fateri : nam decretum, quod ipsi admittunt in Deo, concurrenti cum voluntate creata ad actus liberos concursu generali indifferenti, si ipsa vult ; quamuis sit respectu eorum, qui nihil operantur ; nullam mutationem physicam, & realem in ea ponit : cum per illud nulla fiat realis mutatio. Sufficit igitur, quòd huiusmodi decreta causent in obiecto mutationem extrinsecam, & obiectiuam, illud transferendo à statu meræ possibilitatis ad statum futuritionis conditionatæ, à quo statu omnino abstrahunt, quæ sunt purè possibilis. II. Bonitas futura, sub conditione, est sufficiens ad terminandum actum voluntatis præsentem ; vt constat in decreto absoluto, quod defacto existit ; quamuis bonitas illius obiecti defacto non existat, sed exitura sit : quando igitur dicitur, quòd obiectum voluntatis est bonum : est intelligendum de bonitate præsentis, vel futura, siuè absolute, siuè conditionatè ; non autem, de bonitate præsentis præcisè sumpta : & licet potentia visua ob suam materialitatem non habeat pro obiecto coloratum absens, vel futurum ; sed tantum præsens ; secus autem voluntas : quia cum hæc sit potentia spiritalis, & immaterialis, habet pro obiecto non solum obiectum præsens, & existens ; sed etiam absens, & futurum : vt patet in actu spei, & desiderij, qui fertur in bonum futurum, & possidendum, non verò defacto habitum, & possessum.

III. Circa futura conditionata, quæ sunt intrinsecè mala, & peccata ; non est in Deo decretum conditionatum, quòd illa vellet, vel causaret, si tales adhiberentur conditiones ; in quo decreto Deus certissime omnia cognoscat : sed tantum decretum permissiuum, quo illa tunc permitteret. Vnde Thomistæ volentes explicare medium, quo Deus peccata futura cognoscat, dicunt : peccatum importare duo, vnum de materiali, entitatem scilicet physicam, & positiuam actus mali, & peccaminosi, & aliud de formali, ipsam nempe malitiam, & deformitatem ; siuè de reliquo peccatum consistat in solo priuatiuo, siuè in positiuo, vt connotante priuationem, quod in tract. de peccatis videbitur. Et sic dicunt, quòd quantum ad id, quòd est malitiæ, & defectus moralis, siuè priuationis ; cognosci à Deo in decreto permissiuo ; nam defectus, & malitia, siuè priuatio, habet infallibilem nexum cum decreto permissiuo ; sicut & illud, quod in illis est entitatis, & bonitatis transcendentalis ; infallibiliter connectitur cum decreto concurrenti positiuè ad entitatem actus mali, & peccaminosi ; ergo illud, quod est defectus, & malitiæ cognoscitur à Deo in decreto permissiuo ; quòd verò est in illis entitatis, & bonitatis transcendentalis cognoscitur, & videtur à Deo in decreto positiuo. Sed hæc omnia clarius, & distincte examinantur in tract. de Voluntate Dei ; ideo hæc pauca pro nunc sufficiant.

IV. Quando sacra Scriptura circa futura conditionata solum coniecturalem Deo notitiam asserere videtur, solum intelligitur, Deum loqui nostro assatu; ut indicaret, se liberum hominis arbitrium seruare: ut fuit illud *Matt. 11. Si in Sodomis facta fuissent virtutes, fortè mansissent usque in hanc diem.*

Examinatur scientia media.

Certa, & infallibilis futurorum contingentium notitia, quam Deus habet in suo decreto, & determinatione voluntatis diuinæ, cogit nos examinare celeberrimam illam quæstionem de scientia media, quæ à 130. circiter annis cepit in priuatis, & publicis concertationibus publicari, & defendi; & à 60. ferè annis inter PP. Societatis, & Thomistas versari: Ex hac enim quæstione pendent non solum controuersiæ, quæ agitantur circa futura contingentia conditionata; sed etiam circa diuinas prædefinitiones, physicam prædeterminationem, gratiam Dei, & Prædestinationem ante præuisa merita: vnde ut debito ordine procedamus; semper tamèn breuitatem, & claritatem præoculis habentes; videndum primò erit, quid sit hæc scientia media, & postea, an sit admittenda.

Et incipiendo à nomine, vocatur hæc scientia, *Media*, vel quia mediatur inter scientiam simplicis intelligentiæ, & visionis; vnde dicunt Deum per scientiam simplicis intelligentiæ cognoscere possibilia, per scientiam visionis existentia, & per scientiam mediam futura conditionata. *Secundo*, vel quia est medium diuinitus inuentum, (ut ipsi dicunt) ad conciliandam rerum contingentiam, & libertatem creatam cum Dei certâ, prædestinatione, & vocatione. *Vel tertio* dicitur, media, quia se habet, tamquam medium, cognoscendi futura conditionata; sed quid sit de hoc.

Quamuis in varios dicendi modos, in explicanda hac scientia media eius Professores se extendant; conueniunt tamèn omnes in hoc, quòd hæc scientia media est certa, & infallibilis cognitio ante diuinæ voluntatis decretum volentis, vel permittentis, quòd hoc, vel illud fieret; si talis, vel talis conditio poneretur. Et sic dicunt, quòd videtur Deus hac scientia media, & est ipsi necessaria, quæ certò cognoscat ante decretum, suæ voluntatis, quid liberum arbitrium acturum sit, si in tali, vel tali ordine, & occasione collocetur: formalia autem verba P. Molinæ declarantis, quid sit scientia media sunt hæc: postquam enim explanauit, quid sit scientia naturalis in Deo, quid verò libera; loquens de scientia media, hæc habet: *Tertiam denique mediam scientiam, quæ ex altissima & in scrutabili comprehensione liberi arbitrii cuiuscumque in sua essentia insitus est, quid pro sua innata libertate, si in hoc, vel illo, vel etiam infinitis rerum ordinibus collocaretur, acturum esset, cum tamen posset, si vellet facere re ipsa oppositum.* Con-

Conuenit scientia media in aliquo cum scientia, quam Thomistæ agnoscunt in Deo circa futura conditionata, & est: quod utraque scientia est certa, & infallibilis; non autem coniecturalis, & probabilis. Differunt autem primò in hoc, quòd scientia media est prior, & antecedit decretum actuale, & exercitum; illa verò est in decreto fundata. Secundo, quia volunt Professores scientiæ mediæ, quòd hæc sit naturalis, & necessaria ex parte subiecti, libera ex parte obiecti; illa verò est libera ex parte subiecti, & ex parte obiecti; supponens liberum decretum diuinæ voluntatis: Alij etiam assignant aliud discrimen inter utramque scientiam, quòd scientia media est speculatiua, cum non faciat, sed supponat suum obiectum; scilicet liberum consensum voluntatis humanæ sub conditione; illa verò est eminenter speculatiua, & practica,

An detur scientia media?

EX dictis colligitur idem esse inquirere, an detur scientia media? ac dicere utrum Deus ante absolutum decretum, seu propositum voluntatis suæ, vel volentis bonum, vel permittentis malum; certò cognoscat, quid creatum arbitrium acturum sit; si intali, vel tali rerum ordine collocetur, cum solo concursu ex parte Dei indifferenti ad opera naturalia; vel cum tali, vel tali supernaturali excitatione ad opera supernaturalia: Adhærent huic sententiæ ferè omnes PP. Societatis, mordicis defendentes Deum cognoscere actus liberos conditionatè futuros, v.g. conuersionem Petri, si ponatur in talibus occasionibus, & circumstantijs; prius quam diuina voluntas habeat decretum absolutum ex parte actus, & subiecti, & conditionatum ex parte obiecti; quo definat, & determinet talem conuersionem, si Petrus in his, vel illis occasionibus, & circumstantijs constituatur.

Hæc sententia exploditur, & impugnatur vnanimi consensu ab omnibus Thomistis, & à pluribus alijs Theologis extrà scholam D. Thomæ; nec non ab omnibus totius nostræ Congregationis lectoribus, quibus ego adhærens illam reijcio. *Primo*, quia apertissimè hæc scientia media est contra mentem S.P.N. Augustini, cuius doctrina in materia de Gratia, & Prædestinatione, approbata est, vt Catholica ab Ecclesia Dei: vt constat in Epistola Hormisdæ Papæ ad Possessorem Episcopum; & ex Epist. Ioannis ad Abienum Senatorem. S.P. igitur semper est constans in neganda præscientia, qua Deus cognoscat de homine, quid facturus sit sub quibusuis conditionibus constituatur; ait enim *lib. de Prædestin. Sanct. cap. 10. Prædestinatione quippè Deus ea præscit, quæ fuerat ipse facturus, & infra: Quando promissit Deus Abraha fidem gentium non de nostræ voluntatis potestate, sed de sua prædestinatione promissit, promissit enim quid ipse facturus erat, non, quod homines: idest sicut Deus non potest præscire futurum, nisi ille facturus sit illud; ita nisi prædestinet,*

& decernat se facturum illud; ergò per S. Patrem prædestinatio non supponit scientiam exploratricem consensus; quia ipse consensus subiacet prædestinationi, & decreto, & illud subsequitur, ergò antequam Deus habeat decretum prædestinationis talis consensus, non est futurus; nec subinde potest prævideri, vt talis.

Item S. Doctor *lib. de Prædest. Sanctorum cap. 17.* docet nulla posse Deum præscire futura, nisi in decreto; siue sint absoluta, siue conditionata; ait enim: *Hæc est immobilis veritas prædestinationis, & gratiæ; nam quid est, quod ait Apostolus, sicut elegit nos in ipso ante mundi constitutionem? quid profectò, si propterea dictum est; quia præsciuit Deus credituros, non quia facturus fuerat ipse credentes; contra istam præscientiam loquitur Filius Dei, dicens, Non vos me elegistis, sed ego elegi vos: Electi sunt itaque ante mundi constitutionem ea prædestinatione, qua Deus sua facta præsciuit.*

Si præscit ergo Deus per S. P. August. ante suum decretum fidem credentium; ergò non eligit ipse, vt credant; sed ipsi credendo eligunt ipsum; ergò etiam à pari, si Deus præscit, vt dicunt aduersarij ante suum decretum consensum liberum, quem ego daturus sum vocationi; ergò ego eligo vocationem, non me Deus eligit ad vocationem; sed primum contradicit scripturæ, & D. P. August. ergò & secundum. Constat igitur fuisse semper reiectam à S. P. August. hanc scientiam mediam, sæpissime à Pelagianis ipsi propositam; vnde euidentissimè apparet hanc scientiam non fuisse adinuentam, vt aliqui perperam dicunt à P. Molina; sed solum ab ipso suscitaram; porius autem dicendum puto, eius inuectores fuisse Pelagianos; vt refert idem S. P. *epist. 105.* & etiam Arianos, vt constat ex Epistola Alexandri Episcopi Alexandrini ad Alexandrum Constantinopolitanum, quæ habetur in Concilio Niceno *lib. 1.* Ariani enim negabant Christum Dominum esse Filium Dei naturalem, sed adoptiuum, per gratiam; & per consequens culpæ capacem; & cum illis obijceretur: vnde esset, quod S. Petrus, & Paulus, vel alij non fuerunt facti Filij Dei, eo speciali modo, quo dicebant factum fuisse Christum Dominum? Respondabant, quia præuidit Deus Christum non esse peccaturum, si crearetur. Potest ne clarius explicari scientia media? Videant, quæso, quomodo Ariani ad eorum errorem defendendum apertissimè confugebant ad scientiam mediam illius futuri conditionati.

Reijcitur II. Hæc scientia media, quia est contra mentem Angelici Preceptoris, qui accuratè, & diffusè loquens de scientia Dei, & de omnibus, quæ ad diuinam cognitionem spectant; nunquam mentionem facit huius scientiæ mediæ, siue præscientiæ, quam PP. Societatis affirmant esse necessariam in Deo; Quinimò S. Doctor eam expressè damnat, *p. par. quæst. 23. art. 5. in corp.* vbi retulit hanc scientiam mediam, siue præscientiam, & eius obiectum, cum dixit: *Aliquos asserere, Deum dare gratiam alicui, & præordinare se daturum: quia præsciuit bene usurum.*

Rur-

Rurfus idem S. Thom. impugnat apertè scientiam mediam: ut fateatur ipse Molina *inquæst. 6. de verit. art. 3.* docens, certitudinem prædeterminationis non inniti certitudini solius præscientiæ, ait enim: *Sic enim dicendo, non diceretur prædestinatus differre à non prædestinato ex parte ordinis; sed tantum ex parte præscientiæ euentus; & sic præscientia esset causa prædeterminationis; nec prædeterminatio esset per electionem prædestinantis, quod est contra auctoritatem Scripturæ, & dicta Sanctorum: unde præ certitudinem præscientiæ, ipse ordo prædeterminationis habet infallibilem certitudinem.* Relinquo plura alia testimonia clarissima istius S. Doctoris breui-ratis gratia; & solum peto I. ut præ oculis habeatur id, quod idem S. Doctor docet: scientiam scilicet Dei respectu futurorum contingentium, subiacere libertati diuinæ voluntatis, idest eius decreto. II. illud, quod docet hic *inquæst. 14. art. 8. ad primum*, & alibi, nempe: non ideo res sciri à Deo, quia futuræ sunt, sed ideo futuras esse, quia sciuntur à Deo. III. illud, quod *p. par. quæst. 19. art. 8.* docet, quod efficacia diuinæ voluntatis est prima causa, & prima radix omnis contingentiae. Vltimò S. Doctor ubique diuinam scientiam diuidit in scientiam simplicis intelligentiæ, & visionis; idest, in naturalem, & liberam; ergo hanc scientiam reprobatur quia nec est simplicis intelligentiæ, nec visionis, nec ad illarum aliquam reduci potest; ut rationibus demonstrabitur.

Impugnatur scientia media rationibus.

Solet hæc scientia media impugnari à Thomistis pluribus rationibus, tum à priori, tum à posteriori: scilicet ex innumeris, quasi inconuenientibus, quæ sequuntur illa admissas ostendenda tamen erit à nobis eius impossibilitas summarè, ne lectoribus contra propositum molestiam afferamus: & I. Puto, reiiciendam esse hanc scientiam è medio hac ratione à priori. Futurum conditionatum nullam habet certam, & determinatam veritatem, per quam possit certò cognosci; nisi illam, quam habet à diuino decreto; ergo non potest cognosci per scientiam mediam; ideo enim, dicunt ipsi aduersarij, certò cognoscit diuinus intellectus futurum; quia illud est determinatæ veritatis; ergo debent assignare, à quo habeat in illo priori rationis, ante diuinam cognitionem, hanc certam determinationem veritatis; sed non potest esse causa secunda; quia non ponitur determinata infallibiliter ad actum: neque potest voluntas se primò determinare ad illum actum; quia non est primum suæ actionis principium: neque habet veritatem in se ipso; quia antequam intelligatur extrà suas causas, & realiter existens, non est in se ipso; quia solum consideratur, ut futurum: neque habet veritatem in decreto, quo Deus statuit cum libero arbitrio concurrere, si in tali, vel tali ordine colloceatur; quia hæc non est aliud; nisi decretum dandi concursum, si nempe voluntas humana voluerit operari; sed talis

concurfus est indifferens ad hanc, vel illam actionem: & in re indifferentia ad duo, vnum determinatè non cognoscitur; vt visum est supra; ergo habet determinatam veritatem in decreto voluntatis diuinæ; ergo non potest cognosci per scientiam mediam.

Reijcitur 2l. ex ipsa definitione scientiæ mediæ, quæ per aduersarios: Est certa, & infallibilis cognitio futuri conditionati ante decretum; sed hoc est falsum; quia ante decretum, & determinationem diuinæ voluntatis, non potest certò cognosci futurum aliquod, siue absolutum, siue conditionatum: Quod sic ostendo; Ponamus duo futura conditionata, nempe præuidisse Deum ante decretum suæ voluntatis, quòd si Petrus v.g. sub his conditionibus, & circumstantijs constituitur, liberè loquatur: & Paulus eodem modo affectus in anima; & corpore, & sub eisdem omninò conditionibus constitutus, non loquatur: sed hoc posito nulla potest assignari ratio ex parte voluntatis vtriusque; quare magis vnum, quàm aliud cognoscatur: idest quare potius loquatur Petrus, & non Paulus; cum in vtroque eadem omninò ratio sit visa ad loquendum; nec diuersitas aliqua in illis inueniatur: si vero dicunt, quòd est sola libertas, in quantum Petrus est pro sua libertate loquuturus, non verò Paulus: admitterent apertam principij petitionem; quia dicunt Petrum esse loquuturum; quia est loquuturus; ergo scientia media non est certa, & infallibilis cognitio de futuro conditionato: cum ex parte causatum, & conditionum nulla sit diuersitas vera; vt vnus actus magis, quàm alius ex vi eatum certò cognoscatur; cum nulla sit maior ratio determinatiua in vna voluntate, quàm in alia. *Recurrendum* igitur solum est ad diuinum decretum, cum ipsum sit prima causa, & radix cuiuscumque futuritionis, & determinationis; & per ipsum transeat futuritio conditionata à statu puræ possibilitatis ad statum aliqualis futuritionis: Vnde sicuti nihil potest transire à statu puræ possibilitatis ad statum futuritionis absolutæ, sine decreto absoluto; ita nec futura conditionata possunt transferri à statu meræ possibilitatis ad statum futuritionis conditionatæ, nisi mediante decreto conditionato.

Impugnatur à posteriori hæc scientia media, ex pluribus inconuenientibus, quæ sequuntur illa admissa: Primum enim inconueniens esset, quòd daretur, & poneretur aliquod possibile, per ordinem ad potentiam creatam, quod non sit possibile per ordinem ad potentiam diuinam; quod sic ostendo: Ponamus enim, quòd Deus scientia illa media habeat cognitionem de aliquo futuro conditionato antecedenter, vt concedunt vtrò aduersarij, ad omne decretum diuinæ voluntatis, scum sic: vel est in potestate Dei aliud scire, quàm sciuit, vel non? primum non potest dici; aliter sequeretur, quòd scientia, quam Deus habet de aliquo conditionato, non esset infallibilis; quòd est etiam contra ipsos aduersarios: Si secundum, nempe, quòd non sit in potestate Dei aliud scire, quàm sciuit, sequitur, quòd aliquid esset in potestate hominis, quod non erit in potest-

potestate Dei; nam concedunt ipsi aduersarij; quòd licet non sit in potestate Dei posita illa cognitione de futuro conditionato, aliud per illam scire, quam sciuit; est in potestate hominis facere, quòd Deus aliud sciat, quam re ipsa sciuit, quia videlicet potest homo aliud facere, quam re ipsa facit; ergo aliquod est possibile per ordinem ad potentiam creatam, quod non erit possibile per ordinem ad potentiam diuinam; quia est in potestate hominis, quòd Deus aliud sciat, quam sciuit, quod eadem suppositione præmissa non est in potestate Dei.

Secundò sequeretur enervatio diuinæ omnipotentiae, & dominij; Nam supponamus v. g. quòd Deus p̄r scientiam mediam cognoscat ante decretum suæ voluntatis, quòd si Verbum assumeret naturam humanam, inueniretur in templo in medio Doctorum à Matre: Tum sic, vel potest Deus per suam potentiam facere oppositum, vel non? si primum; ergo scientia, quam Deus habuit de illo futuro, non erat infallibilis; quod ipsi aduersarij non concedunt; si secundum; ergo remanet diminuta diuina omnipotentia, & libertas. Hoc idem argumentum, potest efformari de quolibet futuro, etiam conditionato cum dependentia cuiuscumque conditionis; cum certum sit apud aduersarios, Deum infallibiliter illud cognoscere per scientiam mediam, ante omnem suam liberam voluntatem; & sic non potuit aliud scire, nec immutare aliquid, per quod non esset certò à Deo cognitum illud futurum conditionatum; & consequenter nullam conditionem potuit immutare, per cuius mutationem variaretur illud futurum conditionatum, certò à Deo cognitum per illam scientiam mediam.

Tertium inconueniens esset: Quòd liberum hominis arbitrium esset prima radix, & prima causa suæ determinationis, & in genere suo primum liberum; nam professores huius scientiæ fatentur; quòd antecedente voluntate Dei de constituendo homine in tali rerum ordine: quòd si inflectat arbitrium hominis in hanc, vel illam partem, non prouenit ex eo, quòd id Deus velit ab humana voluntate fieri; sed ex eo quòd voluntas hominis id liberè velit fieri; ergo liberum arbitrium est prima causa suæ determinationis; sed hoc est falsum; quia arbitrij influxus est ens per participationem; ergo verè à primo ente causatur, à quo & participatur; sed causatur à diuina voluntate, cum Deus nihil causet in rebus, nisi per voluntatem suam; ergo prior est diuina voluntas volens, quam ille influxus à creata voluntate fiat; cum causa sit prior suo effectu.

Quartum inconueniens est: Quia per hanc scientiam mediam tolleretur nostri arbitrij libertas; quod sic ostenditur: Scientia media est certa, & infallibilis cognitio, qua Deus videt quòd voluntas creata constituta in tali rerum ordine consentiet v. g. vel sacra sit hoc infallibiliter; ergo voluntas creata constituta sub tali rerum ordine præuidetur infallibiliter operatura; hoc posito sic arguuntur: Ista infallibilis determinatio voluntatis, idest, quòd voluntas se infallibiliter determinet: vel proue-

nit à decreto diuino, vel quia congruè vocatur, in quantum scilicet stat sub talibus conditionibus loci, & temporis, & sub tali humorum temperamento: primum nullo modo concedunt aduersarij, aliter deferent castra, & se subscriberent sententiæ Thomistarum: si secundum; ergo illa determinatio infallibilis est naturalis voluntati, & non libera; quia, locus, tempus, & humorum temperamentum planè res merè naturales sunt: & sic arbitrium esset tractum infallibiliter à forma merè naturali, & antecedente, vt consentiat; quod est naturaliter determinari ad consensum à tali forma naturali; ergo liberè non consentit; & sic eadem via, qua contra diuinam causalitatem liberum creatum arbitrium extollit, illud ita præcipitat hæc scientia media; vt omninò eius libertatem auferat.

Ex hoc sequitur quintum inconueniens: nempe, quòd tolleretur auxilium speciale perseverantiæ necessarium ad perseverandum, & quòd hoc auxilium non esset ex Deo, sed originaliter ab homine. Nam dato æquali auxilio sufficiente ad perseverandum duobus in gratia existentibus, potissima ratio per aduersarios, quare vnus perseverat, & non alius, est, quia recipit vnus auxiliū sufficiens eo tempore, quo præuidetur perseveraturus: quod est dare congruè, & maius beneficium vni quàm alteri; sed quòd auxilium illud sit congruum, vel maius beneficium, oritur ex dispositione hominis, qui sub talibus circumstantijs positus consentit; ergo illud speciale auxilium non erit ex Deo, sed originaliter ab homine ipso, qui sibi facit; quia vult, quòd illud sit auxilium perseverantiæ.

Possent hic adducere plura alia inconuenientia: I. Quòd daretur causa nostræ prædestinationis. Nam per aduersarios fieret secundum præscientiam boni vsus liberi arbitrii; & consequenter ex meritis bonæ voluntatis: II. Sequeretur; quòd prius nos eligeremus Deum, quam quòd ipse eligat nos; quia priusquam intelligatur actus diuinæ voluntatis, quo nos eligit ad gratiam: iam intelligitur Deus per scientiam mediam, præuidisse nos credituros in eum, & perseveraturos vsque in finem: III. Sequeretur; quòd Deus non haberet perfectum, & supremum dominium in voluntates hominum; nam non posset quidquam decernere, aut definire circa nostros actus liberos; nisi quod præcirit, & præuidet per scientiam mediam homines esse innata libertate voluturos: ad quòd acerrimè se opponit D. P. August. dicens, Deum habere cordium inclinandorum omnipotentissimam potestatem; & illum magis habere in sua potestate voluntates hominum, quam ipsi homines: & Deum de ipsis hominum voluntatibus facere, quod vult, & quando vult.

Sed breuitati consulens, ne summarium præfixos breuitatis terminos egrediarur; sufficiat hæc pauca tradidisse: ex quibus faciliè videre est, quibus periculis se exponunt Professores huius scientiæ mediæ; qui nec etiam inter se pacem habere poterunt, contrarijs semper vijs incedentes; quod

quod non est sine magna admiratione prætereundum : Doctores scilicet istos, tam intentos ad conciliandam, & stabiliendam concordiam arbitrij per scientiam mediam cum prædestinatione, & gratia, arma tamen, semper ad inuicem vertisse, & inter se se fuisse discordes: Ludouicus enim Molina, Antesignanus huius scientiæ mediæ restitutor, (non autem institutor, vt aliqui putant,) dicit: nunquam D.P. Augustinum hanc scientiã mediam admisisse: Franciscus autem Suarez inflatis buccis illam S.P. tribuit; quinimò in suis opusculis *lib. 2. de scientia conditionat.* illam à SS. PP. & scholasticis traditam esse contendit; quod efficaciter negat P. Molina, asserendo SS. DD. parum, aut nihil de hac media scientia fuisse loquutos. Pater Molina contendit hanc scientiam mediam, ad scientiam simplicis intelligentiæ esse reducendam. Gabriel autem Vasquez ad scientiam visionis pertinere arbitratur. Pater Suarez *lib. 2. suorum opuscul. cap. 3.* fatetur hoc nomen *scientiæ mediæ* esse nouum, nec in Theologia admittendum: & sic abhorret hanc scientiam mediã appellare, contra omnes eius sectatores. Insuper Gabriel Vasquez admittit in Deo actum prædefiniẽtem actus bonos morales, posita hac scientia media. Quam prædefinitionem constanter negat, tamquam libertatis destructiuam Molina, & Iesius. Franciscus autem Suarius respectu aliquorum actuum admittit. Denique affirmat Molina, Deum per scientiam mediam cognoscere futura, in comprehensione voluntatis humanæ, cognoscendo quid arbitriũ humanum sit acturum, si in tali, & tali circumstantia, & conditione collocetur. Modum autem istum de comprehensione humanæ voluntatis, ostendit Pater Franciscus Suarez non posse subsistere: vnde affirmat illud tale futurum conditionatum certò à Deo cognosci in ipsa veritate determinata obiectiue in illis futuris: contra quem arguit P. Molina, dicendo hunc modum de veritate obiectiua auferre à futuris veram contingẽtiam, & illa necessaria absolutè constituere. Quid adhuc igitur egemus testibus? ipsa mutua in dicendo contrarietas, & discordia defensorum, illius scientiæ mediæ, sũ præscientiæ conditionatæ, maximum relinquit falsitatis exemplum, quæ multicolor est. Sed quidquid sit de hoc, transeamus ad soluenda aduersariorum argumenta.

Afferunt primo loco aduersarij in fauorem scientiæ mediæ plura futura conditionata expressa in pluribus sacræ Scripturæ locis, vt ex illo 1. Regum 23. vbi David consuluit Dominum dicens: *Si tradent me viri Ceilæ in manibus eius* (videlicet Saul,) & *si descendet Saul, responditq; Dominus, tradent.* & plura alia, quæ inferius examinabimur; & dicunt I. Deũ certò cognoscere futura cõditionata; vt patet manifestè ex testimonijs sac. Scripturæ; sed non est alius modus cognoscendi illa; nisi per scientiam mediã; nam non possunt cognosci in decreto prædeterminante, I. Quia multa futura conditionata ex his, quæ Deus præsciuit sunt intrinsecè mala, & peccata, quæ Deus prædeterminare non potest. II. Quia, si cognoscerentur in decreto; non potuisset Christus Dominus exprobare Iudæos, in illo

illo futuro conditionato, quod habetur *Matth. 11.* quod si signa, quæ facta sunt apud illos, fierent apud Tyrios, Tyrij converterentur. Nam facile potuissent respondere Iudæi, si etiam apud nos facta fuissent hæc signa, & datum nobis esset auxilium prædeterminans, & habuisset Deus decretum efficax de nostra pœnitentia: utique converteremur; ergo dicendum non habuisse Deum decretum de futuro conditionato, sed illud per scientiam mediam cognoscere.

Respondeo certam, & infallibilem cognitionem quam Deus habet de futuro conditionato, esse ex decreto, & in decreto suæ voluntatis, vel volentis, vel permittentis, quod talia fierent futura conditionata, si tales adhiberentur condiciones. Et descendendo ad futura conditionata expressa in sacra Scriptura; ad illud 1. *Regum ex cap. 23.* vbi agitur de descensu Davidis in Ceilam. Dico illud futurum cognosci à Deo in decreto permissivo: in quantum, ita Deus decreuerat permittere, si ibi David maneret. Vel potest dici, & hoc est maxime obseruandum, Dominum non respondisse illud ita infallibiliter futurum; sed respondisse id ita euenturum, secundum exigentiam, & dispositionem causarum proximarum, propositi videlicet Saulis, & virorum Ceilæ: familiare est enim sacræ Scripturæ; vt Deus per illam reuelet id, quod licet certò futurum non sit, & id Deus certissimè sciat; futurum tamen sit ex dispositione suarum proximarum causarum; quod verificatur in Prophetia *Isaie 38.* in qua prænunciatur Regi Ezechiz, *Morte morieris, & non viues:* quæ prophetia fuit reuera comminationis, licet enim non ita eueniret; tamen in dispositione causarum secundarum ita erat, quod eueniret nisi per altiore causam impediretur.

In eadem diuinæ voluntatis permissione certò, & infallibiliter cognouit Deus illud aliud futurum ex 3. *Regum cap. 11.* nempe, quod si ingrederentur filij Israel ad mulieres alienigenas, occurrerent Deos ipsarum; nam Deus permittere decreuerat illos à Fide deficere, si contra diuinum præceptum ad alienigenas ingrederentur. Locus autem ille, *Sapient. cap. 14.* vbi dicitur, *Rapius est, ne malitia mutaret intellectū eius.* Si intelligatur esse dictum ante decretum diuinæ voluntatis, fuit dictum secundum communia pericula vitæ, non secundum certam præscientiā; si autem intelligatur post decretum diuinæ voluntatis, quo statuerat permittere infantem illum, si diutius viveret, peccare; certissimè dictum est secundum præscientiam præsupponentem tale decretum.

Illud autem futurum conditionatum ex 4. *Regum cap. 13.* nempe *Si percussisses quinquies, aut sexies, siue septies, percussisses Syriam vsque ad consumptionem;* iam patet, & ostensum est supra: debere intelligi supposito decreto diuinæ voluntatis: vnde colligitur ex dictis, quod eo ipso, quod Deus certò cognoscat aliqua futura, quæ sunt intrinsecè mala, & peccata in suo decreto permissivo; non sequitur Deum prædeterminare peccata.

Remanet solum explicare illud futurum conditionatum *Matth. 11. Vae tibi Corozaim, vae tibi Bethsaida; quia si in Tyro, & Sidone facta fuissent virtutes, quae factae sunt in vobis, olim in cilicio, & cinere sedentes poenitentiam egissent.* Circa quod dico; Esse firmiter tenendum Christum Dominum certo praescivisse in decreto suae divinae voluntatis illud futurum, quo decreverat illos convertere, & illis impendere efficax auxilium suae gratiae; licet ob alta praedestinationis mysteria nec illos voluerit convertere, nec illis praedicare, aut virtutes coram eis facere. Ex hoc autem quod Iudaei illud auxilium efficax non receperunt; non sequitur, quod non potuisset Christus Dominus Iudaeos iuste reprehendere; quia Iudaei habebant auxilium sufficiens, sicut & Tyrij, cum quo potuissent agere poenitentiam: & ex sua malitia, obduratione, & prava voluntate illi resisterunt; nam, ut dicit D. Tho. prima causa defectus gratiae est ex nobis; sicut prima causa collationis gratiae est ex Deo: unde quod Tyrij converterentur, prima causa esset ex Deo; quod autem Iudaei non fuerint conversi, prima causa fuit ex se ipsis, & ex eorum pertinaci obstinatione: ut aliquis igitur sit culpabilis, & reprehensione dignus: sufficit, quod verè possit, teneatur, & non faciat; verè enim Iudaei poterant; quia habendo auxilium sufficiens, habebant omnia requisita ad agendum ex parte actus primi, & sic meritò culpantur.

Dicunt II. Aduersarij in fauorem scientiae mediae: S. P. Augustinus docet scientiam mediam antecedentem omne divinae voluntatis decretum: & videre Deum per hanc scientiam, quid voluntas humana ex se sit operatura; saepe enim docet S. P. tunc voluisse Christum venire, quando sciebat, & ubi sciebat, qui in eum fuerant credituri: idem etiam docent alij SS. PP. Resp. hoc testimoniū fuisse clarissimè explicatū ab eodem S. Doctore in illo cap. 9. de *Praedestinatione Sanctorum*, ibi enim affirmat S. Pater, nihil esse verius, quàm Christum id praescivisse; sed nihil esse verius, quàm in sua aeterna electione id praescivisse; ergo non praesciuit per scientiam mediam, ut perperam asserunt aduersarij. Sicut etiam quando idem S. P. in lib. de *natura & gratia* dixit, Deum permittere hominē cadere in mortale; quia nouit illum cautiorem futurū; Non intelligit S. P. quod nouit per scientiam mediam; sed nouit, ut intelligit idem S. Doctor; quia ita in sua aeterna praedestinatione disposuit, & efficaciter euenturum praedefiniuit.

Quando ergo in SS. PP. legitur; tunc scilicet Deum homines vocasse, quando sciebat obtemperaturos: intelligitur, quando ipse sciebat ipsos obtemperaturos ex efficacia vocationis suae; & sic tunc illos Deus vocauit, quando sciuit ex sua efficaci vocatione consensuros: & ante non eos vocauit; quia sciebat, non tunc determinasse illos efficaciter vocare, ut venirent; unde, & praesciebat, quod si tunc vocaret, non venirent. Non autem intelligitur, quod tunc vocauit, quando ex se ipsis erant reditura congruam, & efficacem vocationem suam, ut putant professores scientiae mediae.

1. Igitur nec S. P. August. nec D. Thomas, nec vllus ex SS. PP. quantum videre potui est, qui aliqua ratione implicita, vel explicita hanc scientiā mediam tangant: vndē perperam aduersarij illam per testimonia SS. conantur inducere: legant, quæ so, quæ scripsit Cardinalis Toletus conformiter ad hoc de S. P. Augustino asserens: *Si Augustinus totus est in contraria sententia: (idest contra scientiam mediam) imò falsò hanc opinionem de vocatione congrua illi conantur tribuere, propter eius verba in cortice littera considerata, quæ & prius explicata, & intellecta fuisse à S. Augustino libro de dono perseverantiæ.*

Sed rationibus vrgent I. aduersarij in fauorem scientiæ mediæ, dicētes: Quæcumque volitio conditionata in Deo debet procedere ex efficaci intentione finis; sed illæ volitiones conditionatæ non possunt procedere ex efficaci intentione finis; quia illæ volitiones non implentur; & sic non procedunt ex efficaci finis intentiones: aliàs implerentur; ergo nō sunt in Deo constituendæ. *Respondeo* illa decreta conditionata esse in Deo; sed non ex voluntate efficaci adimplendi illa; sed ex diuina voluntate intendente per illa decreta suam bonitatem, iustitiam, vel sapientiā manifestare, & propter alia sua occulta iudicia, quem finem Deus obtinet sine dubio per illa decreta conditionalia: & per hoc benē inferimus, non esse otiosas in Deo tales volitiones. Vndē manifestatiū misericordiæ, & bonitatis diuinæ fuit decretum illud conditionatum ex parte obiecti. *Raptus est, ne malitia mutaret intellectum eius:* sicut illud de Tyrijs, & Sidonijs, quibus noluit subuenire cum Christi prædicatione, & miraculis, quæ si adhiberentur, eos conuertere statuerat: fuit propter inscrutabilia iudicia suæ æternæ prædestinationis.

Vrgent II. Decreta circa futura conditionata sunt libera in Deo; ergo potuerunt non esse in Deo; & sic Deus potest non habere scientiam talium futurorum conditionatorum, quod est falsum; nam hæc cognitio pertinet ad perfectionem Dei, vel necessariò illam concomitatur. *Resp.* concedendo illa decreta esse libera in Deo, sicut, & decreta absoluta respectu creaturarum: ac proinde potuisse non esse in Deo: in quo casu cōcedimus etiam, quòd illa futura conditionata certò non cognoscerentur in Deo; sed hoc non prouenit ex defectu cognoscentis, qui in Deo nullus potest esse; sed ex defectu cognoscibilis, nempe ipsius futuri: in quantum non haberet certam, & determinatam veritatem, vt certò à Deo cognoscatur.

Vrgent III. Dantur plura futura conditionata, quæ sunt media in ratione scibilis inter possibilia, & absoluta; ergo ad ea cognoscenda est necessaria scientia media, quia sicut possibiliter futurum cognoscitur per scientiam simplicis intelligentiæ; & absolutum per scientiam visionis: futurum sub conditione, quod est medium inter vtrumque, debet cognosci per scientiam mediam. *Resp.* negando antecedens; futura enim conditionata non sunt media in ratione scibilis inter possibilia, & futura

futura absoluta; sed quædam sunt necessaria absolutè, & cognoscuntur per scientiam necessariam, quæ dicitur simplicis intelligentia; alia vero supponunt decretum liberum diuinæ voluntatis, illa vel volentis, vel permittentis; quæ cognoscuntur per scientiam omnino liberam; id est visio- nis, ut fufius supra visum est.

Virgēt IV. Non haberet Deus perfectissimam providentiam de re- bus creatis, specialiter de homine; nisi haberet omnia, quæ ad talem, perfectissimam providentiam conducunt; sed ad hanc inter alia neces- sariò conducit scientia media; quia per ipsam cognoscit Deus ceriò, quid liberum arbitrium acturum sit, si in tali, & tali ordine collocetur; & si- cuti nullus potest prudenter statuere de fine, nisi præcognoscat media, sibi possibilia ad consequutionem finis; ita nisi Deus præcognoscat qui- bus medijs, seu quibus rebus, & conditionibus positis humanum arbi- trium hoc, vel illud operabitur; non poterit habere certum propositum, vel de fine, vel de operatione hominis; sed totum hoc habetur per sci- entiam mediam; ergo ipsa est necessaria ad providentiam &c. *Retorqueo* argumentum: Non haberet Deus perfectissimum Dominium de re- bus creatis, & specialiter de homine, nisi applicaret ipsos ad quodcum- que voluerit, quomodo cumque voluerit, & quandocumque voluerit; sed hoc solum præstat physica prædeterminatio diuinæ voluntatis, & eius decretum efficax; hoc enim causat, determinat, & prædefinit nostros actus liberos; per scientiam autem mediam non potest aliquid definire, nisi præsciat illos sua spontè, & propria inclinatione voluturos, & sic vo- luntati eorum se accommodat: quod est contra rationem iupremi, & perfecti dominij.

Respondeo in forma negando minorem; ad cuius probationem con- cedo, quod nullus potest prudenter statuere de fine, nisi præcognoscat media &c. loquendo de providentia humana; nego autem id, de provi- dentia diuina: disparitas est clara; quia providentia humana non habet efficaciam ad persuadendum v.g. vel aliud faciendum: & sic non potest prudenter statuere de fine, nisi præcognoscat media, obseruet circum- stantias, &c. à quibus incertæ nostræ providentiæ dependent. Provi- dentia autem diuina, cum sit efficacissima, & habeat infalibilem cer- titudinem ex decreto diuino, non est necesse, quòd expectet tempus; prævideat circumstantias &c. Indignum igitur est, quòd tribuatur su- premo Domino providenti, quod nemo audet adscribere Dominis tem- poralibus, circa negotia à suis seruis adimplenda; nam Dominus tem- poralis dicit seruo suo, fac hoc, & facit, absque vlla præmissione, & ex- pectatione, & omni alia re à voluntate serui pendente. E. supremus om- nium Dominus, cuius potentia est infinita, debet expectare volunta- rem, quærendo tempus, occasiones, &c. & expectare prius, quid liberum arbitrium sit facturum, ut aliquid per hominem faciat?

Multi alia argumenta coaceruant aduersarij ad probandam hanc sci- entiam

dicebat Calvinus, qui intelligebat per sensum diuisum, in quo voluntas potest dissentire, antequam habeat gratiam; & per sensum compositum; in quo voluntas non potest dissentire, ut est sub gratia: nam est de Fide, quod etiam voluntas, dum est sub gratia efficaci, & decreto prædeterminante, potest dissentire, & habet potentiam liberam ad dissentiendum; nam licet Decretum Dei ex parte modi operandi ipsius Dei sit infallibile, & immutabile; in sui tamén determinatione seruat modum causæ secundæ liberæ, determinando, quod effectus liberè sit, & consequenter cum potentia ad oppositum. Explicatus igitur in hac vera intelligentia sensus compositus, & diuisus; ab omnibus est recipiendus: sicut defacto recipitur; & quamuis ab aliquibus ex contentione negetur; attamen ab ipsis alibi patientissimè prædicatur. Nam concedunt, quod hæc propositio in sensu composito est vera, nempe, *quod voluntas in instanti, quo vult, non potest non velle*; quia fieri non potest, ut voluntas, dum vult non velit. In sensu autem diuiso est falsa; quia nulla potentia fieri potest, ut voluntas, quæ in aliquo puncto temporis aliquid vult; non possit tunc non velle illud, vel vacando ab omni suo actu, vel per contrarium actum illum reiiciendo; Et postea nescio, qua ratione, moti, negant esse sensum diuisum in ista propositione, *voluntas in instanti, quo efficaciter mouetur à Deo, potest dissentire*. Est igitur hæc propositio verissima; quia etiam supposita diuina motione efficaci, potentia libera est in arbitrio ad dissentiendum, nec facit sensum compositum, ut aliqui falsò putant; faceret solum sensum compositum, appposito aliquo addito; videlicet liberum arbitrium efficaciter motum, potest dissentire Deo efficaciter mouenti.

No. a hlc I. Nullo modo esse concedendum; Liberum arbitrium à Deo efficaciter motum posse dissentire in sensu composito; quia sensus esset, quod posset coniungere cum tali efficaci motione contrarium dissensum, quod est impossibile. Ex hoc autem malè inferunt aliqui hominem non habere libertatem in sensu composito; quinimò contrarium; nam cum tunc infallibiliter consentiat, & magna sua libertate consentiat, cum possit dissentire, si velit; potius libertatem exercet in actu secundo, & perfectius liber est, quam prius, antequam se determinaret; quia tantum erat liber in potentia. Remanet igitur homo etiam in sensu composito liber; quia actuale suam libertatem cum efficaci Dei motione componit. Nec aliud importat hominem non posse dissentire in sensu composito; nisi quod fieri non potest, ut efficaciter homo à Deo moueatur, & dissentiat. II. Est notandum, Quod maximopere inducit ad clare intelligendam hanc distinctionem sensus compositi, & diuisi, exemplum, quo vtuntur aliqui Theologi de prædestinatione; nam est certum apud omnes, quod prædestinatus absolute, & simpliciter potest damnari: id est quod positus sub prædestinatione, habet potentiam absolute, & simpliciter, ut damnetur; & hoc in omnium sententiâ, siue prædestinatio sit

certa ex vi diuini decreti, vel ex vi mediorum; siue ex vi diuine præscientiæ; in omni enim casu in sensu diuiso prædestinatus potest damnari; & liberam habet ad id potentiam: in sensu verò composito, non potest damnari; idest non est possibilis damnatio cum prædestinato, cum non possit conjungere damnationem cum prædestinatione. III. Est notandum, Quod hæc propositio. *Coruus v.g. potest esse niger*; verum est, quod non adinuenit sensum compositum; sed non ex eo præcisè, ut putant aliqui; quia nigredo illa est forma inseparabilis à subiecto, nempe à Coruo; sed quia est forma inseparabilis ab ipso intrinsecè proueniens. & ideo non admittit sensum compositum, nec diuisum. Diuina autem voluntas, & prædestinatio sunt utriusque inseparabiles à subiecto, sed illi extrinsecè.



TRACTATUS III.

De Voluntate Dei.

Suppono in vestibulo huius tractatus, tamquam certum de Fide, dari in Deo voluntatem: patet ex illo *Psal. 113. Omnia quaecumque voluit, fecit*. Cum igitur voluntas sit perfectio simpliciter, sicut & intellectus, & in Deo sit perfectissimus intellectus; voluntatem in ipso confiteri necesse est. Hoc ergo præsupposito, tamquam certo, quod occurrit hoc loco examinandum, primò est.

Quodnam sit obiectum formale motuum, & terminatum Diuinae Voluntatis?

Est communis Thomistarum sententia, & maximè cōformis menti D. Thomæ quod obiectum formale adæquatum tam motuum, quàm terminatum diuinæ voluntatis est sola bonitas diuina; non autem bonitas in communi: Est autem prænotandum, antequam probetur conclusio, quod obiectum motuum non dicitur tale; quia solum habet mouere, non autem terminare habitudinem potentiæ; nam ut aliqui putant, ipsum est, quod per se primò terminat; sed quia ita terminat, ut simul moueat: sicut è contra obiectum purè terminatum, ita terminat, ut saltèm per se primò non moueat.

Probatur igitur primò conclusio auctoritate D. Tho: qui hoc loco *artic. 2. ait: Cum Deus alia à se non velit, nisi propter finem, qui est sua bonitas, non sequitur, quod aliud moueat suam voluntatem, nisi bonitas sua. Nec suffragatur dicere D. Thomam loqui de obiecto motiuo: Cum eadem sit ratio, ut supra notauimus, obiecti primariò terminatiui: quini-*
mo

modo addo, quòd media purè talia supponunt amorem finis, non solum in esse obiecti motiui; sed etiam in esse obiecti terminatiui prius attracti, vt quòd.

Secundò ostenditur etiam ratione: Quia obiectum formale, tam motiui, quam terminatiui alicuius potentiae est illud, quod per se primò respicitur ab illa; cætera autem ratione illius; nam illud respicitur ratione sui, & consequenter primò per se respicitur; sed illud, quod per se primò respicitur à diuina voluntate, est sola bonitas diuina, & increata; cum diuina bonitas sit primum volitum, et sit vltimus finis, & habeat omnimodam commensurationem cum voluntate diuina; vnde nec bonitas creata, nec bonitas in communi potest habere rationem obiecti motiui, & terminatiui; non bonitas creata; aliter voluntas diuina perficeretur, & specificaretur à creaturis; nec bonitas in communi; quia hæc solum in potentia continet rationem consummationis boni. Addo quòd cum amor voluntatis creatæ sit solum affectiuus inclinans, & transformans amantem in amatum, & amor voluntatis diuinæ sit effectiuus trahens omnia ad se ipsum, & conuertens ad se obiectum amatum; repugnat ipsum transformari in creaturam; Vnde fit, quòd diuina voluntas non possit, neque etiam partialiter moueri à bonitate creata.

Dices, Bonitas moralis, & creata, quæ in actibus meritorijs inuenitur, mouet Dei bonitatem ad præmiandum; nam per opera creata aliquid mereri possumus apud Deum; ergo bonum creatum potest esse obiectum motiui diuinæ voluntatis. *Respondeo*, quòd ad rationem meriti sufficit, vt moueat Diuinam voluntatem, vt det præmium ratione diuinæ bonitatis, quam condecet præmiare merita: Vnde sicut Deus ordinat media ad aliquem finem creatum; & tamen ratio motiua diuinæ voluntatis non est finis creatus; ita ordinat merita ad præmium; cum tamen motiuum diuinæ voluntatis non sint ipsa merita, sed sua bonitas, quam condecet præmiare merita. Sicut etiam non est necesse, vt amor amicitiae, quo Deus creaturas rationales diligit, sit propter ipsas creaturas, exigit enim hic amor, vt dirigatur ad bonum diuinum, & hoc ipsum est indicium amicitiae singularis, & est singulare argumentum præcipue dilectionis, quòd querat Deus (vt ait S. Bernardus *epist.* 23.) *gloriam, & in sanctis, non vt auget sibi, sed vt suis communiceet*: quasi diceret habitudo creaturarum ad diuinam bonitatem, tamquam finem, non est per modum medijs, utilis diuinæ bonitati; Quia (vt ait D. Thomas,) *non est in potentia, vt aliquid acquirere possit; sed solum in actu perfecto, ex quo potest largiri*.

Nota hic I. Quod obiectum formale terminatiuum, non debet continere omnia obiecta particularia, quæ possunt attingi ab illa potentia, semper continentia formali; sed continentia, vel formali, vel eminentiali; & quia Diuina bonitas continet bonitatem creatam continentia eminentiali,

ctali; est sufficiens ad hoc, ut habeat rationem obiecti motui. II. Obiectum formale debet prædicari de omnibus obiectis materialibus, vel in recto, vel in obliquo; non autem semper in recto; & cum diuina bonitas prædicetur de bonitate creata in obliquo, habet sufficientissimè rationem obiecti formalis terminatiui, & motui; hoc totum videtur in obiecto formali Theologiæ, quod est Deus; qui non prædicatur in recto, sed tantum in obliquo de creaturis.

Utrum Deus diligat Creaturas?

Suppono tamquam certum de Fide, quod in Deo sit amor; quia cum in ipso sit voluntas; est etiam, & amor: cum ipse sit motus voluntatis in bonum. Constat etiam ex illo 1. *Ioannis 4. Deus charitas est*: & ex illo *Sapient. 2. Diligis omnia, quæ sunt*. Suppono item Deum necessariò velle, & diligere suam essentiam; quia in ipsa inuenit rationem boni.

Id igitur, quod in præsentì quæritur est. *Utrum Deus diligat creaturas possibiles*; quia loquendo de creaturis existentibus est certum illas Deum diligere; & licet tales creaturas existentes liberè Deus ab æterno voluerit; ex suppositione tamen, quod ipsas voluerit, non est inconueniens dicere, quod necessariò ipsas velit; quia necessitas orta ex suppositione diuinæ voluntatis, non dicit imperfectionem, sed perfectionem. Non tenetur autem Deus velle, quæ meliora sunt in esse physico; quia ultra omnem creaturam, quam Deus desectò produxit in mundo, vel producat, potens est etiam producere alias; nec etiam necessitatur ad amandum, quod melius est moraliter; attento tamen hoc ordine rerum; disposuit enim Deus omnia iuxta suam sapientiam in pondere, & mensura. Non attento verò hoc ordine rerum, & statu ipsorum, nec etiam tenebatur Deus eligere, quicquid melius erat, & conducens ad gloriam suam; quia semper potest Deus producere perfectiorem, & perfectiorem in infinitum.

Circa principale quæsitum, quod est de creaturis possibilibus: dico, Deum, nec necessariò, nec liberè amare creaturas possibiles: loquimur hic autem de possibilitate passiuâ creaturarum, quæ est illa, quæ non est ordinata ad existentiam exercitè habendam: id est ponit solum ordinem potentialem, & non exercitum ad existentiam; non loquimur de possibilitate actiua, quæ est ipsa vis actiua Diuinæ omnipotentia; nam, in hoc sensu certum est, Deum amare possibilitatem creaturarum. *Probat*ur igitur conclusio: si aliqua esset ratio asserendi Deum necessariò, vel liberè amare creaturas possibiles, maxima esset ratio boni, quæ inuenitur in creaturis possibilibus; quia possibilia, licet non sint simpliciter perfectia: quia carent vltima integritate sumpta ab existentia; sunt tamen perfectia secundum quid; quia habent integritatem prædicatorii essentialium; sed ista bonitas iuncta pro statu merè possibili, quam habent crea-

curæ possibiles, non est apta ad terminandum vllum amorem necessarium, aut liberum voluntatis; nam bonum adhuc, ut moueat appetitum, debet concipi ab intellectu, ut ordinatum ad existentiam exercitè habendam; possibile autem, ut diximus, non est ordinatum ad existentiam exercitè habendam; ergo. &c. Addo, quod bonum mouet per modum finis; & sic correspondet efficienti; sed efficiens est mouens ad exercitum; ergo etiam, & bonum; & cum bonum, quod dicuntur possibilia, non sit ordinatum ad existentiam exercitè habendam; ergo non potest amari.

Dices I. Creaturæ possibiles habent connexionem indispensabilem, cum diuina omnipotentia; sed Deus amat suam omnipotentiam; ergo etiam, & creaturas possibiles; cum hæ sint necessariae, ut Deus sit omnipotens. *Respondeo*, quod talis necessitas, & connexio creaturarum possibilibus cum diuina omnipotentia, est solum necessitas, & connexio a posteriori, per modum supponentis omnipotentiam; non autem per modum influentis in illam; & sic non sequitur ex necessaria possibilibus connexione cum omnipotentia Dei, quod amata omnipotentia à Deo, debeant etiam possibilia amari; cum non sint, (ut visum est,) creaturæ possibiles capaces terminandi actum amoris; dum considerantur sub illo statu absque ordine exercitè ad existentiam.

Dices II. Ve itas potest terminare cognitionem, absque eo, quod ordinetur practicè ad existentiam, ut est ens mathematicale, quod cum præscindat pro statu suæ abstractionis ab ordine ad subiectum, in quo physicè existit, caret ordine ad existentiam; ergo etiam bonitas poterit terminare actum voluntatis, absque eo, quod habeat ordinem ad existentiam. *Resp.* negando consequentiam; disparitas est, quia intellectus cognoscit, trahendo res ad se; voluntas autem trahitur ad res: vnde debet voluntas supponere in illis existentiam, qua actu terminet amorem; intellectus autem eo ipso, quod trahit ad se res, potest illis tribuere existentiam intelligibilem.

Nota hic I. Quod voluntas Dei fertur ad reprobos salutem, non, ut merè possibilem, sed ut quodammodo futuram futuritione inchoata, per auxilia sufficientia omnibus oblata. II. Non nego Deum complacere sibi in rebus possibilibus; non quia voluntas eius circa res possibiles immediatè occupetur; sed in quantum amat suam omnipotentiam, quæ valet se extendere ad quodlibet non repugnans. III. Bonum dicitur tale per ordinem ad appetitum, ut in actu primo petentem appetere; non autem ut in actu secundo appetentem; & sic non sequitur, quod eo ipso, quod detur in ente passio bonitatis, debeat dari ordo ad appetitum, quem possit in actu secundo terminare. IV. Non valet dicere: Impossibilitas, seu negatio possibilitatis in rebus impossibilibus, cum sit magnum malum, est odibilis à Deo; ergo possibilitas in creaturis possibilibus est apta terminare actum eius amoris. *Quia* in rebus impossibilibus negatio possibilitatis negat, & existentiam, & etiam ordinem.

exercitum ad ipsam; possibilitas autem ponit ordinem potentialem, & negat solum ordinem exercitum ad existentiam: unde concludimus semper esse necessarium, saltem ordinem exercitum ad existentiam; ut possit esse obiectum diuinæ voluntatis; & nulla res sine tali ordine potest amari à Deo.

Petes hic, An diuina voluntas possit esse absque omni decreto positiuo circa creaturas possibles, & manere suspensa; an verò diuina voluntas versetur circa ipsas exercitio libero, seu omisso: nempe per liberam, decreti omissionem, qua nolit se determinare ad positiuè volendum, seu ad positiuè nolendum creaturas? Puto probabiliter contra multos Thomistas, diuinam voluntatem necessariò versari circa omnes combinationes possibles aliquo exercitio directo volitiuo, vel nolitiuo; nec possit versari circa illas exercitio præcisè indirecto, seu omissione. Ratio est, quia si hoc negaretur, dominium diuinæ voluntatis esset imperfectum; quia nihil dimanatiuè disponderet de illo possibili; ut constat ex his, quæ diximus, impugnando scientiam mediam: secundò quia diuina voluntas esset irresoluta circa illud possibile; quia nihil definiret propositis à Deo congruentijs pro, & contra.

Utrum in Deo sit libertas, & quomodo constituitur?

TOrus labor huius difficillimæ quæstionis, quæ Theologos omnes in diuersissimas traxit sententias, & Hæreticos in errorum aquis absorbit; est in concilianda immutabilitate Dei cum summa eius libertate, & indifferentia; difficile enim concipi potest, quomodo summa Dei immutabilitas cum summa eius libertate, & indifferentia conciliari possit; nam actus liber, vel potuit abesse à Deo, vel non? si primum, perit immutabilitas diuina; si secundum interimitur libertas: ideo Hæretici, quorum mos est negare, quæ non capiunt; ut saluarent diuinam immutabilitatem, negarunt in Deo libertatem; alij verò è contra, ut diuinam libertatem saluarent, eius immutabilitatem negarunt. Est igitur veritas catholica dari in Deo veram, & perfectam libertatem, quæ cum diuina immutabilitate cohæret; ut infra videbitur, ostendendo constitutum libertatis diuinæ; & quomodo vnus, & idem actus rationem necessitatis, & libertatis per ordinem ad diuersa eminentissimè contineat.

Prius autem ostendendum censeo in Deo esse libertatem; habetur enim in Psalmo 93. *Deus ultionum liberè egit.* 1. *Corinth. 12. Hæc omnia operatur vnus.* atque idem Spiritus diuidens singulis, prout vult. Rationes etiam idem ostendunt. Nam Deus habet perfectum dominium in creaturas; sed ad dominium requiritur libertas; ergo &c. hæc enim omnia sunt certa: unde non oportet immorari.

Accedimus igitur ad explicandum conceptum formalem libertatis, à quo difficultatis momentum dependet; & quamuis sint ferè innumeræ

Theologorum sententiæ, quæ circūferuntur ad hoc explicandum; breuiter quid sentiendum cenſeo, proponam: ſoluendo poſtea opinioniones in contrarium. *Dico* igitur, conſtitutiuum actus liberi Dei non eſſe aliquid notum intrinſecè poſitum in Deo, in eſſendo diſtinctum à neceſſario, ſed eſſe aliquod intrinſecum in cauſando; id eſt actiua emanatio boni creati à ſe, quæ aduenit abſque eo, quòd aliquid noui recipiat in ſe, & poteſt non peni abſque vilo dẽmpto in ipſo. Hæc conſuſio eſt D. Tho: qui hoc loco 1. *partæ quaſt.* 19. *artic.* 3. ad 5. reſpondens argumẽto probanti, quòd ſi diuina voluntas eſſet ad vtrumlibet, deberet determinari ab alio, dicit. *Quòd cauſa, quæ eſt ex ſe contingens, oportet, quòd determinetur ab aliquo exteriori; ſed voluntas diuina, quæ ex ſe neceſſitatem habet, determinat, ſe ipſam ad vlitum.* Vnde negat contingentiam in eſſendo in diuina voluntate, & indifferentiam ad vtrumlibet ex parte ſui; quia, vt docet idẽ S. Doctõr, talis indifferentia oritur ex imperfectione principij, non dum conſequuti ſuam perfectionem, per quam ad vnum determinetur; ſolũ ergo admittit D. Tho: in Deo indifferentiam in cauſando, ſeu ad vlitum; idẽ non dixit à vilito, quaſi ex tendentia ad illud acquirat aliquid de nouo, quo in ſe actuetur, & perficiatur.

Probatur conſuſio ratione: Ille modus perfectè probat, conſtitutiuum libertatis diuinæ, qui ſaluat eius immutabilitatem perfectè, rationem ſummi, & perfecti dominij in creaturas, & eius indifferentiam; ſed modus à nobis excogitatus eſt huiusmodi; ergo &c. maior eſt certa, minor oſtenditur per ſingula: Et primò, quòd ſaluet eius immutabilitatem; nam intrinſecum hoc in cauſando, quod eſt actiua quaſi emanatio boni creati à diuina voluntate, quod eſt per nos ipſius conſtitutiuum; licet requirat tranſitum; attamen, quia tranſitus eſt in linea cauſandi, non verò eſſendi; idẽ non requirit mutationem penes aliquod eſſe, quod de nouo accreſcat Deo; ſed penes hoc, quod eſt cauſare, quod ante non cauſabat, ſeu actiue communicare ſe, cum ante non communicabat; ergo potius eſt mutatio actiua, ſeu mutare aliud, quàm mutatio paſſiua, ſeu mutari in ſe. Quod poteſt explicari exemplo Incarnationis; nam, licet ſubſiſtentia diuina deſineret terminare naturam humanam, non propterea mutaretur; quia nihil entitatis, aut perfectionis perderet; ſed ſolũ deſineret habere exercitium, quod antea habebat.

Saluatur Secundò ratio ſummi, & perfecti dominij Dei in creaturas; quia actus diuinæ voluntatis hoc modo explicatus, nempe qui ſit intrinſecus in cauſando eſt ens à ſe, & habet ſummam independentiam à creaturis, & ſubiicit creaturam diuinæ poteſtati; nam non eſt, niſi actiua emanatio boni creati à diuina voluntate; & ſic inferit produccionem creature ſuo tempore ponendæ, ſi eſt vilitio; vel non inferit, & ſic eſt nolitio, non per mutationem Dei, vt diximus, ſed per futuram mutationem creature producendæ; ergo, &c. Quod verò atinet ad eius indifferentiam, etiam clarè oſtenditur quòd ſcilicet ſaluatur etiam perfectiſſima libertas

in Deo; nam de essentia libertatis est sola indifferentia actiua; quia dominium libertatis primum exercetur agendo, cum in patiendi potius appareat subiectio; sed nostra conclusio ponit hanc indifferentiam actiuam in Deo; ergo, &c.

Nora hic I. Quod nostra sententia nullo modo coincidit cum sententia Aureoli; nam nos ponimus indifferentiam, & libertatem in ipso amore voluntatis, qui cum in Deo respectu creaturarum sit effectiuus, non affectiuus; recte eius indifferentia declaratur per posse communicare, vel non communicare bonitatem creaturis. Aureolus autem posuit indifferentiam in sola productione potentie exequutiue distincte à voluntate. II. Libertas datur in actione vitali, & immanente solum materialiter, & implicite; in quantum munus libertatis datur semper in actu vitali; non tamen formaliter, & explicitè; nam munus libertatis non exprimit munus adæquatum vitalitatis; sed solum exprimit munus actiue egressiouis à principio; non autem passiuæ, quasi receptionis in illo. III. Licet quando Deus liberè vult obiectum creatum, detur in ipso noua denominatio liberè volentis; non sequitur, quod diuina volitio debeat habere aliquam formam de nouo superadditam; nam denominatio noua, formalis, tunc debet importare nouam formam; quoties denominatio spectat ad genus causæ formalis informantis subiectum; non autem, quando spectat ad genus causæ efficientis formantis obiectum: vt evenit in casu nostro: Vnde bene docent aliqui, denominationem agentis per actionem transeuntem aduenire absque vlla mutatione ex parte agentis, cum actio transiens subiectionetur in passio.

IV. Iuxta nostra principia velle Dei secundum totum id, quod spectat ad ordinem essendi, est necessarium; illud autem, quod spectat ad ordinem operandi, est liberum; sufficit enim ad libertatem, prout importat indifferentiam ad opposita obiecta, quod ipse actus in se necessarius in essendo, sit ab obiectis independens, & sit non necessariò cum illis nexus: sicut videtur in Verbo diuino, quod licet sit necessarium in essendo; est tamen indifferens in terminando humanitatem absque aliquo superaddito.

Dices I. In fauorem eorum, qui sustinent, quod actus liber Dei constituitur per aliquam rationem adæquatè intrinsecam, potentem non esse. Libertas est quædam perfectio diuinæ voluntatis; sed hæc non potest esse extrinseca; aliter Deus perficeretur per aliquod extrinsecum; ergo debet esse intrinseca. Retorqueo argumentum, libertas diuinæ voluntatis in hac sententia est aliquod intrinsecum; sed talis perfectio est potens non esse; ergo aliquod diuinum, quale est perfectio libertatis intrinseca, poterit non esse in Deo. Resp. igitur in forma negando maiorem; nam hoc, quod est Deum causare, quod antea non causabat, seu actiue communicare se, cum ante non communicabat, nulla perfectio Deo accrescit; quia communicans perfectionem, vt tale, non est recipiens, vt supra dictum est; Neque

Neque valet dicere ; Quòd illa ratio constitutiva intrinseca libertatis nullam addat perfectionem diuinę essentię : Nam quidquid sit de hoc, siuè addat, siuè non addat perfectionem ; cum ista formalitas libertatis sit potens non esse in Deo, semper diceret intrinsecam imperfectionem defectibilitatis in essendo ; nam negare non possunt aduersarij, quòd Deus possit nō habere plures terminationes liberas ad creaturas ; sicut defectō non habet ; & sic sequeretur, quòd Deus non esset id, quo nihil melius excogitari possit ; nam illa ratio exprimeret vi sua imperfectionem defectibilitatis, & contingentię, quę est propria creaturę. *Neque* ad suadendum oppositum suffragatur dicere, quòd constitutiuum sit aliquod intrinsecum adęquatę potens non esse ; sed quod tribuit denominationem liberę volentis in Deo, est esse obiectiuum, quod vocant ens diminutum, & hoc dicunt, quòd neque asserat perfectionem, neque imperfectionem, neque exprimit esse creatum, neque increatum. *Nam* ex hoc sequeretur, quòd constitutiuum decreti liberi Dei, iam supponeret ipsum decretum liberum ; quia esse obiectiuum contingens eget aliquo determinante ad vnā partem potius, quā ad aliam oppositam ; sed hoc determinatiuum nequit esse aliud, quā liberum decretum Dei, vt probatum fuit, agendi de futuris contingentibus ; ergo constitutiuum decreti liberi iam supponeret ipsum decretum.

Dices II. In fauorem eorum, qui defendunt constitutiuum actus liberi Dei esse adęquatę extrinsecum diuinę voluntati Vt voluntas habeat nouam denominationem actualis exercitij, potest compleri per aliquod extrinsecum ; ergo adhuc vt volitio intrinseca necessaria diuinę voluntatis habeat nouam denominationem, poterit determinari ab aliquo extrinseco ; sed hoc extrinsecum non potest esse aliud, nisi vel habitudo ad creaturas, vel res creatę liberę futurę ; nam hæ extrinsecę denominant actum Dei necessarium liberę terminantem earum habitudinem. *Resp.* negando antecedens ; nam quo ad effectus pendentes à libero influxu physico voluntatis, non potest haberi noua denominatio, si nihil de nouo intrinsecę ponatur. Ad minorem subsumptam dico esse falsam ; sicut fuit falsa consequentia ; falsitas autem huius sententię apparet ex hoc, quòd euitare minimę potest manifestum circulum ; nam futuritio probatur per determinationem diuinę voluntatis, & determinatio diuinę voluntatis per futuritionem ; nam ideo dicunt Deum velle liberę res futuras ; quia futurę sunt ; & ideo futuras esse ; quia Deus liberę vult.

Nec valet ad euitandum circulum cum aliquibus respondere ; Quòd id, quod complet diuinam volitionem in ratione liberę, est causalitas productiua effectus ad extrā ; *Quia* hoc dicentes inciderent in maximum inconueniens ; nempe, quòd æternum constitueretur per aliquod temporale ; quia productio Dei externa est temporalis ; volitio autem libera Dei est æterna : *Insper* volitio Dei libera est causa productionis, & operationis Dei ad extrā iuxta illud Iudith *Hoc factum est, quod ipse vo-*
lunt-

lusi; ergo non potest per ipsam productionem constitui; aliter causa constitueretur per suum effectum.

Neque aliquid persuadent, qui dicunt: Actum Dei esse liberum per comparisonem ad volita, docentes; quod voluntas libera Dei est ipsa essentia Dei per modum actus eliciti; includens habitudinem quamdam rationis ad res futuras. Est enim absurdum, & implicans, quod decretum Dei liberum, quod est quid reale, in re constituitur respectu rationis: *Insuper* cum Deus in re sit actu liberè volens, in re est omne necessarium; ut actu sit liberè volens; sed respectus rationis non existit formaliter in re; ergo non est necessarius, ut Deus sit actu liberè volens.

Instant denique alij: Actus liber Dei constituitur ratione, partim intrinseca, partim extrinseca Deo; & sic hoc modo tentant effugere difficultates, quibus inuoluuntur modi supra allati; sed in vanum. Nam isti Auctores, vel intelligunt hanc rationem, partim intrinsecam, & partim extrinsecam Deo concurrere ex æquo, & formaliter ad constitutionem actus liberi Dei; vel solum intrinsecum importatur in recto à ratione, constitutiva diuinæ libertatis; extrinsecum autem connotari in obliquo? non primum, quia illud extrinsecum est effectus actus liberi Dei; ergo debet supponere illum adæquatè constitutum; si secundum committitur idem circulus, qui supra; nam defectibilitas actus liberi Dei in esse talis, explicatur per defectibilitatem connotati; sed defectibilitas connotati non potest explicari, nisi per subtractionem actus liberi, ut inferat connotantia actiua futuritionem; ergo admittitur circulus. *Addo*, quod effectus creatus est connotatum subsequens ad actum liberum Dei, & sic actus liber Dei, ut talis, est eius causa; ergo præviè ad tale connotatum supponi debet adæquata ratio constitutiva actus liberi Dei.

Remanet ergo finium: indifferentiam essentialem libertatis esse purè actiuam, & non importare, nisi intrinsecum aliquod in causando, quod est actiua, quasi emanatio boni creati à diuina voluntate; & hoc nullam mutabilitatem importat, nec addit aliquod sopra principium liberum, sed solum importat, quod aliud sit actiue ab illo principio libero: id est, quod illud principium liberum aliquid causet, quod antea non causabat; seu actiue communicare se, cum ante non communicabat: & sic conciliatur libertas Dei cum eius immutabilitate; quod fuit Cardo præsentis difficultatis.

*Vrum decreta voluntatis diuina sint ab intrinseco efficacia,
& prædeterminantia?*

Conciliata Dei libertate cum eius diuina immutabilitate: in medium erit examinanda alia difficillima quæstio, quæ tota sita est in concordando efficaciam diuinæ voluntatis cum libertate creata: admisso enim decreto Dei efficaci prædeterminante actus nostros liberos, vide-

videtur aliquibus datum; quòd possit saluari libertas, & indifferentia voluntatis humanæ: vnde ad conciliandam hanc libertatem, negant Professores scientiæ mediæ decreta voluntatis diuinæ ex se efficacia, & prædeterminantia; recurrendo ad scientiam mediam: & sic volunt decreta Dei esse indifferentia, & suam efficaciam sortiri à consensu voluntatis creatæ per scientiam mediam præuiso. Omnes autem Thomistæ doctrinam Magni Ecclesiæ luminis P.N. Augustini, & Angelici Præceptoris sequentes: docent, diuinæ voluntatis decreta esse ex se, & ab intrinseco efficacia, & prædeterminantia voluntatem, & nullo modo efficaciam, expectare à consensu præuiso per scientiam mediam: Hanc igitur sententiam, vt à S.P.N. Augustino, & Angelico Doctore traditam, & vt magis sacræ Scripturæ testimonijs conformem, amplectimur, & sustinemus; priusquam autem rationibus probetur, validissimis Sacræ Scripturæ, & SS. Patrum testimonijs munitur, eiusque veritas firmatur.

Probatur I. ex illo Prouerb. 21. *Sicut diuisiones aquarum, ita cor Regis in manu Domini, quocumque voluerit, inclinabit illud.* ex Psal. 36. *A Domino gressus hominis diriguntur, & viam eius vult.* & illius 137. *Etenim illuc deducet me manus tua, et tenebit me dextera tua.* Insuper Psal. 113. *Omnia, quæcumque voluit, Dominus fecit.* Danielis 4. *Fecit enim quodcumque voluit in Cælo, & in terra, Esai. 26, Omnia opera nostra operatus es Domine.* Sap. 8. *Attingit à fine vsque ad finem fortiter, & disposuit omnia suauiter.* Quæ omnia de efficaci Dei præmotione, qua, quocumque vult efficaciter, & cum effectu hominum voluntates inclinât, & transiêr, explicant, & intelligunt SS. Patres.

Accedunt testimonia S.P.N. Augustini, qui lib. 1. de correp. & gratia, ita habet; *Non est itaque dubitandum voluntati Dei, quæ in Cælo, & in terra, etiam illa, quæ futura sunt, fecit, humanas voluntates non posse resistere; quo minus faciat ipse, quod vult: quandoquidem de ipsis hominum voluntatibus, quod vult, cum vult, facit: & iterum hæc subiungit, Hoc in eis egit, qui in cordibus hominum, quod voluerit operatur; & iterum c. 14. eius libri. Magis habet in sua potestate voluntates hominum, quam ipsi suas.* In Epist. 107. ad Vitalem docet apertè *Quòd Deus omnipotentissima facilitate homines conuertit, & ex nolentibus volentes facit; & lib. de grat. & liber. arbitrio cap. 20. asserit frequenter, quòd Deus occultissima, & potentissima medicina sua potestate, ad bonum homines perducit; & lib. de correp. & gratia cap. 5. ait, quòd Ita velle, & nolle in hominis est potestate; vt diuinam voluntatem non impediât, nec superet potestatem; & eodem lib. cap. 4. Deus de voluntatibus hominum facit, quod vult; & quòd humanorum cordium habet sine dubio, quo placet, inclinandum omnipotentissimam potestatem: lib. de gratia, & lib. arbitrio cap. 24. Occulta, mirabili, atque ineffabili potestate operatur Deus in cordibus hominum, non solum veras reuelationes; sed etiam bonas voluntates, lib. 1. ad Bonifacium cap. 20. Certissima, & efficacissima potestate transulit Deus cor Regis ab indignatione ad leni-*

licitatem : & eodem lib. cap. 16. Certum est, nos facere, cum facimus, sed ille facit, ut faciamus ; præbendo vires efficacissimas voluntati, qui dixit, faciam, ut faciatis : lib. de prædestinat. Sanctorum cap. 10. Cum homines bona faciunt, quæ pertinent ad colendum Deum, ipse facit, ut illi faciant, non ipsi faciunt, ut ille faciat : lib. de correct. & gratia cap. 4. Cui volenti saluum facere, nullum hominum resistit arbitrium : sic enim velle, & nolle est in volentis potestate ; ut diuinam voluntatem non impediat, nec superet potestatem. Legatur totus liber de gratia, & liber. arbitr. eiusdem S. Doctoris, ubi nihil aliud inuenitur, nisi Deum efficaci sua motione, & determinatione suæ diuinæ voluntatis agere in voluntatem creatam, & illam, quocumque vult, inflectere.

Extant etiam alia testimonia Angelici Præceptoris, quæ clarissime exprimentur motionem, & prædeterminationem diuinæ voluntatis physicam, & infallibilem in actus nostros : prima enim par. quæst. 111. art. 1. ad 3. hæc habet *Hoc ipsum, quod cause secunda determinantur ad suos effectus, est illis à Deo, & in 1. ad Annibaldum dist. 47. quæst. unica artic. 4. Voluntate Dei non solum res in esse producuntur : sed etiam modum rebus producendis, quo producantur prædeterminauit. quæst. 6. de malo art. 1. ad 2. Deus mouet voluntatem immutabiliter propter efficaciam mouentis, quæ deficere non potest : De vniuersis igitur bonis operibus vult Angelicus Præceptor, quod illa Deus in nobis efficiat ; non solum dando posse, ut Origens malè sentiebat ; sed faciendo ipsum operari, ut videre etiam, est in 3. contra gentes cap. 89. ex quo dicit euidenter concludi : quod non solum virtus volendi sit à Deo ; sed etiam ipsam operationem Deus efficiat in nobis.*

Hanc efficacem determinationem diuinæ voluntatis præquā ad nostras operationes, etiam SS. PP. & Concilia multa sine contradictione tuerentur, quorum auctoritates prætereo ; solum refero illud, quod tradidit Concilium Arausicanū II. in can. 9. ait enim *Quoties bona agimus Deus in nobis, atque nobiscum, ut operemur, operatur.* Sed accedamus ad probandam conclusionem rationibus.

Prima, & validissima ratio, probans necessitatem admittendi decreta ab intrinseco efficacia, & prædeterminantia, est hæc : Si aliquod esset assignabile caput negandi hæc decreta ab intrinseco efficacia, & prædeterminantia actum voluntatis humanæ, esset ; quia hæc decreta, cum humana libertate cohærere non possent, quinimodò aduersantur, eiusque contingentiam, & libertatem destruerent, & eriperent ; sed hoc est falsum ; quia potius firman, fouent, & perficiunt possibilitatē ad oppositum ; & consequenter libertatem creatam ; ergo &c. Maior est doctrina aduersariorum, quæ suos Candidatos lætant. Minor probatur I. Quia decretum diuinum habet supremū dominium in omnes actus voluntatis humanæ, & non agit in ipsam, nisi ratione supremi dominij ; ergo sicut voluntas humana ratione dominij, quod habet in suos actus, dum se deter-

terminat, non eripit eius libertatem; sed perficit reducendo actum primum ad secundum; ita &c.

Nec valet dicere; Quod sit diuersitas in eo, quod aliquid simul se moueat, & ab alio moueatur, ac in eo, quod simul se determinet, & determinetur ab alio; Quia sicut determinatio importat vim actiuam supra id, quod determinatur; ita & mouere importat vim actiuam supra id, quod mouetur; ergo eadem est ratio.

Ostenditur II. eadem minor; Quia decretum Dei in se efficax, & prædeterminans reducit voluntatem à statu suspensionis potentialis ad statum exercitij: idest voluntas, quæ in actu primo erat solum in potentia ad utrumlibet, cum suspensione, & carentia omnis exercitij, quæ vocatur indifferentia suspensionis; reducitur per decretum ad indifferentiam dominij, quæ stat cum actuali exercitio: vno verbo reducit libertatem potentialem libertatis nostræ, de actu primo ad secundum: & sic tollit potentialitatem, & suspensionem, seu carentiam actus, subindeque imperfectionem, & defectum; ergo perficit, firmat, & causat libertatem. III. Eadem minor confirmatur; Quia decretum prædeterminans accommodatur naturæ, & conditioni voluntatis creatæ, quæ cum sit appetitus rationalis petit moueri ad actus liberos, sub indifferentia obiectiua iudicij, quæ est proxima radix libertatis; nam de ratione causæ liberæ non est, vt se primò determinet; sed vt se determinet iuxta suam naturam: ita; vt si fuerit primum liberum, se ipsum primò determinet independenter à quocumque alio; si verò fuerit secundum liberum, sicut est voluntas creatæ, se ipsum determinet secundariò, & dependenter à motione primi liberi: Infertur igitur ex hac ratione non solum decretum diuinæ voluntatis esse in se efficax, & prædeterminans, & nõ lædere libertatem; sed etiam ipsam firmare, & perficere: cum quo conciliatur amicabili, & indissolubili nexu libertas voluntatis creatæ.

Probat II. hac alia ratione; Quia ablato decreto ex se efficaci, & physico, & prædeterminante, necessario debent admitti decreta indifferentia; sed hæc nullo modo possunt admitti; ergo &c. Maior est certa ex ipso ore aduersariorum; Minor autem ostenditur, Quia expectaret Deus voluntatem creatam, ad hoc vt determinaretur; sed non potest assignari, quid sit hoc, quod expectaretur à Deo ex parte voluntatis; quia non potest esse actus primus ipsius voluntatis; nam voluntas in actu primo est indifferens, & sic expectat determinationem ab aliquo. *Insuper* in illo tunc illæ duæ causæ indifferentes: scilicet voluntas creatæ, & decretum Dei indifferentes, non coniungerentur, nisi casualiter, & fortuito; ergo vel voluntas determinat decretum, vel decretum determinat voluntatem; si primum sequitur, quod Deus non sit causa determinationis causarum secundarum; & sic non erit causa prima, nec Deus: si secundum, iam admittitur decretum prædeterminans. Si autem dicatur, quod illud, quod expectaret Deus ex parte voluntatis, sit actus secundus:

deus: idem esset dicere, *concurrat cum Petro, si Petrus se determinaverit in actu secundo*: ac dicere: *concurrat cum Petro ad talem actum, si ipse talem actum faciet*; ergo prius est, quod sit talis actus, quam quod Deus ad ipsum concurrat; nam prius natura egrederetur actio à causa secunda, quam Deus ad illam concurrat; & sic decretum Dei esset ridiculum, & nugatorium; nam cum voluntas creata in quocumque ordine rerum constituitur, non possit velle, nec se determinare sine actuali Dei concursu, iuxta illud S.P. August. in *Solil. cap. 24. Velle, quod bonum est, non possum, nisi tu velis*: esset ridiculum, implicatorium, & absurdum dicere, quod Deus determinat voluntatem creaturæ ad assensum, v.g. si ipsa se determinat ad assentiendum; cum ipsa non consentit, nisi per concursum Dei; qui concursus non est aliud, quam consensus creaturæ, pro ut est à Deo; quis enim non irrideretur, si diceret homini in tenebris constituto, *si videris hoc obiectum, dabo tibi lucem necessariam ad videndum*; cum sit impotens ad videndam, nisi adiunetur à luce.

Neque valet dicere, Quod Deus causat illam determinationem per hoc, quod simul agit, & coëfficit illam determinationem. Nam tunc concursus Dei, tunc causa secunda sunt indifferentes; ergo vel concursus Dei determinabit causam secundam, vel causa secunda concursum Dei; & sic redit argumentum supra factum. *Dicendum* ergo omnino repugnare huiusmodi decreta indifferentia expectantia efficacitatem suam à consensu; sed omnino admittenda esse decreta ex se efficaciter consentum inferentia, & prædeterminantia. denique

Probatur hac alia ratione eadem conclusio: Ille manifestè, & expressè probat decreta Dei esse ex se efficacia, & prædeterminantia voluntatis creatæ, qui ostendit Deum præviè concurrere cum causis secundis; ita ut aliquid imprimat in causam secundam, quo mediante mouetur ad coagendum cum Deo; & insuper præviè ad suam operationem determinet causam secundam efficaciter, & infallibiliter ad vnum; sed nostra sententia hoc probat; ergo &c. Maior patet, cum nihil aliud importet vox ipsa *Prædeterminans* nisi præviè, efficaciter, & infallibiliter mouere, & determinare ad aliquid. Minor autem probatur per singula; & I. Quod moueat præviè; quia liberum arbitrium est causa secunda; ergo necesse est, quod & ipsum à prima moueatur; nam si Deus est prima causa, est etiam prius causalitate; ergo prius ratione causat, quam causa secunda; ergo non solum simul natura; sed prius natura per præuium influxum in causa secunda operatur. II. Deus habet perfectum, & absolutum dominium in nostros actus liberos; quinimò, ut dicit S.P. August. *Magis habet in sua potestate voluntates hominum, quam ipsi suas*. Sed non saluatur tale dominium Dei, nec subordinatio Creaturæ; nisi Deus sic præviè in causam secundam influendo agat; quia debebit expectare, vel supponere determinationem à causa creatæ; cum non possit dici, quod simul concurrant; ex ratione supra allata; ergo dicendum est Deum præ-

mouere voluntatem, & arbitrium creatum ad operationem.

Quòd verò hoc faciat physicè, efficaciter, & infallibiliter etiam; ostenditur I. Hanc enim præmotionem efficacem, physicam, & infallibilem varijs, diuersisque vocibus SS. PP. nobis explicarunt, vocantes talem efficaciam *Beneficia Dei, quibus certissimè liberantur, quicumque liberantur*; dicunt *Decretum Dei dare nobis velle, & operari*; *Facere, vt faciamus*; *Operari in nobis, vt operemur*; *Facere ex nolentibus volentes*; *Translacionem voluntatis de vno in aliud*; *Versionem cordis, quocumq; Deus vult*; vt videre est in testimonijs supra citatis, ad quæ breuitatis causa lectorem remitto: quæ si attentius considerantur à Theologis; nullo prorsus modo possunt intelligi de libero arbitrio præuiso per scientiam mediam; quod est idem de decretis indifferentibus, sed solum de efficacibus, & prædeterminatis.

Ostenditur II. Hoc idem ratione; nempe, Quòd talis præmotio sit efficax, physica, & infallibiliter prædeterminans; I. Quia in illo priori ad decretum liberum hominis arbitrium est ex se indifferens ad hunc, vel illum singularem actum efficiendum; ergo nequit intelligi, vt ab arbitrio sic existente indifferenti fluat actio singularis; nisi ipsum physicè, efficaciter, & infallibiliter determinetur à decreto diuino; eo ipso enim, quòd determinatur à diuino decreto, physicè, & infallibiliter determinatur; quia decretum ex natura sua est infallibile; quia est immutabile, & actus purus; ergo est efficax, cum infallibilitas fundetur in efficacia. II. Si Deus determinationem non efficeret, mouendo physicè, & efficaciter agens, & ipsum determinando, vt infallibiliter efficiat; per accidens eueniret talis effectus; hoc non est dicendum à viro Catholico; ergo &c. Sequela probatur; quia eueniret præter Dei intentionem, nempe aliundè, vel ex materia, vel alijs circumstantijs præuisis ante decretum diuinæ voluntatis. Declaratur exemplo, si enim dominus aliquis præsciret sibi subditum aliquid effecturum, eumque non impediret; sed id solum facere sineret; procul dubio talis actus fieret præter eius intentionem, & voluntatem; ex eo quòd ipsum non præcepit, nec cum fieri voluit, nec ad eum causandum subditum aliqua ratione mouet; ergo licèt Deus ponatur præscire humanam voluntatem effecturam suum actum; quia tamen ponitur illum absoluta voluntate efficaciter non præfinisse, vt fiat, nec ad id voluntatem efficaciter mouere, aut determinare, euentus fit præter intentionem Dei: quod est etiam contra veram Philosophiam, quæ docet omnem rerum contingentiam; & singularitatem referri debere in primam causam, cui omnes causæ secundæ subordinantur, quæ prima causa sua efficaci voluntate agentia creata ad eam mouet, atque determinat.

Remanet igitur meo iudicio sufficienter probata conclusio: & etiam conciliata humana libertas cum decreto Dei ex se efficaci, & physicè prædeterminante; quod cum sit prima radix possibilitatis actus liberi.

vt liberi; ita est causa possibilitatis vnus actus determinati, vt etiam sit causa possibilitatis alterius actus oppositi; ergo per hoc, quòd determinat voluntatem v.g. ad assensum non tollit possibilitatem dissensus; hoc enim importat esse principium, & causam vtriusq; possibilitatis, quòd eo ipso, quòd determinat vnā partem, non lædat libertatem.

Pro complemento huius quæstionis sunt aliqua breuiter notanda, quæ plurimum ad eius intelligentiam faciunt; & I. In his vocibus: *Decretum prædeterminans*, *Physica prædeterminatio*, (de qua intra) particula *Præ* non designat prioritatem durationis, & temporis; sed solum naturæ, & causalitatis. II. Appellatur *Physicè prædeterminans*, non quia ly *physicè* se habeat, tamquam aliquod per modum naturæ ad vnum determinans; nam non sumitur philosophice, sed Theologicè, in quantum ex propria essentia, & ab intrinseco est efficax independentè à quocumque consensu creato, vt visum est. III. Discrimen, quod intercedit inter motionem moralem, seu obiectiuam, quam admittunt Professores scientiæ mediæ, & physicam, seu efficacem, quam admittunt Thomistæ, est hoc, quòd motio moralis se tenet ex parte intellectus, & nihil reale, physicum ponit in voluntate; sed solum eam allicit, & inuitat; motio autem physica se tenet ex parte voluntatis, & illam intrinsecè immutat, & applicat ad volendum illud obiectum: motio physica spectat ad genus causæ efficientis; illa verò ad genus causæ finalis: motio denique physica inducit certò, & infallibiliter effectum, & causat consensum, & determinationem; motio verò moralis consensum, ac voluntatem petit, & expectat.

*Vtrum Deus physicè prædeterminet liberum arbitrium,
vs actum eliciat?*

Nomine *Physicæ prædeterminationis*, nihil aliud venit, & intelligunt Theologi, quàm exequutio decreti prædeterminantis, & efficacis; & sic consequitur inseparabiliter decretum efficax, & in ipso continetur, tamquam effectus illius; quinimò omnem suam vim, & virtutem ab illo æterno decreto efficaciter prædeterminante habet, & recipit: omnia igitur; quæ de decreto prædeterminante dicta sunt, ad physicam prædeterminationem applicari commodè possunt; nam, qui efficacem diuinæ voluntatis determinationem negat, externam, & physicam prædeterminationem eliminat: ideo censui hanc quæstionem breuiter examinare; aliqua simul prænotando ad plenā istius vocis *Physicæ prædeterminationis* intelligentiam: contra quam non sine magno fragore criminantur aduersarij, nimis de illa scrupulosè sentiendo: Addendo nouissimè cathalogum obiectiōum, & responsionum, quibus decreta efficacia, & physica prædeterminatio ab aduersarijs inficiuntur, & à Thomistis agerrimè defenduntur.

Prænotandum est I. Quod physica prædeterminatio, quæ (ut supra diximus) est exequutio decreti Dei efficacis; nihil aliud est, aut esse potest, quam præuius Dei influxus, quo Deus quoad exercitium voluntatem mouet: hic autem influxus est motio antecedens vsum liberi arbitrij, qua Deus efficaciter facit voluntatem operari: qui ergo sustinet, quòd motio Dei antecedens vsum liberi arbitrij, ita est efficax ex Deo, ut per illam Deus faciat voluntatem efficaciter operari: physicam prædeterminationem defendit. II. Hanc vocem non esse nouam, sed à SS. PP. præcipuè à D. P. N. August. & Angelico Præceptore sæpissimè vnitam.

Docendo enim quòd Deus agit interius directè in voluntate, eam inclinando, quocumque ipse voluerit; Quòd Deus applicet voluntatem ad agendum; quid aliud intelligunt; nisi Deum mouere voluntatem ad agendum per motionem antecedentem vsum liberi arbitrij; & hanc esse ita efficacem, ut per illam Deus faciat voluntatem infallibiliter operari: ergo SS. PP. docentes, quòd Deus per motionem antecedentem vsum arbitrij facit voluntatem infallibiliter operari: apertè physicam prædeterminationem concedunt. III. Est notandum, esse valde congruum ad tollendas æquiocationes, & ad excludendam illam præmotionem moralem, quam admittunt Professores scientiæ mediæ, quæ est valdè impropria, & metaphorica; vocare hanc præmotionem *physicam*, idest veram, propriam, & realem: sicut SS. PP. ad tollendas omnes improprias vniones inter Verbum, & humanam naturam, nominarunt hanc vnionem *physicam*, idest veram, propriam, & realem; sicut etiam verissimè vocatur *prædeterminatio* tùm ex rationibus supra allatis; tùm etiam, quia S. Dionysius vocat diuinam voluntatem prædeterminationem effectiuâ rerum; quid mirum ergo si nos illam præmotionem, qua Deus voluntatem nostram determinat, vocamus prædeterminationem effectiuam, qua diuina voluntas physicè nostram voluntatem determinat: est ergo ista vox antiqua, & à SS. PP. vnitata.

Dico igitur; Quòd voluntas humana physicè prædeterminatur à Deo ad volendum obiectum; non verò moraliter; ut volunt multi ex Recentioribus, qui scientiam mediam defendunt. Hæc sententia stando auctoritatibus SS. Ecclesiæ luminum Augustini, & Thomæ, quarum setiem tradidimus, agendo de decreto Dei efficaci, & prædeterminante, conuincitur vera. Docuisse verò physicam prædeterminationem D. Thomam fatentur in primis plures PP. Societatis; primo loco Collegium Conimbricense, Cardinalis Bellarminus, qui vocat hanc sententiam probabiliorem, & Scripturæ sacræ consentaneam: insuper Peretius, Azorius, Henriquez, qui ostendit sententiam Molinæ, & Lessij, doctrinæ D. P. August. & D. Thomæ repugnare: insuper Physicam prædeterminationem esse de mente S. Thomæ apertè tradit Cardinalis Toletus, Cosmas Alemani, Suarius, & alij: & denique libellus compositus, ex sex Patribus Societatis, & impressus Romæ anno 1586, iussu Præpositi Generalis agens de directione studiorum, Hæc

Hæc sententia de physica prædeterminatione innumeros quasi obtinuit Patronos, qui eam acerrimè defendunt; in primis plures ex antiquioribus Theologis Aluarez, Enriquez, celebris scriptor Societatis, dicens hanc ante Molinam fuisse concordem, & vniuersam Theologorum sententiam, & allegat pro hac sententia plus quam viginti Doctores. Præter Dominicanos habet etiam Patronos Patres omnes Exalceatos Carmelitas, & in nostra Congregatione Discalceatorum S. Augusti. Theologos omnes, ut videre est in publicis concertationibus habitis Romæ singulis triennijs ab vnaquaque Prouincia pro Capitulo Generali, coràm Eminentissimis S.R.E. Cardinalibus, quibus bis interfui ex parte Prouinciæ Panormitanæ assistens ut Theologiæ Prælector. PP. item de Mercede Redemptionis Captiuorum, cum Patribus exalceatis eiusdem Ordinis, qui nouissimè in quodam decreto edito in Capitulo Generali celebrato anno 1684. die 20. Maij in Conuentu Corporis Christi Oppidi del Viso, Hispalensis Diocesis, in Prouincia Bæthica, fuit iniunctum, omnibus Lectoribus, sub pœna priuationis à lectione; ut doctrinam D. Thomæ indispensabiliter doceant, & sequantur; sub eis opinionibus, quæ communiter vsitantur in Schola Thomistica, & non in alia. Academias insuper Louaniensem, & Duacensem. Ex Clericis Regularibus PP. Oratorii Barnabitas, PP. Doctrinæ Christianæ, PP. Augustinianos, & quam plures alios, quorum noticiam diffusè tradit P. Gonet in suo clypeo Theologico; ubi præter celebriores Doctores, & Cardinales asserit stare pro hac sententia multa Concilia.

Hæc igitur sententia, quamuis remaneat sufficienter probata, tum authoritatibus, tum rationibus, quibus necessitatem admittendi decreta Dei ex se efficacia, & physice prædeterminantia, notam fecimus: nihilominus breuiter ostendam Deum physice prædeterminare voluntatem creatam ad actum eliciendum: sic, Deus habet certam, & infallibilem cognitionem de futuris contingentibus pendentibus à voluntate creata; sed negata physica prædeterminatione, qua Deus in tempore certò, & infallibiliter voluntatem creatam in vnam partem inclinet, non haberet Deus certam, & infallibilem cognitionem de actibus liberis, seu futuris contingentibus; nam etiam posita æterna diuinæ voluntatis prædeterminatione, nisi Deus physice prædeterminaret in tempore voluntatem illam, infallibiliter inclinando in vnam partem, posset voluntas creata aliud velle; & sic voluntas actum liberum certò non efficiet, cum voluntas in illo casu esset indifferens, & à principio indifferenti, & indeterminato, ut sæpe ostensum est, nullo modo sequitur actio determinata, nisi prius determinetur ab alio: Si Deus igitur non prædeterminat hominis voluntatem in particulari ad hunc, vel illum actum liberum, illum Deus certò non cognosceret; hoc est impium asserere; quia negare in Deo præscientiam, est re ipsa eius diuinitatem negare; ergo &c. Debet igitur illa præmotio Dei verè, realiter, & efficienter mouere, & appli-

applicare voluntatem ad actum; nam quæcumque alia motio in voluntate ponatur: solum moraliter voluntatem mouens, & excitans; non verò physicè, & efficienter; non est motio quoad exercitium, & se tenens ex parte potentia; sed solum se tenens ex parte suadentis; vnde solum mouet obiectiue, non verò physicè, & efficienter, ex parte potentia.

Probat *II.* eadem conclusio, Quia ablata physica prædeterminatione tolleretur de medio prouidentia Dei; hoc non est dicendum; ergo, neque primum: Sequela probatur; quia ita hæc duo inseparabiliter coniunguntur; vt vna posita, vel ablata necesse est, vt altera ponatur, vel auferatur; nam prouidentia Dei excludit à rebus præiudis casualitatem respectu Dei, & fallibilitatem saxe dispositionis; est enim immobilis Dei dispositio, impressa, & inhærens mobili voluntati; sed hoc idem est ipsissima physica prædeterminatio voluntati impressa; ergo qui negat physicam, & efficacem prædeterminationem, negat Dei prouidentiam. Nec sufficit dicere, Deum habere de nostris actibus liberis solum quandam prouidentiam generalem: *Aliter* tolleretur à diuina prouidentia, dispositio circa determinationem nostræ libertatis, quæ est medium, necessarium ad salutem.

III. Denique probatur; Quia ablata physica prædeterminatione destrueretur ordo prædestinationis, & gratia: Primum patet, quia nisi Deus daret voluntati non solum posse, sed etiam ipsum agere media, gratia prædeterminante; prædestinatio non haberet infallibilem effectum; cum natura lapsa trahatur ad malum, & ad id sit valde propensa. *II.* etiam ostenditur; quod scilicet destrueretur totus ordo gratia actualis; hic enim ordo consistit præcipue in auxilijs sufficientibus, & efficacibus, hæc autem stare non possunt sublata physica prædeterminatione; nam determinatio voluntatis ad diligendum v.g. Deum super omnia, est quoddam initium Fidei, & bonæ voluntatis; sed talis determinatio non potest effici à gratia solum moraliter excitante; cum hæc sit solum efficientia metaphorica, & impropria; neque à concursu simultaneo, cum talis concursus non præueniat determinationem, sed solum supponat, vel expectet à voluntate creata; ergo debet causari à gratia physicè prædeterminante; aliter reduceretur in solam naturam, tamquam veram, & propriam causam efficientem, & sic destrueretur ordo gratia.

Circa ea, quæ spectant ad conciliatum libertatis creatæ cum physica prædeterminatione, dicimus: Quod æque bene conciliatur libertas, voluntatis humanæ cum physica prædeterminatione; sicut conciliatur cum decreto efficaci, & physicè prædeterminante: rationes igitur, quæ ostendunt liberum arbitrium non lædi, sed potius perfici à decreto diuinæ voluntatis efficaciter prædeterminante, demonstrant etiam perfici à physica prædeterminatione; sed hoc clarius apparebit ex solutione argumentorum, quæ contra decreta Dei efficacia, & physicam præ-

prædeterminationem aduersarij in sequentibus coaceruant.

Dicunt enim I. *In cap. 15. Ecclesiast.* habetur quòd *Deus reliquit hominem in manu consilij sui*. sed hoc non posset esse, si suo decreto efficaci, & prædeterminante prædefiniret eius actiones; ergo &c. *Respondetur* hoc esse intelligendum, quatenus finit illum operari modo proprio suæ naturæ, idest libero, seu cum consilio; semper tamen cum subordinatione ad primum consilium; sic enim exponit hoc testimonium D. Thom. 3. *contra Gentes cap. 90. Hac verba* (scilicet Ecclesiastici) *ad hoc inducuntur; ut homines esse liberi arbitrij ostendantur, non ut eorum electiones à diuina prouidentia subtrahantur.*

Dicunt II. Ex Concilio Tridentino *sess. 6. cap. 5. & can. 4.* habetur, quòd liberum arbitrium motum, & excitatum à Deo, potest dissentire, si velit, & quamcumque gratiæ motionem à se abijcere; ergo Concilium, excludit hanc præmotionem Physicam, & efficacem. *Respondetur* Concilium definire quidem, quòd liberum arbitrium sic motum, & excitatum potest dissentire, si velit, nempe eidem Deo vocanti, & excitanti; non autem dicit, quòd potest resistere Deo efficaciter mouenti; aliud enim est arbitrium, postquam est à Deo motum, & excitatum posse dissentire Deo excitanti, & mouenti, quod est verum, & Concilium determinat, & est sine distinctione concedendum, cum importetur ex vi terminorum sensus diuisus. Aliud est, quòd arbitrium motum, & excitatum possit resistere Deo vocanti, & excitanti, atque mouenti, quod Concilium non dicit; cum hoc importet sensum compositum.

Dicunt III. Admissa physica prædeterminatione, & decreto Dei efficaci physice prædeterminante, & ex suppositione insuperabili, admitteretur fatum, quòd constituebant Gentiles ex constellationibus syderum; cum posito tali decreto non sit in potestate hominis aliud facere. *Rector* queritur argumentum: posita scientia media aduersariorum non est in potestate Dei aliud scire, quam sciuit per illam; ergo nec erit in potestate Dei aliud efficere; si enim posset aliud efficere, posset etiam aliud scire; ergo in Deo ponitur fatum insuperabile: & sic ex eadem ratione, qua ipsi ponunt fatum in homine poneretur in Deo. II. sequeretur, Quòd omnia subijcerentur fato admissa diuina prouidentia; quia fatum ex Boetio est *Immobilis dispositio rebus mobilibus inherens*; sed D. Thom. dicit, quòd à diuina prouidentia omnia sunt immobiliter prædeterminata, cum sit prædeterminatio ad extra rebus mobilibus inherens; & tamen hoc nomen vult D. Thomas esse vitandum. III. sequeretur, vt bene notat D. P. August. quòd eadem ratione possent aduersarij assertorem fati Apostolum appellare, quando dixit. *Non est volentis, neque currentis, sed Dei miserentis*; & vt ostendat misericordiam Dei non esse in hominis potestate, statim subiungit: *Voluntati eius quis resistet?* quòd clarius habetur in *Haeser. 13. Non est, qui tui possit resistere voluntati.* *Respondetur* igitur in forma, discrimen magnum intercedere inter decretum præ-

prædeterminans, & fatum à Gentilibus admissum; Nam fatum Gentilium necessitatem infert voluntati, & ab ea potentiam ad oppositum tollit; non autem decretum prædeterminans.

Dicunt IV. Sententia hæc admittens decreta Dei ex se efficacia, & & physicè prædeterminantia, conuenit cum hæreticis huius temporis; ergo &c. *Respondetur*, non solum sententia nostra de decreto efficaci, & prædeterminatione humane voluntatis est aliena à sententia hæreticorum nostri temporis; sed etiam totaliter ei contradicit; nam ipsi contendunt, quod ex diuino decreto, & prædeterminatione libertas humana tollitur, vel impeditur, & necessitas absoluta in nostris actionibus constituitur; nos autem docemus, quod ex tali decreto, & prædeterminatione diuinæ voluntatis firmatur, & statuitur nostra libertas; nam supposito tali decreto ex se efficaci semper proponitur obiectum voluntati sub indifferentia rationis, quæ est radix libertatis.

Dicunt V. Posito hoc antecedenti, nempe *Deus efficaciter prædeterminat voluntatem v. g. ad consensum*; sequitur infallibiliter necessitate consequentiæ, quod ego consentiam; cum illi voluntas humana non possit resistere: hoc autem antecedens nullo modo est in mea potestate; quia voluntas non potest efficere, vt prædeterminatio diuinæ voluntatis ponatur; ergo ad initio decreto, & physica prædeterminatione, cum consensus non sit in mea potestate, non erit liber: Nam iuxta illud principium, *quod quoties aliquod consequens sequitur necessariò ad aliquod antecedens, si non est in eius potestate antecedens, nec erit in eius potestate consequens*.

Respondere potest primò ad illud, quod dicitur decretum efficax, & physica prædeterminatio non est in mea potestate originatiuè, in quantum a me non deriuetur, concedo; nõ est in mea potestate terminatiuè, & quo ad vsum, id est consequutiuè, nego. II. concedere libenter poteris hæc omnia: primò, Quod posito decreto, & physica prædeterminatione voluntas non possit illi resistere, loquendo de resistètia propria, sicut per illud verbum *resistere* significatur; concedas secundo: Quod, decretum efficaciter prædeterminans, sicut & physica prædeterminatio non est in nostra potestate, vt habeatur, vel vt nobis donetur: concedas denique, quod sit necessaria ad consensum v. g. Dei prædeterminatio, ex efficacia diuina voluntate procedens; Neganda tamen semper est consequentia, quando ex his inferunt; ergo voluntas non est libera; quia licet sit verum, quod voluntas efficaciter mota non possit resistere efficaci Dei motioni, vt expressè habetur in Scriptura; est tamen absolutè, & simpliciter falsum, quod voluntas efficaciter mota non possit aliud velle; quia voluntas Dei efficaciter mouens vult, quod homo velit id, ad quod à Deo mouetur, & habeat potentiam liberam ad aliud volendum, in quo propriè consistit libertas.

Dicunt VI. Posito decreto Dei efficaci, & physica prædeterminatione

voluntas non potest resistere, vel dissentire efficaci Dei voluntati; ergo neque potest facere, aut velle aliud, quàm quod ipsa vult. *Respondetur* concedendo iterum antecedens, & negando consequentiam. Disparitas est, quia potentia ad resistendum, vel dissentiendum, nequit competere arbitrio creato, cum debeat esse æqualis illi efficaci motioni; nec Deus vult, quòd huiusmodi potentia in arbitrio creato reperitur; potentia autem aliud volendi; in qua consistit libertas, reperitur in arbitrio à Deo efficacitèr moto; quia Deus vult quòd ita voluntas efficacitèr mota operetur; ut valeat contrarium operari; ergo talis potentia, est potius potentia ab obediendum, & consentiendum diuinæ voluntati, quæ vult, ut arbitrium sic operetur, quàm sit potentia ad resistendum, & dissentiendum. Vel dic, quòd antecedens facit sensum compositum; consequens autem facit sensum diuisum; & sic conceditur antecedens, & negatur consequentia.

Dicunt VII. Implicat in terminis, & contradictionem inuoluit, quòd ali- quod se determinet, seu quòd voluntas se ipsam moueat, & determinet, & prius natura moueatur, & determinetur à Deo; quod enim est semel factum, nequit esse refectum. *Respondetur* negando antecedens; non enim repugnat, quòd eadem actio procedat à Deo, & à voluntate creata, tamquam à duobus agentibus diuersi ordinis; & sic eadem determinatio voluntatis est à Deo, & à primo libero, & determinante, & à voluntate, ut secundo libero, & determinante; si tota enim determinatio esset à sola motione Dei, & nō daretur in voluntate vis determinatiua cō, lebilis per efficacem Dei motionem, tunc prædicatio determinationis per accidens prædicaretur de voluntate; & sic non imputaretur illi ad meritum, vel demeritum, quòd vnum præligeret alteri.

Dicunt VIII. Est impossibile, ut derur in voluntate vis determinatiua ad volendum; quia sicuti decretum efficax non est in nostra potestate, nec etiam actus volendi erit in nostra potestate; vnde posito decreto necessario sequitur, quòd velimus. *Respondetur*, quòd est falsissima regula hæc, nempe antecedens, seu decretum non est in nostra potestate; ergo consequens, nempe actus volendi, neque erit in nostra potestate; nam physica, & efficax Dei prædeterminatio, quæ in mea potestate non est; ponit tamen in mea potestate, quòd liberè velim, seu ipsum actum, volendi. Vel dic: non est in nostra potestate actus volendi totaliter, & ex omni parte, concedo; posita sub priori Dei potestate, quòd velimus, nego: est ergo potestatis nostræ velle, ut ait S. Hieronymus respondens Pelagio; sed non est solum potestatis nostræ, sed Dei adiuvantis, ut velimus. *Ad illud*, quod dicitur: Posito decreto efficaci necessario sequitur, ut velimus, *Respondeo* cum distinctione, necessario sequitur necessitate consequenti, seu absoluta, nego; necessitate consequentiæ, seu ex suppositione, & conditionata, concedo.

Dicunt IX. Indifferentia opponitur determinationi; sed etiam posito de-

decreto efficaci, & physica prædeterminatione voluntas est indifferens; ergo nequit ex se habere vim determinatiuam. *Respondetur* distinguendo maiorem: indifferencia suspensionis, & priuatiua, quæ dicit carentiam, & suspensionem omnis exercitij, opponitur determinationi, concedo; indifferencia positiua, & exercitij nego: ad minorem dic, posito decreto voluntas est indifferens indifferencia priuatiua, & suspensionis nego, quia per ipsum voluntas, quæ erat cum suspensione, & carentia omnis exercitij, reducitur ad actum exercitij, manendo cum indifferencia dominij, & actualis exercitij; est indifferens indifferencia positiua, & dominij concedo. Vel dic, indifferencia passiuæ opponitur determinationi, transeat, indifferencia actiua, nego; hanc enim indifferenciam actiuam habet voluntas, etiam posito decreto; licet hæc sit quasi passiuæ respectu Dei, quæ indifferencia potius perficitur, quam lædatur per decretum; quia hac indifferencia voluntas, vt optimè asserit D. P. August. non merè patitur, sed patitur, vt efficiat, & agitur, vt agat: quo pacto dicimus, aerem pati, cum illuminatur; cum huiusmodi pati potius sit quoddam perficere: & sic voluntas, mota enim à Deo, dicitur quodammodo passiuæ; respectu tamén actus, & obiecti se actiue mouet. Vnde nec merè, & totaliter passiuæ, nec merè, & totaliter actiue se habet, sed se habet passiuæ respectu motionis Dei quam recipit; actiue respectu propriæ actionis suæ, quam vitaliter elicit.

Dicunt X. Potentia libera, est illa, quæ potest agere, vel non agere; ergo voluntas quæ est potentia libera, si potest agere in sensu composito; poterit etiam non agere in eodem sensu composito. *Respondetur* conced. antecedens, & negando consequentiam, nam potentia quando est reducta ad exercitium vnius extremi, non est amplius potentia informis, sed formata: vnde licet tunc sit vera potentia ad vtrumlibet; non tamén eodem modo; sed ad vnum in actu secundo, ad aliud in actu primo. Quando ergo dicitur, quod in principio libero detur similitudo potentia: intelligitur, prout extrema per se inspecta a potentia non sunt incompatibilia; quia vtrumque est simul possibile, licet nunquam simul ponantur actu.

Dicunt XI. Suppositio antecedens, seu non descendens ex libera facultate voluntatis tollit libertatem, iuxta D. Anselmum, qui necessitatem antecedentem pugnantem cum libertate vocat illam, quæ præcedit rem, & facit; sed decretum, & physica prædeterminatio sunt aliqua suppositio antecedens, & non descendens ex electione nostræ voluntatis; ergo &c. *Respondetur* distinguendo maiorem; suppositio antecedens in proprio ordine concedo; in altiori ordine, cui proprius subordinatur in sui libera determinatione, sicuti accidit in voluntate cum decreto physice prædeterminante nego: hæc enim non tollit, quin voluntas sit se determinans in suo ordine: & hoc modo est intelligendus D. Anselmus: *Vel*, dic, suppositio antecedens prioritate naturæ, & à quo, tollit libertatem,

nego; suppositio antecedens prioritate *in quo*, & durationis concedo, quia prioritas naturæ & à quo, est prioritas causalitatis: & sicut causa, non tollit, nec destruit effectum, licet antecedit, sed illum causat, & perficit; ita suppositio antecedens sola prioritate naturæ liberum nostræ voluntatis consensum antecedens, libertatem non tollit, sed causat, fouet, perficit, & conseruat.

Dicunt XII. Potentia ad oppositum, quam saluat in voluntate decretū Dei efficax, & physica prædeterminatio, est omnino inutilis; quia nunquam reducitur ad actum; frustra autem est potentia, quæ nunquam reducitur in actum. *Respond.* Quod talis potentia non est frustra; quia per vnum exercitium actuat. Illud autem axioma, nempe *frustra est potentia, quæ non reducitur in actum*; est intelligendum hoc modo; nempe quod sit frustra illa potentia, quæ non reducitur in aliquem actum contentum sub suo actu adæquato; non autem erit frustra, si habens tantum actum vnum, v.g. consensum, non reducat in alium. Vel est frustra potentia, &c. quando nunquam est in talem actum reducenda; non autem si pro aliquo tempore ex suppositione aliqua præhabita, non reducitur in actum; licet ablata illa suppositione postea reducatur: vnde licet potentia ad dissentiendum non reducat ad actum, pro tempore, quo efficaciter arbitrium mouetur; reduciur tamen ad actum, quando non efficaciter mouetur. Vel III. dicunt D. Thoma, quod tunc dicitur frustra potentia; quando non reducitur ad actum, à quo res perficiatur, & suum non consequitur complementum: vnde licet potentia ad dissentiendum non reducat ad actum, quia dissentire Deo non est actus, à quo voluntas perficiatur; non sequitur, quod illa potentia sit frustranea. De reliquo hoc axioma si intelligatur sine limitatione, & absolute; est negandum; interroget enim quæso Aduersarius se ipsum, & videat quantas potentias continet, quæ nunquam reducuntur in actum, absque eo quod ipsæ sint frustraneæ; non ne habet potentiam se flammis suffocari? in manibus barbarorum se vltro committere? se in fluminibus, vel in mari præcipitem dari? & infinitas quasi alias potentias; quæ, vt dixi, nec sunt, nec esse, nec dici possunt frustraneæ.

Dicunt XIII. Decretum Dei efficax, & physica prædeterminatio determinant potentiam ad vnum; ergo destrunt libertatem. *Respond.* distinguendo antecedens; determinant potentiam ad vnum, relinquendo potentiam ad aliud concedo, non relinquendo talem potentiam ad aliud nego. Voluntas igitur efficaciter prædeterminata ad consensum v.g. remanet cum potentia ad dissensum, qui dissensus erit in eo casu voluntati tantum possibilis.

Dicunt XIV. Possibili posito in actu, seu in esse nullum sequitur inconueniens; ergo si voluntati efficaciter à Deo motæ, & physice prædeterminatæ, v. g. ad consensum, ponatur dissensus, qui est possibilis, vt conceditur, nullum sequitur inconueniens. *Resp.* distinguendo antecedens,

Possibi-

Possibili posito in actu, seu in esse, absolute nullum sequitur inconueniens, concedo; possibili posito in actu, seu in esse, supposito alio incompossibili nullum sequitur inconueniens nego. Possibili enim posito in esse supposito alio impossibili sequitur maximum inconueniens; sequuntur enim duæ contradictoriæ veræ; vel quod duæ formæ contrariæ, & repugnantes, sint simul in eodem subiecto, v. g. assensus, & dissensus; nam supposito; quod voluntas efficaciter moueatur ad consensum; licet ipsi remaneat potentia ad dissentendum, non potest illud possibile, sed dissensus poni in actu; aliter duo contraria impossibilia, nempe assensus, & dissensus componerentur simul.

Dicunt XV. Sine efficaci Dei prædeterminatione voluntas non potest operari; ergo ille, qui talem prædeterminationem non recipit, non erit liber, nec debet ei imputari ommissio alicuius præcepti; & daretur locus excusationis in reprobis; nam voluntas sine efficaci Dei motione se habet, sicut ignis, qui non potest comburere sine Dei concursu; & manus, quæ scribere non potest, nisi moueatur. *Respondetur* ad primum q. quod illa particula *sine efficaci Dei prædeterminatione* potest referri ad potentiam, quæ importatur per *ly potest*, vel ad actum, qui importatur per *ly facere*; si refertur ad potentiam, loquutio est falsa; nam sine Dei prædeterminatione habet homo potentiam liberam ad operandum; si verò refertur ad actum, loquutio est vera; & sensus est, quod non potest esse, quod voluntas operetur, & non sit à Deo prædeterminata. *Ad illud*, quod dicitur in consequenti, nempe; ergo ille, qui talem prædeterminationem non recipit, non erit liber, nec ei debet imputari ommissio: & daretur locus excusationis, &c. *Resp.* cum distinctione. Si voluntati nullus omnino concursus ei detur, nec ei negetur ob aliquam præcedentem culpam concedo, quod non poterit operari, nec ei imputandum est, quod non operetur; si verò operatur id, ad quod à Deo mouetur; quia ita ille hoc vult liberè operari, quod aliud vult liberè omittere, & si vellet ipsum facere, posset; cum habeat ad id liberam facultatem, nego, quod non sit liber, & ei non sit imputanda ommissio, &c. Exempla autem de igne, & de manu sunt improprietate; quia ignis, & manus libertate carent, vnde eis non tribuitur, aut imputatur; nisi præcisè id, ad quod à Deo, vel à voluntate mouentur; iuste igitur peccator corripitur, iuste culpatur, & punitur; quia dum caret efficaci decreto, habet libertatem expeditam ad ponendum actum imperatum; quia non caret aliquo ex prærequisitis, ut possit sed sola applicatione, qua agat.

Dicunt XVI. Præmotio Dei efficax, & prædeterminans est forma, & qualitas quædam efficaciter determinans voluntatem quo ad exercitium; ergo voluntas non remanet libera, sed ligata: sicut homo compedibus, vel vinculis adstrictus. *Respondetur* negando antecedens; non enim; hyfica prædeterminatio, & decretum est forma voluntati impressa, efficaciter ipsam determinans quo ad exercitium, nec qualitas per modum

nis, sed capacitatis, non potentia actura, sed actiua, non denique potentia similitatis, sed similitate potentiae.

Non est igitur physica praedeterminatio petra scandali, & lapis offensionis, ut latrant Aduersarij; sed est cardo, fons, & origo totius libertatis arbitrij; nam omnipotentia Dei ita liberum nostrae voluntatis consensum cum inuictissima, & insuperabili physicae praedeterminationis efficacia, & fortitudine, inuolabili nexu, & amabili vinculo sociauit; ut nec physicae praedeterminationis efficacia arbitrij libertatem laedat, aut minuat, nec arbitrij libertas, aut mutabilitas physicae praedeterminationis efficaciam impediatur; aut retardet.

Utrum Deus physice praedeterminet materiale peccati?

AD concludendam hanc difficillimam materiam, & celeberrimam questionem de physica praedeterminatione, qua efficaciter voluntas creata praemouetur ad actus suos liberos eliciendos, remanet solum examinare: utrum Deus efficaci suae voluntatis decreto, & physica praedeterminatione praemoueat; & praedeterminet ad materiale peccatirrationes enim superius allatae pro physica praedeterminatione videntur non solum suadere, sed etiam cogere, esse sustinendum Deum esse causam, & determinare voluntatem ad actionem, quae est in peccato, quatenus entitas, & actio est; nam sicuti est veritas catholica contra Pelagianos, asserere, Deum esse causam praemouentem ad actionem, quae est in peccato, quatenus praecise entitas, & actio est; sic est haereticum asserere: Deum praemouere ad peccatum, vel esse authorem, vel causam illius: prolabantur enim in hunc errorem Manichaei, Calvinistae, & Lutherani, qui sic argumentantur. Quidquid est causa praemouens voluntatem ad actionem, quae est in peccato, est causa praemouens ad peccatum ipsum; sed Deus est causa praemouens voluntatem ad actionem, quae est in peccato; ergo est causa praemouens ad peccatum ipsum: in quo syllogismo minor est de Fide in sententia D. Thomae, maior autem, & conclusio est haeretica.

Tota igitur praesens difficultas est in explicando, quomodo voluntas praemouetur a Deo liberè ad materiale peccati, & Deus non dicatur author, nec causa peccati: ad quod resoluendum, est notandum breuiter I. Quòd in peccato possunt tria distinguì, primò actio, & entitas ipsius peccati, ut actio, & entitas est. Secundo actio illa, quatenus defectiuosa, seu quatenus habet annexam malitiam, & deformitatem, seu actionem, secundum quod ad ipsam sequitur malitia, & deformitas. Tertiò. Est malitia ipsa, seu deformitas consecuta.

Est notandum II. Quòd voluntas creata respectu cuiuscumque actionis, ut actio, & entitas est, non est primum liberum, nec primum se determinans; sed est secundum liberum, & secundum se determinans;

comparatione autem eius, secundum quod est peccatum, voluntas creata est primum se determinans, primum liberum, & prima causa, non habens in illo genere priorem. III. Est notandum, quod quamvis sit omnium Thomistarum sententia Deum concurrere, & præmonere actionem, quæ est in peccato, quatenus entitas, & actio est; non tamen omnes una, eademque via procedunt; nam qui probant physicam prædeterminationem ex generali dependentia causæ secundæ à prima, & supremo, perfectoque dominio, quod habet causa prima in secundam, tenentur asserere, & defecto asserunt Deum physicè prædeterminare materiale peccati materialiter sumptum; qui verò inferunt physicam prædeterminationem ex ratione diuinæ Providentiæ, docent Deum non physicè prædeterminare materiale peccati; sed decreto permissiuo concurrere ad malitiam, refundendo determinationem ad defectum, ad solam voluntatem deficientem: ad entitatem verò concurret decreto positiuo, per præmotionem actiue indifferentem, taliter condeterminantem ipsam entitatem; ut voluntas efficiat ipsam entitatem, & perfectionem actionis, *ut quod*, & præmotio diuina, *ut quo*. Vnde videtur non recedere à sententia Thomistarum, qui docet Deum non prædeterminare physicè materiale peccati, etiam si physicè prædeterminet omnes alios actus liberos nostræ voluntatis: quidquid igitur sentiam, distinctis conclusionibus breuiter exponam.

Dico I. Cum hac secunda sententia, quam existimo æquè probabilior, ac primam; Quantum ad id, quod spectat ad malitiam, & deformitatem peccati, Deum concurrere ad ipsam per præmotionem indifferentem permissiuè se habentem quoad determinationem voluntatis ad malitiam. Hæc conclusio duas habet partes, prima est quod Deus concurret ad determinationem voluntatis circa malitiam permissiuè, seu decreto permissiuo; & altera est, quod Deus hoc faciat per præmotionem indifferentem, non prædeterminantem, sed condeterminantem; ita ut circa malitiam voluntas sola sit primum determinans, & prima causa; circa verò actionem, quatenus est entitas, & actio, concurret simul Deus, & voluntas, ut supra dictum est. Probat. I. Conclusio quo ad primam partem; nempe, quod Deus concurret ad malitiam permissiuè, seu decreto solum permissiuo: Primò quia Deus aliter determinat voluntatem ad actus bonos, quam malos; ut ex multis Sacre Scripturæ testimonijs colligitur; sed ad bonum positiue determinat; ut est conformis Theologorum sententia; determinat enim Deus actus bonos positiua determinatione; ergo malum determinat permittendo; ut scilicet ex occasionibus voluntas flectatur; vel claudendo præmotionem gratiæ, qua amplectatur; permissio enim peccati in se est bona, & ad bonum finem ordinatur; sicut voluit permittere grauissimum illud peccatum crucifigentium Christum, ut mundus redimeretur: & sic ut permissio illa, ex qua tantus finis proueniebat, impleretur, mouebat Deus crucifigentium manus,

nus, (cum sine Deo mouente, nec illas ipsi mouere possent,) vt actionem illam efficerent.

Ostenditur II. Eadem veritas; nam certum est, quod tantum Deus mouet arbitrium ad efficiendum id, ad quod sibi à principio potentiam dedit; sed quando Deus liberum arbitrium creauit, non dedit ei defectibilitatem, seu potentiam formaliter ad peccandum; ergo non mouet hominem ad peccandum; ergo nullo modo est causa peccati, sed solum permissiue se habet ad ipsum.

Secunda pars conclusionis, in qua dicebatur, quod Deus praeuouet indifferenter voluntatem, & simul cum illa actiue determinat, seu sit actiue condeterminans entitatem actus ostenditur. Quia sicut se habet actus ad actum, ita determinatio ad determinationem: id est sicut actualis malitia concomitatur actualem bonitatem ipsius actus: ita determinatio ad malitiam concomitatur determinationem Dei ad bonitatem actus; sed in positione actualis malitiae voluntas concurret simultaneè cum Deo; quia termini concursus sunt simul; nempe Deus ad bonitatem, & voluntas ad malitiam; ergo etiam in positione determinationis ad malitiam; quia termini concursus sunt etiam simul: licet voluntas sit primum determinans quo ad malitiam, erit actiue condeterminans cum Deo entitatem actus, & Deus cum voluntate. Confirmatur; quia per hunc concursum actiue indifferentem bene saluatur, quod Deus nullo modo coope- retur ad malum. Et ratio est, quia licet vna ratio in effectu sit identifi- cata cum alia; tamen potest esse extra latitudinem obiecti virtutis cau- saque; sicut sol v.g. cooperatur ad generationem hominis; non tamen ad rationalitatem causandam; ergo cum deformitas sit extra obiectum adaequatum Dei, bene stat posse Deum cum voluntate concurrere ad entitatem praescindendo ab ipsa malitia, & cooperari ad physicum actionis, quae pro vt est à principio deficiente, est peccatum.

Vt autem hoc totum clare percipiatur, aduerto, quod iste concursus simultaneus determinationis diuinæ, & voluntatis creatæ ad physicum actionis, quae est peccatum, est in diuersa linea; taliter quod Deus non concurret simultaneè cum voluntate creatæ v.g. ad entitatem, & ad actum; sicuti sustinent Professores scientiæ mediæ, & impugnatores decreti Dei efficaciae, sed determinatio diuina est ad entitatem actus peccati, & determinatio voluntatis, seu causae defectibilis, est simul ad malitiam, cum in nullo signo possit concipi in prima productione causae defectibilis siue modo defectibilitatis intimè imbibito in eius praedicatis: & sic in linea effectiua Deus est simpliciter prima causa, & in hac linea habet Deus debitam prioritatem respectu actus subsequenter, licet adsit per accidens concomitantia determinationis voluntatis ad malum; ergo sententia hæc nullo modo coincidit cum sententia professorum scientiæ mediæ, admittentium concursum simultaneum voluntatis creatæ, & diuinæ inter propriam lineam causalitatis circa entitatem, & boni-
tatem actus.

Dices, Causa defectuosa semper agit, ut causa secunda, & Deus ut causa prima; ergo determinatio voluntatis, quæ est causa defectuosa, debet sequi determinationem causæ primæ. *Respond.* concedendo antecedens, & distingo consequens; ergo determinatio causæ defectuosæ debet sequi determinationem causæ primæ in propria linea determinationis causæ primæ, concedo, in diuersa linea, nego: nos enim vltro concedimus) (ut diximus contra Professores scientiæ mediæ admittentes cōcursum simultaneū voluntatis diuinæ, & creatæ ad entitatem, & bonitatem actus) Deum esse primam causam, & primum determinatiuum entitatis, & bonitatis actus, ad quam sequitur determinatio voluntatis: id, quod negamus, est, quod non possit voluntas creata, quæ in linea defectus est prima causa concomitari in hac linea causalitatem, & determinationem diuinam, spectantem ad aliam lineam, nempe ad entitatem, ut entitas, & actus est.

Replicabis, voluntas creata, ut dictum est, pro ut defectuosa, est prima causa, & primum determinans defectus, & malitiæ; ergo absolute dici non potest causa secunda. *Respondetur* negando cōsequentiam; nam licet in linea malitiæ, seu defectus moralis voluntas creata sit prima causa: id non verat, quin absolute dici possit causa secunda: & sic causa defectuosa semper agit absolute loquendo, ut causa secunda; quia agere absolute stat pro efficere, non deficere.

Dico II. Deum non prædeterminare physice materiale peccati. Hæc conclusio sequitur ex dictis; eo ipso enim, quod Deus, ut probatum est, hoc facit per præmotionem actiue indifferentem modo supra explicato; sequitur, Deum hoc non facere per physicam prædeterminationem: nihilominus potest hæc conclusio vltius probari hac ratione. Inter materiale peccati, & ipsam malitiam datur nexus indispensabilis, idest cum entitate peccati est necessariò connexa malitia; ergo ne dicamus, Deum esse causam peccati, debemus assignare causam, in qua refundatur talis nexus; sed si Deus physice prædeterminaret materiale peccati, non posset assignari pro causa talis nexus, nisi ipsa determinatio Dei; ergo si Deus physice prædeterminaret materiale peccati, causaret saltem indirectè malitiam peccati, quod nullo modo est dicendum; antecedens, & prima consequentia est certa, minor subsumpta ostenditur; non enim potest dici, quod refundatur talis nexus in voluntatem creatam, ut deficientem; quia pro signo prædeterminationis voluntas non est deficiens; cum supponatur prædeterminatio ad omnem influxum causæ creatæ; sed præter voluntatem creatam non potest dari aliud, in quod refundatur talis nexus actus cum malitia; nisi ipsa prædeterminatio; ergo si Deus physice prædeterminaret materiale peccati, esset causa peccati, & deformitatis illius, hoc non est dicendum; ergo neque quod Deus prædeterminet materiale peccati.

Dices I. cum P. Gonet; Determinatio voluntatis est quid reale; sed
hoc

hoc non potest esse à Deo per motionem indifferentem, cum omnis realitas debeat prædeterminari à Deo; ergo ne dicamus, quòd detur in rerum natura aliqua realitas non à Deo prædeterminata, debemus negare iuxta nostra principia motionem indifferentem ad entitatem, quæ est peccatum. *Respondetur*, quòd illa determinatio est quid reale à voluntate, non in voluntate; hæc autem determinatio realis à voluntate, bene potest esse à motione sic actiue indifferenti, cui convenire potest, *ut quo*, id, quod competit soli divinæ voluntati, *ut quod*, quo ad prædictum modum determinandi. Præmotio igitur indifferens dat totam actiuitatem intrinsecè requisitam, ut non solum possit voluntas operari; sed etiam, ut actiue determinet operationem; licet hic modus quantum ad condeterminationem actus boni, minus sit positivus; & in actu malo, & si magis difficili, sit permissivus.

Dices II. Est sententia omnium Thomistarum, & à nobis etiam tradita; Deum prædeterminare omnes actus bonos; sed materiale peccati materialiter sumptum est actus bonus; ergo Deus prædeterminat materiale peccati. *Respond.* distinguendo minorem, materiale peccati est actus bonus, nexus in esse prædeterminati cum determinatione ad malitiã, & nexu positivo, concedo, non ita nexum, nego: est igitur materiale peccati, v. g. entitas, & actus odij Dei bona; sed semper talis entitas, & actus est nexus, nexu positivo cum determinatione ad malitiã, & sic non potest elici talis entitas immediate à Deo, nulla alia causâ defectibili interueniente: aliter daretur actus bonus nexus malitiæ, quæ in solum Deum esset refundibilis: Exemplo totum declaratur, si Deus v. g. vellet se solo, & immediate entitatem odij sui, & illud se solo, & immediate causaret; quãvis talis entitas sit bona; nemo est, qui dubitet, quòd Deus odio habendo se, violaret leges charitatis, & peccaret; quia vellet indirectè malitiã; & hoc non ob aliam rationem; nisi quia cum entitate odij causata saltem indirectè à Deo, esset necessariò connexa malitiã, cuius nexus non esset refundibilis in aliam causam; totum hoc verificatur in casu nostro, admissa prædeterminatione ad materiale peccati, in quantum bonum.

Aduerto tamen hic, quòd per hoc, quòd voluntas per motionem actiue indifferentem se determinet ad actum odij v. g. non sequitur, quòd tali motione possit etiam se actiue determinare ad negationem eiusdem; nam carentia illa prædeterminationis, quam habet voluntas ad evitandum odium, idem est, ac permissio: vnde sicut Deus permittens peccata, idest causam secundam deficere, non est causa defectus, ita nec præmotio dicens carentiam prædeterminationis, seu auxilij efficacis ad evitandum odium, erit determinans ad talem negationem.

Dices III. Idèò per nos non potest Deus physice prædeterminare materiale peccati; quia entitas peccati est annexa cum deformitate, & malitia ipsius; sed posita præmotione actiue indifferenti, adhuc entitas pec-

cari est annexa cum deformitate; ergo &c. *Respondeo* concessa maiori, distingo minorem; posita præmotione &c. adhuc entitas peccati est annexa cum malitia eodem modo, ac est annexa posita physica prædeterminatione, nego, diuerso modo, concedo. Diuersitas igitur consistit in hoc, quòd posita physica prædeterminatione non possit assignari aliquod præter ipsam prædeterminationem, in quod esset refundibilis nexus malitiæ cum entitate, & sic Deus esset causa peccati; posita autem præmotione indifferenti iam assignatur voluntas defectibilis, in quam refundatur talis nexus: hæc doctrina potest confirmari exemplo supra adducto de Deo, qui si se solo operante eliceret actum odij, esset causa saltem indirectè malitiæ; quia non daretur alia causa deficiens, in quam refundaretur malitia, quamuis entitas odij sit connexa cum malitia ipsius.

Nota hic I. Quòd posita præmotione hac indifferenti, & decreto solum permissiuo, est infallibiliter futurum peccatum, non ob influxum decreti permissiuo, sed ob defectibilitatem voluntatis creatæ; & licet non adsit principium physicè determinans; habebit tamen Deus omnimodam certitudinem, ortam à principio morali, moraliter influente, supposita fragilitate voluntatis: quatenus si à Deo deferatur sua gratia, efficaci, habet infallibilem omnino nexum cum eius defectu, ex eius tamen libera electione ponendo.

Nota II. Quòd absolutè loquendo est falsum, quòd malitia sequatur ad bonitatem; & consequenter, quòd decretum permissiuum peccati sequatur ad decretum prædeterminatiuum bonitatis, quæ est in materiali peccati: est solum verum, quòd malitia sequatur ad bonitatem, in hoc sensu: quatenus bonitas transcendentalis imbibita in malitia, est prior malitia prioritate dignitatis; quæ ratio, cū attingi debeat à Deo, non est prior physica attingibilitate; quia non est prioritas in re; sed solum in intellectu considerante. III. Licet decretum permissiuum dicat nexum infallibilem cum peccato; quia tamen talis nexum est merè negatiuus, in quantum Deus non impedit peccatum, quod quia non conetur impedire: ideo ommissio impediendi non est illi indirectè voluntaria. IV. Exemplum adductum à D. Tho. hoc loco circa virtutem motiuam applicantem tibiam curuam ad ambulandum, bonè saluatur, & habet locum in nostra doctrina; nam sicut ante actualem claudicationem datur tibia deficiens, in quam refundatur claudicatio; ita ante determinationem ad malum supponitur voluntas exercitè causans determinationem, & ipsam malitiam. V. Per hoc, quòd Deus cooperetur ad physicum actionis, quæ pro vt est à principio deficiente aliàs est peccatum, non sequitur, quòd Deus cooperetur malo; quia facit id propter honestos fines; vt videre est in consulente grauem percussione ei, quem videt determinatum ad occidendum aliquem; in quo casu solum cooperaretur suo consilio illi physice percussioni, tamquam medio, ad euitandam mor-

mortem proximi. Ultimò est notandum, quòd negata physica prædeterminatione ad materiale peccati, & admissa præmotione actiue indifferenti, neque sequitur, quòd talis modus concurrendi sit casualis; neque quòd Deus præuideat per scientiam mediam, in quam partem voluntas sit consensura; hæc enim iam remansit confutata; sed solum verificatur, quòd Deus nunquam decernit concurrere cum causa deficiente, ad entitatem actus peccati, quin prius in decreto permissiuo videat voluntatem esse secum concursuram.



TRACTATUS IV.

De Prædestinatione, & Reprobatione.

INTER reconditissima diuinorum iudiciorum arcana annum eratur prædestinatio, & reprobatio; nesciens enim homo an amore, vel odio dignus sit: sacer quidam terror incurritur: vt autem profundissimam huius mysterij abyssum securius transmeare possimus, potius est Scripturæ sacræ, & PP. intelligentia inuestiganda, quàm humanarum rationum imbecillitati fidendum. Præmissis igitur prius, quæ pertineant ad essentiam, existentiam, motiua, & effectus prædestinationis, agendum postea nobis erit de his, quæ ad reprobationem spectant. Inquirimus ergo primò.

Quid sit, & an detur Prædestinatio?

Prædestinatio, vt ab ipsa vocis significatione exordium sumamus, componitur ex propositione *præ* & nomine *destinatio*; *præ* antecessionem quandam significat, & in casu nostro volunt Theologi esse antecessionem eternitatis ad tempus, vel probabilius antecessionem ad præscientiam meritorum, & futuræ cooperationis arbitrij, de quo infra clarius disputandum. Verbum autem *destino* duobus modis accipi solet, non solum in scripturis sanctis, verum etiam apud præfatos latinos, vno pro eo, quod est mittere: vnde 1. Machab. 2. legitur *Destinauit aliquos de populo, & abierunt ad regem*; altero verò modo pro eo, quod est statuerè, definire, & ordinare; ideo id, quod animo proponimus, dicimus destinare, secundum illud, quod 2. Machab. 6. dicitur de Eleazaro. *Quòd destinauit non admittere illicita propter vitæ amorem*. Prædestinatio strictè, & propriissimè sumitur à Theologis pro æterna Dei prædestinatione, seu præordinatione dirigentis per certa media creaturam intellectualem ad bonum vitæ æternæ, sicut ad finem,

Definitur prædestinatio à D.P.N. August. *lib. de bono perserver. cap. 14. Est præscientia, & preparatio beneficiorum Dei, quibus certissime liberantur, quicumque liberantur: à D.Thom. hoc loco art. 1. Ratio transmissionis creature rationalis ad vitam æternam: ab alijs verò definitur Preparatio gratiæ in presenti, & gloriæ in futuro. Prædestinatio igitur essentialiter est ordinatio creaturæ rationalis ad gloriam per certa, & determinata media obtinendam.*

Est veritas certa de Fide, Scripturæ sacræ, & SS. Patrum testimonijs confirmata, quod detur prædestinatio, seu providentia aliqua specialis, quæ aliquos efficaciter ordinat, & transmittit ad æternam beatitudinem. Legitur enim ad *Epheios 1. Prædestinavit nos in adoptionem filiorum Dei per Iesum Christum: ideo S. Prosper epist. ad Ruphinum ait Prædestinationem tam impium est negare, quam ipsi gratiæ contraire. Nec sufficit, ut putavit Ambrosius Catherinus, ad salvandam hanc veritatem, de Fide sola generalis providentia Dei, & sola voluntas antecedens salvandi omnes homines; nam nisi Deus subvenire disponderet naturæ lapsæ, circa eius transmissionem ad finem supernaturalem, medijs indeclinabiliter inclinantibus voluntatem, divina providentia non posset habere certitudinem, quod in sui dispositione non falleretur.*

Utrum Prædestinatio formaliter consistat in actu intellectus?

Essententia Scoti asserentis prædestinationem essentialiter, & principaliter esse actum voluntatis, includens comomitanter actum intellectus practici. Alij verò defendunt prædestinationem utrumque actum coniunctum significare; præcipuè tamen actum intellectus. Alij verò solum in actu intellectus volunt essentialiter prædestinationem consistere, nimirum in iudicio practico, subsequente electionem, quod iudicium practicum appellatur imperium: sed quidquid sit de hac sententiarum varietate: mihi videtur conformius veritati, prædestinationem essentialiter, & in recto consistere in actu intellectus, connotante actum voluntatis: & *Probat, Quia prædestinatio est pars prudentiæ, & providentiæ, nec differt, nisi penès obiectum materiale, quatenus providentia occupatur circa omnia: prædestinatio verò solum respicit creaturas rationales in ordine ad vitam æternam; sed providentia formaliter, & in recto spectat ad intellectum; nam à Boetio definitur, Providentia est ipsa divina ratio in summo omnium principe constituta, quæ cuncta disponit. ratio autem spectat ad intellectum; quod autem prædestinatio sit pars prudentiæ, patet etiam; quia est certum, quod prudentia est pars providentiæ; sed prædestinatio est pars providentiæ; ergo prædestinatio est pars prudentiæ: eo ipso autem, quod prædestinatio est pars prudentiæ, debet spectare ad intellectum; quia prudentia spectat ad intellectum: licet prudentia, pro ut est virtus intellectus practici, connotat efficaciam derivatam à voluntate.*

Quod

Quòd verò prædestinatio connotet actum voluntatis, Probat ex eodem capite; quia, ut diximus, prædestinatio est pars prouidentiae; prouidentia autem est principalis pars prudentiae, cuius proprium est ordinare alia in finem, siue respectu priorum actuum, & dicitur prudentia monastica, siue aliorum sibi subditorum, vel in familia, vel ciuitate, vel regno, & dicitur prudentia Polyarchica, quæ subdiuiditur in regnatuam, polyticam, æconomicam, & militarem; sed prudentia, licet formaliter consistat in actu intellectus; supponit tamen actum voluntatis; scilicet intentionem boni, & finis, in ordine ad quem præcipit, & exequitur agenda; ergo etiam prædestinatio. Requiritur igitur indispensablem ad prædestinationem actus voluntatis præsuppositiuè, scilicet intentio finis, ad quem fiat transmissio, & electio mediorum; non tamen formaliter in illis prædestinatio consistit; & hoc modo intelligendi sunt SS. Patres, quando videntur prædestinationem declarare, nominibus spectantibus ad voluntatem. Sed in hac quæstione, quæ potius est Metaphysica, & de voce, quàm de re non immoror, quidquid enim dicatur, semper substantialis veritas prædestinationis optimè saluatur, & nemo ambigit hæc omnia requiri ad prædestinationem, siue essentialiter, siue concomitanter.

Aduerto solum hic, quòd licet prædestinatio connotet actum voluntatis; actus tamen iste non subsequitur, sed antecedit actum intellectus, in quo formaliter consistit prædestinatio; hoc dicitur contra Professores scientiæ mediæ, qui explicant diuinam prouidentiam per scientiam mediā, ostendentes Deum sua comprehensiuā notitiā videre varias dispositiones futuras à nostro arbitrio. Nisi enim præcederet actus voluntatis, quo Deus practicè futuras dispositiones arbitrij determinaret, non erit diuina prouidentia vniuersalis in prouidendo; & sicut artifex creatus non dicitur vniuersalis prouisor præcise, quia multa supponit præparata, & præuisa; nisi illa velit applicare: neque artifex diuinus. II. Aduerto, Quòd actus iste voluntatis antecedit actum intellectus, in quo formaliter consistit prædestinatio, est electio efficax mediorum.

Vtrum efficax electio ad gloriam sit ante præuisionem meritum?

Absconditum, & inscrutabile diuinæ prædestinationis Sacramentum non leue inter Catholicorū ingenia ponit dissidium; docentes plures Professores scientiæ mediæ cū Molina, efficacem electionē ad gloriam fieri ex præuisione meritum, habita per scientiam mediā, quam vocant præscientiam conditionatam, seu conditionalium; adeo ut per ipsos non aliter redditur certa prædestinatio, nisi ex præscientia boni vsus futuri liberi arbitrij; & hæc præscientia, dicunt, aufert ab hominibus omnem segnitiem, & torporem in salutis negotio, & sollicitudinem, quam circa bonas operationes debent habere, infallibiliter inducit: Alij ve-

rd cum Leonardo Lessio astruunt prædestinationem fieri secundum absolutam præuisionem operum, seu meritorum futurorum. Thomistæ denique sequentes omnes unanimi consensu doctrinam S. P. N. Augustini, & Angeli Præceptoris acerrimè defendunt, prædestinationem non fieri secundum præuisionem, & præscientiam boni vsus liberi arbitrij, seu meritorum; sed secundum stabile, firmum, & diuinum propositum. Hanc sententiam, quæ ex propria P. Molinæ confessione est S. P. Augustini, sequuntur quasi omnes scholastici, & Robertus Cardinalis Bellarminus in suis controuersijs, loquens de hac sententia S. Patris in materia de prædestinatione, hæc habet. *Hæc sententia non quorumuis Doctorum opinio, sed Fides Ecclesiæ Catholicæ dici debeat.* Antequàm autem rationes afferam pro hac tertiâ conclusione, pro qua stat clarissimè, vt dictum est, S. P. Augustinus, & Angelicus Præceptor.

Est notandum I. Quòd quando quæritur, verum prædestinatio fiat ex præuisione meritorum; non loquimur de prædestinatione formaliter sumpta, hæc enim, (vt diximus,) cum sit actus intellectus diuini practici circa media in ordine ad finem, dicit in reà imperium diuini intellectus, & sic est certum, supponere electionem mediorum, quorum executionem efficaciter intimat; & cum merita sint media, hæc utique supponuntur ad prædestinationem formaliter sumptam; sed loquimur de efficaci electione ad gloriam, quæ est actus diuinæ voluntatis circa finem, per quam Deus quibusdam hominibus præ alijs vult dare gloriam. II. Est notandum ad intelligentiam illius particulæ *ante, vel post præuisa merita*, quòd non est sermo de meritis conditionatè futuris; hæc enim non sunt simpliciter merita: ob quam rationem Suarez, & alij tenentes scientiam mediam nobiscum defendunt electionem ad gloriam fuisse gratuitam, & ante præuisa merita: sed loquimur de meritis, qui non solum conneduntur per modum effectus illati cum intentione gloriæ; sed quòd exerceant circa illam causalitatem motiuam ad intendendum; hoc enim modo exprimunt conceptum meriti. III. Difficultas non solum est de electione ad gloriam, verum etiam paruulorum; cum ipsi consequantur gloriam ex meritis Christi sibi applicatis. IV. Quæstio: procedit de electione ad gloriam, quæ defactò contingit, & facit sensum: an defactò Deus elegerit homines ad gloriam ante, vel post præuisa merita? non loquimur de possibili, verum Deus potuisset eligere homines ad gloriam ex præuisione meritorum? His præhabitis.

Dico I. Prædestinatio non fit ex præuisione, seu præscientia boni vsus liberi arbitrij; & sic nullo modo suam certitudinem à tali præscientia recipit. Est expressa sententia D. Thomæ post S. Prosperum *quest. 6. de veritate art. 3.* Ratio est, Quia si prædestinatio fieret ex tali præuisione, & suam certitudinem à tali præscientia acciperet, hæc esset prædestinationis causa; nam per aduersarios ipsos bonus vsus liberi arbitrij, præuisus per scientiam mediam, non est ex prædestinatione, nec ponitur vt effectus

festus prædestinationis; sed hoc non potest dici; quia sequeretur, quod prædestinatio non esset ex vocante, sed ex operibus præiis: quod Apostolicam doctrinam euertit; nec prædestinatio esset per electionem liberam prædestinantis; nam esset per talem præiis, & præscientiam; sed hoc est contra Scripturam, & dicta SS. Patrum, vt ait D. Thomas loco citato, *Si præscientia esset causa prædestinationis, nec prædestinatio esset per electionem prædestinantis, quod est contra autoritatem Scripturæ, & dicta sanctorum. Unde (idem S. Doctor concludit) præter certitudinem præscientiæ ipse ordo prædestinationis habet infallibilem certitudinem.*

Secundò, si talis præscientia meritorum, seu boni vsus liberi arbitrij esset causa prædestinationis, (vt libenter concedunt Aduersarij Professores scientiæ mediæ) cum habeat per ipsos prædestinatio suam certitudinem à tali præscientiâ; sequeretur, quod prædestinatio non fieret per liberam electionem prædestinantis; & sic illud, quod formale, & præcipuum est in prædestinatione, non esset liberum; sed anteuerteter omnem liberum actum diuinæ voluntatis; quod clarissimè est piarum aurium offensiuum: quod ostenditur; quia talis præscientia, cum sit causa, esset consequenter constitutum prædestinationis, vt sic; sed talis præscientia est necessaria, & non libera in Deo; ergo constitutum prædestinationis non esset liberum in Deo, sed necessarium; ergo prædestinatio non fieret per liberam electionem prædestinantis; sed per aliquod necessarium, quod est præscientia.

Quòd verò constituere hominem causam in aliquo genere suæ prædestinationis; quo ad primum effectum illius, sit contra SS. PP. doctrinam, vt bene dicit S. Thomas, constat; nam ipsi totum genus causæ in liberam, & solam diuinam voluntatem refundunt; nam dicunt, causam efficientem prædestinationis esse solum Deum; formalem, ipsum ordinem prædestinationis; finalem proximam gloriam animæ Christi; & finem vltimum ipsam gloriam Dei. Est igitur notissimum, quod velle dare gratiam, & gloriam, & velle prædestinare, nullam potest habere causam finalem, ex parte hominis mouentem, & inclinantem Deum ad prædestinandum, & dandam gratiam, & gloriam; sed quod sola superabundantia bonitatis Dei sit huius causa: quod autem causa finalis prædestinationis sit solum superabundans affectio bonitatis diuinæ, nullo modo dicunt, qui docent, bonum vsus liberi arbitrij præiis mouere Deum ad prædestinandum; nam semper ex parte hominis daretur causa prædestinationis, quomodocumque id explicant Aduersarij; non enim possunt dicere, quod solo a præscientia esset causa, & non meritum hominis: si enim Rex statueret dare arma militibus ad inimicos vincendos, & statim præuideret Petrum bene vsurum illis, & victoriam reportaturum; quis dubitet ex illo merito futuro præiis moueri, mutum regem ad dandum illi arma? cum ergo Deus velit omnes homines saluos fieri, bene pugnare, &

victo-

victoriam ex inimicis reportare, & ad hoc velit arma illis sufficientia dare; si statim præsit hos ex sua innata libertate bene vsuros armis, & victoriam reportaturos: non possumus negare; multum Deum ex tali bono vsu præuiso, sicut ex quodam merito de congruo moueri, vt illo taliter vocet, sicut vidit obtinperaturos.

Tertio, si prædestinatio fieret secundum præscientiam boni vsus liberi arbitrij, sequeretur prædestinationem fieri secundum hominis propositum non Dei; nam idem est prædestinationem fieri secundum præscientiam boni vsus arbitrij, ac fieri secundum propositum hominis à Deo præuissum; & consequenter ex operibus præuisis: dicere autem prædestinationem fieri ex operibus præuisis, est idem, ac dicere: opera præuisa esse prædestinationis causam, quod manifestè negat Apostolus dicens, *Non ex operibus, sed ex vocante dictum est.*

Ex his colligitur, neque prædestinationem fieri secundum absolutam præuisionem operum, seu meritum futurorum. Hanc enim præuisionem meritum futurorum efficaciter redarguit [S. P. August. præcipuè in lib. de prædestin. Sanctior. exemplo prædestinationis Christi, qui ad illam dignitatem supremam ob nullum præuissum liberi arbitrij opus prædestinatus fuit: vnde arguit S. Pater, nec homines alios ex præuisione operum ad gloriam prædestinari. Ad confutandam autem hanc sententiam alias rationes non addo; quia ea, quæ contra prædestinationem constitutam per scientiam mediam, sunt dicta, optime possunt applicari ad prædestinationem positam per absolutam præscientiam.

Dico II. Efficax electio ad gloriam, seu electorum prædestinatio, est omnino gratis, & fit secundum propositum Dei, & consequenter ante præuisionem, & præscientiam meritum. Hanc immobilem prædestinationis, & gratiæ veritatem perpetuò Ecclesia Christi, quæ est columna, & firmamentum omnis veritatis, docuit, & firmavit contra Pelagianos, & Semipelagianos. Hanc etiam diuersis locis docuit Apostolus, ad Titum 1. dicit, *Non ex operibus institis, quæ fecimus nos: volens prædestinationem non ex operum præscientia fieri: sed ex diuino beneplacito: Et ad Romanos 9. Non ex operibus, sed ex vocante:* vbi Glosa ait, *Sicut non pro meritis præcedentibus illud dictum fuisse ostendit; ita nec pro meritis futuris.* Et infra super illud, *Num quid iniquitas est apud Deum?* Dicit Glosa, *Nemo dicat Deum, quia futura opera præuidebat, alterum elegisse, alterum reprobasse.* Vt autem manifestè appareat, D. Paulum referre prædestinationem in solam voluntatem misericordis Dei; explicans S. Pater Augustinus testimonium Apostoli supracitatum, nempe *Non ex operibus, sed ex vocante dictum est, quia maior seruiet minori: hæc ait lib. 2. cap. 7. contra duas epist. Pelag.* Propter quod professò despiciis, quòd dicente veritate, non ex operibus, sed ex vocante dictum est: vos diuini ex futuris operibus; quia Deus illum facturum esse præsciebat, Iacob fuisse dilectum.

Probatur II. Testimonio S. P. N. Augustini, cuius autoritas in hac re,

re, etiam si sola esset, præcul dubio esset cæteris præferenda; docet enim S. P. N. sic apertè prædestinationem fieri secundum Dei propositum, ut Catherinus, & alij oppositæ sententiæ fateantur, se in hoc à D. P. August. recedere. Expendens enim S. Doctor celebre illud testimonium Apostoli ad Ephes. 1. *Prædestinati secundum propositum voluntatis eius:* sic habet, *Fecit autem hoc secundum placitum voluntatis suæ, ut nemo de sua, sed de illius erga se voluntate gloriatur: Fecit hoc secundum diuinitas gratia suæ, secundum bonam voluntatem suam.* Hoc idem docet pluribus alijs in locis apertissimè ostendens prædestinationem fieri, non secundum hominis propositum, sed secundum firmum, & stabile Dei propositum. Hoc idem affirmat, omisis omnibus alijs SS. Patribus, Angelicus Præceptor, qui hic art. 5. ad 3. ait: *Quare hos elegit in gloriam, illos reprobauit, non habet rationem, nisi diuinam voluntatem: Et quæst. 6. de verit. art. 2. Quod Deus velit alicui dare gloriam, & gratiam, hoc ex mera liberalitate procedit.*

Probatur III. eadem conclusio ratione; & primò ea, qua vtitur D. P. N. Augustinus, & secundò qua vtitur D. Thomas. Argumentum, quo vtitur S. P. contra Pelagianos est de paruulis decedentibus statim post baptismum; quò argumento adeò cruciabantur Pelagiani, ut illud soluere procurantes, in varia deliramenta profluxerunt. Argumentum, est hoc: Potuit Deus absque acceptione personarum, & absque alicuius boni præscientia ex parte paruuli hunc prædestinare; sicut defacto prædestinauit, & illum reprobare, sicut defacto reprobauit; ergo etiam ex duobus ætate grandibus, licet nihil præuideatur boni magis in vno, quàm in alio; potest fieri, & sic prædestinatio secundum diuinum propositum absque aliqua acceptione personarum; verba autem S. P. sunt hæc desumpta ex lib. de prædest. SS. cap. 12. *Laboratur aliquando in statu maiorum iam utentium voluntatis arbitrio; sed ubi venit ad paruulos, & ad ipsum mediatorem Dei, & hominum, hominem Christum Iesum; omnis deficit præcedentium gratiam Dei humanorum assertio meritorum.*

Ratio fundamentalis desumpta ex D. Thoma hic art. 4. est hæc. Nihil præcipitur efficaciter, & ordinatur, seu præparatur ad aliquem finem, si habeat infallibilem connexionem, & efficaciam ad illum consequendum, nisi præexistat efficax voluntas illius finis: ex illo principio, quod *Qui ordinat vult, prius vult finem, quàm media;* sed Deus efficaciter præcipit, præparat & ordinat prædestinatis media efficacia ad salutem consequendam; nam si finis est efficax, consequenter etiam media; ergo antequam hæc media præpareret, ordineret, & præuideat; præexistit in ipso Deo secundum rationem, & secundum nostrum intelligendi modum voluntas efficax salutis, & gloriæ, quæ est finis; cum ergo illa providentia, & præparatio mediorum sit prædestinatio, & voluntas efficax gloriæ sit electio; utique prior erit electio ad gloriam, quàm prædestinatio, seu præparatio mediorum.

Mirum est quantum ab hoc argumento torqueantur Aduersarii; vnde varias solutiones excogitant: Dicunt enim I. Deum agere ex intentione finis, prout finis, nempe intentio dandi gloriam, virtualiter includitur in medijs. Sed impugnantur I. Quia sequeretur, quod Deus ageret temere. II. Quia talis intentio virtualiter contenta in medijs est posterior ipsa electione.

Dicunt II. Propositionem esse veram, quando, finis ad quem ordinantur efficaciter media, est assequendus ab eodem, qui præparat media, & qui finem ipsum desiderat; non autem quando finis est assequendus ab alio, cui desideratur. *Sed impugnantur* I. Quia sequeretur, quod nunquam Deus intenderet aliquem finem creatum; cum nullus sit ab ipso consequendus. II. Licet Deus non intendat beatitudinem à se consequendam; intendit tamen illam, ut à se efficaciter dandam. III. Quia Christus fuit à Deo prædestinatus, ut finis redemptionis humanæ, & ad hunc finem præparauit illi Deus efficacia, & infallibilia media; si autem esset vera hæc doctrina: Deus præparando talia media non habuisset efficacem voluntatem salutis, & redemptionis humanæ. IV. Dato, quod hæc doctrina habeat locum in creatura; non tamen in Deo; disparitas est, quia creatura, nec infallibilem connexionem habet mediorum cum fine, nec eorum efficaciam ad finis consecutionem spectantem in sua potestate habet; at verò Deus O. M. habet media ad illum finem consequendum efficacissima in sua potestate; ac proinde præparando media alicui ad talem finem, nonnisi ex voluntate sua efficaci talem finem assequendi ea præparat.

Dicunt III. Axioma non esse verum quando finis intenditur, ut præmium; ut evenit in casu nostro. *Sed contra.* Quia etiam si finis intendatur, ut præmium; semper est ratio volendi media, siue illa sint physica, siue moralia.

Dicunt IV. Intentionem dandi merita non esse ex fine dandi gloriæ; sed ex intentione ostendendi sua attributa; vel ut alij dicunt, finem Dei esse principaliter ipsam gloriam suam, & obsequium, quod redundat ex meritis. *Sed contra.* Quia intentio ostendendi sua attributa est finis communis. Quo ad secundum, licet Deus sic potuerit disponere res; tamen constat ex scriptura, & ab omnibus supponitur gloriam Dei esse finem extrinsecum.

Dicunt V. Licet gloria potuit esse prius in genere causæ finalis; possunt tamen merita præcedere, & esse præuisa in genere causæ materialis. *Sed contra.* Quia dato, quod merita possint habere aliquam prioritatem ad gloriam intèram per modum finis in genere causæ materialis; non possunt tamen hanc prioritatem habere in genere causæ meritorie, quæ spectat ad genus causæ efficientis moralis, ad quod genus spectant merita; cum non possit dari mutua causalitas inter causam efficientem quo ad esse, & alias causas; vnde licet merita causent finem, id est

ideſt gloriam ordine executionis, cum ſupponantur ante eius poſitionem exiſtentia; non tamen cauſant ſinem, ſeu gloriam ordine intenſionis, de quo eſt difficultas.

Concludimus igitur eſſe omnino defendendam gratuitam eleſtionem, prædeſtinationem ad gloriam ex abſoluta, & efficaci voluntate diuina, volente eos ad gloriam eligere, ante omnem præuiſionem meritorum: ſicut perpetuò eam tradiderunt Apoſtolus Paulus, Concilia, Patres, & Doctores Sancti, docentes eleſtionem ad gloriam omnino gratuitam: & quamuis Aduerſariorum nenia, & ſophiſmata nouam ſemper ſandi materiam ſubminiſtrent; accedimus tamen ad ſoluenda argumentorum præfugia, quibus Aduerſarii ſuam præſcientiam in prædeſtinatione defendunt; & gratuitam eleſtionem ad gloriam impugnant: ſolvende igitur primo erunt breuiter argumenta, quæ ex aliquibus ſacræ Scripturæ testimonijs, & SS. PP. ſiniſtrè intellectis adducuntur; & poſtea, quæ ex inſima, & fallaci ratione humana exponunt.

Vigent I. Aduerſarii contra gratuitam eleſtionem ad gloriam, ante præuiſionem meritorum, illud *Matth. 25. Venite benediſti Patris mei, poſſidete paratum vobis regnum ab origine mundi; eſurini enim, & dediſti mihi manducare*: vbi inſinuatur Regnum Cœlorum eſſe ab æterno paratum iuſtis ob præuiſa eorum bona opera; ſicut explicat D. Chryſoſt. *hom. 80. in Matth.* dicens, *Quia ſciebam vos, antequam nati eſſetis huiusmodi futuros; hac vobis à me parata fuerunt*. Accedit etiam illud aliud *Matth. 20.* vbi dicit Chriſtus: *Sedere ad dexteram meam, & ſiniſtram non eſt meum dare vobis; ſed quibus paratum eſt à Patre meo*. Reſpondetur, quòd hæc loca procedunt de præparatione, ſeu prædeſtinatione ad regnum conferendum in ratione præmij, & mercedis; ſicut vltimum prædeſtinationis effectum: ſecundum quam rationem dixit S. Chryſoſt. & alij PP. illud præparatum, ſeu prædeſtinatum ob præuiſa merita.

Vigent II. Illud aliud *Matth. 22.* ex parabola de inuitatis ad nuptias filij Regis, vbi dicitur. *Multi ſunt vocati; pauci vero eleſti*: ex hoc autem inferunt Aduerſarii: rationem, quare pauci ſunt eleſti, eſſe; quia pauci voluerunt venire; nam dicunt, vocare eſt Dei; eleſtum autem fieri, aut non eleſtum, etiam eſt noſtrum. Reſpondetur indignum eſſe exiſtimare (vt aduertit SS. PP.) per illas nuptias intelligi gloriæ nuptias; quis enim audebit dicere ad beatitudinem cœleſtem bonos, & malos admitti; & aliquem ibi intrare ſine veſte nuptiali, & propterea inde excludi, & mitti in tenebras exteriores, ſicut legitur in illa parabola? Eſt igitur ibi ſermo de generali vocatione ad nuptias; quas Dei filius per Incarnationem fecit cum Eccleſia. Et dato, quòd ſit ſermo de vocatione ad regnum; dicendum, ibi ſermonem eſſe de eleſtione ad gloriam in ratione præmij, & mercedis, ſeu in executione, non autem in intentione: vnde concedi debet, quòd ideo ad eam non eliguntur; quia noluerunt per bona opera ad eam peruenire: ſicut in hoc ſenſu eſt etiam

etiam verum, nostrum esse nos fieri electos; subsequendo scilicet dininæ gratiæ efficaciam.

Vrgent III. Illud ad *Romanos* 8. vbi habetur. *Quos præsciuit, & prædestinavit* : vbi præscientia meritorum ponitur ante prædestinationem. *Resp.* Apostolum intelligere nomine *præscientia*, eo loco scientiam approbationis, secundum quam Deus diligit, eligit, & approbat nos; quæ est eadem, ac prædestinatio; vt docet D.P. August. *lib. de bono persever. cap. 18.* & sensus est; Quos Deus elegit, & approbavit, hos prædestinavit : iuxta quem sensum scientia non præcedit prædestinationem, sed est repetitio eiusdem rei, & eam vario nomine appellare more scripturæ sacræ; verba autem S.P. sunt hæc, *Aliquando eadem prædestinatio significatur etiam nomine præscientia sicut ait Apostolus, Non repulit Deus plebem suam, quam præsciuit* : hoc quod ait, *præsciuit non rectè intelligitur, nisi prædestinavit.* Vel dic sensum Apostoli esse, quos præsciuit electos à se, ad gloriam prædestinavit.

Vrgent IV. Testimonium D. Petri 1. dicentis, *Satagite, vt per bona opera certam vestram vocationem, & electionem faciatis.* *Respond.* sensum illius testimonij esse illum, quem semper Sancti intellexerunt : nimirum non reddi prædestinationem certam per merita hominum; quia ante omnem eorum præuisionem certissima permanet ex diuino beneplacito, & ex voluntate diuina efficaci : sed sensus est, quod prædestinationis effectus per bona opera hominum certitudinaliter adimpletur; vnde & prædestinatis conandum est ad bonè operandum. *Ad illud aliud testimonium desumptum ex Apocalip. 3. Tene, quod habes, ne alius accipiat coronam tuam* : ex quo inferunt Aduersarij coronam non esse certam ante finem vitæ præuisum. *Respond.* vel sermonem esse de corona ex merito gratiæ, quam coronam aliquis re ipsa amittere potest per peccatum, mortale sequens; & amissam alius accipit, in quantum loco illius subrogatur. Vel si sermo est de corona, quæ est ex prædestinatione diuina, dic; Quod bonè dicitur: *Tene quod habes &c.* in quantum corona, quæ ex Dei prædestinatione est certa, eis, vt incerta proponitur; cum nullus eorum sciat se prædestinatum esse : & sic debet cum timore, & tremore suam operare salutem; cum per liberum, & defectibile humanæ voluntatis arbitrium prædestinationem impleturus sit Deus.

Vrgent V. Aduersarij, adducendo aliqua loca S.P. August. & præcipue illud *lib. de bono perseverantia cap. 14.* vbi definiens prædestinationem hæc habet. *Hæc prædestinatio Sanctorum nihil aliud est, quàm præscientia, & preparatio beneficiorum Dei, &c.* ex hoc autem inferunt S.P. docere prædestinationem fieri secundum meritorum præscientiam, & præuisionem.

Respond. quod quando apud S. Patrem, & alios, diuini Verbi tractatores, inuenitur prædestinatio, seu vocatio tradita secundum præscientiam; nomine *præscientia*, intelligunt prædestinationem; taliter, quod

quod Deus præscit in sua efficaci prædestinatione, & gratiæ præparatione, qui infallibiliter credent, & ex efficaci Dei dono perseverabunt usque ad finem vitæ. Vnde idem S. Pater *lib. de prædest. SS. cap. 18.* hoc ait *Prædestinasse est hoc fecisse, quod fuerat ipse facturus.* Non ideo igitur Deus, per S. Patrem, gloriam alicui præparavit; quia eam se illi datum præsciuit, sed è contra; ideo præsciuit, quia absolute dare decrevit: præscius namque est Deus eorum, quæ est ipse facturus, ut S. Doctor, & Pater noster *lib. de prædest. SS. cap. 10.* ait. *Prædestinatione quippe Deus, ea præsciuit, quæ fuerat ipse facturus.* Prædestinatio igitur per S. Patrem est præscientia eorum, quæ ipse Deus facturus est, non boni usus liberi arbitrij præiudici. Et si prius in definitione præscientiam constituit, quàm prædestinationem, fuit; quia latius patet secundum se *præscientia*, & ad plura se extendit, quàm *præparatio*. Posita igitur hac legitima explicatione definitionis S. P. Aug. facile erit respondere alijs testimonijs eiusdem S. Doct. deductis, & malè intellectis ab Aduersarijs: unde videre est, nunquam S. P. magnum post Paulum gratiæ defensorem, & Pelagianæ hæresis gloriosissimum debellatorem, docuisse prædestinationem fieri ex præscientia boni usus liberi arbitrij; sed semper defendisse, fieri secundum Dei propositum; ut supra visum fuit.

Vrgent VI. D. Tho. 3. p. quæst. 1. art. 3. ad 4. docet, quod prædestinatio præsupponit præscientiam futurorum. *Respondeo* per Angelicum. Præceptorem illo loco hoc solum statuitur: videlicet prædestinationem supponere præscientiam aliquorum futurorum; scilicet hominum, qui prædestinantur, & aliquarum actionum eorum, quæ sunt causa, vel occasio prædestinationis; sicut originale peccatum præiudicium fuit occasio prædestinationis Christi. Vel præscit Deus prædestinationem alicuius implendam quoad exercitium per orationes alterius; quia ita implere prædestinavit. Nullo autem modo voluit D. Tho. prædestinationem supponere omnium futurorum præscientiam: quinimò clarissimè, & patentissimè defendit omnia bona opera, & merita nostra, & inter ipsa bonum usum arbitrij, à Deo esse verè præparata, prædestinata, ac præinita; statuendo semper in terminis electionem absolutam ad gloriam, ante prædestinationem, & præiudicia merita.

Vrgent VII. Aduersarij rationibus, quarum prima est; Ut prædestinatio compleatur, requirit conditionem ex parte nostra, quam implere, vel non implere est in nostra potestate; ergo in nostra potestate est efficere, ut nostra prædestinatio compleatur; nam complere suam prædestinationem nihil aliud est, quàm efficere, ut in Deo sit præscientia, & præparatio reliquorum beneficiorum, quibus homo re ipsa perducitur ad salutem; sed in hominis potestate est per gratiam Dei efficere, ut in Deo sit talis præscientia, & præparatio; ergo &c. *Respond.* distinguendo antecedens, est in nostra potestate implere, vel non implere prædestinationem nostram, si sermo sit de prædestinatione quo ad

intentionem, seu preparationem, nego; de prædestinatione quoad executionem, subdistinguo; prædestinatio quoad effectus executionem, est in potestate nostra solum, nego; in potestate nostra supposita primæ Dei summæ potestati, concedo: Ad minorem subsumptam de ea esse falsam; si enim in sola hominis potestate esset originaliter, ut in Deo sit præscientia; iam Deus scientiam suam certam à rebussumeret; & sic sumeret suam perfectionem à rebus, qualis est certa Dei cognitio: & denique sequeretur; ideo homines esse certò electos ad gloriam; quia volunt, non qui Deus vult, ut certò sint electi ad gloriam.

Vrgēt VIII. Prædestinatio est primò, & originaliter certa ex præscientia boni vsus liberi arbitrii; nam certitudo primò, & originaliter pertinet ad intellectum; ergo certitudo prædestinationis primò, & originaliter pertinet ad præscientiam; ergo quòd prædestinatio sit certa, non provenit ex diuino proposito. *Respondetur* ad hoc argumentum cum D. Tho. certitudo ordinis, quæ dicitur originalis, siue causalis pertinet ad intellectum, nego, certitudo cognitionis, quæ dicitur totalis concedo, ex hoc autem clarè pater, certitudinem prædestinationis originaliter pertinere ad intellectum esse falsum; nam tunc haberetur certitudo cognitionis, idest, tunc cognitio est certa, quando eo modo iudicat de re, sicuti est; sed non haberetur certum iudicium de re, nisi per causam ipsius; ut pater in prædestinatione, in qua certum est, quòd Deus sua præscientia certò videt bonum usum liberi arbitrii, in tantum autem, certò scit; quia ita est, quòd homo bene utatur arbitrio, sed sic est, quòd ideo bene utitur; quia diuina voluntas; & prædestinatio facit efficaciter sua gratia, quòd homo bene operetur; ergo prima causa, prima ratio, & origo certæ præscientiæ boni vsus liberi arbitrii est prædestinatio, secundum propositum voluntatis diuinæ.

Vrgēt IX. Eodem modo facit Deus in tempore, quo voluit ab æterno; & sic Deus non dat aliter gloriam in tempore, quam ab æterno dare decreuit: sed in tempore, siue in executione datur à Deo gloria propter merita, tamquam motiua dandi; ergo etiam ab æterno dare voluit illam propter merita ab æterno præuisa. *Respond.* distinguendo maiorem, eo modo Deus facit in tempore, quo voluit voluntate antecedenti ab æterno, nego, quo voluit voluntate consequenti concedo; non enim eodem modo, quo Deus voluit res ab æterno, eodem modo facit; sed eo modo Deus voluit res ab æterno, quo voluit acin facere. *Nota* igitur hic, me non asserere Deum in tempore facere aliquod, quod voluntate antecedenti non fuerit volitum ab æterno; hoc enim est falsum; nam quidquid Deus facit in tempore, hoc ipsum voluit voluntate antecedenti; sed assero Deum non facere in tempore eodem modo, quo voluit voluntate antecedenti. Voluntas igitur antecedens in Deo ex prædestinatione hominum est voluntas electiua, qua ex sua misericordia hos præ alijs ab æterno elegit ad gloriam dandam illis per merita futura;

ra; voluntas autem consequens est voluntas actu dandi gloriam propter illa merita; tamquam motiuum; quæ voluntas non est amplius gratuita, sed ex iustitia: hoc posito clarè apparet, quomodo Deus non faciat in tempore eodem modo, quo voluit voluntate antecedenti; nam voluntate antecedenti voluit dare gloriam ex motiuo misericordie: vnde obiectum volitionis antecedentis, quæ est gratuita, est illud complexum; gloria danda propter merita: & sic dicitur gratuita ex parte motiui volendi; cum non teneretur ad volendum, quòd nos essemus electi ad gloriam consequendam in executione per merita nobis data à Deo; voluntas autem consequens ingreditur lineam iustitiæ, cum eius motiuum sit meritum: vno verbo, voluntas antecedens dicit titulum gratuitum; voluntas verò consequens titulum onerosum, nempe merita. Ad minorem, in qua dicitur; sed gloria in executione datur à Deo propter merita, distingo, si ly, *propter*, se tenet ex parte rei volitæ, concedo, si verò se tenet ex parte motiui volendi, nego.

Est hic auertendum, quòd aliud est, Deum velle dare gloriam per merita, & aliud velle dare gloriam propter merita; primum est verum, & significat Deum non velle dare gloriam in executione sine meritis, & bonis operibus; quia vult illam dare per modum præmij, & coronæ; secundum est falsum, & denotat, Deum intuitu meritorum, quæ præiudet, moueri, & excitari ad eligendum homines ad gloriam. Sicut hæc duæ propositiones, *Deus gratis vult dare gloriam*, & *Deus vult dare gloriam gratis*, prima est verissima, & significat: quòd Deus gratuito motiuo mouetur ad intendendam gloriam. Secunda est falsa, & denotat, quòd Deus vult dare gloriam adultis sine meritis. Vnde subtiliter Scotus in reportatis distinkt. 41. quæst. unica §. de argumento explicat hanc propositionem, *Deus vult Petrum præmiare propter merita*, & dicit, quòd ly *propter merita*, potest construi cū ly, *vult*, & sic sensus est, Deus propter merita vult Petrum præmiare, & est falsa: vel potest construi cum ly, *præmiare*, & sensus est, Deus vult Petrum præmiare propter merita, & in hoc sensu est vera.

Virgenc X. In scriptura gloria dicitur *Mercēs, Bravium, Corona, &c.*, quæ omnia connotant merita; ergo nō potest efficaciter intendi ante præuisa merita. Respond. negando consequentiam; quia Corona dependet essentialiter à meritis, solum in ordine executioni sin genere causæ efficientis; non verò in ordine intentionis, & in genere causæ finalis; vt enim gloria ordine intentionis sit prior præscientia meritorum, sufficit, quòd licet dependeat à meritis in genere causæ efficientis, in genere tamen causæ finalis, quòd non dependeat ab ipsis, sed potius illa causet.

Virgenc XI. Pœna est effectus demeritorum; & tamen non potest efficaciter intendi absque præiudis demeritis, saltem absque præiudis peccati originalis; ergo neque corona absque præiudis meritis. Respon-

de negando consequentiam, ratio est; quia pœna non intenditur ex præuisione demeriti, præcisè quia est effectus demeritorum tantum; Sed etiam quia pœna non est de primaria intentione Dei; sed est bonum, occasionatum: corona autem non est bonum occasionatum; sed per se amabile; & ideo potest ratione sui in ordine intentionis amari, absque occasione, & præuisione meritorum.

Vrgent XII. Si Deus absque consideratione, & præscientia boni vsus liberi arbitrij eligeret efficaciter homines ad gloriam, esset acceptor personarum, & constitueretur aliquod indignum in diuina bonitate, & clementia. *Retorquetur* argumentum, constitueretur aliquod indignum per Aduersarios in diuina clementia, & esset Deus acceptor personarum, si absque præscientia boni vsus liberi arbitrij homines prædestinaret ad gloriam; sed posita præscientia possent cum maiori apparentia conqueri homines de Deo, dicentes, vidisti nos bene operaturos; si in tali rerum ordine collocares; & tamen nos in illo collocare noluisti; sed in alio constituisti, in quo nos vidisti perituros, quasi de nostra perditione congaudens. *Respond.* igitur in forma negando sequelam; quia personarum acceptio habet locum non in merè gratuitis, vt semper S. P. August. & S. Tho. docuerunt; sed in his solum quæ de iustitia debentur; sicut nulla iniustitia, crudelitas nulla est in Deo, cum quosdam Angelos prædestinat ex solo beneplacito voluntatis suæ, alios reprobatur, nolendo dare suum regnum, & gloriam, quibus debita non erat.

Vrgent XIII. Si prædestinatio fieret secundum Dei propositum ante præscientiam boni vsus liberi arbitrij, exhortationes, & inuitationes ad bene operandum, quæ in scripturis inueniuntur, essent irrisiones, & fictiones, & non veri animi significationes respectu reprobatorum, quod non est dicendum; cum Deus omnes in vniuersum homines sine exceptione ad poenitentiam, & salutem vocet. *Retorquetur* argumentum: Per Aduersarios per hoc, quod Deus non habeat voluntatem efficacem saluandi reprobos, & quod conuertantur, essent irrisiones, & fictiones exhortationes, quibus Deus illos ad salutem vocat; sed si prædestinatio esset media præscientia, vtique homines exhortarentur ad id, quod Deus scit illos non facturos; ex eo, quod ab ipso Deo constituti sunt in tali rerum ordine, in quo præsciuntur non bene operaturi; ergo &c. *Resp.* igitur in forma, quod licet Deus respectu reprobatorum non habeat absolutam, & efficacem voluntatem, quod conuertantur, & saluentur, quæ dicitur voluntas consequens; habet tamen voluntatem antecedentem, qua vult omnes illos saluare, & ad poenitentiam venire, conferendo eis auxilia generalia, quæ sunt veræ exhortationes; & quantum est ex vi illorum auxiliorum, potest homo conuerteri, quod si non conuertitur, ex defectu prauæ voluntatis est.

Vrgent XIV. Prædestinatio fundata in proposito diuinæ voluntatis ante præscientiam, & præuisionem liberi arbitrij tollit libertatem; an-

recedit enim hominis libertatem; nam illa posita non potest homo non operari, quod sic prædestinatum est. *Respond.* rero quando argumentum; Posita præscientia Deus præscit per Aduersarios reprobum, v.g. esse malè operaturum; vnde ille homo in tempore non poterit excitari, vt liberè bonum operetur; quia infallibile est illum malè operari. *In forma* respondeo, quod absolute, & simpliciter; siuè in sensu diuiso supposita prædestinatione fundata in Dei proposito, retinet prædestinatus potentiam liberam ad aliter operandum, quia Dei prædestinatio potentiam liberam non immutat; nam prædestinatio vtrumque prædestinat, & operationem fieri ab homine, & liberè fieri, vt dictum est in tract. de decretis, & physica prædeterminatione: retinet igitur liberum arbitriū, posita prædestinatione, totam suam essentiam libertatis; nam cum liberum arbitrium sit secundum liberum, eius essentia est, quod possit se mouere ad hoc, vel illud secundò: ergo qui dicit liberum arbitrium se mouere ad hoc, vel illud primò, negat, non defendit eius essentiam libertatis: sicut, qui negat primum liberum se mouere ad hoc, vel illud primò, negat eius essentiam libertatis: vnde videtur manifestè potentissimam libertatem arbitrii coherere cum prædestinatione fundata in firmo, & stabili proposito diuinæ voluntatis.

Vrgent XV. Prædestinatio certa, & infallibilis secundum Dei propositum occasionem dat hominibus desperandi, nec de eorum salute curandi: quia firmum semper stat diuinum propositum; possunt enim dicere, non oportet sollicitum esse de salute, & bonis operibus; nam vel sum de numero electorum, vel non? si de numero electorum, cum diuinum decretum sit efficax, & infallibile, electus infallibiliter ero; nec mihi officit vita mala; quia semper prædestinatio implebitur; si non sum de numero electorum, ad quid seruare præcepta? infallibiliter quidem nihil mihi, rescietis; nam reprobis infallibiliter ero.

Sed nemo est, qui non videat, quàm sit impiissima, stultissima, & perniciosissima argumentatio damnabilis, atque damnata à S.P.N. August. & alijs PP. est enim argumentum eorum, qui inducuntur ad excusandas excusationes in peccatis. Veniar tamen quæso mecum paulisper, siue Catholicus, siue hæreticus sit iste, qui sic loquitur, ad ratiocinium, & respondeat patienter, sicut libenter ipsum audiui per os Aduersariorum loquentem. Tu qui sic loqueris contra etæi nam electione ad gloriam ante omnem præuisionem meritorum, fundatam solum in stabili, & firmo proposito diuinæ voluntatis: vel es miles, vel rusticus, vel doctus, vel nauta, vel quid simile? si miles, ad quid hostes aggredi; armatum incedere? deberes enim eodem modo ratiocinari: si Deus determinauit, quod victor tuadum; etiam inermis victoriam reportabo: si rusticus, ad quid semen in terra proijcere? terram aratro scindere? si enim Deus determinauit, quod fructus percipies, sine semine, & laboribus colliges: si literatus, ad quid tot laboribus litteris incumbere: ac quid

vsque ad spirituum exinanitionem litteris operam nauare? si enim Deus determinauit, quod doctus euades, talis eris sine vilo labore; si denique naua, ad quid in tot periculis tempestatum tanta sollicitudine, & industria nauem ad portum dirigere? poteris enim degens securus in terra, in medio aquilonum, ipsorumque discretionibus laxare nauis habenas; si enim Deus determinauit, vt ad portum peruenies, sic infallibiliter eueniet. Quid dicis ad hæc mortalis insania? Deberent enim melius isti tales, si bene sentirent, hoc modo discurrere, & argumentari; vel Deus prædestinauit nos, vel non? si primum; ergo debemus rectè operari, licet cum pugna, & resistentia carnis; hoc enim modo præparauit nobis Deus gratiam dare, & hac ratione cognoscemus in nobis signum prædestinationis nostræ: hoc ipsum etiam expressè concinunt, & proclamant scripturæ diuinæ, cum asserunt; Militiam esse vitam hominis super terram. Regnum Cælorum vim pati. Violentos rapere illud. Si secundum, cum reprobatio non afferat pœnam, nisi ex demeritis, & demerita sint ex nostra voluntate, per quam illa vitare possumus cum gratia Dei, quæ præstò semper est; conari utique debemus quantum, cum adiutorio Dei possumus illa non admittere, & patrare.

Sed loquamur nunc tantisper cum defensoribus scientiæ mediæ, qui ponunt & defendunt prædestinationē fieri non ex Dei proposito, sed ex præuisione, & præscientia meritum. Vos enim dicitis, quod si prædestinatio fieret ante præuisionem meritum, & ex Dei proposito firmo, & stabili tolleretur in hominibus omnis sollicitudo salutis, & ipsi in desperationem inducerentur: sed hoc sequeretur, si prædestinatio fieret ex præuisione, & præscientia meritum? Quod sic ostendo; posita enim præscientia posset aliquis ita argumentari, vel sum de numero præuisorum electorum, vel non? idest, vel præscitus, & præuisus sum futurus prædestinatus, vel non? si primum, est impossibile, vt damner; infallibiliter enim prædestinatus, & bonus ero, sicut me Deus præsciuit; est enim diuina præuisio certissima, & infallibilis; & sic non potest frustrari, vel non impleri; si non, frustra bene operor; quia sicuti est præuisum bona opera non mihi profutura, ita infallibiliter erit, quod scilicet nihil mihi proficiant; & sic semper ero futurus malus, & reprobus, sicut me Deus præsciuit; ergo posita hac doctrina tolleretur in hominibus omnis sollicitudo salutis.

Respond. igitur in forma ad argumentum negando sequelam, diuina enim prædestinatio non excludit, imò includit mediā, per quā debet impleri, quæ apponenda sunt à causis secundis; nec enim Deus dare determinauit finem solum, sed etiam mediā ad ipsa: & insuper diuina providentia, & efficacius prædestinatio diuina causas alias non excludit, quin potius ordinat eas ad hoc, quod ordo, quem apud se statuit, rebus imponatur; & sic quidquid Deus certò statuit circa prædestinationem, certò eueniet; sed eueniet per talia mediā, & per tales effectus prædesti-

destinationis; nempe per bona opera, per quæ statuitur prædestinatio quoad executionem: vnde semper est bonis operibus incumbendum; qui enim perseverauerit vsque ad finem, hic saluus erit.

Vrgent deniq; posita prædestinatione, ex firmo Dei proposito nullo modo potest explicari illud testimonium, *Si non es prædestinatus fac, ut prædestineris*, ergo, &c. Respond. testimonium illud vulgatum, quod buccis inflatis afferunt contra nostram sententiam Aduersarij, facile explicari; vel enim intelligendum est de prædestinatione præsentis iustitiæ per gratiam, cum per D.P.N. August. & D. Thomam prædestinatio sit æterna in mente prædestinantis preparatio gratiæ; ait enim S. P. lib. de bono perseuerer. cap. 14. & lib. de prædest. SS. cap. 10. *Quo circa prædestinatio Dei, quæ in bono est, gratia est, ut dixi, preparatio.* Sensus igitur illius testimonij est, si non es prædestinatus ad coronam præsentis iustitiæ per gratiam, fac, ut prædestineris; id est, ora Deum, ut recipias coronam præsentis iustitiæ per gratiam. Vel si vis concedere, quod intelligatur de prædestinatione ad gloriam; dic, illud intelligi de prædestinatione ad gloriam debitam existenti in gratia secundum præsentem iustitiam, non secundum prædestinationis gratiam; quia si homo cecidit, potest resurgere auxilio Dei, quod semper est paratum, & ipsum recipere.

Nota hic I. Quod præter decretum intentionis gloriæ antecedens merita præuisa, datur aliud decretum executiuum circa finem merita præuisa supponens; quia sicut in nobis intentio, & vsus sunt duo actus voluntatis distincti, quorum primus præcedit electionem mediorum, secundus verò est post electionem mediorum, & versatur circa executionem mediorum, & executionem finis; ita de Deo, nostro modo intelligendi est asserendum: & sic in voluntate diuina præter electionem mediorum ad ordinem intentionis spectantem, admittendum est decretum executiuum de eisdem medijs distinctum ratione ab electione; hoc decretum executiuum est ipsa volitio, qua Deus vult efficaciter suam potentiam executiuam applicare adhuc, ut prædestinati suo tempore gloriam consequantur. Ratio est, quia merita, cum sint media moralia, non aliter causant executionem finis, nisi mouendo voluntatem præmiantis, ut velit præmium conferre; ergo si merita sunt causa, & motiuum gloriæ in executione, mouent voluntatem diuinam ad ipsam dandam; sed diuina voluntas temporaliter moueri non potest, nec potest habere motiuum aliquod de nouo in tempore: sicut nec in tempore velle aliquod de nouo; ergo ab æterno mouetur à meritis, & cum hoc de voluntate intentiva verificari non possit, ut satis abundè visum est: necessariò admittendum est in Deo decretum aliquod executiuum ab intentiuo distinctum, quod merita præuisa supponat.

Nota II. Hæc tria *præscientia, prædestinatio, & prædestinatio*, ita inter se comparantur, ut *præscientia* latius pateat, & ad plura se extendat, quam

prædefinitio: sicut *prædefinitio*, plus, quàm *prædestinatio*; quia præscientia se extendit ad bona, vel ad mala, & ad peccata, quæ Deus nec prædefinit, nec prædestinat; sed tantum permittit: prædefinitio se extendit ad omnia, quæ cadunt sub diuina providentia tum naturali, tum supernaturali; prædestinatio verò, si strictè sumatur, terminatur solum ad bona opera ordinis supernaturalis.

Quinam sint effectus prædestinationis?

L Oquimur primò de actibus supernaturalibus elicitis à libero arbitrio creato, & de his quærimus, an sint effectus prædestinationis? postea verò inquirendum erit de effectibus naturalibus imperatis à prædestinatione diuina. Dico igitur, quòd actus supernaturalis, vt à libero arbitrio creato, est effectus prædestinationis. Suppono autem, quòd ita actus liber supernaturalis est à gratia, vt etiam sit liberi arbitrii: & sic ex vtriusque simul vnitis fit indiuisum principium eleuationis, & se habent gratia, & liberum arbitrium, tamquam duæ rationes componentes vnicam causam: vnde actus supernaturalis, etiam prout est à libero arbitrio, exprimit rationem vitalitatis, & supernaturalitatis; & pro vt est à gratia, exprimit rationem supernaturalitatis, & vitalitatis; cum neque potentia sine eleuatione, neque eleuatio sine potentia habeat rationem totius. Hoc posito ratio est manifesta pro nostra conclusione; nam, actus supernaturalis est à libero arbitrio, vt eleuatus; nam etiam, vt vitalis exprimit supernaturalitatem; ergo actus supernaturalis, vt est à libero arbitrio, est à gratia, cum non eleuetur, nisi per gratiam; ergo si est effectus gratiæ mouentis, est effectus prædestinationis; cum prædestinatio sit causa gratiæ, vt sentit D. P. August. & D. Tho: hic artic. 5. qui dicit, *Manifestum est, quòd id, quod est gratia, est prædestinationis effectus.*

Circa effectus naturales imperatos à prædestinatione diuina dubitatur circa permissionem peccatorum; an scilicet sit prædestinationis effectus: Et dico cum sententia magis recepta, & fundata in scripturis: permissionem peccatorum esse effectum prædestinationis; est enim talis permissio à Deo; cedit insuper in commodum ipsius peccantis; nam ex tali permissione humilior, cautior, & feruentior resurgit: insuper cedit multoties permissio peccati in aiorum utilitatem, dicente D. P. N. August. Deum non sinere malos viuere, nisi, vt corrigantur: aut per illos boni, seu electi exerceantur; & sic videtur non solum per permissionem peccati ipsius prædestinati esse effectum prædestinationis; sed etiam permissionem peccati aliorum prædestinatorum, & reproborum esse effectum prædestinationis illius electi.

Ex hoc autem sequitur, peccatum non esse effectum prædestinationis; quia ad hoc, vt sit aliqua res effectus prædestinationis, duo sūt necessaria;

vnum,

vnum, vt illud sit à Deo, alterum, vt conferat beatitudinem, & incrementum illius; peccatum autem, quamuis occasio sæpè sit, vt aliquis beatitudinem, & incrementum illius consequatur, à Deo tamèn esse non potest: vnde est certum non esse prædestinationis effectum.

Nota autem hic permissionem peccati non esse effectum immediatum prædestinationis, sed intentionis efficacis, qua Deus vult dare gloriam electis; sed solum mediatum: in quantum media pœnitentia præintenta, ad quam necessarium est hominem prius peccasse, conducit ad finem prædictum: ex hoc autem non sequitur, non posse permissionem peccati esse effectum prædestinationis, ex eo, quia supponat præuisionem eiusdem peccati; nam ex doctrina posita solum sequitur, peccatum præsupponi ad penitentiam in genere causæ materialis; non autem in genere causæ finalis, in quo pœnitentia est prælecta ante permissionem peccati.

Quæres hic, vtrum possit dari aliquod ex parte nostra, quod sit motiuum, causa, vel occasio prædestinationis? *Respond.* est veritas Catholica non dari aliquod ex parte nostra, quod sit causa, motiuum, vel occasio prædestinationis: non loquimur autem de prædestinatione, in quantum est actus prædestinantis, sed ex parte effectus, quem prædestinatio ponit in prædestinatis. Merita Christi fuerunt causa prædestinationis; elegit enim nos in ipso ante mundi constitutionem.

De Certitudine prædestinationis, & libro vita.

CIrca prædestinationis certitudinem duo sunt præcipua, quæ inquiri possunt, primum, respectu quorum prædestinatio sit certa. Secundum; quænam sit radix, & causa, ex qua in prædestinatione certitudo oriatur, et proueniat: quo ad primum prædestinatio potest esse certa, vel respectu personarum, quæ prædestinantur, vel respectu mediorum gratiæ, per quæ homines prædestinantur, vel respectu finis, siuè gloriæ consecutionem: quo ad secundum, potest attendi, & oriri certitudo prædestinationis respectu illorum trium, vel ex parte solius cognitionis, quæ est propria præscientiæ, vel ex parte ipsius ordinis; cum prædestinatio supra certitudinem cognitionis addat certitudinem ordinis: vnde idem est querere, vtrum illa tria sint certò prædestinata? ac dicere, an certò sint cognita, vel certò prædestinata, & præparata?

Ad punctum igitur difficultatis, *Respond*eo fuisse firmam, & immobilem veritatem prædestinationis, & gratiæ, quam ex Apostolo docuerunt SS. PP. prædestinationem personarum, gratiæ, & gloriæ esse certam tum certitudine cognitionis, tum certitudine ordinis: idèst esse certò cognitam, & verè certò prædestinatas, & præparatas personas scilicet, gratiam, & gloriam. Falsò igitur tribuitur ab aliquibus diuinæ prædestinationi sola certitudo præscientiæ; non autem ordinationis; seu præ-

prædefinitionis; si enim hoc esset, daretur ordo quidam, & dispositio creata; non cadens sub providentia, & dispositione diuina, sed ad illam præsupposita, & præiusta; quod quàm sit absurdum, iam visum est supra contra Professores scientiæ medicæ; dicentes prædestinationem sumere suam certitudinem ex diuina præscientia solum; omisissis igitur, quæ spectant ad certitudinem prædestinationis quo ad se, restat aliquid examinare de certitudine prædestinationis quoad nos: utrum scilicet possit aliquis certò scire, se esse prædestinatum? Non loquimur hic de certitudine orta ex diuina reuelatione; nam certum est multos sanctos certò cognouisse per diuinam reuelationem suam gratiam, & prædestinationem: neque de certitudine orta ex probabili coniectura; nam etiam, constat dari in aliquibus plures, ex quibus probabiliter deduci possit eorum prædestinatio: loquimur igitur de certitudine habita per propriam inuestigationem.

Dicimus ergo, Neminem præcisa reuelatione diuina posse esse certum certitudinis, siue physica, siue morali, excludente omnem formidinem de sua prædestinatione; non enim potest aliquis certò scire certitudinem, siue physica, siue morali, se esse prædestinatum; nisi etiam certò sciat, se habiturum gratiam finaliter; sed nemo potest certificari de hoc; quia nemo potest certò scire, se habere gratiam de præsentis, dicente *Ecclesiast. cap. 9. Homo nescit, utrum odio, vel amore dignus sit*: ergo neque potest scire, se habiturum illam finaliter. Et tota ratio fundamentalis huius est; Quia gratia cum nulla causa, vel effectu nobis certò nescitur; causa enim est diuina voluntas, nos præueniens absque ullo debito; effectus autem gratiæ, ut sunt vera contritio de peccatis, vera charitas erga Deum, æquè dependent à gratuita motione, & infusione Dei, ac ipsa gratia, & sunt æquè supernaturales; ergo æquè scitu difficiles. Nota autem hic sermonem esse de certitudine propriæ gratiæ; nolo autem controuertere, utrum diuina gratia sit in aliquo, ex eo, quòd potest clarè deduci, tanquam mediata reuelatum ex aliquo vniuersali de Fide.

Ex his colligitur soli Deo certum esse numerum prædestinatorum in æterna felicitate locandorum; & formaliter, & materialiter: id est certitudine cognitionis, & ordinis; taliter, quòd sciat istos in particulari, & non alios esse prædestinatos; quinimò est ira certus prædestinatorum numerus, quòd nec augeri potest, nec minui, ut ait S. P. N. August. *lib. de cor. & gratia cap. 13.*

Liber vitæ absolutè prolatus est per D. Tho: Cathalogus omnium saluandorum in mente, seu noticia Dei scriptus; ait enim S. Doctor 1. p. *quæst. 24. artic. 1. Quòd ipsa Dei noticia, qua firmiter retinet, se aliquos prædestinasse ad vitam æternam, dicitur liber vitæ*. Idem asserit S. P. N. August. librum scilicet vitæ esse actum diuini intellectus certò intuentis, & præscientis, quòd tales personæ saluandæ sunt: Vnde colligitur præ-

scientiam illam per hoc SS. Doctores prædestinationem includere; & cū prædestinatio respiciat non solum personam, sed etiam includat mediā, per quæ quis efficaciter præordinatur in finem; etiam liber vitæ non tantum est personarum, sed etiam mediōrum, quibus electi vitam æternam sunt consequuturi.

Petes hic, I. Quomodo stent hæc duo simul, quod illa notitia, quæ dicitur liber vitæ, sit firma, certa, & infallibilis; & ex alia parte dicatur aliqui deleri de libro vitæ? ut legitur *Exodi 32. vbi Moysen Deum præcatur his verbis, Aut dimitte eis hanc noxam, aut si non facis, dele me de libro vitæ. Respond. iuxta expositionem S. P. N. Augusti. quæst. 147. in Exodum, Lyrani, Abulensis, & aliorum: Moyses ex magno affectu Charitatis erga populum, & magna familiaritate, ac conuientia erga Deum, per hyperbolem in ea verba prorupisse; ut exprimeret ardentissimum quoddam desiderium iram Dei à capitibus Iudeorum auerendi, & Deum ad misericordiam commouendi. Absolutè igitur de libro vitæ, qui proprius est prædestinatorum nullus deletur; deletur autem, secundum explicationem aliquorum Doctōrum, de libro vitæ aliquis, in quo secundum præsentem iustitiam gratiam habens, ordinabatur ad vitam, qui potest vocari liber vitæ secundum quid; & hoc modo explicant illud testimonium, *Delebo eos de libro meo.**

Petes II. Vtrum prædestinatio possit iuari præcibus Sanctorum? Respond. quod loquendo de prædestinatione quantum ad effectum, nullum sequitur absurdum ex hoc, quod affirmetur prædestinationem posse iuari præcibus Sanctorum: loquendo autem de prædestinatione quoad actum, est certum præcibus sanctorum non posse fieri, quod aliquis prædestinetur à Deo. Et quamvis Deus decreuerit occultum prædestinationis mysterium; non præterit tamē electos suos, sed eos quibusdam signis notauit; signa verò quibus electi à reprobis discerni possint, quæ ex SS. PP. & Scripturis colliguntur, possunt reduci ad hæc. Primum signum est deuotè sacramenta frequentare. II. Libenter verbum Dei audire. III. Futuræ gloriæ spes. IV. Humilitas, & mansuetudo. V. Post peccatum statim ad penitentiam surgere cum dolore, & timore. VI. Sequentiæ fortunæ aduersitatem, & afflictionem æquo animo tolerare. VII. Inimicorum dilectio. VIII. Deuotio singularis erga Beatissimam Virginem. IX. Conscientiæ stimulus. X. Passions Christi deuotio. XI. Esse Religiosum, vel sacerdotem. Vltimum signum prædestinationis, & magis securum traiecit D. P. N. Augustinus, qui dicit: Si vultis scire, an prædestinati estis, conscientiam vestram interrogare, & Christus Dominus ait, *Ex fructibus eorum cognoscetis eos.*

Quid sit reprobatio, & an detur?

CUm ad supremam providentiam spectet non tantum aliqua conducere in finem; sed etiam permittere alia ab eodem deficere: merito post prædestinationem ea, quæ ad reprobationem pertinent, examinamus: loquendo enim D. Thomas hic *art. 3. de reprobatione* ait, *Reprobatio est pars providentia respectu eorum, qui ab hoc fine decidunt, scilicet vitæ æternæ*. Ex hoc facile erit reprobationem formaliter sumptam definire, dicendo, Reprobatio est ratio practica, qua diuinus intellectus ordinat aliquos à fine vitæ æternæ deficere. Vel, ut alij volunt, & clariùs: Reprobatio est præscientia, seu providentia de his, qui ab æterna vitæ excluduntur, cum voluntate permittendi culpam, & inferendi damnationis poenam. Alij explicant essentiam reprobationis per similitudinem ad prædestinationem, applicando easdem definitiones; cum hoc solum discrimine, penes scilicet exclusionem à fine, & præparationem permissionem mediorum, quibus certissimè damnantur, quicumque damnantur. Vnde sicut prædestinatio importat essentialiter, & in recto actum imperij diuini intellectus, & connotat in obliquo actum voluntatis intendentis finem; ita proportionabiliter reprobatio essentialiter consistit in actu intellectus diuini imperantis defectum, & exclusionem à dicto fine, connotando ex parte diuinæ voluntatis decretum intendens exclusionem ab eodem fine, & eligens non quidem ipsa peccata, quæ sunt media conducentia ad finem perditionis; sed permissionem peccatorum, quæ possunt ob optimos fines eligi à Deo. Reprobatio igitur, pro ut dicitur actum voluntatis, opponitur propriè electioni; est enim reprobare, quasi reijcere, & refutare; ex parte verò intellectus dicitur præscientiam malorum culpæ, & præparationem malorum poenæ.

Circa secundum dubium, conclusio affirmatiua est de Fide; & patet ex infinitis Scripturæ locis, in quibus apparet homines, & Angelos malos esse ad poenam æternam destinatos, & consequenter esse reprobos: habetur enim *ex cap: 9. ad Roman. Iacob dilexi, Esau autem odio habui*. Et infra: *Subiunxit in multa patientia vasa iræ, apta in interitum, ut ostenderet diuitias gloriæ suæ in vasa misericordiæ, quæ præparauit in gloria*.

In hac difficili de malorum reprobatione materia, occurrit satis illa celeberrima quæstio, de modo, quo circa illos reprobandos se habuerit diuina voluntas: an scilicet ex parte reproborum possit assignari causa demeritoria, ob quam Deus intenderet illorum exclusionem à regno cœlesti, & deputationem ad æternum mortis supplicium; vel solum Deus intenderit talem exclusionem, & deputationem ex sola sua voluntate, nulla præsupposita causa demeritoria ex parte reprobandorum: taliter, quod non quæritur causa, vel ratio illius actus, qui dicitur reprobatio; nam certum est talem actum nullam posse habere causam; sed

inquiritur causa illius actus secundum, quod terminatur ad tale obiectum: videamus igitur

Utrum reprobatio sit ante, vel post prauisam demeritam?

O Portet ad intelligentiam quæstionis prænotare: duplicem reprobationem à Theologis distingui, vnā negatiuā, & aliam positiuā: aliqui volunt reprobationem negatiuā habere pro termino, *ad quem*, negationem electionis ad gloriam, & per hoc dicitur negatiua; alij dicunt idem sub alijs terminis: asserentes reprobationem negatiuā solum habere terminum *à quo*, scilicet exclusionem à gloria, vt beneficio indebito; reprobationem verò positiuā habere terminum *à quo*, nempe exclusionem à gloria, & etiam terminum *ad quem*, scilicet pœnam, siuè damni, siuè sensus. Alij verò, cum quibus adhæreo, melius distinguentes terminos, dicunt, reprobationem negatiuā posse considerari, & pro vt negatio beneficij indebiti, & per modum pœnæ peccatorum; reprobatio verò positiuā per hos dicit executionem æternæ damnationis. Fundamentum istorum, quod meo iudicio est firmum, sumitur ab exemplo electionis ad gloriam; nam sicut electio ad gloriam secundum ordinem intentionis non solum est ad ipsam, vt ad beneficium indebitum, sed etiam; vt ad coronam meritum; cum certum sit, vt diximus, Deum ordine intentionis velle hominem consequi gloriam per merita; ita vt merita sint terminus diuinæ intentionis, non verò motiuum: ita exclusio à gloria, seu reprobatio negatiua, & potest intendi, & considerari per modum negationis beneficij indebiti, & per modum pœnæ. Hoc posito sit

Prima conclusio: Exclusio à gloria, si consideretur per modum denegationis beneficij indebiti sit, & incenditur à Deo independentem à demeritis, & consequenter ante præuisionem cuiuscumque demeriti, siue originalis, siue actualis. Antequam autem probetur conclusio. Suppono peccatum originale, saltē in illis, in quibus non remittitur, fuisse sufficientissimum motiuum excludendi homines à gloria, licet de facto non fuerit à Deo assumptum, vt motiuum: secunda pars videbitur infra; prima ostenditur clarē; nam peccatum originale ponit in hominibus indignitatem, & positiuam inimicitiam Dei, redditque totum genus humanum Deo exolum: fuit igitur originale peccatum præuisum sufficiens causa, ob quam Deus si voluisset, potuisset absque cuius in iuria omnes homines reprobare, non fuit tamen præuisum ante reprobationem, vt causa illius; sed tantum, vt obiectum, seu morbum naturæ, in cuius remediū Christus venit.

Probatur igitur conclusio, ante omnem scilicet peccati præuisionem, quæ est causa demeritoria, iuste Deum aliquos excludere à gloria, & illos reprobare reprobatione negatiua; pro vt scilicet dicit puram nega-

tionem beneficii indebiti. Primo, quia manifestè hæc veritas habetur in scriptis ex Apostolo ad Romanos 9. *Igitur cuius vult miseretur, & quem vult, indurat: & iterum, An non habet potestatem figulus, ex eadem massa facere aliud quidem vas in honorem, aliud verò in contumeliam?* Subiungens autem idem Apostolus rationem huius ait, *Quòd si Deus volens ostendere iram, & notam facere potentiam suam, substituit in multa patientia vasa iræ apta in interitum, ut ostenderet diuitias gloriæ suæ in vasa misericordiæ; quæ præparauit in gloria.* Hoc idem confirmant verba eiusdem Apostoli, desumpta ex eodem capite, quæ sunt, *Cum nondam nati fuissent, aut aliquid boni, vel mali fecissent, non ex operibus, sed ex vocante dictum est: Iacob dilexi, Esau autem odio habui.* Quòd autem totum, hoc debeat intelligi de dilectione, & odio pertiunente ad æternam prædestinationem, vel reprobationem; insinuat clarè S. Thomas, qui in fine lect. 2. hæc habet: *Sicut autem dilectio, de qua hic loquitur, pertinet ad æternam Dei prædestinationem; ita odium, de quo hic loquitur, pertinet ad reprobationem, quæ Deus reprobat peccatores, nec est dicendum, quòd ista reprobatio sit temporalis.*

Probatur eadem conclusio ratione; nullius scilicet peccati, siuè originalis, siuè actualis præuisionem causam extitisse demeritoriam, ob quam Deus homines reprobauerit reprobatione negatiua; pro vt scilicet dicit puram negationem beneficii indebiti. Quia potest Deus absque vlla iniuriæ, & crudelitatis nota primam gratiam alijs dare, alijs negare; cum nulli hominum sit debita; ergo etiam poterit Deus gloriam denegare, pro vt habet rationem beneficii indebiti nullis præuisis demeritis. Hoc idem tenentur etiam asserere Professores scientiæ mediæ, qui dicunt Deum aliquibus gratiam congruam denegare nullis eorum præuisis demeritis; ergo cum Deus non minus sit gratus, quàm gloriæ Dominus, si absque iniustitiæ, & crudelitatis nota ante omnem demeritorum præuisionem gratiam congruam aliquibus efficaciter denegare poterit, etiam, & gloriam.

Confirmatur eadem veritas ratione desumpta ex summo dominio, videlicet, Supremum, & summum dominium consistit in hoc, quòd possit scilicet dominus facere de sua re quidquid voluerit absque alterius iniuriæ; ergo cum Deus sit supremus, & summus gloriæ dominus, & gloria nulli hominum sit debita, poterit absque iniuriæ, & crudelitatis nota gloriam aliquibus negare; etiam si nullam supponat præuisionem peccati, siuè originalis, siuè actualis. Nullam ergo causam habet ex parte hominum hæc reprobatio negatiua; sed solam voluntatem diuinam, quæ sicut in prædestinatis voluit ostendere misericordiam indebitam illos eligendo; ita & in reprobis summum dominium illos excludendo à gloria, tamquam beneficio ipsius indebito.

si Dices I. Si reprobatio negatiua esset ante præuisionem cuiuscumque demeriti, non reluceret in Deo tanta æquitas, & iustitia, quanta relucet,

ceret, si esset ex præiudiciis demeritis; ergo &c. *Resp.* argumentum solum habere vim in reprobatione positiva, quæ dicit executionem æternæ damnationis, quæ est maxima pœna, quam vique concedimus fieri, ut constabit, ex præiudicio demeritorum; vel in reprobatione negativa secundo modo sumpta, pro ut scilicet connotat pœnam; non autem in reprobatione purè negativa, quæ nec dicit æternam damnationem, nec aliquam pœnam; sed solum voluntatem non dandi gloriam, cui debita non est: unde ad argumentum negatur antecedens. Hoc idem argumentum fuit etiam olim oppositum ab hæreticis S. P. August. ad quod respondit idem S. Doctor; Non iam contra se, quam contra Apostolum ipsum militare, cum docuit, quod non ex operibus Iacob dilexit Deus, Esau autem odio habuit.

Dices II. Noluit Deus circa dona supernaturalia Angelis, & hominibus ex mera bonitate sua tradita neminem excipere; quinimò voluit illa dona esse omnibus communia; ut patet in elevatione naturæ rationalis ad statum supernaturalem; ergo etiam putandum est neminem exceperisse in electione ad gloriam ante præiudicium cuiuscumque demeriti. *Respondetur* negando consequentiam; per hoc enim, quod Deus aliquos exceperit in electione ad gloriam, nec iniustitia, nec vindictio aliqua apparet: quinimò in reprobis ostenditur aliqualis misericordia, & bonitas; dum illis dantur auxilia, quibus possunt benè operari, & ad vitam peruenire, si velint: iuste igitur potuit Deus à regno excludere, & permittere, quod ab illo deficerent, non dando illis gloriam suam, nec illos ad eam præeligendo, hac sola ratione, & titulo; quia gloria, & gratia illis debita non est.

Vigebis I. Supposita elevatione naturæ humanæ ad finem supernaturalem per voluntatem Dei antecedentem, qua vult omnes homines, quantum est ex se, saluos fieri; gratis asseritur, carentiam gloriæ posse habere rationem puræ negationis; nam semper dicit pœnam, cum dicat priuationem rei aliquo modo debitam; ut patet in carentia gratiæ, supposita elevatione ad finem supernaturalem, quæ adæquatè sumpta, & secundum quemvis conceptum datum à parte rei, est maculans animam, & consequenter priuatio, & non mera negatio; ergo si dicit pœnam, non potest fieri talis exclusio ante præscientiam, & præiudicium cuiuscumque demeriti; nam pœna semper connotat culpam. *Respondeo*, quod licet supposita elevatione naturæ humanæ ad finem supernaturalem exclusio à gloria non dicat puram negationem, sed priuationem, seu carentiam vicini finis, ad quem creatura rationalis est ordinata; quia tamen Deus, dum ordine intentionis denegat gloriam, non intuitu culpæ illam denegat; sed quia non tenetur illam efficaciter dare, non habet talis carentia vicini finis rationem culpæ, nec pœnæ. Nam pœna non consistit in sola ratione mali disconuenientis; aliter motus concupiscentiæ, qui essent in natura pura, si homo fuisset conditus in puris naturalibus,

libus, essent ibi pœna, cum in illo statu disconuenientes essent; quòd nullus dicit: sed requiritur ad rationem pœnæ aliquid aliud; quòd malum infligatur propter culpam; ergo cum denegatio gloriæ non infligatur incuitu culpæ; sed quia non tenetur illam dare, ut diximus, supposita etiam eleuatione naturæ humanæ ad finem supernaturalem, carentia gloriæ, nec habebit rationem pœnæ, nec culpæ; & cum Deus per eleuationem ad finem supernaturalem non se obligarit ad conducendum defacto homines sic eleuatos ad eundem finem; non sequitur, Deum se obligare, supposita etiam tali eleuatione ad dandam gloriam.

Vrgebis II. Saltem non potest negari, quòd excludere homines à gloria, tamquam à beneficio indebito, videatur in se quid malum; ergo non poterit per se intendi, nisi ratione culpæ reprimendæ. *Respondetur* negando antecedens, & consequentiam; habet enim Deus sufficientissimum motiuum, & causam excludendi homines à gloria tamquam à beneficio indebito; etiamsi non intendat culpam reprimere; hoc enim motiuum, & causa, esset bonum ostensionis supereminentiæ diuinæ gloriæ, quæ nulli naturæ est debita.

Vrgebis III. Pueri decedentes sine baptismo sentient magnam tristitiam in die iudicii, & consequenter pœnam sensus, cum viderint se fuisse ordinatos ad æternam beatitudinem per voluntatem Dei antecedentem, ac mortem Christi; & tamen illa priuari; ergo non est de conceptu essentiali pœnæ, quòd connotet culpam; cum in illis detur pœna, & nullum inueniatur peccatum, quod sit correlatiuum talis pœnæ. *Respond.* esse multum probabile pueros non tristari ob carentiam visionis beatificæ, ut videbitur magis expressè in tract. de peccatis, agendo de peccato originali; & consequenter pueros vlla pœna sensus puniri; nam vel ignorant bonum supernaturale, quo priuantur, vel si habent aliquam coniecturalem notitiam, quia in die iudicii erunt præditi rectitudine, & sapientia naturali, non tristabantur de carentia talis boni, quod respiciet tamquam bonum improporcionatum, ob cuius carentiam sapiens non tristatur.

Vrgebis IV. Eo ipso, quòd Deus velit aliquem excludere à gloria, vult illum punire pœna æterna; cum hoc secundum sequatur ex primo; ergo falsum est, quòd voluntas excludendi a gloria, ut à beneficio indebito, non dicat pœnam, & consequenter sit ante præiudicium cuiuscumque demeriti. *Respond.* distinguendo antecedens, vult illum punire eadem voluntate, ac motiuo nego, diuersa voluntate, ac motiuo concedo antecedens, & nego consequentiam; licet enim voluntas excludendi aliquem à gloria, ut à beneficio indebito, sit connexa infallibilitate consequentiæ cum voluntate infligendi pœnam; non sequitur, quòd idem sit motiuum excludendi aliquem à gloria, ut à beneficio indebito, ac infligendi pœnam; & consequenter, nec sequitur, quòd si secunda voluntas est dependens à præiudicio demeriti, sit etiam, & prima. Dicimus er-

go, quòd licèt exclusio à gloria, prout negatio beneficii indebiti, sit simpliciter prior peccato, & consequenter nec dicat pœnam, nec consequenter præuisionem demeriti; vt tamen habet rationem pœnæ, est simpliciter posterior eodem peccato; quia non intenditur per modum pœnæ, nisi occasione peccati secundaria intentione: & sic eadem denegatio gloriæ, quæ est reprobatio negativa, quæ prius intendebatur à Deo titulo indebiti, quando scilicet non respiciebat pœnam; potuit rursus ob peccata denegari titulo demeriti; cum non repugnet aliquod tantum, præintantum vno titulo, posse alio titulo intendi, antequam mandetur executioni.

Urgebis V. Si exclusio à gloria, seu reprobatio negativa pura facta fuisset ante omnem demeritorum præscientiam, maxima hominum pars esset diuina potestate ad malum prædestinata, & creata, vt pereat; cum ex tali exclusione à gloria infallibiliter sequatur æterna damnatio; hoc non est dicendum; ergo &c. Respond. negando sequelam; prædestinatio enim semper est ad bonum, nunquam ad malum, loquendo de malo culpæ; in nostra ergo sententia, idest ante omnem præuisionem culpæ, siue originalis, siue actualis, prædestinatio non est ad mortem; sed solum est exclusio a gloria, tamquam à beneficio indebito, ex qua sequitur permissio in peccatum, & ad permissionem peccatum, non à Deo prædestinatum, sed à praua hominis voluntate affectum; post peccatum autem preparat Deus pœnam, & mortem æternam, posita autem tali exclusione à gloria, nec sequitur per se peccatum, nec æterna damnatio; nam non est connexa, vt supra diximus, talis exclusio cum æterna damnatione infallibilitate consequentis, sed solum consequentiæ; quòd ostendo hoc exemplo; si enim Deus conderet hominem in puris naturalibus, quem à gloria excluderet, & statim moreretur sine peccato; ex vi talis exclusionis, nec sequeretur peccatum, nec æterna damnatio.

Nota hic I. Quòd reprobatio negativa non est veluti negatio, siue suspensio diuinæ voluntatis; in quantum scilicet diuina voluntas postquam aliquos homines elegit ad gloriã, remaneat suspensa circa aliquos, quos non elegit; nam in eodem instanti, in quo positiuè quosdam prædestinauit, cæteros positiuè reprobauit: dicitur ergo reprobatio, negativa, eo quòd secundum nostrum concipiendi modum in eodem instanti eternitatis concipimus vnum signum, in quo Deus sine præuisione meritum quosdam ad gloriã elegit; in quo signo non concipimus reprobare ceteros, nisi in alio posteriori signo supposita præscientia, & præuisione demeritorum: & sic concipimus in illo primo signo solam exclusionem à gloria, seu solam negationem gloriæ, vt à beneficio indebito, absque eo, quòd respiciat pœnam, quam vocamus reprobationem negatiuam primo modo: & dicimus eam fuisse ante omnium demeritorum præuisionem.

Nota II. Per hoc, quòd Deus reprobet homines, excludendo illos à glo-

gloria, vt beneficio indebito, non ordinat formaliter ad pœnam; & consequenter nulla est in tali exclusione crudelitas: sicut, neque in exclusione à prima gratia; nam licet hæc exclusio à gloria, vt à beneficio indebito sit quoddam malum physicum naturę ordinatę ad finem supernaturalem, vt supra visum est; attamen non vult Deus, nec delectatur in tali exclusione, vt est malum hominis; sed vt in illo resplendet excellentia suorum donorum debitorum cuiuscumque naturę creatę, & singularis amor erga electos: Concludimus igitur in fauorem primę conclusionis, exclusionem à gloria, vt beneficio indebito, fuisse tam in Angelis prauis, quàm in hominibus independentem ab influxu demeritorum cuiusvis peccati, etiam originalis: vnde sit.

Secunda conclusio: Reprobatio negatiua, seu exclusio à gloria, si consideretur per modum pœnæ, fit ex præiudiciis demeritis, vt talibus; pro vt scilicet demerita habent sufficientem prioritatem ad influxum demeritorum. Hæc conclusio est omninò conformis D. Thomę, qui 1. ad *An-nibal. dist. 41. quęst. unica art. 3. ait. Voluntati diuinę de salute hominis duplex voluntas opponi videtur, scilicet voluntas de contradictorio, secundum quod vult aliquem non saluare, & voluntas de contrario, secundum quod vult damnare aliquem. Prima non requirit aliquam rationem ex parte voliti, cum salus glorię non sit debitum naturę humanę; non enim requiritur ratio quare non dem alicui, cui dare non debeo. sed voluntas damnationis respicit rationem voliti in damnato, cum damnatio ex debito inferatur. Vbi videtur manifestè Angelicum Præceptorem nostras conclusiones ponere; dñi asserit voluntatem de contradictorio, seu denegatẽ beneficium indebitum, fuisse in Deo independentem à meritis; voluntatem autem de contrario, seu connotantem damnationis pœnam, fuisse ex iusticia, ac dependentem à meritis malis.*

Probatur II. autoritate S. P. N. Augusti. qui *lib. 5. contra Iulianum cap. 18. ait. Bonus est Deus, iustus est Deus, potest sine bonis meritis liberare; quia bonus est; non potest sine malis meritis damnare; quia iustus est: & epist. 105. inquit, Deus non est prius ultor, quàm sit homo peccator. Idẽ habet S. Prosper, S. Fulgentius, Gregorius Magnus, Ioannes Chrysostomus, & alij SS. Patres: Suffragatur etiam auctoritas Concilij Valentini sub Benedicto III. in quo dicitur, Quod in electione bonorum misericordia Dei præcedit omne meritum bonum; in damnatione autem malorum meritum malum præcedit iudicium. Vnde D. Prosper ad obiectiones Vicentinę obiectione secunda ait. Quod multi pereunt pereuntium est meritum, quod multi saluantur, saluantur est donum.*

Probatur III. ratione, Voluntas denegandi gloriam, seu excludendi ab illa per modum pœnæ, habet diuersam habitudinem ad obiectum; nempe ad denegationem glorię, ac habet voluntas denegandi gloriam per modum beneficii indebiti; cum idem obiectum, vt supra diximus, nempe denegatio glorię habeat rationem beneficii indebiti, vel pœnæ,
quæ

quæ sunt diuersæ rationes; sed voluntas denegandi gloriam, seu excludendi ab illa per modum beneficii indebiti, ut probatum est, cum non supponat poenā, nullā dicit præuisionem culpæ; ergo voluntas denegandi gloriā per modū poenæ debet dicere præuisionē culpæ; excludere. nā gloria per modū poenæ, cū sit actus iustitiæ vindicatiuæ, semper debet dicere præuisionem culpæ; nam sicut punire aliquem sine culpa, est iniustum; ita velle eum punire, & ad poenā deputare ante præuisionem culpæ.

Rescè igitur ordinatur in nostra sententia series diuinorum decretorum in negotio reprobationis, si dicatur Deum postquam totam naturā humanam ordinauit ad finem supernaturalem, aliquos efficaciter elegerisse ad eam consequendam, & alios ab eadem exclusisse, ut beneficio indebito; in quo signo sicut decreuit dare electis auxilia efficacia ad cōsecutionem talis finis; ita exclusis, talia auxilia denegauit: in secundo signo, sicut visis bonis operibus electorum decreuit dare ipsis gloriam, in executione, ex præuisione bonorum operum; ita decreuit excludere reprobos à gloria per modum poenæ, & damnationis, ex præuisione malorum operum. Vnde apparet, quod præuisio peccati in genere causæ finalis est prior decreto exclusiuo per modum poenæ, & decretum est habitum à Deo secundaria intentione, idest occasione peccati; cum voluntas puniendi sit de secundaria intentione Dei, ut docet D. Anselmus, & communiter Thomistæ. Potuit igitur sine vlla implicantia exclusio à gloria, non dum executioni mandata, duplici titulo intendi à Deo, scilicet beneficii indebiti ante præuisa demerita, & poenæ post eorum præuisionem.

Aduerte hic, quod licet permissio peccati, sicut & peccatum, supponant in genere causæ finalis exclusionem à gloria per modum beneficii indebiti; idest sit prior exclusio à gloria per modum beneficii indebiti, quā sit peccatum; cum hæc exclusio non fiat ex præuisione peccati, neque actualis, neque originalis, ut supra visum est; non negamus tamen peccatum, eiusque permissionem, quæ est in eodem signo rationis *in quo*, cum peccato, antecedere, & præire in genere causæ materialis exclusionem à gloria, ut à beneficio indebito, & consequenter etiam ipsam exclusionem per modum poenæ; quod non impedit, quin exclusio à gloria per modum beneficii indebiti sit de primaria intentione Dei, & sit prior in genere causæ finalis per modum primæ intentionis ipso peccato: ut clarè patet in Incarnatione Christi, quæ supponit peccatum, tamquam aliquod prius in genere causæ materialis, licet eadem Incarnatio sit prior peccato in genere causæ finalis. Hæc doctrina maximè iuuat ad impugnandam sententiam aliquorum Thomistarum, afferentium, denegationem gloriæ per modum beneficii indebiti fieri ex præuisione saltem peccati originalis, quod per nos neque fuit præsumptum in exclusionem à gloria considerata per modum poenæ; ut colligitur ex dictis in secunda conclusione, & magis expresse examinabimus in tertia.

conclusionem. Circa reprobationem positivam, quæ est executio æternæ damnationis, nihil puto esse dicendum; cum hæc probabiliter dicat implicite totum id, quod dicit reprobatio negativa, considerata per modum pænæ; cum hæc respiciat terminum positivum, nempe pœnam, sicut reprobatio positiva: unde ea, quæ diximus de reprobatione negativa considerata per modum pænæ, applicari possunt ad reprobationem positivam.

Dices I. Contra hanc secundam conclusionem: electio ad gloriam, ut est ad beneficium indebitum, & ut ad coronam meritorum modo supra explicato, sit independenter à meritis; cum sit perfecte gratuita, ut dictum est, agendo de prædestinatione; ergo etiam exclusio à gloria, considerata per modum beneficii indebiti, & per modum pænæ, debet fieri ante prævisionem cuiuscumque demeriti. *Respondetur* negando consequentiam, disparitas est; quia intentio dandi gloriam, seu electio ad gloriam, ut ad beneficium indebitum, & ut ad coronam, respicit donum gloriæ consequendum meritis à se donatis; ideo prima intentio dandi gloriam est perfecte gratuita; at verò exclusio à gloria considerata per modum pænæ dicit, & connotat ipsam culpam, quæ oritur ex nobis, non ex Deo; ergo debet fieri ex prævisione demeriti; & sic concedimus Aduersarijs solam exclusionem à gloria per modum beneficii indebiti fieri ante prævisionem cuiuscumque demeriti.

Dices II. Si Deus denegaret gloriam, ut beneficium indebitum, denegaret titulo indebiti: rursus si denegaret gloriam, & excluderet ab illa per modum pænæ, denegaret titulo demeriti, ut visum est; sed hæc duo pugnant inter se: quòd scilicet aliquid denegetur alteri, quia illi non debetur, seu non ex debito, & illi denegetur ob culpam, seu ex debito; ergo &c. *Respond.* concessa maiori, disting. minorem, negare gloriam non ex debito, & ex debito pugnant inter se, si respiciunt negationem secundum eandem rationem, concedo, si illam respiciunt secundum diuersas rationes, nego. Prima igitur negatio respicitur à diuina voluntate cum præcisione à demeritis; secunda verò cum connotatione demeritorum; & sic respicitur illa negatio gloriæ secundum diuersas rationes: unde denegatio illa gloriæ, quæ prius intendebatur à Deo titulo indebiti, potuit rursus ob peccata denegari titulo demeriti.

Dices III. Non implicat, quòd exclusio à gloria per modum pænæ infligendæ, ad ostensionem etiam iustitiæ vindictivæ Dei sit independentes à peccato, eiusque prævisione; ergo &c. antecedens probatur exemplo Incarnationis; nam intentio Incarnationis Verbi fuit de infligenda pœna Verbo Incarnato, cum passibilitas carnis sit pœnalitas; & tamen talis prima intentio Incarnandi Verbum in carne passibili fuit independentes à peccato, eiusque prævisione; quia fuit talis intentio simpliciter prior in genere causæ finalis, quàm permissio peccati. *Adx. Respond.* negando primum antecedens; ad exemplum adductum de Incar-

natione. Dico, intentionem illam incarnandi Verbum in carne passibili ex parte motiui non fuit actus iustitiæ vindicatiuæ; sed summæ liberalitatis, & misericordiæ erga genus humanum; solum ex parte effectus, seu termini respexit rigorosam iustitiæ compensationem tribuendam pro peccato. II. Falsum est etiam, malum passibilitatis Christi, cui debebatur impassibilitas, esse simpliciter pœnam; etiam si aliàs hoc malum fuerit pœnale Christo; eo ipso autem, quod non fuit simpliciter pœna, sequitur non exigisse intendi à Deo occasione peccati: taliter, ut peccatum sit prius, & Incarnatio posterior, idest secundaria intentione, & occasione ipsius; sicut euenit in intentione excludendi homines à gloria considerata per modum pœnæ. Fuit igitur Incarnatio, & Christi passibilitas de primaria intentione Dei antecedenter ad peccatum in genere causæ finalis; versatur tamen Incarnatio circa peccatum, tamquam materiam circa quam, & habet nexum cum decreto permissiuo peccati in genere causæ præcisè materialis.

Aduertè hic, quod non distinguitur voluntas intentiua ab executiua penès obiectum, sed penès motiuum: vnde sicut motiuum illius primæ intentionis eligendi ad gloriam fuit sola misericordia Dei, & motiuum decreti executiui fuerunt merita; ita motiuum illius primæ intentionis excludendi à gloria per modum beneficii indebiti fuit sola Dei voluntas non dandi gloriam, cui debita non est, & motiuum excludendi ab illa per modum pœnæ infligendæ fuerunt ipsa demerita.

Tertia conclusio, Quamuis sit probabilis sententia aliquorum Thomistarum, asserentium reprobationem, siuè exclusionem à regno fieri ex præuisione peccati originalis; probabilius tamen puto, peccatum originale non antecedere ex parte motiui, vel causæ exclusionem à regno per modum pœnæ, saltem in his, quibus peccatum originale remittitur. Probatur igitur conclusio hac ratione, quæ licet communiter exaggeratur à Thomistis, attamen meo iudicio non sic facilliter impugnatur, ut ipsi putant. Si in omnibus reprobis ratio, & motiuum exclusionis à gloria esset peccatum originale, taliter, ut ipsum antecederet ex parte motiui, vel causæ, sequeretur, quod cum multis hominibus reprobatis remissum fuerit verè, & actualiter peccatum originale per baptismum, ut patet de Baptizatis, qui damnantur; Deus puniret illos pœna æterna propter peccatum remissum. II. Sequeretur, quod Deus puniret ipsum originale peccatum remissum per baptismum, si ipsum originale peccatum esset prima causa, & radix reprobationis; quia prima causa, & radix reprobationis, est prima causa omnium sequentium, & ob quæ quis damnatur; sed peccatum originale est prima causa, ut concedunt, reprobationis; ergo omnium sequentium, ob quæ quis damnatur; sed quod est prima causa omnium sequentium, ob quæ quis damnatur, est etiam prima causa reprobationis; ergo cum peccatum originale sit prima causa omnium sequentium, ob quæ quis damnatur,

Deus puniret non tantum peccata actualia, sed etiam ipsum originale peccatum. III. Sequeretur, quod darentur in Deo duæ voluntates impossibiles, & contradictoriè oppositæ; nam vellet aliquos efficaciter excludere à gloria propter originale peccatum, & vellet illud efficaciter remittere: per secundam voluntatem statueret, se non amplius recordaturum illius peccatis; per primam autem statueret, se recordaturum illius; dum intuitu illius, tamquam prima causa denegat gratiam ad evitandum peccatum, propter quod sequitur æterna damnatio: & sic darentur in Deo duæ voluntates impossibiles, & contradictoriè oppositæ.

Mirum est quantis responsionum præfugijs nituntur Aduersarij vim huius rationis enervare. Respondent enim I. inter quos est Pater Gonet, dicentes, verum esse, Deum velle hominem excludere à gloria propter peccatum originale; sed exclusione exequenda, non propter peccatum originale; sed propter alia peccata actualia committenda, taliter, vt *ly propter*, non se teneat ex parte obiecti; nam isto modo essent in Deo voluntates impossibiles; sed se tenet ex parte actus: & hoc modo cohererent voluntates in Deo sine vlla implicancia: sicuti cohererent hæ voluntates, volo gratis dare gloriam, & volo illam dare, vt coronam, & consequenter per merita in executione; vnde concludit: Quod decretum intentium exclusionis à gloria habuit pro motiuo peccatum originale; decretum verò executiuum habuit pro motiuo in eo, cui remittitur peccatum originale, sola peccata actualia. Contra est primò. Quia permissio peccati actualis in exequutione ob quod damnatur reprobus, est effectus voluntatis, seu decreti intentiui, exclusionis à gloria; nam siue intentio finis est causa electionis mediorum; ita & motiuum intendendi finem est ratio mouens ad volendum media; ergo peccatum originale remissum esset motiuum, non tantum intendendi, sed etiam exequendi damnationem; ergo damnaretur aliquis propter peccatum originale, se tenente *ly propter*, non tantum ex parte actus, sed etiam ex parte obiecti, seu effectus executiui. Secundò decretum intentium electionis ad gloriam, vt sæpè dictum est, insinuat etiam in decretum executiuum, seu in ipsam executionem gloriæ; cum Deus non tantum coronet nostra opera, sed etiam maximè dona sua; cum ipsa opera nostra, sint ex Deo; ergo decretum intentium exclusionis à gloria; debet insinuare in decretum executiuum, & consequenter in ipsam damnationem; ergo gratis asseritur in decreto intentiuo peccatum originale insinuare, & præcedere, vt causam, & in decreto executiuo damnationis præcedere, vt causam, peccatum actuale.

Respondent II. Alij, cum quibus stat citatus Pater Gonet, dicentes, quod in reprobis baptizatis causa adæquata, & immediata reprobationis ipsorum, non est solum peccatum originale; sed etiam gratia indebita; & sic dicunt, ex duplici titulo Deum hominē reprobare; titulo sci-

licet gratiæ, siuè gloriæ, tamquam beneficium indebitum, sicut repro-
bavit Angelos; & titulo iustitiæ punitivæ propter originale peccatum;
& sic dicunt. Licet peccatum originale dimissum per baptismum non,
fuerit causa reprobationis; fuit tamen causa illius indebita gratia, vel
gloria; quia postquam peccatum originale dimissum fuit, non amplius
influebat in sequentes effectus reprobationis, sed solum influebat se-
cundus titulus, qui semper remanet. *Sed contra*, quia si esset vera hæc
doctrina; sequeretur, quod peccatum originale esset efficax moti-
uum exclusionis à regno, & non esset efficax motivum talis exclusio-
nis; esset, quia per Aduersarios peccatum originale, antequam esset re-
missum, influebat in effectus reprobationis; non esset efficax motivum
exclusionis à gloria, quia efficax exclusio à gloria est apta ex se indu-
cendi media conducentia ad talem finem; sed ipsi Aduersarij concedunt,
peccatum originale esse ineptum ad mouendum diuinam volunta-
tem, ad media conducentia ad æternam damnationem; ergo pecca-
tum eo ipso, quod sit remittendum, non esset efficax motivum exclusio-
nis à gloria.

In his igitur in quibus peccatum originale remittitur, vltimo modo est,
aut esse potest peccatum originale causa, vel motivum exclusionis à re-
gno; solum potest dici peccatum originale causa reprobationis, seu ex-
clusionis à gloria, quatenus vltimi effectus reprobationis potest esse
causa idem peccatum, quibus non remittitur: dixi, quod peccatum
originale solum potest esse causa vltimi effectus reprobationis, in quibus
non remittitur: & merito; nam non potest peccatum originale esse
causa integri effectus reprobationis; quia sicut in prædestinatione nulla
datur ex parte prædestinati causa totalis, & integri effectus eiusdem;
sed dantur effectus intermediij, qui sunt causa vltimi effectus; ut sunt me-
rita, quæ sunt causa moralis gloriæ in executione; ita & in reproba-
tione nulla datur ex parte reprobi causa totalis, & integri effectus eius-
dem reprobationis; cum ipsum peccatum originale in ijs, in quibus nõ
remittitur, etiam numerari debeat inter eius effectus; datur solum cau-
sa vltimi effectus ipsius, quæ est peccatum ipsum originale in ijs, in
quibus non remittitur: hoc totum videre est in serie decretorum,
quæ Deus habet in negotio prædestinationis, & reprobationis supra
notata.

Ex dictis facile percipies modum explicandi testimonia SS. PP. quæ cõtra
nostras conclusiones obijciunt Aduersarij; quando enim SS. PP. docet re-
probationem, seu exclusionem à gloria fieri antecedenter ad præuisionem
peccati, loquuntur de exclusionem per modum beneficii indebiti. II. Quã-
do dicunt, fieri ex præscientia demeritorum; loquuntur de exclusionem
per modum pænæ. III. Quando dicunt, peccatum originale antecede-
re ex parte motiui; vel causæ exclusionem à gloria; loquuntur de ijs;
quibus peccatum originale non remittitur, modo supra explicato.

Remanet hic solum explicare aliqua loca S. P. N. August. in quibus videtur docere, reprobationem hominum fuisse à Deo factam ob peccatum originale præuisum: insuper idem peccatum esse in pœnam obdurationis, obsecationis, derelictionis, &c. *Sed* ad hoc facile est respondere, S. P. loqui de peccato originali respectu eorum, quibus non remittitur: sicuti quando in *epist. 106.* dixit, *Hæc massa,* (idest genus humanum) *esset ita media, ut quemadmodum nihil boni, ita nec mali aliquid mereretur; non frustra videretur iniquitas, ut ex ea fierent vasa in contumeliam:* intelligendus est de eo, quod est fieri vasa in contumeliam punitione, & loquitur de iniquitate non originali, sed actuali. De reliquo ex duobus, quibus peccatum originale est remissum, quod unus eligatur, alius excludatur; sicut etiam potest queri de Angelis: idem S. Pater totum hoc negotium reducit ad inscrutabile Dei iudicium, ut in mille locis patet; non autem ad peccatum originale: Cæterum loquendo generaliter, & absolute de tota collectione effectuum reprobationis, & de ipsa reprobatione, non in executione, sed in intentione, nunquã D. P. August. ponit pro eius causa, & motiuo peccatum originale.

Dices D. Thom. 2. 2. *quest. 2. art. 5. ad 1.* ait, *auxilium gratiæ negari in pœnam saltem peccati originalis; dicit enim, Auxilium gratiæ ad credendum quibuscumque datur, misericordia datur; quibus autem non datur, ex iniustitia non datur in pœnam antecedentis peccati, & saltem peccati originalis; ut docet August. lib. de corre. & gratiæ; ergo D. Thom. & S. P. Augustin. sentiunt, reprobationem, & exclusionem, siuè à gratia, siuè à gloria generaliter fieri ex præuisione, saltem peccati originalis. Respond.* quod isti SS. Doctores loquuntur de ijs, quibus peccatum originale non est remissum, & de denegatione gratiæ in executione, & per modum punitionis facta in pœnam alterius peccati: de reliquo nunquam S. P. August. dixit exclusionem à gloria generaliter fieri ex præuisione peccati originalis: quinimò de *prædest. & gratia cap. 16.* expressè docet contrarium, nãpè, quod licet non præcessisset vllum peccatum originale in natura; adhuc Deum absque vlla iniustitia potuisse ex eadem naturæ massa quædam vasa facere in contumeliam. Si (inquit) *humanum genus, quod creatum primis constat ex nihilo, non cum debito mortis, & peccati origine nasceretur; tamen ex eis Creator omnipotens nonnullos in æternum damnare vellet ad interitum; quis omnipotenti Creatori diceret, quare sic fecisti? & post pauca concludit, Quia potestatem habet & figulus ex eadem massa facere aliud quidem vas in honorem, aliud verò in contumeliam.*

Vrgebis D. P. August. exponens illum locum Apostoli, *Iacob dilexi, Esau autem odio habui*, dicit, *Deum non odio habere Esau hominem, sed Esau peccatorem; sed non loquitur de Esau peccatore peccatis actualibus; quia contradiceret Apostolo aperte asserenti, Cum nihil boni, aut mali fecissent, non ex operibus, sed ex vocante dictum est: Iacob dilexi, Esau autem odio habui: ergo loquitur de eius peccato originali, ut clarè idem*

S.P. expressit, dicendo, *Ambo itaque gemini, natura filij ire nascebantur, nullis quidem operibus proprijs, sed originaliter ex Adam vinculo damnationis obstricti*; ergo per S. Patrem Esau reprobatur propter peccatum originale; sed hoc peccatum originale fuit remissum in Esau per circumcissionem; ergo per D. Patrē August. peccatum originale remissum est causa reprobationis, & exclusionis à gloria. *Multipliciter* ad hoc argum. respondeo cum his, qui nostram sententiam defendunt. I. S. P. August. loqui de Esau peccatore indefinitè, non verò determinatè, pro peccato scilicet actuali, vel originali. II. Vel loqui de odio reprobatio à gloria, quantum est ex se, pro ut gerebat Esau personam eorum, qui reprobantur, & quibus peccatum originale non remittitur; ad quod per accidens fuit, quòd postea ipsi Esau fuerit remissum. III. Denique potest dici, quòd si vis, quòd loquatur de Esau peccatore peccato originali iam remisso; loquitur non præsuppositivè, idest, non, ex operibus, etiam futuris, & præiis, Deus odio habuit Esau, tamquam ex meritis, & causa odio habendi; sed quatenus ex aversione, & odio negatiuo, seu nō electione, & dilectione, consecuta est permissio peccati, quòd Deus positivè odio habuit in Esau: sicut potest dici, quòd Deus Angelos peccatores odit, & bonos diligit, non quod præsuppositivè essent peccatores, cum omnes sint creati in gratias; sed quòd consequenter peccatores essent.

Nota hic, I. Quòd auferitur sufficientissimè locus quærimoniae, quare Deus aliquos homines, quibus peccatum originale remittitur, excludat à regno ante præiusionem peccati originalis; per hoc, quòd reprobatio nostra semper supponat causam, & demeritum sufficiens ex parte nostræ; scilicet originale peccatū, propter quod sufficienter possit Deus, si vellet, omnes punire, quamvis defecto non pro omnibus usus sit Deus illius præiusionem; sed pro his, quibus non est remissum. II. Peccatum originale, ut remissum, consequitur, non antecedit reprobationem; & sic est effectus illius non causa. III. Quando D. Thomas *quæst. 6. de veritat. solut. ad 8.* docet, denegationem auxilij ad credendum, vel infidelitatem negatiuam esse pœnam originalis peccati; loquitur de his, quibus peccatum originale non est remissum, in quibus ipsum peccatum originale potest esse ratio, & causa reprobationis, seu primi effectus reprobationis. IV. Illa voluntas efficax excludendi ante præiuisa demerita, nunquam est mandata executioni illo titulo denegandi beneficium indebitum; sed alio titulo, scilicet punitionis, & damnationis ad ostensionem suæ iustitiæ: Unde vult, quòd sua iustitia nō exerceatur, nisi suppositis malis, in quo nihil fœderatis, & crudelitatis est, ut impiè putant hæretici; pertinet igitur ad diuinam providentiam non eligere omnes homines ad gloriam, vel ad gratiam; sed aliquos suæ naturæ relinquere, & permittere peccata; si enim omnes creaturæ intellectuales sine ullo defectu persisterent, & non permitterentur deficere:

re : nec bonum diuinæ iustitiæ reluceret , nec contingentia , & libertas earum appareret ; sicuti si omnibus gratia Dei daretur , nec ipsa gratia , nec magnitudo beneficiorum Dei extimaretur . Nec Deus intendens iustitiam tenetur velle peccatum ; sed solum permittere , cum peccatum non sit ponibile in re per volitionem Dei , sed per permissionem , & suspensionem concursus , sed denegationem gratiæ ; sed solum tenetur velle permissionem , seu non dare gratiam : sicuti ad hoc , ut velit iustitiam non requiritur , quod præsupponat mala iam existentia , & antecedentia ; sed sufficit , quod prævideantur à Deo exitura ex ipsius permissione , & defectu creature , à qua deriuantur .

V. Quando dicimus reprobationem , seu exclusionem à gloria per modum pœnæ fieri ex præiudis demeritis , ut talibus , pro ut scilicet demerita habent sufficientem prioritatem ad influxum demeritorum : non excludimus à talibus demeritis peccatum originale non remissum , sed illud includimus sub nomine demeriti ; & dicimus , ipsum esse motiuum , & causam ultimi effectus reprobationis , iuxta supra dicta . Vnde non est hæc nostra sententia improbabilis , ut putat P. Lemos , dicendo , non posse satis intelligi , quomodo hæc sententia , non vnam , & eandem reprobationem respectu omnium constituat , & vno modo factam : Nam sicuti idem Pater Lemos satis intelligit sententiam omnium Thomistarum , asserentium prædestinationem , & electionem ad gloriam non fuisse vno modo factam ; sed ut beneficium indebitum , & in intentione fuisse ante præiudis merita ; ut verò corona , & in executione fuisse ex præiudis meritorum ; ita etiam deberet intelligere , nullam inuoluere repugnantiam , reprobationem , & exclusionem à gloria , tamquam à beneficio indebito , fieri ante præiudis cuiuscumque demeriti , siue actualis , siue originalis , & eandem exclusionem consideratam per modum pœnæ fieri ex præiudis demeritorum . Nec igitur hæc sententia est improbabilis , nec contra mentem S. P. N. August. & Angelici Præceptoris , ut vir iste alioquin doctissimus putauit ; cum ex dictis satis abunde niens veriusque S. Doctoris circa negotium reprobationis fuerit explicata .

Quinam sint effectus Reprobationis ?

Suppono hic easdem conditiones proportionabiliter requiri ad hoc , ut aliquod utatur effectus reprobationis , quas diximus , requiri ad effectum prædestinationis : debet igitur primò esse à Deo , & secundò , ut conferat cum effectù ad finem reprobationis . Vnde peccatum , quia caret prima conditione , non potest esse effectus reprobationis : sicuti ob defectum secundæ conditionis peccata , quæ remittuntur quoad substantiam suam , non sunt effectus reprobationis . Potest igitur difficultas esse circa permissionem peccatorum , propter quæ defectò reprobos dam-
natur

natur, & conducunt cum effectu ad finem æternæ exclusionis à gloria; nam circa peccata remissa non est dubium, quòd non sint effectus reprobationis; deest enim illis secunda conditio requisita ad effectum reprobationis, quòd scilicet conferat cum effectu ad finem reprobationis; & sic permissio peccati remittendi non est effectus reprobationis, quando plene est remissum.

Loquendo igitur de permissione peccati non remittendi, ita quòd cum finali impenitentia continetur, vel ad illam ordinem dicat. Dico, quòd permissio cadendi in peccatum, quæ est denegatio efficacis auxilij, obduratio, & derelictio in illo, est effectus reprobationis. Probat igitur conclusio, destruendo fundamentum præcipuum oppositæ sententiæ; quia in tantum per Aduersarios permissio peccati conducentis cum effectu ad finem æternæ exclusionis à gloria, non esset effectus reprobationis; in quantum finis permissionis peccati esset tantum pœna, vel vindicta, seu offensio iustitiæ vindicariæ Dei per pœnam; cum pœna supponat culpam; & permissio non conducit ad pœnam, nisi ratione culpæ; ergo si reprobatio, seu offensio iustitiæ vindicariæ supponit culpam permissam, sequitur permissionem non esse effectum ipsius reprobationis; cum sit prior illa. Sed falsum est, quòd finis per se permissionis peccati sit pœna, vel vindicta; sed est solum exclusio à gloria, tamquam à beneficio indebito; pœna enim, vel vindicta sequuntur ad permissionem per accidens, & præter intentionem Dei, idest ratione peccati; aliter si denegatio gratiæ efficacis, in qua consistit permissio peccati, esset per se, & necessitate etiam consequentiæ annexa cum peccato, non posset haberi denegatio gratiæ absque peccato, quòd non est semper verum; quia daretur in statu naturæ puræ denegatio gratiæ supernaturalis, tamquam beneficii indebiti, absque eo, quòd neceretur cum peccato. Insuper datur in pueris in ordine ad consecutionem Baptismi absque sequela noui peccati; ergo dicendum est, permissionem cuiuscunque peccati, siue actualis, siue originalis, non remittendi, & conducentis cum effectu ad finem æternæ exclusionis à gloria esse effectum reprobationis; sumptè tamèn per modum beneficii indebiti.

Dices, Deus intendens finem reprobationis, non potest non velle, ac intendere peccatum; nam qui per se intendit finem, debet per se intendere medium, quatenus conducit ad finem; sed permissio peccati non conducit ad finem punitionis, nisi quatenus ad illam sequitur peccatum; ergo &c. *Respond.* maiorem esse veram in suppositione, quòd finis per se intentus primaria intentione præsupposita ad permissionem peccati, esset pœna, quod nos negamus, asserentes talem finem esse exclusionem à gloria, tamquam à beneficio indebito, ad quem finem non requiritur per se peccatum, sed solum per accidens, vt dictum est; cum enim peccatum non requiratur ad finem per modum termini ad quem ponendi, vel consequendi; sed solum per modum termini à quo destruendi, non debet per

se, nec vilo modo intendi ab intendente finem : hoc totum pater in natura intendente generationem, ad quam licet requiratur corruptio alterius formæ; hæc tamen non intenditur à natura : Insuper, vt bene notat P. Suarez, Potest Deus permittere peccatum ob finem humilitatis, & tamen ad hunc finem non requiritur per se peccatum; sed ipsa denegatio gratiæ, tamquam indebitæ, potest vtiq̃e bene iuuare ad humilitatem : hoc modo intellecta maiori, faciliè erit respondere ad totum argumentum.

Vrgebis. Peccatum originale etiam non remissum supponitur permissum ante prædestinationem Christi, & consequenter ante aliorum prædestinationem; ergo à fortiori debet supponi permissum ante reprobationem; ergo non potest esse effectus ipsius. Hoc argumento vltus est quidam vir doctissimus, dum in vna ex publicis concertationibus habitis Romæ pro Capitulo Generali assisterem, vt lector Theologiæ, inferens ex eo, quod permissio peccati originalis est effectus reprobationis, peccatum originale non antecedere Christi prædestinationem, & consequenter Christum non se incarnasse propter remedium peccati. Sed solutio vtriusque argumenti sufficienter in supradictis appareret, vbi diximus, permissionem peccati originalis habere solum prioritatem in genere causæ materialis, circa quam, respectu Incarnationis; non autem in genere causæ efficientis, & finalis; nam Incarnatio Christi non est finis occasionatus, & sic est de primaria intentione Dei: vnde peccatum, quod est prius in genere causæ materialis, potest esse effectus Incarnationis, quæ præcedit in genere causæ finalis.

Circa pœnam æternam inflictam reprobis, & mortem ipsorum in peccato mortali: per quam scilicet educitur reprobis ob peccata reus è carcere huius vitæ ad supplicium æternum: non apparet difficultas, esse effectus reprobationis; cum enim hæc afferant secum executionem exclusionis à gloria, quæ fuit præintenta à reprobatione, sequitur indubiè terminare eius influxum, & consequenter esse eius effectum.

Ex his colligitur, quomodo cohæreat præscientia reprobationis cum decreto, & providentia reprobatiua ex sua natura efficacis: dicuntur enim reprobi præciti; non quia eorum demerita causantur, sed præsciuntur: & sic non præparantur, sicut merita iustorum: Vnde Deus suo decreto reprobatiui præparat, & infert pœnam iuxta supradicta; non tamen præparat, vel disponit demerita, quæ sunt peccata, nec illa causat, aut prædefinit, sed tantum permittit.

Petes hic pro complemento huius tractatus, an sit maior numerus electorum, quàm reproborum? Respondeo in hoc porius audiendum esse Apostolum dicentem, *Quis hominum scire potest consilium Dei, aut quis consiliarius eius fuit?* Quinimò ipse Dominus ad præsciendam omnem radicem curiositatis circa hoc mysterium omnium secretissimū, & occultissimū, Interroganti cuidam *Lucæ 13. Domine si pauci sunt, qui saluantur?* respondit, *contendere intrare per angustam portam; quia multi,*

*dico vobis, quarent intrare, & non poterunt: quæ verba deberent à nobis omnem socordiam, & negligentiam excutere, circa studium adipiscendæ salutis, nos sollicitos reddentes ad contendendum intrare per angustam portam; cum ex his, qui solliciti sunt, & quærunt intrare, neque adhuc poterunt, iuxta verba Christi Domini. Cum magno igitur metu, & tremore salutem operemur, & tamquam Christi Domini discipuli, eius pretiosissimo sanguine redempti, iuxta Evangelij semitas incedamus, innocentiam vitæ sanctorum exemplis custodiamus, à titillationibus ferarum voluptatum aurem omnino auertamus, concupiscentias carnis rationis iugo supponamus, passionum impetus virtutum freno contineamus, & Deum, eiusque præcepta sequamur, qui ideo præcepit, ut nos ad beatitudinem, & felicitatis regiam transferat. De reliquo unusquisque curiositatem omnem deponat circa hoc diuinitatis arcanum, quod Propheta *secretum horrois* appellat; & solum quæso præ oculis habeat formidabilem illam D. Ioannis Chrysost. sententiam, desumptam ex homil. 14. ad populum Antiochenum, qui sexcentis hominum millibus constabat, dicentis, *Quot putatis esse in Ciuitate nostra, qui salui fiunt? & responderet idem Sanctus, Non possunt in tot millibus, centum inueniri, qui saluentur, quin & de his dubito. Concludo cum illa M. Gregorij sententia, qui homil. 19. in Euangel. loquens de ipsis Catholicis ait, Ad fidem multi veniunt, sed ad cælestia regna pauci perueniunt.**



TRACTATUS V.

De Deo Trino, & Vno.

Prima Christianæ Religionis veritas; est Deum esse Trinum in personis, vnum in essentia, Patrem esse Deum, Filium esse Deum, & Spiritum sanctum esse Deum; non tamen tres Deos. Nullum est ergo, vel dignitate sublimius, vel profunditate altius sacro hoc Trinitatis mysterio densissimis nebulis circumdato, inaccessibili luce persuso; hoc enim est primum, & caput, & causa aliorum Christianæ religionis mysteriorum: illud autem quod splendidissimo Ecclesiæ lumini D. P. Augustino, hoc idem mysterium olim comprehendere satagenti, obiecit Angelus, non scilicet aliud intendere, quam si in vnus digiti fossulam oceani totius infinitas prope aquas concludere vellet; nos monet, non naturalibus rationibus, & ingenio esse fidendum; sed Diuinæ reuelationi, Sanctorum Patrum, ac Scholasticorum authoritati, tamquam securissimæ columnæ innitendum.

Verum dentur Processiones in Diuinis?

Necessario sunt admittendę in Deo processiones Diuinę, in quibus vt ait D.P. August. *lib. 1. de Trinitate cap. 3. Nec periculosius alicubi erratur, nec laboriosius aliquid queritur, nec fructuosius aliquid inuenitur.* illas enim expressę Scriptura declarat; dicitur enim Ioannis 8. *Ego a Patre processi: & cap. 15. Cum veneris Paraclitus, qui a Patre procedit.* Duę igitur tantum dantur processiones in diuinis, vt docet communis, & vera sententia; quia tantum dantur duę actiones immanentes, quę sunt intellectio, & volitio; & sic non possunt dari plures processiones, v.g. generationes, & spirationes; aliter darentur duę filiationes, quod implicat; si enim sunt duę personę productę, duas esse processiones necessarium est, vnā qua vna persona producat, alteram qua alia, & vna ex ijs, se extendit ad omnia obiecta, vt cognita; non autem, vt amata; altera verò ad eadem obiecta, vt amata, non vt cognita: neque est possibilis vna indiuisibilis, quę ad vtrumque feratur; illa enim processio, quę ex amore procedit debet prodire a duabus causis, & consequenter ab altera, quę procedit per cognitionem, quę quodammodo est prior; eo quod prius est noscere obiectum, quàm illud amare, & consequenter prior est processio per intellectiōem, quàm per volitionem.

Processiones istę sunt ad intra, non ad extra, vt putant Ariani: & Personę procedentes sunt vnius substantię. Insuper processiones diuinę, quoad suos terminos proprię sunt immanentes, quatenus producunt terminum, qui manet in principio producente: Filius igitur, & filiatio manent in Patre: non quia identificentur cum illo; quia hoc non requiritur ad immanentiam propriam, imo si identificaretur, non esset immanentia in rigore; quia nihil proprię immanet in se, sed in alio. Addo, quod Filius magis intrinsecę immanet in Patre, quàm actus vitalis in nostro intellectu; hic enim solum vnitur realiter; Pater verò cum Filio ratione essentię mediatę identificatur.

Quęres, quare Filius per intellectiōem, & Spiritus sanctus per volitionem acceptam non producant rursus alium Filium, & alium Spiritum sanctum? *Respond.* quia illa intellectio quam accepit Filius, iam producit existens in Patre totum suum terminum; inde quando communicatur Filio, non habet amplius quid producat: sicut si albedo communicata vni subiecto produceret in illo secundum totam suam actiuitatem, si postea alijs subiectis communicaretur, non esset amplius operatiua.

Dices I. *Mysterium Trinitatis fundatum in reali processione vnius personę diuinę ab alia, destruit illud primum principium lumine nature notum, cui tota ars syllogistica nititur, nempe, Quę sunt eadem vni tertio sunt eadem inter se: quod non est credibile; nam licet hoc mysterium*
fit

sit supra rationem naturalem; non tamen est illi contrarium. Sequela probatur, quia in hoc mysterio ponuntur tres personæ, quæ identificantur cum vno tertio, nempe cū essentia diuina, absque eo quod identificentur inter se, cum inter se realiter distinguantur. *Respond.* negando sequelam, ad cuius probationem assero, quod principium illud militat tantum in illis, quæ sunt eadem alicui tertio, non solum re, sed etiam, ratione, saltem quod vtrumque in ratione illius includatur; non autem militat in ijs, quæ non sunt eadem vni tertio re, & ratione, idest non dicunt identitatem eiusdem rationis formalis adæquatè: sicut sunt personæ diuinæ, quæ solum sunt eadem vni tertio, nempe essentiæ diuinæ re, non autem ratione; idest identificantur realiter cum essentia, & distinguuntur ratione ab eadem. II. Illud principium solum militat circa ea, inter quæ non obstat relationis oppositio; inter personas verò diuinas obstat relationis oppositio. III. Quia est verum illud principium, si sunt eadem vni tertio adæquatè: personæ, verò sunt eadem vni tertio, nempe essentiæ, inadæquatè. IV. Illud tertium debet esse ita singulare, vt non æquiualeat naturæ vniuersali: ob eandem rationem, quia rationale, & innibile identificantur vni tertio, nempe animali, idè non identificantur inter se.

Dices II. Natura diuina, vtpotè infinita est immultiplicabilis, sed etiā persona diuina, est infinita; ergo est immultiplicabilis; ergo non dantur plures personæ diuinæ. *Respond.* quod principium immultiplicabilitatis in diuina essentia, non oritur simpliciter ex eius infinitate; sed quia est infinitas absoluta; infinitas autem personæ, vt talis, est relatiua, ac proindè debet dicere oppositionem cum alia persona, & consequenter multiplicabilitatem. Nota, quod ex infinitate absoluta diuinæ essentiæ colligitur, & quod sit immultiplicabilis, & quod personæ nequeant distingui, nisi ratione oppositionis relatiuæ.

Dices III. Si Filius, & Spiritus sanctus procederent à Patre reciperēt esse ab eo; ergo sunt indigentis naturæ, quia carent illo; ergo dependent ab illo; quia illud quod recipiunt non haberent, nisi daretur, aut communicaretur. *Respond.* negando consequentiam; quia argumentum solum habet vim in creatura, quæ prius natura quàm recipiat esse, præintelligitur esse sub nihilo, non autem in diuinis; quia non præsupponuntur personæ procedentes prius esse sub nihilo; insuper quia illud esse, quod vna persona recipit ab alia, est talis conditionis, vt in suo conceptu includat, quod semper, & necessario habeat illud ab altera; non sequitur, quod careat illo; neque quod dependeat ab illa; quia recipit ab alia idem prorsus esse, quod est in illa.

Virum divina Processiones sint actus intellectus, & voluntatis?

Processiones diuine sunt actiones vitales formaliter intellectus, & volitionis; non verò emanationes; quia Filius dicitur Verbum, in quantum procedit per intellectum; Spiritus sanctus autem Charitas, & Amor; quia procedit per voluntatem: & hinc est quod processio Verbi sit prior origine, quàm processio Spiritus sancti. Vnde colligitur processionem Filij non esse immediatè ab essentia, sed ab intellectu: & processionem Spiritus sancti à voluntate: & sic conuincitur apertè falsa sententia Durandi asserentis, quòd si per impossibile Deus non esset intelligens, aut volens, nihilominus darentur dictæ processiones; personæ enim diuinæ non procedunt à natura diuina præcisè, secundum quod natura est, sed secundum quod habet rationē potentie operantis ad intra; ergo secundum quod habet intellectum, & voluntatem.

Nota, quòd dictio, & spiratio sunt idem cum intellectione, & volitione, & non distinguuntur formaliter ex natura rei, vt putat Scotus; sed sunt vna, & eadē actio, & solùm differunt, quia intelligere importat habitudinem ad obiectum, illud apprehendendo; dicere versatur circa Verbum, illud manifestando. II. Asserendo processiones diuinas esse operationes intellectus, & voluntatis, egregiè saluatur, Primò, quòd vna processio sit prior alia; cum enim intellectus sit prior voluntate, sequitur, quòd processio, quæ est per intellectum, sit prior illa, quæ est per voluntatē. Secundò saluatur, quare vna processio sit generatio, & non alia; cum sola processio, quæ est per intellectum; non verò, quæ est per voluntatem sit generatio; vt melius infra videbitur. Tertiò saluatur denique, diuinas processiones esse tantum duas, & non plures; cum vires naturæ intellectuales sint tantum duæ, scilicet intellectus, & voluntas.

Vrgēbis I. Contra hanc conclusionem, Actiones intellectus, & voluntatis sunt communes toti Trinitati; ergo per eas non producuntur personæ; nam processiones sunt, actus notionales, & proprii. Respond. distinguendo antecedens actus intellectus, & voluntatis, vt essentielles sunt communes toti Trinitati, concedo, vt notionales, nego: Discrimen verò, quod reperitur inter intellectiōem (& idem dico de volitione) essentialē, & notionalē est: quia intellectiō absolutè dicit ordinem ad solum obiectum cognitum: notionalis autem dicit etiam ordinem ad terminum productum. Et licet intellectus non distinguatur in essentialē, & notionalē, non sequitur neque intellectiōem debere distinguī; quia vnius potentie possunt esse plures actus; vt videre est in intellectu creato, qui intelligit, & discurrit: sic intellectus diuinus habet duos actus 1. speculari, 2. dicere Verbum, qui dicitur notionalis, & est tantum in Patre.

Vir-

Urgebis II. Relatio paternitatis emanat sine vlla implicancia immèdiatè ab essentia diuina; ergo & aliæ relationes personales; ergo diuinæ processiones non sunt actûs intellectus, & voluntatis; sed solius naturæ diuinæ. *Respond.* negando consequentiam, ratio est; quia prima persona cum sit improducta, sequitur quidem immèdiatè ad essentiam, quo ad munus constituendi personam; fundatur tamen in actione intellectus, quoad munus expressum referendi.

Urgebis III. Si dictio quæ est productio Verbi esset idem cum intellectione, sequeretur, quòd sicut dicitur, producere Verbum, sic diceretur illud intelligere. *Respond.* solutionem patere ex dictis; nam licèt intellectio sit idem cum dictione, & eadè actio sit realiter intellectio & dictio; dicit tamen diuersas habitudines; quia intelligere importat habitudinem ad obiectum, illud apprehendendo; dictio verò ad Verbum illud manifestando.

Utrum Processio Verbi sit generatio?

Est veritas Catholica, quòd in diuinis processio secundè Personæ, seu Verbi diuini sit vera generatio: vnde solum Verbum diuinum est Filius; non verò Spiritus sanctus; in *Psal.* enim 109. habetur. *Ex utero ante luciferum genui te.* Ioann. 3. *Sic Deus dilexit mundum, vt filium suum unigenitum daret;* & in Symbolo Apost. *Et in Iesum Christum filium eius unicum.* Probatur conclusio ratione; quia omnes particule definitionis generationis viuentium conueniunt soli processioni Verbi; non, autem processioni Spiritus sancti. Processio enim Verbi est *Origo viuentis à viuente in similitudinem naturæ*: Quòd sit origo viuentis, patet ex eo, quod legitur. *Ioan. 11. Sicut enim Pater habet vitam in semetipso, sic dedit, & Filio habere vitam in semetipso.* Et sic Verbum viuens à Patre viuente procedit. Quòd autem sit à viuente vt tali, videtur clarè; cum, procedat per actionem vitalem, seu intellectiōem; quia producitur ab illo quatenus est intelligens; intelligere verò est vita entis intellectualis. Quòd verò sit à viuente coniuncto, etiam patet; quia Verbum cum sit terminus actionis immanentis manet intra dicentem; & sic habet actionem immanentem, qua in Patre manet, vt constat ex illo *Ioannis I. Unigenitus Filius, qui est in sinu Patris.*

Tota autem difficultas restringitur in ostendendo, Verbum esse in similitudinem naturæ ex vi, & modo sue processions; quod ostenditur clarè; quia Verbum ex vi, & modo sue processions recipit naturam similem suo principio, secus verò Spiritus sanctus; ergo processio Verbi est in similitudinem naturæ, subindeque vera generatio: non verò processio Spiritus sancti; hæc enim est natura actionis intellectualis, vt producat similitudinem obiecti, natura verò actionis voluntatis, vt producat impulsus in amatum; ergo licèt per processionem Verbi, & per processio-

sionem amoris communicetur natura, cum utraque sit diuina, ac proinde communicans Deitatem; tamen non communicatur natura ex vi, & modo processionis, nisi per processionem Verbi; quia actio intellectus est per se assimilatiua, seu producens similitudinem in termino; actio vero voluntatis est impulsiva, seu producens impulsum, & pondus in actum.

Confirmatur, Quamuis Filio, & Spiritui sancto equaliter communicetur natura diuina; & sic conueniant in communicatione naturæ diuinæ; differunt tamen; quia in productione Filij producitur personalitas, quæ habet similitudinem cum personalitate producente, vt principium quod incompletum; in productione vero Spiritus sancti producitur personalitas, quæ non habet ex se similitudinem; hypostasis enim Filij est similis hypostasi Patris; hypostasis autem Spiritus sancti, non est similis hypostasi Patris, aut Filij; nam commune est subsistentiæ Patris, & Filij constituere suppositum spirans amorem, idest Spiritum sanctum, quæ non conueniunt subsistentiæ Spiritus sancti; ergo cum productiones diuinæ attendi debeant per D. Thomam respectu hypostasum, & hypostasis sola Filij, non vero Spiritus sancti producatur similis; sola productio Filij, non vero Spiritus sancti erit generatio.

Hinc deduco, benè hoc probare, qui diceret, Verbum diuinum, eo quod procedit per intellectionem, quæ est virtualiter natura, procedere formaliter ex vi suæ processionis in similitudinem naturæ; Spiritum sanctum vero, qui procedit per volitionem, quæ non est virtualiter natura, non procedere formaliter per naturam, & consequenter nec in similitudinem naturæ; ideoque non esse Filium, sed Spiritum.

In Nota hic I. Quod ly, *ex vi processionis*, potest dupliciter intendi; primo lato modo, idest per productionem sui: & in hoc sensu Spiritus sanctus ex vi processionis procedit vt Deus, recipit Deitatem, & consequenter naturam diuinam; quod idem est, quod per productionem sui habet communicatam Deitatem: Secundo ly, *ex vi sue processionis*, sumitur magis strictè, vt significet primariò per processionem intenditur communicatio Deitatis Spiritui sancto, in quo sensu negatur illum esse Deum, ex vi processionis; quia ex vi processionis Spiritus sanctus, primariò neque procedit vt Deus, neque vt persona, aut suppositum diuinum; sed pure, vt amor subsistens. Nota II. Quod maxime iuuat ad soluenda plura argumenta Aduersariorum: Idem esse habere similitudinem in natura, ex vi suæ processionis, ac habere similitudinem non solum quasi effectiue, sed etiam specificatiue: vnde Verbum, non autem Spiritus sanctus procedit in similitudinem naturæ effectiue, & etiam specificatiue; quia non attingitur quocunque modo, sed ex virtute propria, & formaliter. Insuper Verbum non tantum propagatiue, sed etiam assimilatiue procedit in similitudinem naturæ; quia ad essentiam propagationis, non requiritur, quod in principio propagante sit formaliter natura propagata,

gata. Sed sufficit, quòd sit virtualiter; vt patet in sole propagante naturam ignis; ad assimilationem autem requiritur essentialiter, quòd sit eadem formalis natura in principio, ac termino.

Arguunt I. Aduersarij, Spiritus sanctus procedit in similitudinem naturę, quia procedit, vt amans, & consequenter, vt intelligens, ex illo principio. *Nil volitum quin precognitum.* Respond. Dato quòd Spiritus sanctus procedat in similitudinem naturę, modo supra explicato, negatur quòd procedit, vt amans, sed procedit, vt amor subsistens: eodem modo quo si produceretur noster amor separatus, & terminatus subsistentia, non produceretur amans, sed amor subsistens. Unde est notandum, quòd etiam si in se prior sit intellectio, quàm volitio; nihilominus in ordine executionis prius, in quo, communicatur spirationi volitio, quàm intellectio; non enim est necessarium, vt illum ordinem, quem seruant in se aliquę res, quo ad esse, eundem seruent in ordine ad communicationem sui alteri; prius enim in se est subsistentia solis, quàm lux; non tamen prius communicatur subsistentia solis, quàm lucis: quamuis ergo in Patre, & Filio prius sit intellectio, quàm volitio; tamen ab ab utroq; prius communicatur Spiritui sancto volitio, quàm intellectio.

Arguunt II. Spiritus sanctus ex vi suę processiois procedit, vt persona diuina; quia procedit vt subsistens in natura diuina; communicatur enim ipsi; ex vi suę processiois, ratio naturę diuinę; ergo Spiritus sanctus procedit vt Deus.

Respond. negando antecedens; quia terminus formalis processiois Spiritus sancti, non est natura, sed amor, impulsus &c. neque procedit, vt subsistens in aliqua natura, ex vi suę processiois; licet identicę, seu secundum id, quod identicę affert, accipiat, quòd subsistat in natura diuina. Ad id verò quod dicitur, quòd communicatur ipsi, ex vi suę processiois, ratio entis diuini; Respond. cum distinctione, communicatur ipsi ratio entis diuini, prout ens diuinum dicit naturam diuinam, nego, prout dicit rationem entis inclusam in ratione amoris, & impulsus diuini, concedo.

Arguunt III. Spiritus sanctus procedit vt Deus spiratus: ergo ex vi suę processiois recipit naturam diuinam; quia procedit, vt Deus. Respond. distingo: antecedens, procedit vt Deus spiratus, taliter, vt ly, vt, reduplicet rationem formalem, vt per talem spirationem communicetur ipsi formalissimę diuinitas, nego si non reduplicat concedo. Ad id verò, quod dicitur in consequenti, quòd Spiritus sanctus recipit naturam diuinam, respond. verum esse, quod recipiat naturam diuinam per processionem, id est ratione identificationis suę processiois, seu spirationis cum diuina essentia; sed non recipit naturam diuinam ex vi suę lineę.

Replicabis, Spiritus sanctus non habet naturam diuinam formalissimę ex vi suę processiois; ergo est solùm identicę, & non formalissimę Deus. Resp. conced. antecedens, & distingo consequens, non est for-

malissimè Deus in esse entis nego, in esse procedentis, ut Spiritus, ut amor concedo. Vel si vis poteris absolute negare consequentiam; nam licet Spiritus sanctus non habeat Deitatem ex vi sue processionis formaliter, sed identicè; est tamen formalissimè Deus; quia habet naturam diuinam, quæ est formalissima ratio Deitatis. Neque ex hoc; quod Spiritui sancto communicetur identicè natura diuina, sequitur, quod sit identicè Filius: vel quod eius processio sit identicè generatio; quia ad hoc requireretur, ut processio Spiritus sancti identificaretur cum aliqua formali generatione ipsius, quod non contingit. Vnde

Est notandum, quod est propositio vera, quod Spiritus sanctus habet eandem naturam, quam habet Filius identicè; sed ex hoc semper falsum inferit, qui dicit; ergo Spiritus sanctus est identicè Filius; quia ut persona sit Filius, non sufficit, quod sit Deus; aliàs Deus Pater esset Filius, sed requiritur quod sit similis principio ex vi, & modo processionis. Sicut malè inferunt aliqui, quod amor diuinus producit terminum similem naturæ diuinæ, & consequenter Filium: ex illo principio, quod omne simile producit sibi simile; quia hoc est verum, quando agens agit per actionem communicatiuam substantiæ generantis; & cum actio communicatiua naturæ in Deo sit intellectio, quæ est assimilatiua, non autem amor, qui est tantum impulsuus; sequitur quod amor diuinus non producit terminum similem naturæ diuinæ, & consequenter neque Filium.

Arguunt IV. Amor, qui est proprietas Spiritus sancti communicatur ipsi ex vi sue processionis; ergo etiam, & natura communicatur ipsi ex vi sue processionis. Respond. negando consequentiam; quia amor, & natura pertinent ad diuersas lineas; esset solum verum argumentum, si proprietas, & natura pertinerent ad eandem lineam.

Colliges I. ex his, Non malè aliquos ponere disparitatem aliquam inter productiones creatas, & diuinas consistentem in hoc, quod productiones creatæ primario ordinentur ad naturam, utpotè quæ multiplicatur; at verò productiones diuinæ ordinantur ad personalitates: & sic per hos, similitudo præcisè in natura non constituit generationem diuinam, sed in personalitate. Vnde per hos definitur generatio diuina hoc modo: *Est origo viuantis à viuente Patre principio coniuncto, vel potius identificato in similitudinem personalitatis*. Vnde quia Spiritus sanctus non est similis in natura Patri secundum entitatem personalem paternalem, sed ut natura constituta est in esse personali, sicut est Filius; eius processio non est generatio, sed sola processio Filij.

Colliges II. Cum generatio debeat ex supra dictis terminari ad simile, est semper maior ratio dicendi, secundam personam, seu Verbum esse genitum, non autem Spiritum sanctum; nam cum ratione propriæ personalitatis sit Verbum, est per consequens expressio, & similitudo sui principij; communicatur enim Verbo natura, ut specialiter appropriata per-

personæ producenti, quæ est vna ex conditionibus ad communicationem factam modo assimilatio. Spiritus sanctus autem ratione propriæ personalitatis est tantum pondus, & inclinatio in principium; ut satis constet ex dictis: ideo non habet rationem generationis.

In processuum diuinarum prodigijs, & prodigiorum splendoribus stupet ratio, silet ingenium, Quomodo processiones istæ sint ex aliquo principio; non tamen ex subiecto: Quod insunt in principio, absque eo quod informet: Vniantur, & non faciant compositionem: Habeatur pluralitas sine diuisione: Sit vnititas sine solitudine: In idemitate naturæ habeatur societas personarum: Quomodo profuant Deo volente, sine libertate: Semper manabunt, absque eo, quod sint futuræ: Semper manarunt, absque eo, quod sint præteritæ: Semper manant, absque eo quod reproducantur: oportet ergo cum D.P.N. August. cap. 31. *soli loqui*: confiteri: *Trinitas tua, soli tibi nota est.*

De Relationibus diuinis.

Virum dentur in Deo relationes reales, & quid importent?

EST extra cōtrouersiam inter Catholicos esse in Deo veras, & reales relationes, tam in esse *Ad*, quàm in esse *In*; quia, & realiter respiciunt terminum, & realiter sunt in Deo ipsæ identificatæ: Insuper Concilium Florentinum sess. 18. ait: *Sola relatio personarum multiplicat; sed personæ, ut constat realiter multiplicantur; ergo per relationes reales.* Hoc idem ostendit D. Thom. art. 1. huius quæst. in argum. sed contra, dicens: *Pater non dicitur nisi à paternitate, & Filius à filiatione; si igitur paternitas, & filiatione non sunt in Deo realiter, sequitur, quod Deus non sit realiter Pater, aut Filius, sed secundum rationem intelligentiæ tantum, quod est hæresis Sabelliana.* Probat denique ratione idem Angelicus Præceptor hanc veritatem; Cum enim in Deo sit numerus trium personarum, debet esse aliqua distinctio; cum numerus sequatur aliquam distinctionem; sed hæc distinctio non potest esse ratione alicuius absoluti; quia non daretur in diuinis personis æqualitas; nam aliquid absolutum esset in vna persona, quod non esset in alia; ergo debet esse, & desumi à relationibus.

Dices I. Admissis relationibus diuinis admitteretur in Deo aliqua imperfectio, nempe aliqua dependentia; cum enim relatio non possit esse, nec concipi sine termino, hinc est quod dependet ab ipso. Respond. negando sequelam; ex hoc autem, quod relatio diuina nequeat esse sine termino, solum inferitur necessaria connexio; non autem dependentia; de reliquo cum relatio diuina habeat idem esse cū essentia; sequitur quod eo ipso, quod diuina essentia habet esse independens, ita; & diuina relatio; Imperfectiones autem, quæ communiter tribuuntur relationibus,

nempe quoddam ens debilius, quoddam indigeant fundamento, & termino &c. sunt propriæ relationis creatæ non increatæ.

Dices II. Si inter Patrem generantem, & Filium, ut est genitus daretur relatio realis, deberet etiam dari inter Patrem cognoscentem, & Filium, ut est obiectum cognitum; cum utrobique sit par ratio; non admittitur inter Patrem cognoscentem &c. ergo neque inter Patrem generantem, & Filium, ut est genitus. *Respond.* negando sequelam, disparitas est; quia Pater, ut generans terminatur ad Filium, ut genitum, in quo à Patre distinguitur; nam relatio in diuinis, ut sit realis, debet terminari ad terminum, pro ut distinctus est à relato: cognitio autem Patris non terminatur ad Filium, ut est res distincta à se, sed pro ut est cognoscibilis, in quo non est distinctus à Patre; cum etiam ipse Pater sit cognoscibilis.

Dices III. Essentia diuina præcisè relationibus, intellectus solum attribuitur est perfectissima; ergo relationes sunt superflue: *Respond.* quid sit de antecedente, negamus consequentiam; haberet enim aliquam vim argumentum in apparentia, si relationes superadderent diuinæ essentiae perfectionem, quod non faciunt; nam ut infra videbitur, non important relationes diuinæ specialem perfectionem relatiuam ab absoluta distinctam, eique superadditam.

Secunda conclusio. Puto probabilius relationem in diuinis non importare aliquid reale, per quod extrema realiter distinguantur; sed solum coexistentiam terminorum; fusè enim docui in logicis in tract. de relationibus, incredibilem omnino esse inter duas albedines v.g. dari relationes aliquas realiter, aut modaliter distinctas; cum nihil aliud prorsus importent, nisi existentiam vtriusque albedinis. Neque per hoc sequeretur tolli prædicamentum relationis, ut aliqui obijciunt; tollerentur enim solum relationes distinctæ, non prædicamentum relationis.

Solet hic controuerti, quomodo relationes diuinæ distinguantur ab essentia? an scilicet realiter, ut putauit Gilbertus Porretanus, vel formaliter, vel virtualiter? sed de hoc satis dictum est agendo de visione beata.

Utrum relationes sint de conceptu essentia, & an sint tantum quatuor?

Prima conclusio. Si essentia diuina sumitur sub conceptu naturæ, relationes non sunt de conceptu ipsius, nec proprietates, nec operationes; quia conceptus naturæ supponitur ad conceptum proprietatum, relationum &c. si verò essentia sumitur, pro ut est ens increatum, & actus purus, non solum essentia est de conceptu relationum, sed etiam relationes sunt de conceptu essentia; quia relationes sunt essentialiter entia increata, actus purus &c. Qui docent ex Thomistis essentiam diuinam

uinam esse de conceptu relationum, non verò relationes de conceptu essentia: loquuntur de relationibus, pro vt dicunt oppositionem relatiuam: & sic defendunt, quòd ex qua parte nulla adest oppositio relatiua; transcendit diuina essentia quamcumque formalitatem in Deo; & cum inter ipsam essentiam diuinam, & relationes in suis formalibus conceptibus nulla importetur oppositio relatiua; essentia diuina erit de intrinseco conceptu relationum: ex oppositione autem relatiua, quæ versatur inter relationes, & quæ reddit illas immediatè incommunicabiles, oritur in eorundem sententia intrascendibilitas in essentia: & sic dicunt, relationes non esse de conceptu essentia: quæ omnia, cum nihil prorsus efficiant nostræ conclusioni, existimo posse defendi.

Arguunt tamen aliqui I. Si essentia diuina esset de conceptu relationum, idem esset formalissimus, & quidditatiuus conceptus essentia, ac esset relationum; ergo cum essentia diuina sit communicabilis, etiam relatio esset communicabilis. *Respond.* concedendo antecedens; in sensu iam explicato, & nego consequentiam, quo ad secundam partem; quia communicabilitas cum habeat rationem boni, & bonum sit ex integra causa; ideo exigit integram causam, quæ in presenti deficit; nam relationes secundum propriam rationem *Ad*, seruant incommunicabilitatem, & sic communicabilitas essentia imbibita in relationibus, non reddit illas simpliciter communicabiles.

— Replicabis, Communicabilitas essentia imbibita in relationibus, non reddit ipsas simpliciter communicabiles, & sic essentia est de conceptu relationum, vt dictum est, secundum hanc vltimam sententiam; ergo neque incommunicabilitas relationum imbibita in conceptu essentia reddet essentiam incommunicabilem, & consequenter erunt relationes, etiam de conceptu essentia. *Respond.* negando consequentiam; quia, si incommunicabilitas relationum imbibetur in essentia, semper redderet illam incommunicabilem; cum enim incommunicabilitas sit veluti sapiens rationem mali, oritur ex quocumque defectu; communicabilitas autem essentia imbibita in relationibus non reddit relationes communicabiles, propter rationem superius dictam.

Arguunt II, Ex Concil. Lateranensi *cap. damnamus*, & Florentino habetur, Patrem communicasse Filio totam essentiam; non verò hoc, quod est esse Patrem; ergo paternitas, quæ est relatio non est de conceptu essentia diuinæ. In illo enim priori in quo intelligitur Pater constitutus, & potens generare; intelligitur tota essentia; & tamen non intelliguntur omnes relationes; ergo signum est relationes non esse de intrinseco conceptu essentia, etiam si consideretur essentia sub conceptu actus puri. *Respond.* I. ad autoritatem Conciliorum, ipsam non esse contra nostram sententiam; verum enim est, quòd communicatur Filio tota essentia, sed non totaliter; quia communicatur sub conceptu absoluto, & sub præcisa ratione nature; non verò sub conceptu relatiuo, & sub omni modo

modo incluso in ipsa essentia. Eodem modo respondendum est ad illud, quod subiungitur; in illo enim priori signo intelligitur tota, & integra essentia; sed non totaliter; quia non explicatur pro illo signo omne modificarium, & terminativum pertinens ad adæquatam terminationem ipsius.

Arguunt III. Si relationes essent de conceptu essentiae consideratæ sub ratione actus puri &c. non posset essentia divina in illo priori signo præscindere à relationibus; & sic quando intelligitur Pater constitutus, & potens generare, deberet intelligi tota essentia, & totaliter; quoties enim aliquid est de conceptu alterius non potest vnum præscindere ab alio. Respond. disting. sequelam, si essentia divina perfecta, & adæquato modo concipitur concedo, si verò inadæquato, & imperfecto nego; & hoc modo respondendum est ad probationem: idest quoties aliquid est de conceptu alterius, non potest vnum præscindere ab alio; si adæquato, & perfecto modo concipitur concedo; si inadæquato, & imperfecto nego.

Circa secundum punctum quæsitum; Dico esse veritatem catholicam, relationes divinas esse tantum quatuor. Loquimur autem non de relationibus habentibus terminos extra, ut est relatio Creatoris, Domini, &c. sed de relationibus in Deo existentibus, etiam quo ad ipsarum terminos; hæc autem sunt Paternitas, Filiatio, Spiratio activa, & Spiratio passiva; & sic quælibet processio duas dicit relationes, una in procedente; alia in eo à quo procedit, idest principii producentis ad terminum productum; & alia termini producti ad suum principium; & sic prima, est Paternitas, quæ est in principio generante, secunda, Filiatio, quæ est in termino genito, tertia, est Spiratio activa, quæ est in principio spirante, & quarta, est Spiratio passiva, quæ est in termino spirato, Nota, quod sunt quatuor relationes, non autem quatuor personæ; quia Spiratio activa identificatur cum Paternitate, & Filiatione; & ob eandem rationem, non sunt quatuor res, sed tres res, nempe tres relationes reales; scilicet Paternitas, Filiatio, & Spiratio passiva. Spiratio autem activa fundat relationem virtualiter solum distinctam à Paternitate, quæ respicit Filium, & Spiratio activa respicit Spiritum sanctum; & quia Paternitas, & Spiratio activa nullam inter se dicunt oppositionem; ideo non sunt relationes realiter distinctæ; quia in divinis, ubi non datur oppositio, non est multiplicatio: unde hæc propositio *Paternitas est spiratio*, si facit sensum identicum est vera; si vero facit sensum formalem, nempe ad aliud est falsa; quia sensus esset, Paternitas, prout est ad Filium est spiratio: Spiratio igitur activa, nec à Paternitate, nec à Filiatione distinguitur: unde in quatuor relationibus non est quaternitas, quæ damnata est in Concilio Lateranensi sub Innocentio III.

Dices, Vniuersalia multiplicantur ad multiplicationem inferiorum; ergo si sunt quatuor relationes, erunt quatuor entia. Respond. distinguan-

recedens, multiplicantur superiora, & inferiora eodem modo concedo, diuerso modo nego, & cum relationes non sint quatuor sub omni consideratione absolute, & simpliciter; ita non erunt quatuor entia in diuinis sub omni consideratione absolute, & simpliciter, sed tantum secundum quid: multiplicata igitur inferiori secundum eam, rationem quæ est inferius directe respectu superioris, debet etiam multiplicari superioris, seu quod est vniuersale: sicut multiplicatur homine multiplicatur animal; quando autem inferius non multiplicatur secundum eam rationem secundum quam continetur directe sub superiori, seu vniuersali; sed secundum connotata extrinseca, ut in præsentia accidit; non est verum, deberi vniuersalia multiplicari ad multiplicationem inferiorum. Et sic Spiratio, & Paternitas non sunt duæ relationes reales: potest solum dici, quod multiplicentur realiter actualiter, quo ad connotata, siue terminos per se inspectos; quatenus termini ab ipsis inspecti sunt realiter actualiter inter se distincti: vnde dictæ relationes dicuntur duæ; tñ quia sunt duæ virtualiter; tum quia respiciunt duos terminos realiter actualiter distinctos.

Nota I. Quod est proprium relationum distinguí quo ad rationem, Ad, per ordinem ad terminos; quo ad verò rationem, In, distinguuntur per ordinem ad subiecta: & sic distinctio realis terminorum quodammodo refunditur in relationes. II. Relationes creatæ, possunt ad inuicem distinguí sine oppositione ab inuicem, ratione limitationis; in diuinis autem non possunt relationes realiter distinguí, nisi solum ratione oppositionis.

Vtrum Relationes diuinae secundum esse, Ad, exprimant specialem perfectionem ab absoluta distinctam?

Sensus præsentis quæstionis est: vtrum relationes diuinæ vltra perfectionem diuinæ essentiae, quam imbibunt, quæ est absoluta, exprimant secundum esse, Ad, seu ex vi propriarum linearum aliam perfectionem relatiuam. Loquendo igitur de relationibus diuinis formalissimè sumptis secundum id, quod exprimunt ex vi propriæ differentiae reductivæ sumptæ, puto probabilius, dicendum, non importare relationes diuinas specialem perfectionem relatiuam ab absoluta distinctam, eique superadditam. Quidquid sentiant in contrarium alij. Hæc sententia est D. P. Augustini, & D. Thomæ, & sequuntur plures ex discipulis eiusdem. Aut enim S. P. August. lib. 7. de Trinit. cap. 1. & 6. Bonitatem, & magnitudinem perfectionis in diuinis, non relatiuè, sed ad se dici.

Probatur conclusio hac ratione, Relationes diuinæ in suo formalissimo conceptu non addunt bonitatem ad essentiam, sed infinita solum essentiae bonitate gaudent; ergo nec etiam addunt perfectionem distinctam

etiam ab essentia; sed gaudent eadem essentię perfectione. Consequenter patet; quia bonum, & perfectum conuertuntur; ut docet D. Thomas *quest. 5. artic. 3.* antecedens probatur, si relationes diuinę in suo formalissimo conceptu, seu secundum esse, *Ad*, adderent bonitatem ad essentiam, illę possent dici non solum adiectiuę, sed etiam substantiuę; quia significatum tum materiale, quàm formale huius nominis, *bonus*, multiplicaretur; sed tres personę diuinę, non possunt dici tres boni, sicut nec tres magni, substantiuę, ut docet D. P. August. 5. *de Trinitate cap. 8.* his verbis: *Magnus Pater, magnus Filius, magnus Spiritus sanctus; non tamen tres magni, sed unus est magnus: & bonus Pater, bonus Filius, bonus Spiritus sanctus; non tamen tres boni, sed unus est bonus.* Ergo si relationes diuinę non addunt bonitatem ad essentiam, neque addent perfectionem; gaudebant ergo eadem essentię perfectione.

Tota igitur perfectio, quę in mysterio Trinitatis relucet, se tenet ex parte naturę diuinę, quę summę, & infiniter perficit diuinās personas; non verò ex parte relationum, qui sunt puri respectus ad terminum, & puri termini diuinę secunditatis, & naturę, qui nullam addunt perfectionem, sed tantum dant illi subsistere incommunicabiliter, quòd nulla perfectio est; in hoc enim, quod est non posse alteri communicari nulla relucet perfectio; & si aliquam perfectionem dicunt, solum illam arguitiue demonstrant; infinitatem scilicet, & secunditatem: & sic colligitur arguitiue, & à posteriori Deum infinita perfectione cariturum, si per impossibile Paternitate, & Filiatione careret.

Impugnant aliqui hanc conclusionem, dicentes, Perfectum secundum Aristotelem est cui nihil deest in proprio genere; quam definitionem, admittit D. Thomas *quest. 4. art. 1.* ergo perfectio in integritate consistit; sed paternitas v. g. est integra integritate relatiua; ergo est perfecta perfectione relatiua. *Respond.* distinguendo antecedens, perfectum est cui nihil deest in proprio genere, dicente perfectionem concedo, in quocunque genere nego; sic enim est intelligenda, & explicanda definitio Aristotelis, & sic à D. Tho: explicatur ibidem; ait enim, Perfectum esse, cui nihil deest secundum modum suę perfectionis.

Impugnant II. Relationes addunt essentię entitatem virtualiter distinctam, ergo etiam addunt perfectionem virtualiter distinctam; cum bonitas, & perfectio sequantur ad entitatem. *Respond.* antecedens à pluribus negari, qui existimant, quòd licet diuinę relationes gaudeant realitate distincta virtualiter à realitate essentię; non tamē entitate: unde docet tres relationes posse quidem dici tres res nō tamen tres entitates; sed quidquid sit de antecedente, negatur consequentia: ad id quod dicitur; bonitas, & perfectio sequuntur rationem entis, ut in actu existentem, conceditur, sub præcisa ratione entitatis, negatur. Mathematica enim prout substant abstractione à materia singulari, ut singulari, sunt vera entia realia; & tamen quia abstrahunt ab ordine ad existentiam, prout sic,

non

non sunt bona. Cum igitur diuina relatio nequeat esse in actu, neque existens, nisi quatenus imbibit essentiam diuinam per modum transcendentis, sequitur quod non sit conuertibilis cum bono, seu perfecto, nisi ut imbibit eandem essentiam.

Replicabis, Sufficit ad hoc, ut res absoluta dicatur bona, quod connotet existentiam, licet non actu existat; sed hoc idem faciunt diuinæ relationes; ergo &c. *Respond.* esse discrimen inter res absolutas, & relatiuas; quia res absoluta habet aliquid per quod connotet existentiam, scilicet propriam entitatem; relatio autem formalissime non connotat existentiam, sed terminum.

Impugnant III. Diuina relatio est in sua ratione formali integra; nam dicit veram realitatem relatiuam habentem vim ad referendum unam personam ad aliam; sed bonitas, & perfectio nihil aliud est, quam integritas in sua ratione formali; ergo &c. *Resp.* concedendo maiorem, & distinguo minorem, bonitas, & perfectio est quælibet integritas in sua ratione formali nego, talis integritas, quæ sit ad se, seu quæ respiciat subiectum, non terminum; ut accidit in casu nostro, concedo.

Impugnant IV. Si diuinæ relationes, seu personalitates secundum se formalissimum conceptum, seu esse, *Ad*, non dicerent perfectionem, nec Trinitatis mysterium, quod coalescit ex ipsis personalitatibus diceret perfectionem; sed hoc est absurdum, quia si Trinitatis mysterium, seu diuinæ personalitates non dicerent perfectionem, neque diceret perfectionem diuina essentia; quod sit illis communicabilis; ergo sicuti est absurdum dicere, quod non sit perfectio diuinæ essentia, quod sit illis communicabilis; ita etiam, quod Trinitatis mysterium non dicat perfectionem. *Respond.* ad soluendam hanc difficultatem, & plures alias similes, quæ in hac controuersia occurrunt; oportet prænotare, quod mysterium Trinitatis potest considerari præcisè secundum rationem, *Ad*, & etiam secundum rationem, *Ad*, pro ut imbibit diuinam essentiam per modum transcendentis. Unde concedimus mysterium Trinitatis nullam dicere perfectionem, consideratum præcisè secundum rationem, *Ad*; non autem consideratum prout ratio, *Ad*; imbibit essentiam diuinam per modum transcendentis. Et sic patet responsio ad sequelam adductam, ab Aduersarijs; ad probationem autem dicimus, quod quamuis sic maxima perfectio diuinæ essentia, quod communicet mysterio Trinitatis, seu diuinis personalitatibus se, & suam perfectionem; hoc autem ex vi suæ lineæ non affert perfectionem.

Colliges I. Ex his, malè aliquos arguere, relationes diuinas dicere, secundum suum formalem conceptum perfectionem, per hoc præcisè, quod quælibet sit infinita in sua propria ratione; quando enim ratio terminandi est relatiua, infinitas præcisè in ratione referendi, & terminandi non dicit perfectionem. II. Neque potest inferri perfectio, ex eo quia necessariò relationes amantur à Deo; nam ipsæ non amantur nisi

ratione diuinæ essentiae inclusæ : sicut personalitas Verbi diuini, seu relatio Filiationis sanctificat humanitatem, seu naturam humanam Christi Domini ratione diuinæ essentiae, quam continet per modum transcendens ; non autem secundum conceptum, *Ad*, & sub eodem conceptu reddit ipsam impeceabilem, sanctam, bonam, &c. & consequenter sub eodem conceptu ; prout scilicet transcendenter continet diuinam essentiam, reddit ipsam perfectam.

Neque valet dicere, quod si dignitas, bonitas, valor moralis, & perfectio tribueretur à diuina essentia, essent communes tribus personis, & non propriæ personalitatis Verbi. quia hæc non tribuuntur diuinæ essentiae, ut est communis ; sed prout diuina essentia est appropriata Filio, seu prout imbibitur in Filiatione : vnde non sequitur quod valor &c. quo personalitas Verbi dignificat actiones Christi Domini sit communis tribus personis.

Replicabis, Relationes diuinæ per nos in suo formalissimo conceptu non afferunt perfectionem ; ergo afferunt imperfectionem ; nam sicut est perfectio asserre perfectionem, ita non asserre erit imperfectio. Respond. valeret argumentum, si asserre, & non asserre ex se perfectionem opponerentur priuatiue ; sed quia opponuntur contradictorie, non valet : oppositio priuatiua inuenitur inter perfectum, & imperfectum ; non autem inter perfectionem, & non perfectionem. Relationes igitur diuinæ neque dicunt secundum suum formalem conceptum perfectionem, neque imperfectionem ; sed præscindunt ab utraque : sicuti etiam secundum eundem conceptum præscindunt à ratione conuenientiæ, seu consonantiæ cum persona, quam constituunt ; licet ratione inclusi, seu essentiae eam afferant, secundum quam rationem concurrunt ad constituendam personam.

Nota I: Quod si vnica daretur in Deo personalitas, tunc personalitas, vel esset ipsissima Dei essentia, sine distinctione virtuali, vel saltem tunc personalitas adderet aliquid absolutum ad essentiam, & consequenter perfectionem, ratione ab illa distinctam ; modo verò nihil addit absolutum, sed purum respectum ad terminum correlatiuum : & ideo non addit perfectionem ; quia perfectio in sola ratione absoluti consistit. II. Testimonia Concilij Constantinopolit. Primi, Sextæ synodis, & D. Tho. in contrarium, solum intelligunt, diuinas relationes dicere perfectionem ratione diuinæ essentiae inclusæ ; non autem secundum proprium conceptum formalem, seu rationem, *Ad*.

Remanet hlo solum aliquid dicendum circa existentiam, & substantiam relationum : & circa primum, puto probabilius dicendum, quod neque multiplicantur existentie relationum, sed vna tantum datur : & sic per eandem existentiam absolutam, per quam diuina essentia existit, existit etiam quælibet relatio ; quia existentia relationis non est relatiua, sed est ad se, vel ad subiectum ; quia relationes non habent existentiam per

ordinem ad terminum; sed per ordinem ad subiectum. Et licet relationes creatæ habeant existentiam propriam distinctam ab existentia subiecti, & fundamenti; non verò relationes diuinæ; quia relatio creatæ est limitata, & ratione limitationis non potest esse fundamentum, & subiecto identificari, sed debet facere cum eo compositionem accidentalem. Circa veritatem, infinitatem, sanctitatem &c. idem dicendum est, ac de existentia; Hoc idem extendimus ad durationem, & vocationem relationum; videtur enim probabilius ponendas esse non tres, sed vnam, quæ omnes relationes durent.

Loquendo autem de subsistentia; si hæc sumitur per terminum ultimo incommunicabili: id est si nomine, *subsistentia*, intelligitur *personalitas*; multiplicatur ad multiplicationem relationum; & sic in diuinis dantur tres subsistentiæ relatiuæ, & incommunicabiles: constat ex SS. PP. & Concilijs, qui vnanimiter asserunt tres esse subsistentias relatiuas in diuinis. In sexta enim Synodo Generali. *Actione 11.* habetur: *Sanctissima Trinitas numerabilis facta est personalibus subsistentijs.* Et in Concilio Generali Nicæno I. & II. in primo enim dicitur: *Vna est diuinitas Sanctæ Trinitatis, quæ in tribus subsistentijs perfectis, & aequalibus consideratur.*

Nora I. Quod si D. Tho. *quæst. 8. de potentia artic. 3. ad 7.* ait, *Relatio in quantum est relatio non habet, quod subsistat, vel subsistere faciat; hoc enim solius substantiæ est.* Vult S. Doctor, quod relationes habent à diuina essentia ratione identificationis vim constitutiuam radicaliter; id est constituere radicaliter; ex vi autem sua habent vim constituendi formaliter hypostasim. II. Non valet, diuinæ relationes existunt per vnicam existentiam absolutam diuinæ essentiae; ergo etiam debent subsistere per vnicam subsistentiam absolutam diuinæ essentiae. Quia multiplicatio existentiae derogat diuinæ simplicitati, & vnitati; non autem multiplicatio subsistentiæ; & sic requiritur ad multiplicationem personarum multiplicatio subsistentiæ; cum sit forma constitutiva, & distinctiua earum. III. Subsistere relatiuè præcisè non dicit ex vi sua perfectionem; sed solum subsistere absolute, seu in ordine ad se, prout scilicet per modum emanantis includit diuinam essentiam dicit ex vi sua perfectionem.

Petes, Vtrum diuinæ personæ subsistant etiam per subsistentiam absolutam, quæ eadem numero singulis personis communicetur, sicut communicatur natura? Respond. quod si subsistentia sumitur pro eodem, ac existentia per se independentem ab omni subiecto; subsistentia non multiplicatur, sed est communis: & sic diuina natura habet propriam subsistentiam absolutam, quam diuinis personis communicat: vnde diuinæ personæ præter subsistentias relatiuas habent etiam subsistentiam absolutam. Ratio est, quia diuina natura, vt præter relationes, habet quod sit per se, & quod possit existere, & operari, vt quod, & vt repugnet esse in alio tamquam in subiecto alieno; non tamen in proprio: ergo diuina natura habet vnicam tantum subsistentiam absolutam, quam diuinis personis

sonis communicat; multiplicabilitas enim, vel immultiplicabilitas attenditur solum penes multiplicationem ipsius esse, *ut quod*, & subsistere, *ut quod*: Essentia igitur diuina per tres subsistentias relatiuas redditur subsistens incommunicabiliter; per absolutam verò existens per se communicabiliter; hæc autem identificatur, *ut dixi*, & est communis cum tribus subsistentiis relatiuis.

Aduerte hic I. Quòd quando Concilia pro eodem reputant subsistentiam, & personam: loquuntur de subsistentia relatiua. II. Deus, *ut subsistens* per subsistentiam absolutam non est persona; quia subsistit communicabiliter; de ratione autem personæ est; quòd subsistat incommunicabiliter: vnde non valet dicere, in diuinis non dantur quatuor personæ; ergo neque quatuor subsistentiæ, tres scilicet relatiuæ, & vna absoluta. III. Diuina essentia est in se communicabiliter, & in personis incommunicabiliter; neque per hoc quòd sit in personis, dicitur esse in alio; cum sit ipsi personæ per identificationem.

De Personis Diuinis.

Vtrum ratio Persona inueniatur in diuinis?

EST veritas catholica, quòd conueniat propriè Deo hoc nomen *Persona*; rectè autem definitur Persona in Theologorum sententia, quòd sit, *Rationalis natura indiuidua substantia*. Ratio igitur personæ verè, & formaliter reperitur in Deo; hæc autem est rationalis, & intellectualis naturæ indiuidualis substantiæ incommunicabiliter existens in tribus suppositis. Constat ex illo D. Achanasij in symbolo: *Alia est enim Persona Patris, alia Filij, alia Spiritus sancti*. Tum quia attendendo ad rem significatam per nomen Persona; persona denotat id, quod est perfectissimum in tota natura, scilicet subsistens in rationali natura; ergo cum Deus debeat continere omnem excogitabilem perfectionem, cum sit omnium perfectionum pelagus; debet formaliter reperiri in Deo ratio personæ.

Personalitas in natura rationali addit subsistentiam, & supposititalitatem, & est prædicatum terminatiuum, non verò constitutiuum naturæ constitutæ; & hoc quòd addit, est aliquod positium, nempe modus, qui est subsistentia.

Nota hic, quòd definitur hoc loco Persona in abstracto, idest personalitas; quia Persona, quæ dicit personalitatem, & naturam simul non est naturæ, sed potius natura personæ; sicut non est homo pectoris, brachij &c. sed pectus, & brachium hominis; persona ergo est totum, natura verò est pars personæ: vnde rectè dici potest personalitas naturæ, vel natura personæ; non autem persona naturæ. II. Per ly, *rationalis*, intelli-

gi debet, intelligibilis, & intellectu pollentis. III. *Perindividua*, intelligitur incommunicabilis.

Dices, in Deo nulla est substantia incommunicabilis; ergo falsum est, quod in diuinis inueniatur ratio personæ. *Respond.* distinguendo antecedens, nulla est substantia absoluta incommunicabilis concedo, substantia relatiua nego; Persona igitur diuina tam in concreto, quam in abstracto est quid relatiuum, & significat primariò relationem; consequenter autem, & indirectè significat naturam, quatenus significat eam relationem, quæ reddit naturam incommunicabilem: & sic paternitas v. g. reddit naturam diuinam incommunicabilem, non vt est absoluta; nam hoc pacto natura semper remanet communicabilis, sed prout est personalis, scilicet patnalis.

Est igitur res certa inter catholicos, quod in diuinis dentur tres hypostascs, seu Personæ; ait enim D. Thomas *art. 3. huius question. ad 3. Nomen hypostasis est impositum ad significandum scilicet rem subsistentem*. Et quamuis PP. Græci, & ex Latinis D. Hieronymus dicebant hypostasim, idem esse ac essentia. Latini autem, hypostasim, nihil aliud voluit significare, nisi subsistentiam, seu personam. II. Neque debent admitti absolute in Deo tres substantiæ, sed cum addito nempe tres substantiæ relatiuæ; quia tunc substantia supponit pro hypostasi, seu subsistentia. III. In diuinis possunt concedi tres hypostascs, seu personæ, non tria indiuidua; cum in diuinis multiplicetur ratio essendi per se incommunicabiliter; non autem ratio naturæ, & essentiæ singularis. IV. Non est necessaria ad multiplicationem personæ, multiplicatio substantiæ; sed satis est multiplicatio incommunicabilitatis: vnde est falsum quod multiplicata ratione personæ debeat multiplicari substantia; non loquimur autem de substantia relatiua; nam hæc iam supra dictum est, quod multiplicetur; sed de substantia, pro vt idem est, ac natura.

Argues, Persona diuina non potest significare formaliter, & directè relationem, seu quid relatiuum; ergo falsa conclusio: antecedens probatur; nam si ex eo, quia significatum Patris est quid relatiuum, Pater dicitur Filij Pater, eodem modo persona Patris diuini posset dici persona Filij. *Respond.* negando antecedens, ad probationem dico, quod persona diuina non significat directè, & formaliter relatiuum sub munere expresso respiciendi correlatiuum, sed sub munere hypostasis, seu subsistentis incommunicabiliter: vnde non sequitur, quod Pater sub nomine Patris, seu quod persona Patris dici possit persona Filij.

Colliges ex his, quod rectè vimur in diuinis nomine pluralitatis ad significandam pluralitatem personarum; cum verè ibidem detur Trinitas personarum; cum iuxta symbolum S. Athanasij: *Et vnitas in Trinitate; & Trinitas in unitate veneranda sit*. Quando autem in Concilio Toletano XI. dicitur: *Nec rectè dici potest, vt in vno Deo sit Trinitas*. Loquitur de Deo, qua vnus, seu quatenus dicit essentiam.

De Diuinis Nominibus.

Quomodo sit utendum in diuinis Nominibus?

EST summa cautela procedendum in modo loquendi de hoc diuino, & ineffabili myſterio, ne ex verbis inordinatè prolatis incurratur hæreſis. Aduertè igitur I. Quòd in diuinis admitti debent tres Perſonæ, non tres Dij: quia eadem diuinitas eſt in tribus Perſonis; non tamen eadem perſonalitas: & ſic dicitur vnus Deus, & tres Perſonæ, non tres Dij; ratio eſt, quia modus ſignificandi nominis ſubſtantiui eſt per modum ſubſtantiæ, quæ multiplicatur ad multiplicationem formæ; & cum forma, nempe Deitas ſit vna, ſic dicitur vnus Deus: ſicuti modus ſignificandi nominis adiectiui eſt per modum accidentis, quod multiplicatur ad multiplicationem ſubiecti, & cum eadem perſonalitas non ſit in tribus ſubiectis, ſeu Perſonis, ſicuti eſt Deitas: ideo dicuntur tres Perſonæ; quia vnaqueque Perſona habet ſuam perſonalitatem. Secundo *Effentia generat, vel Effentia generatur*, ſunt propoſitiones falſæ; quia generare, & generari eſt proprium ſuppoſitorum; effentia autem non ſignificat ſuppoſitum, ſed formam abſtractam: ſicut eſt etiam abſolutè reiſcienda illa alia propoſitio, *Deus genuit alium Deum*; nam ſignificat abſolutè duos Deos; eſt autem vera ſi dicatur, *Deus genuit alium, qui eſt Deus*.

Tertiò, Hæc vox, *Alius*, non poteſt dici in neutra terminatione, v.g. Pater eſt aliud à Filio; quia hoc denotat diuerſitatem naturæ; poteſt tamen dici, eſt *Alius*; quia hoc ſignificat ſolum diuerſitatem in perſona. *Vnum* verò poteſt dici neutraliter; Pater, & Filius vnum ſunt; poteſt tamen dici masculinè, ſi adiungatur terminus reſtringens ad naturam, vt, Pater, & Filius ſunt vnus Deus. Quartiò *Alienus, Diuerſus, Extraneus* non poſſunt tribui perſonis; quia per illos indicatur diuerſitas naturæ, vel qualitatis &c. poſſunt dici masculinè, ſi adiungitur terminus reſtringens illos ad relationes: vt, Pater eſt diuerſus à Filio notionaliter, ſeu in relatione. Quintò *Triplex, Multiplex*, de effentia dici non poſſunt; de relationibus autem poſſunt: vt, in Deo eſt triplex relatio; quia hæc nomina ſemper denotant multitudinem ſui ſignificati: *Trinus*, verò poteſt dici abſolutè: vt, Deus eſt Trinus; quia licet dicat diſtinctionem, non dicit diuiſionem.

Sextò, Termini ſignificantes excluſionem, vt *ſolus, ſolitarius*, non poſſunt ſimpliciter affirmari in diuinis, dicendo, Deus eſt ſolus, Pater eſt ſolus: quia hæc prædicatio ſignificat ſolitudinem, & negationem plurium perſonarum; poteſt tamen iſte terminus uſurpari quando cadit ſupra actum notionalem: vt, ſolus Pater generat; ſecus autem ſi prædicatum eſt commune: vt, ſolus Pater ſpirat.

Nota hic I. Quòd est nimis fallax hæc argumentatio: Pater est essentia Dei; sed essentia est communicabilis Filio; ergo Pater est communicabilis Filio: committitur enim fallacia accidentis, quæ oritur ex mutatione appellationis; nam mutatur appellatio; quia in maiori fit appellatio formalis, in minori materialis: appellatio formalis est per D. Thomam, quando in diuinis sunt prædicata, quæ consequuntur proprias rationes essentiae, & relationis; quando autem prædicata quantum ad rem significatam non differunt ab essentia, & relatione, sed solum quoad modum significandi; appellant prædicata ista in significatione impropria supra materiale. Si igitur prædicata faciunt appellationem formalem; ita nimirum, vt conueniant essentiae ob suam rationem formalem; secundum quam distinguitur à ratione formali relationum; non possunt absque fallacia accidentis attribui relationibus; secus autem si faciunt appellationem purè materiale: vnde in exemplo posito committitur fallacia accidentis, vt de se patet: & videre etiam est in sequentibus, v. g. Deus generat, Filius est Deus, ergo Filius generat: vel, Deus est Pater, in diuinis, Filius est Deus; ergo Filius est Pater: vel, Essentia est communicabilis, Filius est essentia; ergo Filius est communicabilis: vel, Filius Dei est genitus, sed Filius Dei est essentia; ergo essentia est genita.

Nota II. Quòd quando in syllogismo sunt quatuor termini, si non actu saltem virtute, tunc syllogismus peccat in forma; vt esset si diceretur, Paternitas est hæc essentia, sed hæc essentia est Filiatio; ergo Paternitas est Filiatio: in quo syllogismo essentia, quæ est medium æquiualeat propter suam infinitatem pluribus terminis: Sunt aliqui qui distinguunt maiorem: Paternitas est hæc essentia; realiter formaliter concedo, virtute, & ratione nego: & concessa minori, negant consequentiam; quia, ad identitatem realem extremorum requiritur identitas eorum in medio; non tantum realis, sed etiam virtualis.

Petes hic, Vtrum possit mysterium Trinitatis rationibus naturalibus demonstrari? Respond. esse omninò certum, non posse mysterium SS. Trinitatis rationibus naturalibus demonstrari: non quia contra rationem; sic; sed quia supra rationem; est enim *Deus noster vincens scientiam nostram*: potest tamen eius fides congruentijs illustrari, & declarari, quinimò reddi potest euidenter credibile solutione obiectionum: de reliquo mysterium hoc est difficillimum, & occultissimum, ac supra caput omnis creaturæ; effectus autem supernaturalis, vt visio beatifica, potest hoc mysterium euidenter demonstrare, quo ad an sit. Non potest igitur Trinitas Personatum ab vilo homine naturaliter cognosci; inuisibilia enim Dei tantum per ea, quæ facta sunt intellecta conspiciuntur; sed ea quæ facta sunt non repræsentant Trinitatem, sed tantum Dei vnitatem; quia non fiunt à personis quatenus sunt multæ, & distinctæ; sed quatenus sunt vnum in essentia, & omnipotentia ad extra; ergo &c. Nota hic quod

quòd finis supernaturalis hominis est Deus, & Trinitas clarè cognita per visionem beatam; finis verò naturalis est Deus obscurè cognitus per scientiam abstractiuam.

De Notionibus diuinis.

Circa Notiones est sciendum, quòd Notio dicitur id quo vna persona dignoscitur ab alia: vnde definitur à D. Thom. hic art. 3. *Est ratio propria cognoscendi personam diuinam.* Notiones autem ponendas esse in diuinis est certum; nam Notiones sunt ipsæmet proprietates constituentes, & distinguentes personas; sed illæ non possunt non poni in diuinis; ergo &c. Relationes omnes sunt Notiones; quia per illas personæ inter se dignoscuntur. Hinc fit, vt quatuor dentur Notiones positivæ, nempe Paternitas, Filiatio, Spiratio actiua, & Spiratio passiva; nam diuinæ personæ cognoscuntur per relationes originis; illæ autè, vel sunt actiue, vel passivæ, si actiue hinc Paternitas, qua cognoscitur Pater principium Filij, & Spiratio actiua, qua cognoscitur Pater, & Filius principii Spiritus sancti; si sunt passivæ, Filiatio, & Spiratio passiva: Paternitas, & Spiratio actiua sunt duæ relationes; quia respiciunt diuersos terminos; vt visum est agendo de relationibus; non sunt autem duæ res; quia non dicunt oppositionem; Paternitas autem, Filiatio, & Spiratio passiva sunt inter se aequales distinctæ.

Præter has quatuor Notiones positivas, datur alia Notio negatiua, nempe Innascibilitas, quæ tribuitur Patri, & non solum dicit negationem, propriæ generationis, seu natiuitatis, sed negat omnem productionem. Nam per quatuor Notiones præcisè positivas, non adhuc cognoscitur Trinitas Personarum; posset enim quis cogitare Patrem in diuinis, sicut in creatis, habere principium; ergo admittenda est alia Notio negatiua, nempe, Innascibilitas, quæ importat de formali negationem processionis ab alio, connotando pro materiali, & pro fundamento positivo primam personam, vt existentem à se.

Dices I. Ideo Paternitas est Notio, quia pertinet ad rationem originis; sed etiam generatio pertinet ad rationem originis; ergo generatio erit Notio. *Respond.* distinguendo causalem maioris; quia pertinet ad rationem originis in facto esse, concedo, in fieri nego; sed generatio pertinet ad rationem originis in fieri, concedo, in facto esse, nego; cum enim Notio sit ratio dignoscendi personam, & persona significetur, vt forma, aut quasi forma in facto esse; Notio debet significari per modum formæ, & in facto esse: vnde addit Bannez *quest. 32. art. 3. ad 2.* quòd per generationem, vt spectatur in fieri, Pater non distinguitur præcisè à Filio, sed fundamentaliter, & radicaliter; contra verò de Notionibus.

Nota, quòd neque in Patre esse fontale principium Deitatis est ratio distincta à Deitate, neque in Filio ratio imaginis distinguitur à filiatio-

ne, neque in Spiritu sancto ratio amoris, aut doni à spiratione passiva: unde neque esse fontale principium Deitatis, neque ratio imaginis, neque ratio amoris, aut doni habebunt rationem Notionis.

Dices II. Innascibilitas est negatio; sed negatio non potest esse ratio dignoscendi; ergo non potest esse Notio. *Respond.* negando minorem; nam rem cognoscimus, tam sciendo quid sit, quàm sciendo quid non sit; sicuti cognoscitur à Philosophis materia: Innascibilitas igitur in recto dicit negationem pertinentem ad personam, & eam pro fundamento afferentem, idest dicit in recto aliquid negativum; connotando tamen Paternitatem: unde non est per modum puræ negationis; pro ut pura negatio non determinat sibi aliquod fundamentum speciale, sed est per modum negationis determinantis sibi prædictum fundamentum.

Replicabis, Innascibilitas, ut concessum est, est negatio, siue pura, siue non pura: sed negatio nullam dicit perfectionem; ergo non potest esse Notio; nam hæc dicit perfectionem. *Respond.* distinguendo minorem, negatio rei perfectæ nullam dicit perfectionem, concedo, rei imperfectæ nego; & quia produci in Patre esset imperfectio, ideo remotio productionis est perfectio. Et licet negatio productionis actiue in Spiritu sancto sit perfectio; cum in eo productio actiua sit imperfectio: non sequitur ex hoc, quod talis negatio debeat esse Notio, quia licet res ita se habeat à parte rei, non tamen secundum nostrum modum concipiendi, propter quem sunt adinuentæ Notiones.

Replicabis II. Hæc perfectio, seu dignitas Innascibilitatis, seu remotionis productionis non distinguitur à Notione Paternitatis; ergo Notio Innascibilitatis est superflua. *Respond.* distinguendo antecedens, non distinguitur à Notione Paternitatis materialiter sumpta, in esse rei concedo, formaliter sumpta, & pro ut connotat prædictam negationem, nego. Notio igitur Innascibilitatis importat duo, vñ de formali, aliud de materiali; de formali importat negationem simpliciter essendi à quouis alio principio personali ad intra; de materiali autem importat relationem Paternitatis, pro ut habet aseitatem personalem.

Vndè colliges, quod ad Notionem Innascibilitatis duotantum ad præsens videntur requiri, vnum, quod ducat speciali modo in notitiam personæ Patris, aliud quod denoret specialem dignitatem; utrumque autem præstat Innascibilitas, seu negatio essendi ab alio personaliter in Patre; nam via negationis ducimur in notitiam personæ per negationem illi propriam. Secundum etiam præstat; nam ut negatio afferat dignitatem sufficit, ut dictum est, ut de materiali illam afferat; & cum de materiali connotetur aseitas personalis, quæ magnam præferat dignitatem in persona; sequitur quod Innascibilitas habeat veram rationem, Notionis.

De Personis in particulari, & primò de persona Patris.

Persona Patris dicitur prima, non quia antecellit tempore, dignitate, aut perfectione cæteras personas: sed quia ipsa est à se, reliquæ verò duæ ab illa. Vocatur *Pater*, quia generat secundam, quæ dicitur *Verbum*, cuius processio cum sit generatio, ut supra diximus, sequitur, quòd persona à qua *Verbum* procedit necessariò sit genitor, & *Pater*. Appellatur autem prima persona, potius *Pater*, quàm *Genitor*, vel *Generans*, quia denominatio rei per D. Thom. *quest. 33. art. 2. ad 2.* maximè debet fieri à perfectione, & fine; generatio autem significat, ut in fieri; Paternitas verò complementum generationis; ergo potius *Pater*, quàm genitor, vel generans est nomen primæ personæ.

Ratio principij ad intra competit per se primò, & veluti fontaliter Patri, quatenus est duarum personarum productivus; Filio autem convenit respectu Spiritus sancti; si verò principium sumitur respectu ad creaturas, dicimus esse toti Trinitati commune; omnes enim tres personæ æqualiter ad extra producant. Filius autem non debet dici principiat; quia hoc significat subiectionem, vel minoritatem; *Pater* verò non est causa Filij, neque *Pater*, & *Filius* causa Spiritus sancti; ex eo quòd non producant essentiam: Nomen igitur *Pater*, & *Principium* simpliciter notionaliter, soli Patri convenit: & denique sumitur nomen *Patris*, & *Principij* essentialiter, & notionaliter simul.

Si nomen *Ingenitum*, seu *Ingenitus* accipiat simpliciter, & absolutè, convenit soli Patri; si verò accipiat secundum quid, pro negatione solius generationis passivæ, convenit Spiritui sancto, qui est ingenuus, seu non genitus, aut non Filius.

Dices, Filius esse non potest sine Patre, qui est principium Filij; ergo Filius dependet à Patre. *Respond.* negando consequentiam, quia ad hoc ut aliquid dependeat, debet esse indigens, & vacuum aliquo, quod per aliud recipit; Filius autem cum acceperit à Patre, non illud quo carebat, sed quod habebat; cum ab æternitate fuerit quidquid est: nullo unquam indiguit, aut caruit: & sic licet à Patre incæperit, aut potius totus existerit; nunquam tamen incæpit aliquid à Patre accipere.

Replicabis, Filius in creatis dependet in fieri à Patre; quia sine eo esse non potest; ergo etiam in divinis. *Respond.* negando consequentiam, disparitas est; quia filius in creatis libere producit à Patre, ideò ab ipso dependet; res autem diverso modo se habet in divinis.

De Persona Filij.

Secunda Persona Sanctissimæ Trinitatis vocatur Filius, Verbum, & Imago naturalis Patris; Filius, quia procedit per generationem à primæ Ver-

Verbum, quia est terminus productus per intellectionem; Imago naturalis Patris producta naturaliter ad repræsentandum Patrem ex vi processionalis intellectualis; vel quia est terminus productus à Patre per cognitionem sui; diuersa enim hæc nomina attribuuntur Filio ad exprimendam diuersitatem perfectionum diuinarum. Nomen *Verbi* est proprium Filij in diuinis; quia ut vult D. Thom. Verbum propriè, & personaliter dictum, est per emanationem intellectus; Filius autem in tantum est Filius, in quantum generatur, & emanat per intellectum.

Prima autem, & gravis difficultas, quæ in præsentī agitur à Theologis est: utrum Verbum diuinum procedat ex cognitione omnium, quæ sunt formaliter, & necessariò in Deo; id est utrum procedat ex cognitione diuinæ essentiae, & etiam omnium personarum. Nostra conclusio est, Verbum diuinum non solum procedit ex cognitione essentiae diuinæ, & attributorum, quod à nullo negatur; sed etiam ex cognitione omnium personarum, id est ex cognitione Patris, eiusdem Verbi, & etiam Spiritus sancti. Hæc est sententia S. P. August. Athanas. Basilij, & multorum SS. PP. nec non D. Thom. & omnium discipulorum eius: vnde sicut est communis omnibus Thomistis, & alijs quampluribus, ita & probatio. Quia Verbum diuinum procedit ex cognitione comprehensua, ut comprehensua Dei, seu adæquatè; sed hæc cognitio terminatur ad personas; quia cognitio comprehensua nihil aliud importat, nisi quòd intelligat in essentia, legat, & penetret attributa, & relationes, quæ in ea essentialiter includuntur; ergo &c.

Dices I. Verbum procedit ex cognitione comprehensua Dei secundum ea, quæ ei conueniunt in illo signo; sed ea quæ conueniunt in illo signo sunt diuina essentia, & ad summum attributa, non autem personæ; ergo &c. Nam licet intellectio paterna in eodem instanti reali æternitatis terminatur ad omnia, quæ sunt in Deo formaliter, & necessariò; non tamen pro omni signo rationis. Sed contra est, quia essentia diuina pro nullo priori cōprehendi potest nisi cognoscatur, ut secunda per intellectum, & voluntatem per modum actus; sed non potest hoc modo cōprehensiuè cognosci, nisi intelligantur termini talis secunditatis, scilicet personæ diuinæ; ergo &c. *Addo*, quòd sicut ordo originis non tollit quominus Verbum diuinum sit perfectissimum omnium excogitabilium; ita nec tollit quin procedat per cognitionem perfectissimam, quæ excogitari potest; id est comprehensiuam; ergo sicuti non tollit ordo originis, quin procedat ex cognitione comprehensua diuinæ essentiae, neque tollit, quòd in quocunque signo, in quo intelligitur diuina essentia, intelligantur personæ.

Colliges, Quòd ex eo quod Verbum diuinum procedat ex cognitione formaliter comprehensua, debere procedere formaliter ex cognitione Patris, & Filij, & Spiritus sancti, tamquam obiecti cogniti; ergo

non debet procedere ex cognitione Patris, & Filij, & Spiritus sancto ſolum concomitanter, vt purauit Vaſquez.

Dices II. Si per impoſſibile in productione non præcederet in intellectu Patris cognitio Spiritus ſancti, nec eſſet Spiritus ſanctus; adhuc daretur generatio, & proceſſio Verbi diuini; ergo &c. *Reſpond.* diſtinguendo antecedens, adhuc daretur generatio, & proceſſio Verbi, eodem modo, ac nunc nego, diuerſo modo; concedo; quamuis enim in illa hypotheſi, adhuc daretur proceſſio, & generatio Verbi; non autem Verbum procederet eodem modo, ac nunc; quia implicante Spiritu ſancto non communicaretur Verbo potentia ſpirationis; nam implicaret potentia ſpirationis, & ipſa relatio ſpirationis; & ſic non communicaretur Verbo: vnde Verbum non procederet eodem modo, ac nunc procedit. *Addo*, quòd cum in illo euentu Pater non habeat cognitionem Spiritus ſancti, nec illam communicaret Verbo.

Dices III. Spiritus ſanctus eſt poſterior productione Verbi; ergo quòd Verbum producit non eſt Spiritus ſanctus; ergo Verbum non procedit ex cognitione Spiritus ſancti. *Reſpond.* diſtinguendo antecedens, eſt poſterior poſterioritate in quo nego, & quo concedo. Vel dic, Quòd in eo priori cognoscitur Spiritus ſanctus, vt exiturus pro ſigno poſteriori; quia in rebus neceſſarijs bene poteſt cognitio eſſe prior ſuo obiecto.

Replicabis, Si Verbum procederet ex cognitione ſui, & Spiritus ſancti, ſequeretur, quòd Verbum eſſet principium ſui. *Reſpond.* negando ſequelam; quia non eſt neceſſarium, vt obiectum ſit principium, aut cauſa cognitionis ſui: & ſic nullo modo ſcienſia illa cauſatur à Verbo, & Spiritu ſancto, etiam ſi habeat Verbum, & Spiritum ſanctum pro obiecto: & ſic nec Verbum, nec Spiritus ſanctus eſſent principium ſui.

Dices IV. Si Verbum procederet ex cognitione ſui ipſius, hoc eſſet per cognitionem intuitiuam; nam cognitio abſtractiua in Deo, quæ eſt ſimplicis intelligentiæ, ſolum ad creaturas terminatur; cum hæc ſolum poſſint abſtrahere ab exiſtentia; tum ſic: Si Verbum procederet ex cognitione intuitiua ſui ipſius, ſequeretur quòd Filius ſupponeretur, & nõ ſupponeretur productus; ſupponeretur, quia cum attingatur per cognitionem intuitiuam in aliquo ſigno, debet eſſe exiſtens in illo ſigno, & conſequenter præſupponitur productus: ex alia parte non præſupponeretur productus; quia producit per illam cognitionem; ergo &c. *Reſpond.* concedendo Verbum procedere ex cognitione intuitiua; nego tamen ſequelam. Ratio eſt; quia quamuis Verbum ſit origine poſterius, quàm ipſa intellectio, & productio; non ſequitur quòd præſupponatur productum; quia hæc poſterioritas non eſt in quo, ſed à quo tantum; & ſic tum eſſentia, tum perſonæ omnes in eodem ſigno cognoscuntur. Ad cognitionem enim comprehenſiuam, (ſicuti debet eſſe Verbi productio) pertinet, vt terminetur ad omnia, quæ ſunt in eodem ſigno in quo: vnde licet

licet concedamus cognitionem diuinam prius prioritate à quo terminari ad essentiam diuinam; non autem prioritate in quo, etiam rationis cum fundamento in re.

Dices V. Pater prius habet cognitionem Verbi, quam Spiritus sancti; nam prius est Pater, quam Spirator: vnde Filius non accipit spirationem per processionem à Patre, sed resultat simul in Patre, & Filio cum producant Spiritum sanctum; ergo cognitio Spiritus sancti, & spirationis actiue non erit, prius in Patre, quam in Filio, & consequenter non poterit Verbum procedere ex cognitione Spiritus sancti. *Respond.* distinguendo antecedens, prius habet Pater cognitionem Verbi, quam Spiritus sancti, prioritate in quo concedo, prioritate à quo nego: Pater ergo habet prius prioritate solum in quo cognitionem Spiritus sancti; quam Verbum; non autem prioritate à quo.

Nota hic, Quod per hoc, quod Verbum procedat ex cognitione Spiritus sancti, non sequitur quod Verbum sit similiudo, imago, & proles ipsius Spiritus sancti: ad hoc enim requireretur, quod Spiritus sanctus, ut obiectum cognitum haberet rationem principij respectu Verbi: quam tamen non habet; nam vel haberet rationem principij à quo, vel in quo; non primam; quia hanc solum habet essentia diuina; neque secundam; quia hanc solum habet Pater æternus: est igitur Spiritus sanctus solum terminus illius cognitionis, ex qua Verbum procedit.

*Utrum Verbum procedat ex cognitione creaturarum
possibile?*

PRO solutione huius difficultatis, quæ de Secunda Persona Sanctissimæ Trinitatis solet controuerti, est notandum; sensum questionis non esse, utrum Verbum procedat ex creaturis possibiliibus, tamquam ex obiecto cognito, id est tamquam ex obiecto, quod sit formaliter innotium, & secundans per modum speciei; nam hoc modo, neque Verbum procedit ex cognitione creaturarum possibile, neque ex cognitione ipsius Verbi, neque Spiritus sancti: sed solum ex cognitione essentię diuinæ, ut distinctæ à personis, & creaturis; cum hæc sola sit obiectum formale secundans per modum speciei intellectum Patris. Neque inquirimus, utrum Verbum procedat per cognitionem creaturarum possibile, id est, utrum in signo generationis Verbi intercesserit saltem cōcomitanter cognitio possibile; nam hoc est certum, & à nemine potest negari; cum enim creaturæ possibile contineantur in scientia Patris; etiam debent esse expressę per Verbum adequatum Patri. Sed querimus utrum Verbum procedat ex vi cognitionis possibile, taliter ut cognitio possibile per se exigat, ut vi illius Verbum procedat. Hoc posito

Dico cum communi Thomistarum sententia, Verbum per se procedere,

dere ex cognitione omnium creaturarum possibilem; non tamen ex cognitione futurarum; vel existentium. Colligitur hæc conclusio quoad primam partem ex D. Thoma hic *quest. 34. artic. 1. ad 3.* ubi ait. *Pater intelligendo se, & Filiū, & Spiritum sanctum, & omnia alia, quæ in eius scientia continentur concipit Verbum;* ut sic tota Trinitas Verbo dicatur, & etiam omnis creatura. Probatur autem ratio. Quia Verbum per se procedit ex cognitione comprehensiva secundum ea, quæ per se, & necessario importantur à tali cognitione; cū ipsum Verbum per se exigit esse comprehensivum, & adæquatè expressivum totius cognoscibilitatis per se importatæ à Divina essentia: unde adæquat Verbum genitum, totam cognoscibilitatem Dei; aliàs si Verbum non esset comprehensivum Dei, nulla esset ratio cur non possint dari plura Verba genita; ergo debet procedere ex cognitione omnium creaturarum possibilem; cum cognitio comprehensiva Dei necessario feratur ad creaturas posibles; cum non possit cognosci omnipotentia quantum cognoscibilis est, nisi cognoscantur creaturæ posibles in eius virtute contentæ: omnipotentia enim Dei (sine cuius cognitione nequit virtus divinæ essentiæ perfectè cognosci) dicit vim productivam omnis possibili, quæ nequit perfectè penetrari, quin attingatur secundum omnes eminentias, secundum quas est vis productiva cuiusvis creaturæ possibili in particulari: Est igitur de ratione cognitionis comprehensivæ, quòd attingat, & penetret obiectum primum, & secundarium in primario necessario inclusum.

Ex eadem ratione benè etiam probatur secunda pars conclusionis: Verbum scilicet non procedere ex cognitione futurorum. Quia illud solum per se concurrat ad productionem Verbi, quod essentialiter requiritur, ut cognitio ex qua procedit sit comprehensiva; sed potest saluari in Deo cognitio comprehensiva absque eo quod essentialiter terminetur ad futura contingentia; quia ad hoc ut Deus se ipsum comprehendat sufficit, quòd perfectissimè penetret suam omnipotentiam, & in illa cognoscat quidquid per illam potest producere; non autem requiritur per se, quòd cognoscat futura; aliàs si Deus decrevisset nullam creaturam producere, non posset seipsum comprehendere, quod est absurdum; ergo non concurrat cognitio futurorum ad Verbi productionem: Cognitio igitur paterna non fertur necessario ad futura, sed tantum liberè, & veluti per accidens, ratione decreti statuentis futuritionem; cum potuisset statuere non futuritionem: Inde fit Verbum non representare, nisi concomitanter, & ex suppositione liberæ Dei voluntatis futura. Hoc idem extendimus ad futura conditionata, cum ea Deus non cognoscat, nisi per suum decretum liberum.

Argues I. Creaturæ posibles sunt obiectum secundariū divinæ cognitionis; ergo non potest Verbum procedere ex cognitione creaturarum possibilem. *Respond.* negando consequentiam; quia quòd creature posibles sint obiectum secundarium divinæ cognitionis, arguit tantum prioritatem

ritatem à quo inter cognoscibilitatem horum, & illius; ergo non arguit pro aliquo signo fuisse generationem Verbi sine cognitione illarum.

Argues II. Ad comprehensionem potentiz visuæ non est necesse, quòd cognoscantur visibilia in particulari; ergo ad hoc ut diuina cognitio sit comprehensua, neque erit necesse, ut cognoscantur creaturæ in particulari, sed solum in communi. *Resp.* negando consequentiam, disparitas est; quia nisi potentia visuæ determinetur per species particulares illas representantes, non est visuæ eorum in particulari; essentia autem diuina; & diuina omnipotentia continent creaturas in particulari, secundum omnes modos proprios vniuscuiusque, secundum quos, & ad inuicem, & à Deo peculiariter distinguuntur.

Argues III. Ex cognitione comprehensua non bene inferitur, Spiritum sanctum procedere ex amore creaturarum possibilem; ergo neque bene inferitur, Verbum procedere ex cognitione creaturarum possibilem. *Resp.* negando consequentiam, disparitas est, quia omnipotentia diuina, ut amabilis amore comprehensua, non connectitur cū creaturis possibilebus; quia in illo statu non sunt capaces terminandi amorem diuinum; ut comprehensa autem in ratione cognoscibilis eum illis connectitur. Vel dic, Verbum procedere ex cognitione creaturarum possibilem; non autem Spiritum sanctum ex amore earum; quia creaturæ possibile non habent bonitatem, qua amari possint; habent tamen veritatem, qua possint intelligi.

Argues IV. Maior est necessitas in essendo Verbi diuini, quàm creaturarum possibilem; cum cognitio non possit habere maiorem necessitatem quàm suum obiectum; ergo Verbum non potest per se procedere ex cognitione illarum; cum veritas, & processio Verbi nequeat per se necesse cū veritate, & cognitione possibilem. *Respond.* concedendo antecedens, maiorem scilicet esse necessitatem Verbi diuini, quàm creaturarum possibilem; negamus tamen consequentiam; ad illud autem quod additur, quòd nequeat eius veritas, & processio per se necesse cū illarum veritate, distingo, nexu illato, & causato à creaturis concedo, illato potius, & causato à Verbo, & cognitione terminata ad Verbum nego. Ad id, quòd licet necessitas in essendo Verbi diuini si maior, quàm creaturarum possibilem, cognitio autem secundum terminationem actiuam, ad dictas creaturas est tantæ necessitatis, quantæ est Verbum; licet, ut dixi, ipse terminus talis cognitionis sit minoris necessitatis: unde non sequitur, quòd Verbum per se non procedat ex illarum cognitione; habet enim necessariam connexionem essentia diuina cum creaturis possibilebus; & sic non potest attingi sine illis.

Replicabis, Si creaturæ possibile dicere necessariam connexionem cum essentia, seu cognitio Verbi esset necessariò connexa cum creaturis possibilebus, modo supra explicato, sequeretur, quòd si per impossibile deficeret creaturæ possibile, deficeret quoque ipsum Verbum; & sic si
per

per impossibile non essent creaturæ possibiles, sequeretur per locum intrinsecum, quod Verbum diuinum non esset processurum ex cognitione diuinæ essentiae. *Respond.* distinguendo sequelam, deficeret quoque ipsum Verbum, defectu orto à priori, ex deficientia creaturæ nego, orto à priori ex eo quod diuina virtus, & imitabilitas diuinarum idæarum prædeficeret, ex quibus deficientibus ostenderetur à posteriori defectus creaturarum secutus ad illarum defectum, concedo; aliqui verò ex Thomistis concedunt, quod si per impossibile creaturæ non essent possibiles, Verbum non procederet ex cognitione omnipotentiae, nec esset eiusdem rationis, ac modo est; nam Deus in illo casu non esset omnipotens. Sed hanc responsonem toruo supercilio aliqui ex Aduersarijs recipiunt, quinimo ipsam tamquam piarum aurium offensiuam iudicant; sed nescio quo fundamento; nam si creaturæ non essent possibiles, non esset Deus primum ens, & summè perfectum; non quia Diuinum esse habeat indigentiam creaturarum; sed ex summa perfectione, quæ tanta est, vt non posset ratione illius inferre creaturarum possibilitatem: vnde ex sublatione possibilitatis earum solum sequitur à posteriori, quod Deus non esset ita perfectus, ac modo est; hoc autem non oritur, vt dixi, ex eo quod firmitas Verbi nitatur firmitati creaturarum; sed firmitati alterius, nempe diuinæ virtutis, & participabilitatis à creaturis, quæ prius deficeret, deberet, quàm creaturæ quo ad possibilitatem deficerent.

Replicabis. II. Ergo implicante vna, aut altera creatura v.g. formica, idest si esset impossibilis vna, aut altera creatura, diuerso modo procederet Verbum, ac modo procedit, & consequenter mutaretur Deus, aut diuina omnipotentia, quod non est dicendum; eadem enim est ratio de impossibilitate vnus creaturæ, ac omnium. *Respond.* conceden. in illo casu, Verbum non procedere eiusdem rationis ac modo; nam si vna implicaret, sicut iam non esset idem creaturarum cumulus; ita non esset eadem omnipotentia; non quia diuina omnipotentia specificetur ab illa creatura: sed quia à posteriori colligeremus non esse eandem diuinam omnipotentiam, quam colligimus esse talem ex cumulo omnium creaturarum.

Nota hic I. Quod licet Verbum diuinum producat ex cognitione creaturarum; ab illis tamen non procedit; quia diuina scientia ex qua Verbum diuinum procedit, à creaturis non desumitur: Vnde est, quod Verbum diuinum est Verbum creaturarum; ab illis tamen non procedit; nec etiam sequitur, quod ab illis dependeat, seu quod illis indigeat; sed solum sequitur, quod cū illis necessariò connectatur; quia possibilitas creaturatum non infert à priori existentiam omnipotentiae, sed solum à posteriori, vt supra visum est. II. Verbum diuinum procedens ex cognitione creaturarum dicit ordinem rationis fundamentaliter ad illas. III. Non est absolutè concedendum, Verbum procedere per se in quarto modo ex cognitione comprehensiuæ essentiae; sed requiritur quod procedat

cedat ex cognitione comprehensua terminata ad obiecta necessaria, seu cum ipsa diuina essentia necessario connexa; ad comprehendendam enim aliquam potentiam sufficit, quod cognoscantur obiecta, quæ per se, & necessario in illa continentur, non autem requiritur, quod attingantur illa, ad quæ per accidens, & contingenter se extendit: Propter eandem rationem hæc propositio est falsa, Essentia diuina, vt gerens vicem speciei intelligibilis est per se representatiua, non solum rerum possibilem, sed etiam futurorum.

Contra secundam partem conclusionis, Vrgent I. Aduersarij probantes Verbum procedere ex cognitione etiam futurorum. Dicentes, Ideo Verbum ad sui productionem requirit cognitionem possibilem; quia ex vi processionis representat possiblea; sed Verbum ex vi suæ processionis representat etiam creaturas futuras, & est id quo dictæ creaturæ dicuntur, & defecto dictas creaturas representat; ergo &c. *Respond.* negando minorem; nam licet Verbum habeat per processionem representare futura; non autem hoc habet ex vi suæ processionis, idest non habet vi suæ linæ representare futura; cum ad hoc requiratur futuritionis suppositio; sicut licet omnia, quæ habet Spiritus sanctus habeat à Patre, & Filio per processionem; non tamen ex vi processionis.

Vrgent II. Pater communicat Filio cognitionem futurorum; ergo necesse est, vt ipsa futura sint prius in cognitione diuina; nam debet præhabere Pater quidquid communicat Filio; ergo etiam procedit ex cognitione futurorum. *Respond.* concedendo antecedens, & negando consequentiam; vt enim Pater communicet Filio cognitionem futurorum sufficit, quod ipsa cognitio sumpta secundum terminationem actiuam sit prius in Patre, quæ actiue communicata Verbo pro posteriori à quo, terminatur passiuè ad creaturas, & non requiritur, quod ipsa futura sint prius in cognitione diuina.

Vrgent III. Essentia diuina representat in eodem signo in quo creaturas possibilea, & futuras; ergo si cognitio possibilem per se requiritur ad productionem Verbi; etiam cognitio existentium; facta saltem suppositione, quod existant in aliqua differentia temporis. *Respond.* distinguendo antecedens, representat creaturas possibilea, & futuras eodem modo, nego, diuerso modo concedo, nam possibilea representat necessario, & per se; futuras verò minimè, nisi per suum decretum determinetur; cognitio enim futurorum est libera: vnde supponit omnia necessaria, & consequenter ipsam Verbi productionem: & licet terminatio cognitionis diuinæ ad futura, nullam realitatem addat, supra cognitionem diuinam; prius tamen, prioritate à quo, intelligimus diuinam cognitionem terminari ad creaturas possibilea, quàm ad existentes; etiam facta suppositione, quod existant in aliqua differentia temporis.

Aduerte hic I. Quod cognitio creaturarum futurarum non pertinet ad perfectionem cognitionis comprehensiuæ; nam si Deus decreuisset nul-

lam creaturam producere, tunc nulla creatura esset futura, neque in Deo esset cognitio creaturarū futurarū; & tamen adhuc cognitio Dei esset perfectissima, & cōprehensivā; *Addo*, quòd ad hoc, ut cognitio sit diuina, cōprehensivā, & perfectissima, non requiritur, quòd extendatur ad obiectum contingens, quod potest non esse; sed debet esse necessaria omnino in Patre; cognitio autem futurorum, solum est necessaria in Patre, ex suppositione ipsius decreti liberi; & licet Verbum dicat respectum ad creaturas, ut faciendas; hic est respectus rationis fundatus in dicta suppositione; Verbum autem solum procedit ex cognitione eorum, ad quā necessariò necessitate omnimoda fundat respectum rationis.

Averte II. Quòd si D. Tho; in quest. 4. de verit. artic. 5. dixit, Verbum per accidens, & quasi ex consequenti ad creaturas referri; loquitur de creaturis ad quas refertur relatione Domini, & Creatoris, quæ utique sunt tantum future; non loquitur autem de possibilibus. Sicut ad illud testimonium SS. P. August. lib. 15. de Trinit. cap. 14 & 15. dicentis, Verbum diuinum esse de omnibus, quæ sunt in scientia Dei; nam si aliquod minus esset in Verbo, quàm in scientia, non esset Verbum adequatum. Respondetur quòd Sanctus Pater intelligit, quòd si aliquod necessariò cognitum esset in Verbo &c. non autem intelligit concomitanter, & liberè cognitum; sicut est futurum.

Colliges ex dictis, plures esse distinguendas terminationes in intellectione, per quam Verbum procedit: prima est ad essentiam diuinam, ut ad eius obiectum formale, & primarium. Secunda, ad attributa, & relationes. Tertia, ad creaturas possibles. Ultima, ad res existentes, & futuras. Tres primæ, per se, & ex vi processionis Verbo Diuino conueniunt; quarta verò solum concomitanter, & veluti per accidens: unde si per impossibile aliqua ex tribus primis tolleretur, Verbum diuinum, vel omnino destrueretur, vel mutaretur intrinsecè; secus verò si ultima tantum terminatione careret.

De Persona Spiritus Sancti.

Nomen Spiritus sancti est proprium; Tertiæ Sanctissimæ Trinitatis personæ procedentis per voluntatem; & quamvis disunctiuè sumptum conueniat Patri, & Filio, cum uterque sit Spiritus, & sanctus; peculiariter autem appellatur hoc nomine tertia Persona: appellatur enim *Spiritus*; quia ut in spiratione reali ponitur aliquid extra; ita voluntas amando fertur extra se ad obiectum; dicitur etiam *Sanctus*; quia, sanctitas ad voluntatem pertinet, per quam producit Spiritus sanctus.

Est veritas Catholica, Spiritum sanctum à Patre, Filioque procedere, contra Græcos tenentes à solo Patre procedere; hic autem error à Nestorianis primò introductus est, ut ait D. Tho. *quest. 36. art. 2. ad 3. de quo fusè fuit disputatum in Concilio Florentino; ubi plura dicuntur de additione*

tionem illius particulæ; *Filioque*, facta symbolo Nicæno. Spiritus sanctus ita à Patre, & Filio, ut ab vno principio producit; ut immediatè, & æquè principaliter ab vno, & ab altero procedat; quia per eandem virtutem immediatam, idest per eandem volitionem, & spirationem actiuam procedit. Et licet Filius habeat eam virtutem à Patre, æque tamen principaliter producit, ac Pater; quia sicut Filius est tam principaliter Deus; quam Pater; licet hic sit à se, ille ab hoc; ita æquè principaliter producant; quia quod perfectionis dicit in Patre, esse à se; dicit in Filio, esse à Patre: vnde illa propositio, quæ sæpe innenitur in Patribus: *Spiritus sanctus procedit à Patre per Filium*, sic intelligenda est; Quod virtus productiua Spiritus sancti, quæ est vna, & eadem in Patre, & Filio, non est in Filio, nisi à Patre; idest dat Pater virtutem Filio, quâ secum producit Spiritum sanctum. Vnde falsum est quod Pater prius origine producat Spiritum sanctum, quam Filium, loquendo de prioritate in quo; sed solum prioritate à quo; licet concedamus, quod Pater prius origine habeat virtutem spiratiuam, & prius origine spirer.

Spiritus sanctus licet petat duas Personas ad sui productionem, idest procedat à duabus Personis distinctis; ille tamen duæ Personæ sunt, & dicuntur vnum principium Spiritus sancti; quia quauis Pater, & Filius sint duo supposita; vnicam tamen habent virtutem spirandi Spiritum sanctum; sicut, & vnicam voluntatem; cum principium in recto dicat rationem formalem productiuam, quæ est vna in Patre, & Filio; & nomina solum multiplicentur secundum multiplicationem eorum, quæ dicunt in recto: principium igitur Spiritus sancti realiter est vnum, virtualiter solum est duplex; cum intellectio, & volitio distinguantur solum virtualiter inter se.

Nota hic I. Contrà Græcos, quod licet Filius in quantum factus est homo, dicatur mitti à Spiritu sancto ad prædicandum, ut constat ex illo *Isai. 61. Spiritus Domini super me, eo quod unxerit Dominus me; ad annuncium mansuetis misit me*: non tamen mittitur in quantum est Deus, nisi à Patre: vnde Filius mittitur à solo Patre ad incarnandum; postquâ autem incarnatus est mittitur à Patre, & Spiritu sancto; & à seipso; quatenus actiones humanitatis ipsius sunt à tota Trinitate. Nota II. Quod testimonium D. Basilij dicentis, quod Filius non producit Spiritum sanctum; est intelligendum hoc modo, nempe; quod Filius secundum, quod Filius, seu secundum notionem Filij non producit Spiritum sanctum; quia secundum hanc rationem solum respicit Patrem; non autem secundum notionem cum Patre communem: Sic etiam est intelligendus D. Nazianzenus, & alij SS. Patres. III. Non obstat simplicitati Spiritus sancti criri à pluribus per eandem virtutem. IV. Spiritus sanctus dicitur etiam *Amor*, & *Donum*; *Amor*, quia procedit per voluntatem; cum terminus actionis voluntatis conuenienter amor dicatur: dicitur etiam *Donum*, & licet nomen *doni* non sit proprium solius Spiritus sancti; ei ta-

men conuenienter appropriatur; quia ex vi suæ originis est amor; amor, autem est primum donum, & ratio donandi alia; primum enim, quod damus alicui est amor, & ex amore alia bona largimur; Multa, & varia nomina attribuuntur Spiritui sancto, vt in scripturis faciliè videre est.

Virum si Spiritus sanctus non procederet à Filio, distingueretur ab illo?

Ad inuestigandum, vtum ex hoc antecedente, *Spiritus sanctus distinguitur à Filio*, rectè possit inferri hæc consequentia; Ergo *Spiritus sanctus procedit à Filio*, solet exagitari hæc celeberrima quæstio: vtum Spiritus sanctus distingueretur à Filio, si non procederet ab eo: & licet hæc quæstio sit de hypotesi impossibili; non est tamen implicatoria in terminis; vt aliqui malè putant; nam supponitur, quod non maneat idem numero Filius, & Spiritus sanctus, qui defectò existunt; nam si manerent, esset propositio implicatoria in terminis; quia esse distinctum, est omnino essenziale illi filiationi; ergo non potest concipi, quod maneat eadem numero Filiatio, & non maneat distincta; sensus igitur quæstionis est: An si per impossibile Spiritus sanctus non procederet à Filio possemus concipere alium Filium diuinum, qui cum non produceret aliam tertiam personam; distingueretur tamen ab eajta vt vtamque personam concipiamus diuersam ab his, quæ defectò sunt.

Præter authoritatem Conciliorum, & SS. Patrum est communis sententia D. Thomæ, & omnium ferè Doctorem, exceptis Scotistis, assentientium, quod si Spiritus sanctus non procederet à Filio, non distingueretur ab eo; Quia ratio quare personæ diuinæ ad inuicem distinguuntur, est quia ad inuicem opponuntur; cum omnes teneant illud axioma commune. *In diuinis omnia sunt vnum, vbi non obstat relationis oppositio*; neque possit realis distinctio inter diuinas personas inueniri ratione essentialium; nam essentialia sunt communia omnibus diuinis personis; & sic cum diuina perfectione compati nequit distinctio penès absoluta; vnde debet esse penès relatiua, idest penès relatiuam oppositionem; sed in Deo non datur oppositio relatiua; nisi ratione processionis vnus personæ ab alia; ergo cum tunc nulla obuiaret oppositio relatiua inter Filiū, & Spiritum sanctum; quia vnus alterum non produceret; in diuinis enim ibi est relatiua oppositio, vbi est ratio originis; sequitur, quod realiter non distinguerentur.

Distinctio igitur in diuinis oritur ex oppositione formaliter relatiua; vnde non sufficit oppositio disparata, vt volunt Scotistæ; nam in diuinis, quæ non opponuntur, non causant realem distinctionem: vnde relatio ideo non distinguitur realiter ab essentia, quia illi non opponitur; insuper videmus, quod relationes non se inuicem respicientes, defectò sunt indistinctæ in diuinis, vt Paternitas, & Spiratio actiua; ergo vt di-

distinguantur, non debent tantum disparatè se habere, sed etiam inuicem respicere. Neque II. Sufficit oppositio penès affirmationem, & negationem; nam talis oppositio oritur, vel ex limitatione, in quantum vnum non potest pertingere ad hoc, vt sit realiter idem cum alio, vel ratione realis oppositionis sequutæ ad oppositionem, penès affirmationem, & negationem; cum ergo in diuinis non sit limitatio debet esse oppositio realis, ad quam sequitur illa, penès affirmationem, & negationem. Neque III. Sufficit oppositio relatiua, penès duas totales origines diuerso modo tendentes ad suos terminos; quia nisi aliunde termini fiat diuersi, diuersitas originum non arguit diuersitatem terminorum; idem enim homo potest originari, & per creationem à Deo, & per generationem. Neque denique IV. Sufficit oppositio contraria, aut quasi contraria proueniens ex differentijs disparatis; quia hæc oppositio non potest causare impossibilitatem nisi ratione limitationis: propter quàm rationem iusticia, & misericordia in creatis realiter distinguuntur; cum, autem in diuinis nulla inueniatur limitatio, & coarctatio, non potest talis oppositio causare impossibilitatem.

Arguunt I. Aduersarij contra hanc conclusionem: In illa suppositione impossibili, quòd Spiritus sanctus non procederet à Filio, Filius generabitur, & Spiritus sanctus non generabitur; ergo erunt duæ diuersæ personæ, & consequenter distinctæ; nempe vna genita, & altera ingenita. *Respond.* quòd in illo casu illæ duæ processiones passiuæ solum, distinguerentur virtualiter, non realiter; cum nulla prædicata contradictoria realia conuenirent Filiationi, quæ non etiam conuenirent Spiriationi; nam etiam tunc Spiritus sanctus esset Filius realiter: & sic tam Filiatione, quàm Spiratio prodirent realiter per idem omnino principium, nempe per intellectiōem: vnde in illo casu realiter, & identicè esset generatio, & productio amoris; nam esset vnica personalitas realiter, & virtualiter duplex; quia licet per duas personalitates realiter distinctas constituerentur duæ personæ realiter distinctæ; non tamen per vnica personalitatem realiter, & virtualiter duplicem.

Arguunt II. Facta hypotesi adhuc, vt Spiritus sanctus distinguatur à Filio, sufficit, quòd ambæ personæ originentur ex tertia, nempe ex Patre: *Contra* est; non potest enim resultare aliqua distinctio realis, inter personas productas, nisi ex vi productionis aliquid communicetur personis productis, ratione cuius ad inuicem distinguantur; sed istis duabus personis communicaretur vna natura; ergo non distinguerentur ex parte naturæ; neque per relationes; quia in eadem persona essent impossibiles; cum in illo casu eadem esset persona, quæ procederet per intellectum, & per voluntatem, esset simul Verbum, & Amor; persona genita, & spirata.

Arguunt III. Quæcunque differunt à tertio alia, & alia differentia reali, illa sunt distincta inter se; sed facta hypotesi adhuc Filius, & Spiritus

ritus sanctus differret à Patre alia, & alia differentia reali; quia Filius differret per Filiationem oppositam suæ Paternitati, & Spiritus sanctus per Spirationem passiuam oppositam suæ Spirationi actiue; ergo &c. *Potest negari minor huius syllogismi*; quia si Spiritus sanctus non procederet à Filio, non esset in diuinis aliqua productio, nisi sola generatio; sed quidquid sit de hac responsione: facilius euacuatur difficultas, si dicatur, quod in illa minori est petitio principij; quia supponit illa producta esse plura; & per consequens, cum omnis pluralitas innascatur ex distinctione, præsupponit ea esse distincta; hoc autem est, quod queritur: videlicet, vtrum Spiritus sanctus distinguatur à Filio, si non procederet ab eo.

Arguunt IV. Filius, per hoc, quod à Patre generatur est persona in diuinis; ergo Spiritus sanctus per hoc, quod à Patre spiratur erit persona distincta. *Respond.* negando consequentiam; quia supponitur falsum, nempe generationem, & spirationem futuras in illa hypotesi productiones totales; quando est vna, & eadem actio generatiua, & spiratiua, solum virtualiter distincta; nam Filius, & Spiritus sanctus, vt supradiximus, procederent in illa hypotesi à Patre per processiones totales, solum virtualiter distinctas: non verò realiter.

Arguunt V. Filiatio constituit personam Filij in esse talis personæ; ergo constituit personam Filij in esse personæ distinctæ à quauis alia; cum constitutum alicuius sit etiam distinctum illius; sed facta hypotesi remaneret Filiatio; ergo &c. *Tota vis huius argumenti fundatur in illo axioma. Idem est constitutum, ac distinctum.* Ad quod *Respond. I.* Quod distinctum in diuinis relationibus non sumitur per ordinem ad constitutum, sed per ordinem ad quidditatem relationis; quidditas autem relationis solum sumitur per ordinem ad oppositum; & sic in diuinis solummodo relatio distinguit ab opposito; ergo cum in illa hypotesi nulla haberetur oppositio: nulla etiam intercederet distinctio; & licet in creatis sine ulla oppositione Ioannes distinguatur à Paulo, non sequitur eodem modo discurrendum esse in diuinis; nam in creatis, quibus non repugnat ea imperfectio, quæ in distinctione consistit, & aliæ etiam multæ; non est necessarium pro earum distinctione recurrere ad oppositionem; secus autem in Deo. *Respond. II.* Quod quando distinctum est transcendente, quod sumitur semper ab intrinsecis constitutivis rei, tunc idem est constitutum, ac distinctum; quando tamen distinctum est formale, quod sumitur ab aliqua forma adueniente, & communicante suum effectum formalem subiecto, vel est sequens ad unitatem formalem; tunc non est idem constitutum, ac distinctum; non enim valet, duo homines constituuntur per rationalitatem; ergo distinguuntur ad inuicem per rationalitatem. *Respond. III.* Quod constitutum relatum, quod constituit in ordine ad terminum, solum distinguit ab illo, & non ab omni alio; constitutum autem absolutum distinguit ab omni alio; Filiatio autem constituens Filium in ratione personæ incommu-

municabilis, cum solum constituat incommunicabiliter in ordine ad Patrem, solum distinguit ab illo.

Ad illud autem, quod subiungitur, nempe facta hypotesi remaneret Filiatio. *Respondetur*, quod Filius maneret solum, ut formaliter respicit Patrem, non pro ut dicit esse radicem Spiritus sancti; ac proinde non maneret secundum suam rationem adæquatam, sed inadæquatam tantis; ac proinde Filius, qui nunc est radicaliter spiratius, in illa hypotesi non maneret talis: sicuti neque Spiritus sanctus; nam tunc non diceret ordinem ad Filium, ut ad id à quo procedit, sicuti nunc dicit: & sic maneret secundum quod Spiritus sanctus respicit Patrem; non verò Filium; ac proinde solum maneret secundum rationem inadæquatam.

Arguunt VI. Facta hypotesi, quod Spiritus sanctus procederet à solo Filio; & non à Patre, adhuc distingueretur à Patre; & tamen non esset tunc oppositio relatiua inter illos; ergo etiam facta hypotesi, quod Spiritus sanctus non procederet à Filio, adhuc distingueretur ab illo. *Respond.* aliqui concedendo antecedens, & negando consequentiam, disparitas est; quia in illo euentu, quod Spiritus sanctus procederet à Filio tantum, licet non procederet immediatè à Patre; procederet tamen mediatè: quia procederet à Filio procedente à Patre: & sic in illa hypotesi Pater, & Spiritus sanctus opponeretur oppositione reali relatiua mediata, quæ (ut volunt communiter Theologi) est sufficiens ad realem distinctionem. *Respond.* II. Quod in consequenti assumitur non solum impossibile; sed etiam impossibile; quia cum Filius omne posse, & agere habeat à Patre, dicere, quod Filius producat aliquid, quod Pater non producit, est manifesta contradictio; quia est dicere, Filium non esse Filium. *Respond.* III. Concedendo antecedens, & negando consequentiã, disparitas est; quia si Spiritus sanctus procederet à solo Filio, idest si solus Filius produceret Spiritum sanctum, adhuc distingueretur à Patre; quia tunc Spiritus sanctus, & Pater se haberent sicut productum, & improductum; & ideo necessario differrent; si verò procederet à Patre tantum, non à Filio, tunc Spiritus sanctus, & Filius ambo essent producti à Patre.

Arguunt VII. Si ratio distinguendi Filium à Spiritu sancto esset oppositio relatiua, & non Filiatio; sequeretur quod Spiritus sanctus facta hypotesi, quod non procederet à Filio, non opponeretur Filio ex vi suæ processionis; ergo &c. *Respond.* distinguendo sequelam, non opponeretur Filio realiter, præcisè ex vi suæ processionis concedo, non opponeretur formaliter, virtualiter nego; nam tunc processio, & generatio solum virtualiter distinguerentur; & sic tunc ratio Geniti, Filij, Verbi, & Imaginis non repugnarent realiter Spiritui sancto.

Arguunt VIII. Distinctæ relationes reales incommunicabiles, & impossibiles in eodem supposito sufficiunt ad realem distinctionem personarum; sed generare, & spirare, quæ remanent, facta hypotesi, sunt huiusmodi; cum vna formaliter aliam non includat; ergo &c. *Respond.*

negando maiorem, quo ad illam partem in qua dicitur, quòd remanent facta hypotefi generare, & spirare: nam vt diximus, spirare non amplius remaneret facta hypotefi, ex parte Patris; vno autem relatiuorum non manente, non manet reliquum: *Insuper* probatio minoris deficit; quia non valet, A, non includit B formaliter; ergo A, distinguitur à B realiter: Paternitas enim non includit formaliter diuinam effentiam; & tamen non differt ab ea realiter.

Nota hic I. Quòd est semper negandum, Filium realiter distingui à Spiritu sancto per suam relationem Filiationis; per hanc enim à solo Patre distinguitur: & sic processio per intellectum præcisè non est ratio distinguendi Filium à Spiritu sancto; distinctio enim realis, vt dictum est, à sola oppositione desumitur: vnde nec ratio Verbi, vel imaginis, quæ accipit Filium per generationem, nec ratio amoris, vel doni, quæ est in Spiritu sancto, est cur realiter distinguatur Filius à Spiritu sancto, sed solum virtualiter. II. In Filio sunt plures rationes distinctiue, scilicet Filiationis, & Spirationis actiue; per primam enim, nempe per Filiationem à solo Patre distinguitur; per secundam autem, nempe Spirationem actiuam à solo Spiritu sancto; per hanc enim constituitur in ratione spirarij, & oppositi Spiritui sancto: & sic per hanc ab ipso distinguitur: vnde est semper negandum, quòd Filius distinguatur realiter à Spiritu sancto per id per quod constituitur in esse Filij; sed distinguitur per id per quod constituitur in esse spirarij, quod est commune Patri.

III. Est etiam negandum, quando dicitur, quòd detur distinctio realis in diuinis sine oppositione relatiua. sicuti quando dicitur, quòd Paternitas, & Filiatio distinguuntur à Spiritu sancto, absque eo quod opponantur illi relatiue: cum Spiritui sancto opponatur Spiratio actiua, & in concreto spirator. Falsum est inquam; nam Paternitas, & Filiatio opponuntur Spiritui sancto, tamquam principium constitutiuum quod; Spiratio autem actiua opponitur Spiritui sancto, quatenus est relatio ad Spiritum sanctum; relatio autem opponitur termino: fundatur autem hæc relatio in ratione principij, quæ inuenitur in Patre, & Filio; Spiratio autem actiua distinguitur à Patre, & Filio virtualiter, vt supra diximus; quia non possunt distingui realiter; cum illi non opponantur. Vnde bene dicit quidam Recentior, quòd Filiatio, pro vt est radix Spirationis actiue, radicaliter distinguit, & opponitur Spiritui sancto.

Si D. Anselmus *lib. de processione Spiritus sancti cap. 1.* ait Filium, & Spiritum sanctum ipsa distinctione natiuitatis, & processionis referri ad inuicem; loquitur de natiuitate, & processione, quæ defactò dantur, & quibus defactò distinguitur Filius à Spiritu sancto.

Quodnam sit constitutum Personarum?

Constituuntur diuinæ Personæ per aliquod relatiuum in actu primo; non verò per relatiuum in actu secundo; idest non pro vt relatio respicit terminum, sed pro vt est ordinata ad respiciendum terminum; & sub hac ratione intelligitur Paternitas v.g. ante generationē; sunt enim duo munera in relatione, vnum afficere naturam, & terminare, alterum referre subiectum ad terminum: licet igitur relatio paternitatis in re totum suum effectum communicet; tamen prius natura intelligitur complere personam Patris, quàm respicere Filium; & sic vt tangit Patrem, constituit personam; vt respicit Filium, supponit personam constitutam.

Potentia generatiua in diuinis non dicit potentialitatem aliquam distinctam ab actu, sed principium *d quo*: insuper dicit in recto naturam diuinam cum connotatione relationis paternitatis, vt conditionis requisitæ, seu principij *quod*; quia virtus, seu potentia se tenet ex parte naturæ; relatio requiritur, ad hoc, vt persona distinguatur à termino producto. *Actus* notionales, nempe intelligere, & velle, sunt necessarij, non voluntarij, quatenus voluntarium idem est, ac liberum. *Datur* in diuinis æqualitas, non quantitatis, sed perfectionis, & virtutis; eadem enim diuinitate, & natura gaudent, salua personarum discretione; sunt etiam æquales in duratione; cum persona procedens sit cœterna suo principio, & æquales etiam in potentia; nam etiam potentia notionalis generandi, vel spirandi in ratione perfectionis, æqualiter in personis inuenitur.

De Missionibus Diuinis.

Circa Missiones diuinarum personarum est sciendum primò; Quòd *Missio*, est temporalis apparitio personæ procedentis: vnde ea sola persona mittitur, quæ ab alia procedit: hinc D. P. August. *lib. 2. de Trinitate cap. 5.* ait, *Pater solus non legitur missus*. Filius autem à solo Patre; Spiritus verò ab utroque mittitur. II. Missionū personarum diuinarum, alia est inuisibilis, visibilis altera: loquendo de missione inuisibili, illa sola vocanda est *missio*, quæ fit per dona supernaturalia. III. Præcipua, & visibilis missio fuit illa Filij Dei per mysterium Incarnationis, Secunda visibilis missio fuit, quando Spiritus sanctus descendit visibiliter in Christum sub specie Columbæ. Tertia fuit in transfiguratione Domini in nube. Quarta fuit in vento, & flau. Quinta, & omnium celeberrima fuit in linguis igneis die sacratissimo Pentecostes. Potest Filius sine Spiritu sancto, & hic sine Filio mitti; sicut per Incarnationem missus est Filius sine Spiritu sancto. Hæc sufficiant de augustissimo, & ineffabili Trinitatis mysterio.



TRACTATUS VI.

De Angelis.

POST tractatum de Deo Trino, & Vno, illum de Angelis explicandum aggredimur: & licet ad horum præstantissimam naturam, proprietates, & officia explicandam, non facile humana intelligentia valeat; Angelico tamen Præceptore duce, qui in hoc de Angelis tractatu se ipsum, (quia homine maior scripsit,) superauit: sanè non res ardua, sed facilis erit; incipiendo igitur ab eorum existentia, & creatione, inquirimus

Virum dentur Angeli, & in quo loco sint creati?

Licet nomen *Angelus* vi suæ significationis, idem sit, ac *Nuncius*, dicente D. Ambrosio in cap. 1. *Epist. ad Hebræos*. *Angelus nomen est officij, non natura, qui etiam semper sunt spiritus, non semper Angeli vocari possunt*: ex consuetudine tamen Scripturarum Sanctarum, & vsu sacrorum Doctorum, nomen, *Angelus*, accommodatum est, ad significandas substantias creatas, completas, & intellectuales. Has substantias vocauit Aristoteles, intelligentias cælorum motrices.

Dari Angelos est certum de Fide, contra Saducæos, negantes tales substantias, vt constat ex illo *Actorum* cap. 21. *Saducæi dicunt non esse resurrectionem, neque Angelum, neque spiritum*. Ostenditur 1. hæc veritas ex illo *Genesis* 3. in quo habetur, *Collocauit Dominus ante Paradisum voluptatis Cherubim ad custodiendam viam ligni vitæ*. ibidem cap. 19. *Venerunt duo Angeli Sodoma Vespere*. *Tobia* 12. *Ego sum Raphael Angelus, vnus ex septem, qui astamus ante Dominum*. *Matth.* 18. *Angeli eorum in cælis semper vident faciem Patris mei, qui in cælis est*. & pluribus alijs; vt videre est in Scriptura; ergo dicendum est, quod dentur in rerum natura substantiæ quædam intellectuales creatæ, excedentes nobilitate humanam naturam; atque adeò corpora omnia, quæ sensibus percipiuntur. Id ipsum etiam est manifestum quoad malos Angelos, quos demones appellamus; nam *Leuit.* 18. habetur, *Nequaquam ultra immolabunt hostias suas demonijs*. *Deuteron.* 32. *Immolauerunt demonijs, & non Deo*.

Potest item hæc veritas probabiliter ostendi à priori, & à posteriori; à priori; Cum enim Deus condidisset hoc vniuersum perfectum, etiam quantum ad gradus, cum defecto detur anima rationalis, quæ est substantia immaterialis, & incompleta; multo magis dabitur completa, & per-

perfectior, qualis est Angelus. A posteriori etiam ostenditur; ut videtur ex pluribus effectibus veneficiorum, lamiarum, apparitionum demonum, magicæ artis, & energumenorum, à quibus multa sunt, quæ vires totius naturæ corporeæ superant; cum multoties tam mirabililoquantur, ut ea numquam, vel discere, vel audire potuerint. Hi autem effectus, neque possunt tribui Deo, neque animæ separatæ; non Deo, cum enim plurima, quæ sunt ab energumenis, & alijs, sint indigna, & indecentia, repugnant infinitæ sanctitati ipsius: neque animæ separatæ; cum habeat summam suam perfectionem in corpore; atque adeo videtur, non posse extra corpus perfectius operari, quàm in corpore.

Pro solutione autem secundi dubij, suppono, tamquam certum de Fide, non fuisse Angelos ab æterno productos; cum nulla creatura fuerit ab æterno: neque fuisse ante mundum corporeum; ut constat ex *Concilio Lateranensi cap. firmiter*; vbi asseritur, Deum simul ab initio temporis utramque de nihilo condidisse creaturam, spiritualem, & corpoream, Angelicam, & mundanam. Quamvis sit res multum incerta, & difficilis ostendere, in quo loco Angeli fuerint creati; cum sit res, quæ à sola Dei voluntate pendeat, & de hoc scriptura mentionem non faciat; puto tamè probabiliter, Angelos fuisse creatos in cælo Empyreo. Hoc idè sentit D. Thom. *quæst. 61. art. 4.* ostendens, fuisse conveniens, ut nobilissimæ, & perfectissimæ creaturæ, quales sunt Angeli crearentur in loco omnium nobilissimo, & supremo, qualis est Empyreum. Si in *Isaïæ 14.* legitur de Lucifero, *Ascendam in cælum, & similis ero Altissimo*; non est hoc intelligendum de cælo aliquo corporeo, sed de cælo Sanctissimæ Trinitatis, exoptans similitudinem cum Altissimo.

Utrum Angeli sint incorporei, & immateriales?

Sensus quæstionis est; utrum Angeli careant corpore quantitativo: unde sumitur *incorporeum*, pro ut distinguitur ab extenso, tam per se, quàm per accidens, quale est omne id, quod habet partes extra partes. Conclusio est affirmatiua cum communi Scholasticorum sententia, cum quibus non solum assero, Angelos esse incorporeos; quinimò contrariunt defendere post definitionem Concilij Lateranensis II. esse temerarium. Probari primò hæc veritas potest ex scripturis; in pluribus enim locis Sacræ scripturæ vocantur Angeli, *Spiritus*; & licet hoc nomen significet ventos, ac proinde res agiles, subtileque substantias, nihilominus cum de rebus intellectualibus sit sermo, significat substantiam incorpoream, iuxta illud *Ioannis 4. Spiritus est Deus*. Accedit etiam testimonium Concilij Lateranensis sub Innocentio III. *cap. Firmiter, de Summa Trinitate*, vbi sic habetur, *Deus utramque de nihilo condidit creaturam spiritualem, & corporealem; Angelicam videlicet, & mundanam*; ergo cum Concilium dicat, Angelicam esse spiritualem, & diuidat ipsam à creatura cor-

porali; utique affirmat, Angelum non esse corporeum, sed spiritum.

Probatur hæc conclusio ratione; Si enim Angeli essent corporei, non potuisset legio demonum, quæ complectitur sex mille sexcentos sexaginta sex demones, inueniri, & esse in vno corpore, sicut fuit obsessus ille, de quo mentionem facit D. Lucas *cap. 8.* quomodo enim posset vnus homo capere tot demones corporeos? cum enim implicet, & non possint duo corpora, quantumuis minima, & subtilia simul esse in eodem loco; neque à fortiori poterit, tam ingens multitudo corporum simul existere in eodem loco cum alio. II. Si Angeli essent corporei, sequeretur, quod essent corruptibiles ad diuisionem suæ quantitatis; cum omne animal ad solam diuisionem sui corporis sit corruptibile; esset enim Angelus, vel saltem aliqua eius pars extensa ad extensionem quantitatis; cum quantitas sit ratio extensionis. III. Sequeretur, nec Angelos cælum mouentes posse esse penetratiuè cum cælo, nec demones possent tanta celeritate moueri, nec mouere, quanta compertum est, & innuunt plura testimonia Scripturæ, & sacrorum Doctorum.

Dices I. In *Script. Genes. 6.* Angeli vocantur Filij Dei, & dicuntur generasse Gigantes; legitur enim ibi, *Videntes Filij Dei filias hominum* (vel vt legunt septuag. Angeli filias hominum,) quod essent pulchri, acceperunt sibi uxores; ergo si Angeli potuerunt generare gigantes, sine dubio sunt corporei. *Respond. I.* Quod nomine *Filiorum Dei* intelliguntur posseti Sethi, qui erant iusti, & sancti, atque adeò Filij Dei per adoptionem; sicut nomine *Filiarum hominum*, intelliguntur filie de stirpe Cain, quæ erant pessimæ; vñtatum enim est scripturis vocare iustos, filios Dei, & Angelos. II. Nomine *Fliorum Dei*, veniunt filij principum, & potestatum, alijque homines magnæ proceritatis; sicut nomine *Filiarum hominum*, intelliguntur communes, plebcizq; mulieres; assuevit enim scriptura, rectores, ac potentes, Deos appellare; vnde *Exod. 7.* ait Dominus ad Moysen: *Ecce constitui te Deum Pharaonis;* idest habentem super illum imperium, & principatum.

Dices II. Angeli cruciantur igne corporeo; ergo habent corpora. *Respond.* retorquendo argumentum, animæ cruciantur eodem igne in inferno; ergo sunt corporeæ. *In forma,* respondeo negando consequentiam; ignis enim inferni concurrat, vt Dei instrumentum ad cruciandum demones, & animas in inferno, vt dictum est in tract. de visione Dei, & melius infra agendo de pœna demonum.

Dices III. Multi ex antiquis Patribus, & Doctoribus sensisse videntur, Angelos habere corpora. *Respond. I.* Quod per *ly corpora*, & *corporeos* intelligunt, Angelos non esse rem vanam, sed substantiam: vel dicunt esse corporeos, vt expriment eorum potentialitatem, per quam conueniunt cum corpore. De reliquo, qui tribuunt Angelis vera corpora, nõ fundant aliquam probabilitatem contra authoritates Scripturarum, & Concilij supra allatas,

Utrum Angeli sint compositi ?

Quia compositio potest esse multiplex , I. Ex materia, & forma substantiali, tanquam partes physice, & realiter componentes. II. Ex materia, & forma spirituali. III. Ex materia, & forma metaphysica, scilicet ex genere, & differentia. IV. Ex potentialitate, & actu. Incipiendo igitur claritatis gratia à prima; Dico cum communi Scholasticorum sententia, Angelos defacto existentes non esse compositos ex materia: Ostenditur I. hæc veritas ex SS.PP. qui loquentes de Angelis, dicunt, illos esse incorporeos, & nullam habere materiam; eo ipso enim, quod Angeli sunt incorporei, ut visum est, carent quantitate; ergo etiam materia; cum materia prima non careat quantitate. II. Quia materia non est necessaria, nisi propter transmutationem, vel operationem; sed Angelorum substantia non est mutabilis, seu corruptibilis; ergo ex hoc capite Angeli non habent materiam: neque est necessaria materia in Angelis propter operationem; nam operationes Angelorum nullo modo dependent à materia; ut inferius clarius videbitur: & patet etiam in operationibus animæ rationalis separatæ. Nec valet dicere, materiam esse necessariam propter esse Angelicum; *Eo ipso* enim, quod non est necessaria propter operationes; gratis asseritur esse necessariam propter esse; eum esse fit propter operationem.

Nec valet dicere, Angelus mouet se ipsum localiter; ergo debet habere partem mouentem, & partem motam, & consequenter materiam. *Non enim* indiget Angelus ad motum localem materia, neque partibus; & multò minus ad intellectionem, & volitionem: se mouet enim Angelus, ut melius suo loco videbitur; eliciendo suas operationes virtualiter transcurrentes, & formaliter immanentes.

Secunda conclusio: Excludunt etiam Angeli compositionem ex subiecto, seu materia spirituali, & forma item spirituali. Hæc conclusio, quæ est etiam communis apud Theologos, docetur præcipuè à D. Dionysio 1. de celesti hierarchia, ubi cap. 4. & 7. docet, eos proximè imitari Dei simplicitatem, & vocat Angelos ab omni materia, & partium multitudine solutos. Suadetur eadem conclusio ratione; Si enim Angelus constaret ex materia purè spirituali, illa esset perfectior anima rationalis; esset enim ens absolutum, & omninò independens à corpore, & sic ut spiritualis, esset intellectiua perfectiori modo, ac est anima rationalis; & sic essent in vno composito, nempe in Angelo, duæ substantiæ intellectiue, nempe forma spiritualis ipsorum, & materia etiam spiritualis, quæ etiam esset ens completum, ut potè principium adæquatum radicale operationum in aliqua determinata specie.

Exclusa ab Angelis omni compositione ex materia, & forma substantiali, tanquam partibus physice, & realiter componentibus; siue sit hæc matc-

materia eiusdem rationis cum nostra, siue non: exclusa etiam ab ipsa compositione ex materia spiritali, & forma item spiritali, asserimus, Angelos esse substantiam completam, intellectuam, per se subsistentem, & simplicem.

Cum tamen Angelus sit substantia finita, & creata, non negat compositionem ex subiecto, & accidenti, ex actu, & potentia: cum sit in potentia ad multa accidentia: neque negat compositionem ex natura, & supposito, neque ex genere, & differentia.

Dices, Si Angelus admitteret compositionem ex genere, & differentia constaret etiam ex materia, & forma; nam genus desumitur ex materia; differentia verò ex forma. *Respond.* negando sequelam, ad cuius probationem dico, illud intelligi proportionaliter, & secundum analogiam; nempe, quia genus in compositione metaphysica gerit vicem materię, tamquam quid perfectiuium, & potentiale, ac actuabile; differentia verò vicem formę, quę actuatur, & determinat genus ad certum gradum, & ad determinatam speciem naturę.

Nota hic I. Quòd licet aliquando Angeli vocentur animalia: hoc est intelligendum, quatenus sunt substantię intellectuales viuentes. II. Quando dicuntur constare ex materia, & forma; sumitur materia, pro vt significat potentiam, & genus; forma verò, quatenus significat differentiam, & actum. III. Conueniunt Angeli inter se in ratione substantię completę spiritalis, quę est quoddam genus, & differunt per proprias differentias; si autem hanc compositionem ex genere, & differentia, vis vocare ex materia, & forma, latè sumpto vocabulo; nolo quęstionare de voce, sed standum melius est doctrinę supra allatę. IV. Neq; Angeli sunt forma illa simplex, de qua dixit Boetius *lib. de Trinit. Forma simplex subiectum esse non potest.* V. Cum substantia Angelica comparatur ad multa accidentia, tamquam potentia ad actum; nullo modo potest dici actus purus; ad hoc enim requiritur, vt numquam sit in potentia, & semper in actu existat, quòd nulli creaturę potest competere.

Utum Angeli defacto existentes differant specie?

EST adeò clarum, Angelicum Pręceptorem docuisse, Angelos differre specie; semper enim Seraphicus Doctor repetit, & inculcat principium indiuiduationis, & multiplicationis numericę desumi à materia, vel ab ordine ad illam; vt meo iudicio si quis hoc negaret, magna ex parte doctrinam huius S. Doctoris negaret: solum potest oriri dubium, an loquatur defacto, an verò etiam de possibili; ideò claritatis gratia, examinandam primò censui hanc quęstionem: An Angeli defacto existentes differant specie, vel solò numero; videndum postea, an implicet omnino contradictionem, posse plures Angelos differre solo numero in eadem specie infima, sicut differunt homines, vel animę rationales pro quo?

Eit

Est notandum I. Angelum esse substantiam, seu naturam, tum physicè, tum metaphysicè completam, & essentialiter, & integraliter simplicem. II. Si aliquis conceptus est vniuersalis, & diuisibilis, id habet, vel quia potest contrahi per diuersas, & oppositas perfectiones; & sic est conceptus genericus, metaphysicè incompletus, ac diuisibilis in plures species: vel quia potest veluti integraliter diuidi in suas partes; & sic est numero multiplicabilis: vnde sicuti esse essentialiter completum, facit, ne possit diuidi in plures species; ita esse integraliter simplicem, facit, ne possit diuidi in plura indiuidua, & ne sit vterius intrinsecè, & per identitatem contrahibilis; ac determinabilis; quamuis sit indifferens ad plura accidentia: hoc posito pro fundamento conclusionis.

Affert cū Angelico Præceptore, & omnibus eius discipulis, Substantias spirituales, incorruptibiles, cōpletas, ac simplices, cuiusmodi sunt Angeli specie differre, & esse numero inmultiplicabiles. Probatur hac ratione; Quia species seu essentia de suo cōceptu essentiali determinata, & indeterminabilis est numero inmultiplicabilis; cū essentia, seu species hoc modo sit essentialiter indiuidua, & indiuisibilis in plura: aliter esset vterius determinabilis ad plura, & sic nō esset essentialiter determinata, & indeterminabilis; sed substantia spiritualis simplex, & completa, sicut est Angelus, est ex suo essentiali conceptu determinata, & indeterminabilis; quia est secundum suam essentiam completa, & incomplebilis; cum compleri nihil aliud sit, quàm vterius determinari: vnde si Angelus est substantia completa, & incomplebilis, est consequenter determinata, & indeterminabilis; sicuti per hoc, quod sit simplex, excludit partes essentialiter incompletas; ergo Angelus, qui est substantia spiritualis, completa, & simplex, est numero inmultiplicabilis, & consequenter differt specie.

Aduerto, me dixisse, Angelum esse substantiam completam, & simplicem, quod volo, vt intelligas, esse integraliter simplicem; nam si est possibilis substantia aliqua completa, siue materialis, siue spiritualis integraliter composita, sed essentialiter simplex; vtique partes huius substantiæ essent distinctæ, sed distinctione purè numerica. Cum igitur Angelus sit integraliter simplex, seu substantia integraliter simplex, sequitur, non posse diuidi in plura indiuidua, & consequenter, ne sit vterius intrinsece contrahibilis, ac determinabilis, iuxta supra notata; sicut, quia natura diuina est essentialiter cōpleta, & nihil inuoluit essentialiter incompletum, est inmultiplicabilis in plures numero naturas diuinas: è contra verò, quia essentia humana, quamuis essentialiter completa; quia tamen constat partibus essentialiter incōpletis, potest numero multiplicari. Hoc idem est dicendum de anima, quæ cum sit pars compositi substantialis, est essentialiter incompleta, & complebilis: Insuper materia prima, licet sit simplex; est tamen essentialiter complebilis, & cum sit principium omnis diuisibilitatis, debet constare partibus omni-

nò similibus : denique formæ materiales sunt integraliter compositæ, & essentialiter incompletæ, ac propterea capaces vltioris determinationis essentialis.

Dices I. Substantia Angelica, seu eius essentia est determinabilis, & complebilis per subsistentiam, & perfectibilis per accidentia ad constituenda plura concreta accidentalia; ergo est numero multiplicabilis. *Respond.* concesso antecedente, negamus consequentiam; licet enim illa substantia sit vltius determinabilis per subsistentiam, & accidentia; semper tamen supponunt ipsam determinatam, & indeterminabilem, completam, & simplicem; cum enim subsistentia, & accidentia sequantur ad conceptum essentia; iam supponunt in illa inmultiplicabilitatem numericam; nam subsistentia supponit essentiam illam indiuisam, & indiuisibilem in plura indiuidua similia; accidentia autem supponunt eam essentiam iam substantialiter terminatam, seu suppositum.

Dices II. Non possunt plura specie diuersa præstare effectus eiusdem speciei; sed Angeli præstare effectus eiusdem speciei, vt sunt intellectiões ipforum: insuper aliqui ipforum conueniunt in hoc effectū extrinseco circa terminos eiusdem speciei; cum ordinentur ad custodiam hominum; ergo saltē aliqui differunt numero. *Respond.* negando maiorem; non enim implicat plura specie diuersa, posse secundariò præstare effectus eiusdem speciei: ad minorem dico, intellectiões Angelorum specie differre propter ordinem ad Angelos specie diuersos; si loquimur autem de intellectiōnibus eiusdem Angeli, possunt etiam specie differre per ordinem ad diuersa obiecta; & dato, quod differant numero, adhuc nihil sequitur contra nos. Ad illud, quod dicitur de custodia: potest sustineri, quod custodia vnius hominis sit diuersæ speciei à custodia alterius hominis: & dato, quod sit eiusdem speciei, sicut concessimus de intellectiōnibus; negatur consequentia; ratio est; quia cum substantia completa sit prædicatum absolutum, & primum, ac reliquorum fundamentum, eius multiplicabilitas, vel inmultiplicabilitas debet desumi ab eiusdem prædicatis absolutis vltius determinabilibus.

Replicabis intellectiões Angelorum, vt concessum est, differunt numero; ergo etiam, & Angeli. *Respond.* negando consequentiam; intellectiões enim, & similia accidentia non sunt ex suo conceptu entia simplicia, & completa.

Dices III. Angeli conueniunt in aliquo prædicato specifico, & veluti formali, & determinatiuo, nempe in eo, quod intelligant per cognitionem innatam, & perfectam ex primo suæ creationis instanti, & differunt solum in cognoscendis pluribus, vel paucioribus obiectis, vna, vel pluribus speciebus; sed plus, & minus faciunt differre solum materialiter, & numero; ergo, &c. *Respond.* retorquendo argumentum, omnia bruta conueniunt in prædicato præcipuo sensitiui, & solum differunt secundum magis, & minus; ergo sunt eiusdem speciei. *In forma respond.*

spondeo negando maiorem; esse enim intellectuum modo supradicto est prædicatum genericum Angeli, non specificum, vt malè altruunt Aduersarij; differunt autem essentialiter; quia non differunt tantum secundum magis, & minus veluti accidentaliter; sed differunt per differentias quasdam essentielles, contractiuas prædicati illius, quod diximus esse genericum. Ad illud, quod additur, maioritas, & minoritas facit solum differre materialiter, seu numericè: hoc est intelligendum de maiortate, & minoritate intensiua, vel extensiua accidentali; non autem de quidditatiua, & essentiali, quæ consistit in indiuisibili; sicut est differentia Angeli, quæ reddit ipsum magis, vel minus perfectum maiortate, & minoritate quidditatiua, & essentiali.

Dices IV. Omne genus est multiplicabile in plures species; ergo, & omnis species in plura indiuidua. *Resp.* negando consequentiam, ratio est; quia genus est quid indeterminatum, & incompletum, vltèrius determinabile, & complebile; at species ex sua ratione non est incompleta, & vltèrius determinabilis, vt patet in natura diuina. *Vel dic,* quòd de ratione speciei, vt sic, non est esse de pluribus prædicabilem; satis enim est, quòd sit subiijcibilis: contra verò de ratione generis est, vt possit prædicari de pluribus differentibus specie in quid: vnde non est mirum, si genus Angelicum sit multiplicabile in plures species; non autem species Angelica in plura indiuidua.

Dices V. Angeli conueniunt omnes definitione; nam Damascenus 3. *de fide* definiens Angelum, ait, *Angelus est substantia intellectualis, arbitrio libera, incorporea, Deo ministrans, secundum gratiam, non naturam immortalitatem suscipiens*: in qua definitione omnes Angeli conueniunt; ergo si conueniunt in vna definitione, conueniunt in vna specie; quia, vt ait Boetius 7. *Metaphys.* sola species est, quæ definitur. *Respond.* disting. antecedens, Angeli conueniunt omnes vna definitione, explicante rationem speciei subalternæ, concedo, speciei infimæ, nego. *Definitio* autem tradita à Damasceno, non explicat speciem infimam Angelicam, sed speciem subalternam, & valde communem: quando autem dicitur, quæ conueniunt vnica definitione, conueniunt specie; est distinguendum, conueniunt specie specialissima, nego; abstrahendo à specie infima, vel subalterna, concedo; & hæc species, quæ abstrahit à specie infima, & subalterna, est, quæ definitur.

Dices VI. Imperfectior differentia generis multiplicatur in plures species, quàm differentia perfectior; vt patet in rationali, & in irrationali contentis sub animali; nam irrationale multiplicatur per species quasi innumeras; rationale verò non multiplicatur; ergo si, aliqua ex his differentiis, nempe substantia spiritalis vnibilis corpori, vt est anima rationalis, & substantia spiritalis non vnibilis corpori, vt est Angelus, deberet multiplicari; potius deberet hoc facere differentia, imperfectior, quæ est anima, quàm Angelus; sed anima non multiplicatur; ergo,

neque Angelus. *Respond.* in primis possem negare antecedens; nam non est vniuersaliter verum; differentia enim corporis sunt animatum, & inanimatum, imperfectior differentia est inanimatum; & tamen plures videntur species corporum animatorum, quàm inanimatorum, præcipue si corpora cælestia sunt animata. Secundo, diuisio facta ab Aduersarij substantia spiritalis, quæ se habet tamquam genus, in substantiam spiritualement vniibilem corpori, & in substantiam spiritualement non vniibilem corpori, non est per partes æquales. Et si dicunt, oppositorum eadem est ratio, & disciplina: est verum, si cætera sunt paria, & secundum id, in quo opponuntur. Dico igitur, quod minor perfectio substantia spiritalis vniibilis corpori, minus arguit varietatem specificam, & maior perfectio substantia non vniibilis corpori arguit potius varietatem specificam.

Dices VII. Si posset vna species esse tantum vnius Angeli, sequeretur, quod deficiente moraliter Angelo per peccatum, deficeret tota species moraliter; sed species est physicè indefectibilis; ergo etiam moraliter. *Respond.* Per hoc, quod species sit physicè indefectibilis, non sequitur, quod sit etiam moraliter indefectibilis; disparitas est, quia deficiente, physicè specie, rerum ordo non esset perfectus; careret enim specie debita; non verò deficiente moraliter; cum defectus moralis abundè compensetur per exercitium iustitiæ in pena: & sic non est contra perfectionem vniuersi existentia peccatorum; nam Deus, vt ait S. P. Augustin. non permitteret peccatum, si malum peccati non esset alijs bonis compensaturus.

Dices VIII. In Angelis est vera societas, & amicitia; sed hæc non est, nisi inter similes, ergo Angeli non differunt sola specie. *Respond.* negando minorem in sensu, quo intelligunt Aduersarij; attenditur enim in cælis amicitia penes gratiæ, & gloriæ dona, in quibus omnes conueniunt.

Dices IX. Duæ gratiæ habituales, visiones beatificæ, &c. differunt numero; & tamen nullum dicunt ordinem ad materiam; ergo falsa conclusio. *Respond.* negando consequentiam, antecedens etiam est falsum; quia licet non dicant ordinem ad materiam realiter sumptam; dicunt tamen ordinem ad ipsam æquiualentem acceptam; cum enim sint formæ receptibiles, dicunt ordinem ad materiam æquiualentem acceptam; cum subiectum, quod illas recipere debet, exigit numericam pluralitatem earum,

Dices X. Materia distinguitur numero, & multiplicatur per se ipsam, sine respectu ad aliam materiam; ergo etiam Angelus. *Respond.* negando consequentiam; disparitas est; quia materia prima, & quantitas important essentialiter multipliciter partium homogenearum; Angelus verò est incapax multiplicabilitatis, quæ ex diuisione quantitativa procedit; cum sit indiuisibilis, indeterminabilis, &c.

Dices

Dices XI. Si species Angelorum nō esset numero multiplicabilis, sed vnus Angelus esset solus in vna specie; sequeretur, quōd eius natura, neque esset vniuersalis, neque species. *Respond.* concedendo totum, quid contra nos? illa enim natura, neque esset vniuersalis, neque species prædicabilis, sed subieciibilis generi; quatenus esset natura perfecta sub suo genere. *Nec valet dicere;* natura humana à nostris singularitatibus abstracta, est specifica, & vniuersalis; ita & natura abstracta ab Angelorum differentiis. *Quia* Angelorum differentiæ sunt formales, & forma Angelica est indiuidua; quia est incommunicabilis, & inreceptibilis; natura autem esset receptibilis.

Vtrum de potentia Dei absoluta possint Angeli intra eandem speciem multiplicari?

Visum sufficienter est, meo iudicio, Angelos, seu substantias spirituales, incorruptibiles, completas, ac simplices actu specie differre, & consequenter esse numero inmultiplicabiles: videndū igitur in præsentī est, vtrum implicet omnino contradictionem, posse plures Angelos solo numero in eadem specie infima differre, sicut differunt homines, & animæ rationales; an verò de potentia Dei absoluta possint Angeli intra eandem speciem multiplicari?

Sunt aliqui ex Thomistis, vt Bannez, Ferrariensis, & alij, qui putant, quōd licet spectata exigentia naturæ, sit impossibile, quōd Angeli in eadem specie infima multiplicentur solo numero; de potentia autem Dei absoluta non implicat: licet autem hæc sententia probabilitate non careat; probabilius tenendam censeo contrariam sententiam, asserentem; Nec de potētia Dei absoluta posse Angelos intra eandem speciem multiplicari. Hæc conclusio deducitur manifestè ex prima, vbi ostensum fuit, quōd Angelus est substantia spiritualis, simplex, completa, & incompleibilis, determinata, & indeterminabilis; cum excludat partes essentialiter incōpleras; & consequenter est numero inmultiplicabilis; cum enim sit integraliter simplex, & nullum dicens ordinem ad materiam, non potest diuidi in plura indiuidua, & sic est numero inmultiplicabilis: hoc posito sic probo, benè nos deducere, & inferre ex hac conclusione, nec de possibili posse Angelos intra eandem speciem multiplicari; Nam multiplicabilitas numerica speciei est proprietas emanans, & procedens ex ordine ad materiam; conuenit enim omnibus, & solis rebus habentibus materiam, vel dicentibus ordinem ad ipsam; sicut rugibilitas est proprietas leonis, & innibilitas equi; ergo sicuti implicat fingere posse dari de potentia Dei absoluta animal, quod sit rugibile, & non sit leo, vel quod sit innibile, & non sit equus: ita etiam implicabit dari de possibili, Angelos non dicentes ordinem ad materiam, & esse numero multiplicabiles; vindicaret enim Angelus proprietatem solius rei materialis,

lis, vel dicentis ordinē ad materiam: cum ipse, ut supra visum est, neque materiam, neque ordinem ad ipsam includat: cum sit substantia spiritalis, completa, integraliter simplex, determinata, & indeterminabilis: & cæteris paribus se haberet Angelus respectu multiplicabilitatis numericæ, ac illud terrium animal, quod non esset leo, etiam si rugibilitatem haberet; nam substantia Angeli esset numero multiplicabilis, absque eo, quod materiam, vel ordinem ad ipsam habeat.

Circa mentem Angelici Præceptoris: Puto cum pluribus Thomistis S. Doctorem stare potius pro nostra sententia; cum semper docuerit species Angelicas esse essentialiter numericè inmultiplicabiles; quidquid sentiant in oppositum alij: *prima enim parte quasi. 75. art. 7. in corp.* loquendo de substantijs incorporeis hæc habet, *Quia cum non sint composita ex materia, & forma, sed sint forma subsistentes; manifestum est, quod necesse erit in eis esse diuersitatem in specie: sed implicat de potentia Dei absoluta, Angelos dicere ordinem ad materiam, ergo etiam in eis non esse diuersitatem in specie: & lib. 2. Metaphys. sect. 11. ait: Substantia verò, quæ sunt forme tantum subsistentes, non habent aliquid, per quod indiuiduentur, quod sit extra rationem speciei, significantem quidquid est: sed si de potentia Dei absoluta possent numero multiplicari, iam verificaretur, quod haberent aliquid, per quod indiuiduentur, quod sit extra rationem speciei; ergo expressè impugnant sententiam D. Thomæ.*

Aduersarij, qui putant rationem desumptam ex immaterialitate non inferre absolutam implicantiā contradictionis, sed solū secundum exigentiam talis naturæ: afferunt præ alijs ad impugnamdam nostram conclusionem testimonium illud D. Tho: desumpt. ex opusc. 16. contra Auerroistas, vbi incipiens soluere eorum argumenta, hæc habet: *Valde ruditer argumentantur ad ostendendum, quod Deus facere non possit, quod sint multi intellectus eiusdem speciei, credentes hoc includere contradictionem; nihil enim prohibet aliquid non habere in sua natura causam alicuius; quod tamen habeat illud ex alia causa; ex quo loco inferunt Aduersarij; si D. Thom. arguens contra Auerroistas, qui putabant intellectum ob eius immaterialitatem numero multiplicari, dicit non includere contradictionem: hoc idem dicendum de Angelis. Respond. Auerroes posuisse intellectum vniuersalem, seu vnā animā assistentem, non informantem; voluit tamen eum habere aliquem ordinem ad materiam ratione cuiusdam continuationis cum phantasmatibus, à quibus dicebat, pendere in intelligendo, & ponebat dictum intellectum incorruptibilem, & sufficientem ad discurrendum, per assistentiam in omnibus, & singulis hominibus. Ergo benè Angelicus Doctor intulit contra illum: valde ruditer argumentatum esse, cum docuit, quod intellectus ille, qui ratione incorruptibilitatis inmultiplicabilis erat naturaliter, sic etiam supernaturaliter esse debuerit; cum enim Auerroes non negaret talem intellectum dicere ordinem ad materiam ratione continuationis, ut diximus,*
non

non benè negabat postea talem intellectum, saltem diuinitus, non esse numericè multiplicabilem.

Purantes aliqui ex recentioribus Thomistis non implicare contradictionem, posse plures Angelos in vna specie infima multiplicari, sed solum spectata exigentia, & connaturalitate rei; sic arguunt contra nostram conclusionem: Ratio, quare anima rationalis est multiplicabilis numero, est, quia anima rationalis non nisi partem huius materiæ informat; non verò totam; hinc fit, ut ceteræ partes materiæ, quæ sunt eiusdem rationis cum parte informata, retineant naturalem suam inclinationem, & appetitum ad animam rationalem; contra verò, formæ cælorum non sunt numero multiplicabiles in vna specie; quia forma vnus cæli totam suam materiam occupat, quæ non est eiusdem rationis cum alio; ergo cum Angelus, seu essentia Angeli non habeat aliam materiam, nisi suam entitatem singularem, quam totam actuat, nec datur extra ipsam alia potentia naturalis, quæ dicat ordinem ad ipsam, sequitur, non esse in tali natura vllam exigentiam naturalem, aut inclinationem ad multiplicabilitatem numericam; sed Deus potest facere contra exigentiam naturalem rei creatæ; ergo &c. Hic est totus discursus horum recentiorum, asserentium, esse de potentia Dei absolutam substantiam Angelicam numero multiplicabilem.

Sed meo iudicio nullum video in hoc argumento solidum fundamentum, vnde possint moderni isti hanc deducere consequentiam; supponunt enim in primis, hanc formam multiplicari numero per ordinem, ad hanc numero materiam; illam verò per ordinem ad illam, quod est falsum; nam indiuiduationes formarum non sumuntur per ordinem ad vnam numero materiam; cum circa eandem numero materiam dentur plura accidentia numero distincta: Formas igitur materiales eiusdem speciei multiplicari numericè importat solum hoc, quod eo ipso, quod aliqua species formarum respicit materiam primam, tamquam subiectum, exigat habere sub se plura indiuidua solo numero distincta, tamquam proprietates emanans ab eius essentia: sicut calor, & siccitas in summo est proprietates profluens ab igne, rugibilitas à leone &c. ergo sicuti sine fundamento aliquis assereret, dari de possibili aliqua forma materialis, quæ exigat calorem, & siccitatem in summo, & non sit ignis, dari aliquod animal, quod sit rugibile, & non leo: ita etiam sine fundamento asserunt Aduersarij, Angelum, seu substantiam Angelicam esse de possibili numero multiplicabilem, & non dici e ordinem ad materiam. Negandum igitur semper est, substantiam completam, simplicem, sicut est Angelica, esse in specie infima innumplicabilem, solum spectata exigentia, & connaturalitate ipsius.

Arguunt II. Dicentes, si Deus non posset producere duos Angelos eiusdem speciei, restringeretur diuina omnipotentia; ergo &c. Respond. negando sequelam; multiplicatio enim specifica per se intenditur à natu-

ra, & est maior, quàm multiplicatio purè numerica, quæ per accidens intenditur; ergo nos, qui multiplicamus species, magis diuinam omnipotentiam dilaramus. II. Non posse Deum facere, quod est impossibile, iuxta dictamen suæ sapientiæ, non est diuinam omnipotentiam restringi; sed supposito conceptu differentiz specificæ, & numericæ, diuina sapientia dicat, Michaelē v.g. esse in sua specie vnicū, & implicare alios Michaelēs; ergo &c.

Arguunt III. Annihilato à Deo vno Angelo, potest Deus eius speciem reproducere in aliquo indiuiduo; sed non in eodem, qui erat antea; cum non possit idem numero Angelus reproduci in sententia Thomistarum; ergo in diuerso indiuiduo ab eo, quo erat antea; ergo sunt possible plura indiuidua sub eadem specie vltima naturæ Angelicæ. *Respond.* concedendo maiorem, & negando minorem; illud enim indiuiduum, foret illud idem, quod fuisset annihilatum: & licet annihilata anima, rationali non possit idem numero homo resurgere; benè tamen iterum, creari, suè reproduci potest; disparitas est; quia resurrectio requirit partem ipsius hominis, scilicet animæ rationalis; quam neque requirit iterata creatio, neque reproductio.

Arguunt IV. Si daretur indiuiduum, cui non posset creari aliud simile, erit profectò tale indiuiduum infinitum; quia absorberet omnem possibilem perfectionem: sicut si daretur quantitas, cui non posset dari alia similis, vtique esset infinita. *Respond.* negando sequelam; esset enim magnum discrimen inter hoc indiuiduum, & quantitatem; nam si daretur quantitas, cui nullum superest indiuiduum extra ipsam positum à parte rei, esset vtique infinita; cum defectò quantitas sit in infinitum multiplicabilis, & eius indiuidua possint facere vnum extensiuè; quod non currit in casu nostro; cum non sit supponendum possible esse alia indiuidua similia indiuiduo, de quo loquimur.

Arguunt V. Potest dari vnus Angelus, qui sit æqualis perfectionis, & virtutis cum alio Angelo; sed hoc ipso essent eiisdem speciei infimæ; ergo &c. *Resp.* maiorem esse falsam, & negandam in sententia eorum, qui sustinent æqualitatem perfectionis, & virtutis stare non posse cum diuersitate specifica; si autem partem affirmatiuam tenes, concessa maiori, neganda est minor, & consequentia.

Arguunt VI. Si non posset de possibili natura Angelica numero multiplicari; sequeretur, quod esset essentialiter indiuidua, & singularis, quod implicat; quia esset actus purus, sicut est natura diuina, quæ formaliter sibi identificat singularitatem. *Respond.* negando minorem, & causalem eius. Ad illud, quod additur de natura diuina, dico, non ideo Deus est actus purus, quia solum identificat sibi singularitatem; sed quia etiam formaliter, & essentialiter identificat sibi existentiam; atque adeò est omnis potentialitatis expers: è contra v.ò natura Angelica, licet sit essentialiter singularis, vt potè inreceptibilis in materia, nō identificat

tificat sibi existentiam ; sed comparatur ad suum esse, sicut potentia ad actum : & sic nullo modo est actus purus.

Arguunt VII. In Angelorum speciebus debet dari aliqua, quæ sit omnium infima, sicut, & aliqua, quæ sit omnium suprema ; ne procedatur defacto in infinitum in speciebus Angelorum ; sed nulli speciei infimæ repugnat communicari pluribus ; ergo, neque habere sub se plura inferiora solo numero distincta. *Respond.* concedendo maiorem, ad minorem dico, vel Aduersarij loquuntur de communicabilitate speciei infimæ, siue quidditatis, quæ sit cum limitatione in suis ad certum gradum suæ perfectionis, & dicitur communicabilitas naturæ vniuersalis respectu suorum inferiorum : hæc autem repugnat cuilibet speciei infimæ Angelorum, propter eius perfectionem : vel loquuntur de communicabilitate, quæ sit absque limitatione naturæ ; idest sine diuisione essentiæ ad certum gradum suæ perfectionis ; quo pacto natura, siue quidditas diuina dicitur communicabilis tribus personis : hæc autem repugnat etiam naturæ Angelicæ, vt de se patet ; cum non sit actus purus, qui est summa perfectio : vel denique loquuntur de communicabilitate, quæ sit per assumptionem alicuius naturæ ad hypostaticam vnionem ; sicut natura humana dicitur communicabilis tribus personis. Hæc autem communicabilitas conuenit Angelis ; cū possit natura Angelica assumi ad vnionem hypostaticam à qualibet ex personis diuinis ; sed quid contra nos ? quomodo ex hoc potest inferri possibilitas plurium Angelorum solo numero inter se sub illa specie differentium ? ad argumentum igitur, explicata hoc modo minori, negatur consequentia.

Notabis I. Pro complemento eorum, quæ dicta sunt circa quæstiones de multiplicabilitate Angelorum ; Quod ad hoc, vt Angelus inferior cognoscat superiorem, sufficit, quod conueniat in eodem gradu immaterialitatis. II. Natura specifica in Angelis est identificata cum sua singularitate. III. Per hoc, quod in Angelis non detur materia, non sequitur, quod neque in ipsis possit dari vnus Angelus, nempe Gabriel v. g. ratio est, quia materia est tantum principium pluralitatis indiuidualis, & indiuiduationis ; non tamen est principium illius indiuiduationis, quæ est etiam species ; nam hæc habetur per hoc, quod forma sit per se completa, determinata, & indeterminabilis, & subsistens &c. IV. Si Deus crearet animas sine ordine ad corpora, non multiplicarentur numero ; quia non essent amplius animæ, sed substantiæ completæ ; ac proinde Angeli, & sic multiplicarentur specie. V. Differentia specifica in Angelis habet duo munera inadæquata, solum ex parte nostri modi concipiendi distincta ; scilicet constituere essentialiter naturam v. g. Gabrielis, & reddere eam hanc numero, & singularem, ac pluribus inferioribus incommunicabilem ; quia vt supra diximus, indiuiduatio, quæ est in Angelis, est sine multiplicatione naturæ ; quæ indiuiduatio, neque exigit materiam, neque ordinem ad illam ; vt patet in Deo, qui habet in-

indiuuationem, & singularitatem sine vlla materia, & ordine ad illam; & sine aliqua capacitate multiplicationis. VI. Quando Thomistæ afferunt, ad distinctionem numericam sufficere subiectum; loquuntur de distinctione numerica accidentium; non verò substantiarum, quas volunt indiuuari à materia signata quantitate, vel ex ordine ad illam; vt declaratum sufficienter est.

Remanet solum explicare aliqua loca SS. PP. quæ non rectè considerata, videntur esse contra nostram sententiam: Et I. est testimonium S. P. N. August. in *Enchirid. cap. 29.* dicentis, quòd *Deus idem reparauit hominem; quia tota species perierat: non reparauit Angelos; quia tota species illorum non perierat.* Respond. quòd S. P. non loquitur de specie, & essentia Angelorum in esse essentia ipsorū; sed pro vt ordinantur ad beatitudinem. II. est D. Arhanasij, qui opusc. ad *Antiochum* dicit: *Vna, & eadem est essentia Angelorum, sicut etiam vna est essentia hominum.* & D. Anselmus lib. 2. *Cur Deus homo, cap. 21.* inquit, *Omnes Angeli sunt vnius naturæ.* Respond. quòd isti SS. PP. & alij, nomine *speciei*, *naturæ*, aut *essentia*, non intelligunt speciem infimam, sed subalternam; aut conuenientiam in gradu puræ intellectualitatis; quamuis intra latitudinem istius naturæ intellectualis specie differant inter se. Sicuti quando idem D. Arhanasius dixit, quòd Angelorum, Archangelorum, &c. vna est essentia, sicut vna est essentia hominis: Non debet intelligi cum omnimoda similitudine; sed cum quadam proportionem; nimirum, quòd sicut natura rationalis est communis omnibus hominibus; ita vna natura intellectualis est communis omnibus Angelis; quamuis non eodem modo. III. est Nisienti lib. de opific. hominis cap. 17. vbi dicit, loquendo de Angelis, *Ad infinita propè millia se esse diffusos, vt & vna natura, & multi esse numero possunt.* Respond. quòd non constat, illum loqui de multitudine numerica ad sensum philosophicum, quo sensu multa numero dicuntur illa, quæ sub eadem specie infima multiplicantur; sed loquitur de multitudine numerica latè sumpta; quomodo etiam si stellæ omnes differant specie, nihilominus multæ numero dicuntur.

Vtrum Angeli sint incorruptibiles, & ab intrinseco indestruibiles?

Pro decisione quæstionis est aduertendum, posse dupliciter intelligi Angelos esse ab intrinseco incorruptibiles: primò in ordine ad potentiam Dei absolutam; taliter, vt semel creati, nec à Deo possunt destrui; & sic essent per Dei potentiam absolutam indestruibiles; secundò in ordine ad potentiam ordinariam; ita vt semel producti exigant ex suis intrinsecis semper esse; vnde Deus operans, vt auctor naturæ, non possit illos destruere.

Prima conclusio : Angeli non sunt incorruptibiles , & indestruibiles primo modo, scilicet in ordine ad potentiâ Dei absolutam; sed posset omnino Deus ipsos, & omnē aliam creaturam annihilare si vellet. Hæc conclusio est certa de Fide , & habetur in script. D. enim Paulus 1. ad *Thimoth.* 6. de Deo loquens , sic ait, *Qui solus habet immortalitatem*: id est cui soli impossibile simpliciter est non esse : Ostenditur etiam hæc veritas ratione . Quia creatura ista essentialiter indestruibilis semel posita ita petit esse ; vt nullo modo Deus possit liberè impedire eius conseruationem ; vnde peteret necessariò esse ; ergo excluderet necessariò exercitium diuinæ liberalitatis , & prouidentiz ; nam in conseruari non penderet à liberalitate , nec libertate Dei ; cum conseruatio sit effectus immediatus diuinæ liberalitatis , & prouidentiz. In hac autem conclusione probanda non multum immoror ; cum de ipsa satis abundè agatur in Philosophia , ad quam lectorem remitto : inferimus solum ex dictis , Angelos in ordine ad Dei potentiam absolutam esse destruibiles , & annihilabiles .

Secunda conclusio : Angeli sunt ab intrinseco naturaliter incorruptibiles , & indestruibiles ; hæc conclusio est communis inter Theologos, & expressè eam docent SS. PP. inter quos D. Dionysius c. 4. de *Diuinis nominibus*, docet, *Intellectuales substantias vitam habere indeficientem, & ab vniuersa corruptione, morte, & materia, & generatione mundas existere* : ex quo ostenditur , Angelos non esse natura sua labiles , & exigentes durare ad determinatum tempus , post quod non exigant amplius durare , sed esse ex intrinseca sua natura , subindeque per aliquam potentiam ad esse in illis existentem , (& non per solam gratiam, vt putauit Scotus) indestruibiles , & incorruptibiles .

Probatur conclusio ratione , Angelos scilicet esse intrinsecè , & naturaliter incorruptibiles, & indestruibiles ; Si enim Angeli non essent ab intrinseco , & naturaliter incorruptibiles ; vel esset , quia ex suis intrinsecis haberent contrarium , & causam defectibilem ; vel quia non exigent positiuè , & ab intrinseco semper durare ; sed neutrum accidit in Angelis ; ergo & c. maior est certa , minor probatur per singula : in primis non habent contrarium ; cum enim Angeli minimè substantialibus contrarijs , & dependeant à solo Deo , non habent ex suis intrinsecis contrarium , à quo possint destitui : neque habent causam defectibilem creatam , à qua possint destitui ; nam hic modus destructionis non est , nisi per productionem formæ impossibilis in aliqua materia ; sed Angelus caret tali materia , quæ sit capax formæ impossibilis ad suâ essentiam ; cum sit substantia simplex ; ergo non potest intelligi substantialiter destitui per causam defectibilem creatam. Quod verò Angelus exigit positiuè semper durare , & consequenter esse natura sua , seu naturaliter incorruptibilis , & indestruibilis , probatur ; Quia Angelus est ens intellectuale naturaliter felicitabile , vt est certum ; sed quod est hu-

D d

iustmo-

iusmodi, est ab intrinseco indestruibile, & ex natura sua æternum; nam ordinatur ad finem connaturaliter æternum, & à se participabilem, nempe felicitatem naturalem, de cuius conceptu est æternitas: cum verum sit, quòd illud, quod ex natura sua ordinatur ad finem naturaliter æternum à se participabilem, sit natura sua æternum; aliàs non esset natura sua aptum ad finem, ad quem ex natura sua ordinatur; ergo Angelus existit positivè semper durare, & consequenter esse immortalem: eo modo, quo ignis existit comburere, & solum esse destruibilem, eo modo, quo ignis approximatus potest à Deo impediri, ne comburat.

Dices, Angelus habet non repugnantiam, ut possit per absolutam Dei potentiam desinere, & destrui; ergo est ex natura sua absolute corruptibilis, & destruibilis. *Respond.* negando consequentiam, quia ista non repugnantia non est aliquod positivum, & connaturale ipsis Angelis; alioquin sequeretur, quòd non esset connaturale Angelis habere species insulas; cum possint de potentia Dei absoluta illas non habere: nec homini esset connaturale actu ridere; cum habeat non repugnantiam ad non ridendum.

Instabis I. Hæc non repugnantia, quam habet Angelus, ut à Deo annihilaretur, est potentia intrinseca ad non esse; aliter Deus annihilando Angelum, inferret illi violentiam; quia faceret contra naturalem eius inclinationem; cum petat connaturaliter conservari in esse; ergo Angelus est ab intrinseco, & ex natura sua corruptibilis. *Respond.* negando antecedens, nec Deus annihilando Angelum inferret illi violentiam; quia licet tunc faceret Deus contra inclinationem particularem, quam habet Angelus ad semper durandum; non tamen faceret contra inclinationem uniuersalem, quam, ut pars uniuersi, habet ad obediendum Creatori; cum in Angelis, licet negetur potentia naturalis ad non esse, seu ad annihilationem; est tamen in eis potentia obedientialis, qua quilibet creatura subditur Deo, ad hoc, ut de ea, & in ea faciat, quidquid non implicat contradictionem, ut melius videbitur in tract. de Sacramentis in genere, ubi agendum erit de potentia obedientiali ad quodlibet, alioquin non implicans fieri.

Instabis II. Res possibilis non dum existens, est natura sua producibilis; ergo res existens, & possibilis corrumpi, debet dici natura sua corruptibilis; sed Angelus est res existens, & possibilis corrumpi; ergo est natura sua corruptibilis. *Respond.* negando consequentiam, disparitas est; quia in creatura comparata ad primam causam, potentem illam producere, nihil fit contra eius inclinationem particularem; sicut fieret, comparata ad primam causam, ut potentem illam annihilare.

Urgebis, Multi SS. PP. asserunt, Angelos esse incorruptibiles ex gratia; ait enim Damascenus 2. lib. *Fidei Orthodoxa cap. 3.* Angelus est substantia per gratiam, non per naturam, immortalitatem consecuta. ergo falsum est, Angelum esse natura sua incorruptibilem. *Respond.* quòd SS. PP.

nomine, *gratia*, intelligunt liberum, & gratuitum Dei influxum, quo sicuti illis contulit esse de nihilo; ita per illud perpetuò in eodem esse eos conseruat: Sicuti quando SS. PP. negant, animas, & Angelos immortales esse per naturam; loquuntur de immortalitate perfectissima, & per essentiam, ut potè à nullo alio dependente, quæ solius Dei est propria: vnde vtrò concedimus, Angelos non esse entia necessaria positiue, & ab intrinseco; possunt solum dici entia necessaria extrinsecè, & supposita creatione eorum. Est igitur adeò certa hæc conclusio, quæ est D. Tho: ut asserere Angelos suapte natura esse corruptibiles, sit periculosum in fide: sicut etiam est error in fide, negare, quòd Angeli, sicut & animæ rationales, & post diem iudicij homines, numquam sint interituri. Durabunt igitur in perpetuas æternitates, & præmium; ac supplicium bonorum, ac malorum hominum, sicut & Angelorum erit æternum; iuxta illud *Matth. cap. 25. Discedite à me maledicti in ignem æternum, qui paratus est diabolo, & angelis eius: & in eodem capite; Ibunt hi in supplicium æternum, iusti autem in vitam æternam.*

Vtrum Angeli assumant corpora, & exerceant opera vita?

Suppono hic I. cum D. Tho; tamquam certum, Angelos non habere absolutè corpora naturaliter sibi vnita. II. Corporales Angelorum visiones, quæ in scriptura narrantur, non fuisse solum per immutationem imaginationis; aut etiam sensuum externorum factam in eis, quibus se se ostendebant, absque existentia alicuius corporis à parte rei: quoniam quæ per immutationem solius potentiæ apparent, non conspiciuntur ab omnibus indifferenter, qui præsentés sunt; & tamen de Angelo, qui luctabatur cum Iacob, & Raphael, qui comiratus est Tobiam, & alijs, de quibus meminit scriptura, legitur, quòd ab omnibus videbantur, loquebantur, &c.

Est igitur sententia D. Thomæ, & communis sensus ferè omnium scholasticorum, Angelos propriè assumere aliquod corpus; hoc autem non fit, ut falsò putauit Tertullianus, & Origenes, vniendo corpora sibi hypostaticè; absurdum enim est asserere, passim fieri, & sine vlla necessitate opus tam mirabile, & ut singulare habitum, & prædicatum in Verbi Incarnatione. Neque fieri potest per informationem substantialem: quoniam Angelus est substantia completa; ergo non potest esse forma substantialis informans. Neque per vniionem accidentalem motoris ad rem, quam mouet; quis enim dixit, Angelos celorum motores, quamuis sint illis vniti accidentalitèr, ut motores assumere celos?

Dicendum igitur censeo, Assumptionem hanc fieri per vniionem accidentalem, non solum motoris ad rem motam; sed etiam, ut assumentis tale corpus, ad hoc, ut eo utatur, vel ad se ipsum manifestandum, vel aliam, cuius personam gerit, assumens: hæc autem corpora assumpta,

docet communis sententia, formari ex aere, talitèr disposito, vt condensari possit in talem figuram: idest non fieri ex aere puro, sed condensato, admissis vaporibus, efalationibus, & similibus mixtis imperfectis. Hæc autem corpora formantur propria virtute ab ipsismet Angelis. Existimat iussu P. Molina probabile, colores, qui in huiusmodi corporibus assumptis apparent, interdum esse veros; interdum verò solum apparentes ex luminis susceptione: & licèt huiusmodi corpora assumpta, neque caro sint, neque ossa habeant; similitudinem tamè carnis, & ossium, quo ad colorem, interdum habent; illa autem mollities, durities, &c. sunt ab Angelis per condensationem, & rarefactionem iuxta supradicta.

Quæres, An Deus aliquando simile corpus assumpsit? *Resp.* cum D. Tho: & communi Theologorum sententia, Deum neque in nouo, neque in veteri testamento assumpsisse corpora, eo modò, quo Angeli assumunt: quando igitur narratur, Deum tradidisse legem Moysi, loquutum cum Moysè facie ad faciem, & similia: vult S. Doctor, apparitiones illas semper fuisse factas ministerio Angelorum. Hoc idem dicendum, quando Spiritus sanctus apparuit super Christum in specie Columbe, & in die Pentecostes super Apostolos in specie linguarum; fuerunt scilicet corpora illa formata ministerio Angelorum, vt vult S. P. Aug. *lib. 2. de Trinitate cap. 6. & lib. 4. cap. ultimo*: & *Epist. 102.* Non fuerunt igitur illa corpora, neque assumpta à Spiritu sancto, neque ab Angelis: licèt Spiritum sanctum repræsentarent præsentem; cum non fuerint formata, nec mora à Spiritu sancto, tamquam à causa particulari: indè fit non fuisse assumpta à Spiritu sancto, neque ab Angelis; eo quod non eorum personas, sed Spiritus sancti repræsentabant.

Circa secundum dubium, vult communis sententia, Angelos exercere posse motum localem, & ea, quæ immediatè ad illum sequuntur; quinimo, & alias operationes communes animatis, solum materialiter, non formaliter; quatenus actiones vitales sunt: prima pars ostenditur: Quæ enim implicantiæ in hoc, quòd comestio, quatenus significat fractionem, & receptionem cibi in ore, & transmissionem ad inferiorem partem, posse fieri ab Angelo, posse loqui item materialiter, idest emittendo sonos similes vocibus, percutiendo aerem? &c. Secunda pars, in qua dicebatur, non posse Angelos in corporibus assumptis prædictas operationes, & similes efficere formaliter, vt vitales sunt, patet; quia Angeli non sunt principia vitalia intrinseca: vnde nec comedere, nec loqui formaliter possunt, quatenus actiones vitales sunt; neque calorem, neque frigus possunt facere per se; sed solum per motum, applicando actiua passiuis. Comestio Christi Domini post Resurrectionem, fuit vera; vt vult D. P. N. August. *13. de Ciuit. Dei cap. 22.* & licèt cibus in substantiam ipsius non conuerteretur; quantum tamen erat ex natura humana Christi Domini poterat conuertere cibum; in corporibus autem assumptis non ita euenit;

De Loco, & Motu Angelorum.

Quanam sit in Angelis proxima ratio existendi in loco?

Suppono tamquam certum in Fide Catholica, (ad maiorem quæstionis dilucidationem) Angelos, seu substantias separatas verè esse in loco; Angeli enim beati verè, & realiter secundum suam substantiam sunt in cœlo: sicuti nullum est dubium, dæmones, partim in inferno, partim esse in hoc aere; ergo Angeli, seu substantiæ separatae verè sunt in loco per realem præsentiam, seu propinquitatem ad locum: inferius autem videbitur per quid formaliter substantia Angeli constituatur in loco. Quando autem Aristoteles 1. de Celo tex. 100. dixit, *Substantias separatas non esse aptas esse in loco*: intellexit circumscriptivè, seu per commensurationem cum loco: sicuti quando D. Tho: dixit, Angelos æquivocè esse in loco: non loquitur de reali præsentia, & propinquitate, secundum propriam substantiam; sed de vera, & propria ratione existendi in loco, de qua re infra: apertissimè enim concedit D. Tho: præsentiam substantiæ Angelicæ, docens, Angelos esse in corporibus assumptis; & cum non sint ubique, sicuti Deus; moveri per accidens ad motum corporum assumptorum.

Suppono II. Angelum esse in definito, & limitato loco secundum realem præsentiam propriæ substantiæ, modo dicto; ita ut, quando vni loco est præsens, ab alijs distet secundum realem præsentiam; asserunt enim SS. PP. communiter, Angelos ita esse in vno loco, ut non sint in alio, & quando mittuntur à Deo in terram, non esse in cœlo. Et si aliquando videantur asserere, Angelos esse ubique; id tantum dicunt, ut significant summam velocitatem motus Angelorum, qua ferè momento ubique esse possunt.

Ad decidendum autem, quanam sit ratio proxima in Angelis existendi in loco? oportet prius prænotare, quæstionem non solum procedere de loco corporeo naturali, in quo dicitur Angelus existere naturaliter, idest ad quem liberè se applicat Angelus per actum suæ voluntatis, & quem sibi subiecit; sed etiam de loco corporeo præternaturali, & violento, in quem Angelus præter, seu contra suam voluntatem collocatur, qualis est locus dæmonum.

II. Est notandum, Angelum essentialiter indigere aliqua vbiacatione, per quam constituatur formaliter intimè inadequatè præsens divinæ immensitati, quæ dicitur præsentia metaphysica, seu locus intrinsecus, per quem penetratur quælibet res creata divinæ immensitati; & talis præsentia, seu vbi, est quædam forma positiva creata realiter distincta, tum à corpore locato, tum à loco, vel à quolibet alio; ut suppono ex Philosophia. Præter hanc præsentiam metaphysicam, possumus nos

admittere in Angelo quamdam præsentiam physicam, qua videlicet respiciat corpus aliquod, & illi suo modo affigatur; idest sit realitèr præsens corpori, quod dicitur locus.

III. Quando inquirimus, quænam sit in Angelis ratio proxima existendi in loco; non inquirimus per quid formaliter proximè Angelus constituatur in loco; cum certum supponam hanc esse vocationem ipsius Angelis; sed quæstionem procedere de ratione causali, & fundamentalis; & inquirimus, quænam sit ratio causans, & fundans rationem formalem, & formaliter constitutivam Angeli in loco siue naturali, siue violento?

Dico cum communi Thomistarum sententia, Angelum esse physicè in loco connaturali per operationem virtualiter transeuntem, atque adeò per contactum virtutis in actu secundo, taliter, quòd talis operatio virtualiter transiens sit ratio formalis, immediatè fundans vocationem Angeli in loco connaturali. Hanc sententiam docet Angelicus Præceptor adeò expressè ut nullus remaneat locus dubitandi; ait enim *in distinct. 37. quæst. 3. ad primum. Angelus est in loco, quatenus operatur circa aliquod corpus locatum, vel motum, vel lumen, vel aliud huiusmodi. & 3. contra gentes cap. 68. ait, Res corporea est in aliquo, sicut in loco secundum contactum quantitatis dimensionis; res autem incorporea in aliquo esse dicitur secundum contactum virtutis; cum careat dimensionis quantitate.*

Probatur Conclusio ratione. Quia illa est ratio formalis immediatè causans, & fundans vocationem Angeli in loco connaturali, quæ fundat præsentiam realem, & physicam indistantiam loci cum Angelo; sed hoc nihil aliud melius facit, nisi operatio Angeli virtualiter transiens, seu contactus virtutis in actu secundo; nam non potest hoc facere substantia ipsius Angeli, ut putant aliqui; quia cum hæc sit invariabilis, non potest facere, ut Angelus sit modò in maiori, modò in minori spatio, dicente D. Tho: *Locus Angeli potest esse divisibilis, vel indivisibilis, aut magnus, vel parvus, secundum quod operatio eius immediatè ad magnum, vel parvum terminatur. Neque potest hoc facere diversa voluntatis Angeli applicatio; nam licet voluntas possit facere, quòd Angelus potius sit hic, quàm alibi; non autem quòd ipse occupet maius, vel minus spatium, si remaneat eadem indivisibilis ratio locandi. Neque denique potest esse modus aliquis unionis, productus per liberam Angeli voluntatem, quo loco corporeo unitur; quia talis modus unionis productus supponit operationem, qua liberè ab Angelo producat; ergo, vel erit ipsamet operatio virtualiter transiens, vel debet supponere talem actionem; ergo à primo ad ultimum concludendum est, rationem formalem immediatè causantem, & fundantem vocationem Angeli in loco naturali, esse solam operationem virtualiter transeuntem, seu contactum virtutis in actu secundo.*

Aduerte, me dixisse, contactum virtutis in actu secundo, esse rationem

nem formalem, fundantem vocationem Angeli; vt intelligas contactum virtutis in actu primo constituere incompletè, & materialiter Angelum in loco; formaliter autem, & completè constitui per contactum, & continentiam virtutalem, consideratam in actu secundo: sicuti substantia Angeli potest dici ad summum principium radicale essendi in loco, in quantum est radix operationis, & virtutis per quam est in loco.

Ex his colligitur ratio pro secunda conclusione, in qua videndum est, quomodo Angeli existant in loco præternaturali, & violento: Dicimus ergo, quod ratio formalis fundans vocationem Angeli in loco præternaturali, & violento est passio, seu passiva alligatio, qua spiritus ita detinentur, & alligantur; vt non permittantur, quinimò impediuntur, ne possint operari, vbi, & secundum quod volunt; eo ipso enim, quod vbiatio Angeli in loco naturali fundatur in contactu actiuo, quo Angelus per actionem transeuntem aliquod corpus effectiuè contingit, & sibi subiicit, ac subordinat: sequitur, quod eius vbiatio in loco violento debeat fundari in contactu passiuo, quo Angelus patitur, & alligatur ab aliquo agente; vt non permittatur operari, vbi vult, & secundum quod vult.

Impugnant I. Aduersarij hanc nostram sententiam illo decantato argumento, in quo plurimum fidunt, dicentes; Prius est rem esse in se, quam fieri præsens, & coexistens alteri; ergo prius est, Angelum esse in loco, quam ibi operari; cum omnis virtus finita prius natura intelligi debeat applicata corpori, & illi præsens, quam actu operari; si opere- tur immediatione suppositi, qualis est operatio Angeli. *Respond.* aliqui ad illud antecedens cum distinctione, prius est rem esse in se, quam fieri præsens, prioritate *à quo*, concedunt, prioritate *in quo* negant; prioritas *à quo* est prioritas per intellectum, & per abstractionem, seu præcisionem; sicut prioritas *in quo* est prioritas quædam realis: absurdum igitur, non est intelligere, rem esse, non intelligendo rem esse præsentem alteri; absurdum tamen est esse realiter, & in eodem instanti, & momento realiter; & non esse præsentem alteri.

Alij verò cum D. Tho: concesso antecedenti, distinguunt consequens; prius est Angelum esse in loco formaliter, & completè, quam ibi operari, negant, materialiter, concedunt: & sic dicunt, prius est, Angelum esse indistantem loco per contactum in actu primo, quam operari; sed hoc non facit, vt prius sit in loco secundum omnem conceptum essendi in loco, supra explicatum. Alij denique cum quibus stat P. Gonet, concedunt antecedens, & negant consequentiam: vnde dicunt, verum esse, quod prius est, Angelum esse, quam operari; posterius tamen est esse in loco, quam operari in loco: sicuti prius est, corpus esse, quam tangere; tamen posterius est, corpus esse in loco, quam corpus tangat locum: Angelus igitur, cum incipit operari in loco, constituitur in ipso; idest redditur præsens præsentia physica per ipsam operationem:

vnde

vnde licet requiratur ad præsentiam Angeli, quod Angelus sit; non tamen prærequiritur: sicut licet ad recipiendam animam requiratur corpus organicum; non tamen prærequiritur; sed ipso animæ ingressu fit organicum. *Insuper* licet prius concipiamus, Deum esse, quam operari ad extra, vel esse in creatura; non tamen est prius in creatura, quam operetur; inò prius operatur circa ipsam, quam sit in ea: vnde valde est consentanea ad solutionem huius argumenti illa prima responsio, & distinctio prioritatis *d quo, & in quo.*

Insurgunt Aduersarii, dicentes, In agentibus corporeis approximatior, unio, & immediatio agentis ad passum, est prior operatione; ergo etiam in agentibus spiritualibus. *Respond.* negando consequentiam, disparitas est; quia agens corporale, & passum sunt semper in loco ratione suæ quantitatis; & sic si distant localiter, non possunt ad inuicem approximiari, nisi per approximationem localem; & sic prius agens corporale, & passum in loco constituuntur, quam operatio in passum progrediatur: approximatior igitur, unio, & immediatio agentis ad passum, sita est, ad hoc, ut tollatur impedimentum distantie positivæ localis, impediens actionem, & passionem inter agens, & passum. Ceterum cum Angelus non sit determinatus ad existendum semper in loco proximè, & completè; cum possit cessare ab omni operatione; ideo in eo potest tolli impedimentum distantie ad passum sine approximatione locali; nam quantumcunque sit distans localiter ab aliquo passu, potest fieri indistans negatiuè; id est approximatior negatiuè; & sic esset in loco, sed non in illo, tamquam in loco; nam Angelus ubicumque est, est per applicationem virtutis; etiamsi nihil velit operari; & licet anima rationalis non possit esse præsens loco, nisi mediante corpore, cui vnitur; & corpus Christi, nisi mediante speciebus Sacramentalibus quantitativis, non sequitur, Angelum neque posse fieri præsens, nisi mediante unione ad corpus; quia unio Angeli ad locum, neque est informativa, sicut anima, neque Sacramentalis sicut corporis Christi; sed est unio operativa.

Insurgunt II. Si Angelus esset in loco per operationem, sequeretur quod si nihil operaret, non esset in illo loco; ergo esset nullibi. *Respond.* distinguendo sequelam; non esset in illo loco formaliter, & completè, concedo, incompletè, & materialiter, negos; in illo enim casu esset Angelus in illo loco per solum contactum virtutis actiui, quod est esse incompletè in loco; non autem per applicationem operationis, quod est esse complete: Hæc nimirum doctrina est maximè notanda ad soluenda plura argumenta, quæ fieri solent contra hanc sententiam. *Addo*, quod posita hac doctrina argumentum illud, quod estimatur efficax contra aliquos Thomistas, nempe si Angelus esset in loco per operationem, sequeretur Angelos non fuisse creatos in celo empyreo, neque nunc ibi esse, cum ibi nihil operentur ad extra. Hoc inquam argumentum per nos,

nos, non est magni momenti; nam dicimus, Angelos fuisse ibi creatos, & nunc esse, & futuros, esse ibi, taliter, ut si ibi aliquid operentur, ut putato probabilius, producendo lumen, vel quid simile, sunt in eo tamquam in loco completè; si verò nihil operentur, sunt in eo incompletè: nec est aliquid absurdi in eo, quòd Angelus ita sit in cælo empyreo, ut non sit ibi tamquam in loco formaliter, & completè in omni rigore physico: sufficit igitur, ut sit ibi; ut in loco materialiter, & incompletè per contactum virtutis in actu primo; quia quantum est ex se, possunt ibi operari, saltem ex imperio, & virtute diuina.

Insurgunt III. Si Angelus constitueretur completè, & formaliter in loco per operationem modo dicto, sequeretur, Angelum, qui mouet primam spheram, esse in tota illa spherâ, tamquam in loco; hoc non est dicendum; ergo, &c. *Respond.* negando sequelam, ad hoc enim, ut Angelus sit al cubi, tamquam in loco, non sufficit sola operatio; nam etiam sol operatur in terra, & tamen non est, nisi in cælo; sed præterea requiritur immediata applicatio virtutis; ut supra explicatum est; & quia Angelus non est applicatus immediatè, nisi vni parti spheræ: sequitur solum esse in illa parte, tamquam in loco: debet igitur Angelus necessariò solum esse in eo, quod veluti primò, & immediatè mouet; non autem in toto corpore, quod mouet.

Insurgunt IV. Si Deus poneret aliquod corpus in vacuo, posset illud corpus moueri; ergo etiam si Deus poneret Angelum in vacuo, posset etiam ibi moueri; sed non per contactum suæ virtutis ad locum, ut de se patet; ergo, &c. *Respond.* quòd si corpus poneretur à Deo in vacuo, & ibi moueretur, esset illud corpus hic, aut ibi metaphoricè, per applicationem suæ molis sine contactu; ita à pari diceretur Angelus in illo casu esse in hac, vel illa parte illius spatij, per applicationem suæ entitatis; cum enim illud spatium non sit aptum moueri ab Angelo, nulla ratione potest comparari Angelus in ordine ad illud spatium; sicuti nunc comparatur in ordine ad locum: & sic esset in illo per applicationem suæ entitatis: sicuti corpus in eodem casu esset per applicationem suæ molis: Angelus igitur vbicumque est, est per applicationem suæ virtutis, etiam si nihil velit operari, modo iam explicato; cum non habeat alium modum, quo comparatur ad locum; nisi per hunc contactum: vnde si præscindamus ab hoc: posset quidem dici Angelus esse in loco, aut quomodolibet illi præsens; sed non tamquam in loco: sicuti si anima rationalis non contineret corpus, non posset dici esse in corpore, tamquam forma ipsius.

Nota hic I. Quòd iuxta varium modum habendi contactum, variatur modus habendi præsentiam; corpus enim habet præsentiam ad locum per quantitatem; anima rationalis informando: Corpus Christi vniendo se cum speciebus: Spiritus increatus in ordine ad spatium per immensitatem, in ordine ad passum per ipsam operationem: Spiritus

creatus per contactum virtutis. II. Licet operatio Angeli sit indiuisibilis; accommodatur tamen rei diuisibili, per superioritatem in ipsam: sicuti, ubi Sacramentale Corporis Christi est indiuisibile, & terminatur ad species diuisibiles. III. In casu quo Angelus esset intimè præsens alicui corpori, & nihil in illo positivè operaretur, sed solum custodiret, v. g. assisteret impediendo, vel remouendo coneraria; sufficienter diceretur Angelus operari extra se, quantum requiritur, vt saluetur conceptus continentie loci: sicuti non dicitur Deus solum operari ad extra, si producat; sed etiam si destrueret, & annihilaret. IV. Loquendo de anima separata, potest sustineri, Quod sit in loco etiam per operationem. *Nec valet dicere*, quod anima nullum motum potest causare; cum non possit mouere, nisi illud corpus, quod informat: *Hoc enim est falsum*; quia potest etiam, & corpora, quæ non informat mouere: & licet hoc naturæ animarum non debeat; non tamen est miraculosa; quia illis debetur attentæ suauis Dei prouidentia: sicut per D. Thomam animæ rationali infunduntur à Deo in statu separationis species, vt intelligatque infusio, licet naturæ animarum non debeat; non tamen est miraculosa; quia est iuxta suauem Dei prouidentiam: Et in hoc sensu loquutus est D. Thomas, quando dixit, quod anima separata non possit mouere, nisi illud corpus, quod informat. V. Angelus potest esse physicè in loco minori, & minori, vel etiam in maximo sue sphaeræ; Quia sicut liberè agit; ita potest suam actionem liberè contrahere ad corpus minus, & minus, vel etiam extendere ad totum corpus, circa quod potest simul agere, & non excedat locum adequatum: Quomodo autem possit Angelus liberè suam actionem contrahere, vel ad corpus minus, & minus, vel extendere ad totum locum sue sphaeræ adequatum; Puto probabiliter id fieri per qualitatem quandam, seu virtualem extensionem, quæ dicitur localitas; & à D. Thoma quantitas virtualis, per quam intelligitur determinatus ad coexistendum tanto, vel tanto spatio, maiori, vel minori: sicut enim in corporibus per quantitatem secundum locum extensum intelligitur substantia eidem loco coexistere, & durante eadem extensione semper equali loco coexistit; ita Angelus per hanc localitatem, seu virtualem extensionem, per quam v. g. aptus est coexistere, illi coexistit donec talis localitas varietur: sicuti in sententia, quæ admittit indiuisibilia in quantitate, saltem ratione distincta, potest ob eandem rationem Angelus etiam in puncto loci se constituere.

Verum unus Angelus possit esse in pluribus locis, vel plures Angeli in uno loco?

Solet hæc quæstio exagitari, tum de locis adequatis, tum de inadæquatis; dicuntur loci inadæquati illi, ex quorum coniunctione fieret vnus locus adequatus Angeli; siue loca sint ad inuicem continua, siue

siuè contigua, siuè diffusa; locus autem adequatus est illud maximum spatium, ultra quod non potest simul Angelus applicare suam propriam virtutem. Sed meo iudicio, loquendo de locis adæquatis, nemo est, qui possit affirmare, Angelum posse simul esse in pluribus locis adæquatis; quoniam eo ipso, quod Angelus posset esse in alio distante loco, ille prior non esset locus adæquatus; vt patet ex terminis: sicut etiam est communis opinio, loquendo de locis inadæquatis, siuè continuis, siuè contiguis, contentis intra adæquatum; posse Angelum simul esse in pluribus locis inadæquatis; cum enim Angelus possit esse in loco diuisibili, potest simul esse in eius partibus, quæ sunt loca inadæquata respectu Angeli existentis in toto illo loco.

Difficultas igitur in præsentī solum est de pluribus locis inadæquatis inter se distantibus; v. g. an Angelus, qui potest esse in tota hac aula, vt in loco sibi adæquato, possit esse in duobus extremis eius partibus, absq; eo quod sit in medio. *Puto* probabilius, viribus naturæ nulla ratione fieri posse, Angelum esse in duobus locis inadæquatis, etiam contentis intra spherā actiuitatis ipsius, siuè parum, siuè multum distantibus, absq; eo quod sit in medio. *Probat*ur conclusio, quia multiplicatio vnus Angeli ad plura loca, naturaliter est impossibilis; vt omnes fatentur; sed si Angelus esset in pluribus locis inadæquatis modo dicto, multiplicaretur Angelus in plura loca; nam partes illæ loci, non comparantur ad Angelum, vt vnus locus, sed plura, vt plura actu per separationem; & consequenter essent plures Angeli naturaliter multiplicati in pluribus locis; nam tota eius substantia, & entitas erit in vno loco, & tota in alio; eo ipso, quod non sit in partibus intermedijs; ergo sicuti propter hanc rationem, non potest anima rationalis informare partes extremas corporis: v. g. caput, & pectus, quin informet collum intermedium; neque Angelus poterit esse substantialiter præsens pluribus locis, vel minimum distantibus, si nullo modo sit in medio.

Pater Gonet, volens hanc rationem impugnare, dixit, Nullo modo sequi inconueniens allatum: quia loca illa partialia, & inadæquata continentur intra spatium illud, ad quod potest Angelus extendere suam virtutem simul vnica operatione in illud operando: vnde habet rationē vnus loci simpliciter. *Non nego* hanc rationem habere efficaciam contra Thomistas illos asserentes, quod Angelus dicitur esse in loco, & sic præsens loco per solam, & meram operationem transeuntē; non autem vim aliquam habet contra nos; qui defendimus, quod quantumuis Angelus dicatur esse in loco per applicationem virtutis, aut per operationem transeuntem; attamen illi loco, cui est præsens, est verè præsens per suam virtutem, & entitatem, vt applicatam, & virtualiter tangentem hoc corpus; ergo non potest dici, quod ratione vnus operationis illa loca inadæquata, distincta, & separata habeant rationem vnus loci, & esse plura materialiter.

Secunda conclusio: Probabile est, loquendo de loco adequato, & de operatione adequata, seu totali, non posse plures Angelos simul physice esse in eodem loco, in quo scilicet operentur, vt causæ totales completæ, seu adequatæ in eodem genere: Quia naturaliter esse non possunt plures causæ totales in eodem genere respectu eiusdem effectus; cum non possit saltem naturaliter idem effectus dependere à duplici causa totali; ergo non possunt duæ causæ totales applicari ad eundem effectum; nec consequenter duo Angeli physice esse in eodem loco: cum physice esse in eodem loco nõ sit aliud, quàm applicari ad causandum motum eiusdem corporis: itaque si vnus Angelus in aliquo corpore efficiat operationem aliquam transeuntem, vt causa totalis in illo genere, v.g. efficiat motum aliquem; non potest simul alius Angelus, vt causa totalis in eodem genere, efficere eandem operationem, v.g. motum.

Possunt igitur solum plures Angeli esse in eodem loco inadæquatè, & partialiter. Tunc enim Angelus dicitur inadæquatè continere aliquem locum, si, vel non omnis operatio circa illum locum esset ab ipso, vel si esset, esset tantum, vt à causa partiali simul operante cum alio Angelo; sed veroque modo possunt plures Angeli immediatè operari circa aliquem locum: primum patet, cum possint plures demones, vel Angeli circa idem corpus diuersas operationes efficere; taliter, vt non sint omnes operationes circa illum locum ab vno. II. Ostenditur exemplo animæ, & demonis, qui per diuersas operationes in eodem corpore possunt esse simul in illo. Quod si igitur duo, vel plures Angeli in eodem corpore motum v.g. efficiunt in diuersa: tunc erunt quidem simul in eodem corpore plures Angeli; sed non erunt causæ totales, sed partiales illius motus, qui erit vnus, compositus ex illis diuersis moribus.

An, & quos modis Angelus possit moueri localiter?

EST communis Scholasticorum sententia, & certa, Angelos moueri localiter, & mutare suas reales præsentias ab vno loco ad alium: solus Durandus, cuius opinio damnatur, vt falsa, putauit Angelum, numquam moueri secundum substantiam, sed solum ratione operationis: sicut etiam falso putauit, animam Christi Domini non descendisse ad inferos secundum substantiam. Colligitur hæc veritas ex multis sacre Scripturæ testimonijs, in quibus Angeli dicuntur descendere, & ascendere, mitti à cælo in terras, exire ab aliquo loco, reuerti, & ingredi in locum, circumire, & perambulare terras, & similia; quæ omnia SS PP. exponunt de motu locali; asserentes, Angelos definiri loco, summa celeritate loca omnia peragrarè, &c.

Probatur insuper ratione; Quia Angelus secundum suam substantiam est in loco definito; cum non sit vbique; quamuis non sit alligatus certo loco; ergo potest ex vno loco transire in alium, vnum relinquere, & alium

aliū acquirere : sicuti potest in pluribus locis successiue operari : huiusmodi autem operationes , iam supponunt præsentiam Angeli in illis locis , iuxta supra dicta , agendo de modo existendi in loco . Ostenditur etiam exemplo animæ rationalis , quæ post mortem hominis corpus relinquit , & realem præsentiam ad illud , euolando ad locum sibi destinatum . Quando autem D.P.N. August. 1. de Genes. ad luter. cap. 20. docuit ; Spirituality moueri per tempora , non per loca : Solū voluit creaturas incorporeas , & spirituales non moueri per loca , motu commensuratio , sicut mouentur corpora : Sicuti quando D. Tho: dixit , Quod nomen motus æquiuocè conueniat Angelo ; Loquitur per comparisonem ad motum corporum ; oppositas enim rationes habet motus Angeli , & motus corporis ; nam corpus sicut continetur loco actu , vel potentia , ita in motu commensuratur loco ; at verò Angelus est in loco , quia continet locum ; & ita mouetur continendo successiue distincta loca ; atque adeo successiue tangendo : per comparisonem igitur ad motum corporum , non dicitur Angelus moueri propriè localiter ; & hoc modo intelligenda sunt testimonia , quæ asserunt , Angelos non moueri propriè localiter : si verò per iy , moueri localiter , intelligamus verè transire de vno loco ad aliū , relinquendo priorem ; Dicimus , quod Angelus propriè mouetur localiter : benè igitur D. Tho: ad ostendendum motum Angeli , per comparisonem ad motum corporum esse æquiuocè motum , in resp. ad 3. docet , motum Angeli non esse actum existentis in potentia , idest ad aliquam formam , requisitam per se ad intrinsecam sui perfectionem ; sicut accidit in motibus sublunaribus ; sed esse actum existentis in actu ; idest entis perfecti , quatenus per illum cōstituitur in via ad locū , quem acquirit , & ad contactum illum suæ virtutis in ordine ad locum .

Importat formaliter motus Angeli operationem aliquam intrinsecè receptam in ipso Angelo , quæ operatio explicatur à nobis , per applicationem virtutis Angelicæ , terminatam ad contactum virtutis in actu primo , qui prius natura est , quàm contactus in actu secundo : vnde distincti contactus , quos importat per D. Tho: motus Angeli , sunt distinctæ applicationes suæ virtutis ad distincta loca ; cum enim Angelus intelligatur successiue operari immediate circa plura loca , debet prius natura intelligi applicatus immediate suppositi ad illa : quare hæc applicatio debet esse operatio saltem prior natura , quàm sit motus corporum : & hoc modo intelliges , quomodo Angelus prius ordine naturæ sit præsens toti loco , quàm in eo operetur , & moueatur localiter .

Ad intelligendum autem , quomodo Angelus moueatur localiter præter distinctas applicationes virtutis Angelicæ ad distincta loca , quibus Angelus dicitur moueri per se ; dico , Quod potest etiam Angelus habere motum per accidens , per quem Angelus applicat suam substantiam , &

virtutem (licet extrinsecè mediante corpore assumpto) distinctis, & distinctis partibus spatij, quibus applicatur corpus assumptum. Quando autem Angelus mouetur ad motum corporis assumpti, non mouetur propriè per accidens eodem modo; sicuti dicitur moueri per accidens anima, & nauta, quando mouetur corpus, & nauis; quia adhuc est in potestate sua motum efficere cum illo corpore, vel non: neque vnionem, habet ad illud corpus, qualem habet anima, vel nauta; sed adhuc dicitur moueri per se; quia reuera ipsa substantia Angeli mouetur à se ipsa, quando suum corpus assumptum mouetur. Addo esse improbabilem, sententiam aliquorum asserentium, Angelos in corporibus, quæ mouent, habere quemdam modum vnionis distinctæ, quo aliquo modo alligentur illis corporibus; nam D.Tho: nullam aliam vnionem Angeli ad corpora cognouit; nisi per solam applicationem virtutis; quæ optimè intelligi potest sine hoc modo vnionis distincto.

Præcipua difficultas in hac materia est, verum Angelus moueatur motu continuo, vel discreto, vel possit moueri absque eo, quod transeat per medium? Ad quod decidendum oportet prænotare. I. Motum continuum, differre à discreto; quia per motum continuum acquiritur successiuè, & diuissibiliter, siuè per partes, terminus ad quem; per discretum verò, acquiritur totus simul terminus ad quem; & sic motus continuus habet partes sibi succedentes; motus autem discretus partes totas simul; ita vt singulæ momento perficiantur, & inter inceptionem vnus, & alterius, semper intercedat tempus, & quies in aliquo loco. II. Est notandum, tempus discretum, iuxta communem Theologorum sensum; dicitur illud, quod componitur ex pluribus durationibus, quarum quælibet dicitur tota simul, & per se ipsa indiuidua, non successiua, nec indiuidua cum alia: atque adeo tota aggregatio illorum instantium, quibus durant tales operationes, appellatur tempus discretum. Vnde durationes istæ vocantur instantia Angelica, taliter, vt instans Angelicum sit totum illud spatium, in quo necessariò conseruatur operatio libera Angelica, quod dici potest minimum temporis Angelicum. Dicuntur autem, instantia Angelica, ad differentiam instantium nostri temporis, quæ ita sunt tota simul, & indiuisibilia; vt etiam indiuisibiliter transeant: duratio verò, seu instans Angelicum diu permanere potest, & non solum correspondere instanti, sed etiam nostro tempori.

Prima conclusio: Angelus potest moueri motu continuo; cum enim Angelus possit esse in loco diuissibili, nihil prohibet, quo minus successiuè, ac continuè possit priorem locum derelinquere, & ad nouum accedere; si enim Angelus ponatur esse in hoc palmo, potest intelligi, retinendo eandem numero locabilitatem, per quam æquiualeat quantitati palmari, applicare successiuè suam substantiam, & virtutem loco viciniore, illum acquirendo per partes per operationem continuam, &

habentem partes in successione : vnde assignari potest terminus extrinsecus huius durationis, qui est ipse locus continuus, ratione cuius habet partes : terminus etiam intrinsecus, qui est vltimum mutatum esse : & terminus denique formalis, qui non est aliquid re distinctum ab ipsa; sed eadem prorsus entitas, quæ vt exiens ab hoc principio, habet rationem motus ; in quantum verò est applicatiua Angeli ad locum, habet rationem termini: Si D. Tho: autem in 1. *distinct.* 3. *qu. 3. art. 1. in corpore ad 3.* negauit Angelum moueri continuè. *Respond.* vel S. Doctorem mutasse sententiam, vel loqui de natura motus Angelici, qui non petit ex se esse continuum : vnde sensus est, quòd Angelus de necessitate non mouetur motu continuo; cum moueri possit etiam motu discreto, vt infra videbitur.

Dices, Omne, quod mouetur, debet esse diuisibile, & debet transire spatium æquale, vel minus se; quod contingere non potest in Angelo. *Resp.* hoc esse verum, & intelligendum de motu commensuratio mobilis quanti, & de motu continuo diuisibili respectu eiusdem mobilis; non autem est verum de motu Angeli, qui ad hoc, vt moueatur motu continuo, sufficit, quòd virtus eius partim vni, & partim alteri loco applicetur; vt docet S. Tho: hic *artic. 1. ad 3.* vbi ait, *Angelus est partim in vno loco continuorum, & partim in alio, non quòd substantia illius sit partibilis; sed quia virtus sua applicatur ad partem primi loci, & ad partem secundi.*

Secunda conclusio : Potest Angelus moueri localiter motu discreto: Quia potest Angelus ita se mouere, vt non successiuè, & continuè moueatur, sed simul relinquat totum locum adæquatum, in quo est, & simul acquirat totum locum adæquatum, in quo paulisper quiescat; & iterum hunc relinquat; & sic deinceps: & hoc per operationes quasdam discretas, & totas simul; ita vt singulæ momento perficiantur, & inter inceptionem vnius, & alterius, semper intercedat tempus, & quies in aliquo loco: quod ostenditur, & declaratur exemplo; Ponamus v.g. quòd Angelus sit in loco palmari, in quo durat vsque ad vltimum instans huius horæ exclusiuè, in quo instati definit esse totus simul in eo palmo, & incipit esse totus simul in secundo palmo, applicando suam virtutem toti secundo palmo, in quo palmo persistit aliquo tempore quantum vult, & in vltimo instanti illius temporis definit esse in toto illo simul, & incipit esse in toto tertio simul palmo; taliter, vt verum sit dicere, in eodem instanti nunc primò Angelus non est in priori palmo, & primò est in sequenti palmo; sed hoc modo moueri est moueri motu discreto; ergo, &c. Quòd autem Angelus possit hoc modo moueri, pater, cum enim Angelus non sit in loco, vt res contenta, & clausa loco, sed potius, vt continens, non subieciatur legibus corporis, & loci; ergo poterit suam virtutem applicare simul toti alicui loco, dummodo non excedat locum adæquatum; & cum operationes istæ, seu durationes istarum operationum non essent continuæ, sed totæ simul, modo prædicto; sequitur, quòd to-

ta aggregatio istarum operationum sibi inuicem succedentium efficiat tempus discretum, & consequenter motum discretum.

Dices, Implicat, Angelum ex prima hora transire ad totam secundam; ergo à pari, implicat, Angelum ex primo spatio diuisibili transire ad totum immediatè sequens. *Resp.* negando consequentiam, disparitas est, quia hora tota numquam est; cum habeat partes impossibiles, quod non militat in loco.

Nota hic, quòd Angelus, neque in termino à quo, neque in termino ad quem, absolute sumpto, mouetur motu discreto, sed in utroque; pro vt vnus dicit habitudinem ad alium; successio enim, & habitudo vnius termini ad alium habet rationem alicuius medij: vnde D. Tho: loquens de motu discreto Angeli in 1. distinct. 37. quest. 4. ar. 1. ad 3. ait, *Nec in A, nec in B mouetur; licet, A, & B sint partes eius; sed successio horum, quod est esse, in A, & esse in B, motus eius vocatur.*

Virum Angelus possit transire de vno loco ad alium, non transeundo per medium?

AD intelligentiam huius quæstionis oportet prænotare, quòd medium in spatio corporeo, quòd Angelus potest omittere, transeundo de vno extremo ad aliud, potest esse duplex; communicans scilicet, & non communicans: sicut in quantitate continua solent Philosophi duo genera partium distinguere; scilicet communicantium, seu proportionalium, & non communicantium, seu aliquotatum. Ponamus igitur Angelum existentem in primo palmo corporis tripalmaris, & quòd velit transire ad tertium palmum: Medium non communicans est secundus palmus; quia hic nullas partes communes habet cum primo, aut tertio palmo; idest nec de primo, nec de tertio palmo aliquid participat; Medium verò communicans erit, si sumitur aliquid de primo palmo, & aliquid de secundo, vel aliquid de secundo, & aliquid de tertio; taliter, vt palmus ille cõpositus ex parte primi, & ex parte secundi dicitur medium communicans; & cum quantitas, in probabiliori sententia, sit diuisibilis in infinitum; hinc fit, vt media hæc communicantia esse possint finita in infinitum; quantum enim tollitur per partes proportionales de primo palmo, tantumdem addi potest de secundo; & ita palmi communicantes inter primum, & tertium erunt finiti in infinitum.

Dico I. Si motus Angeli est continuus, non potest moueri de vno extremo ad aliud, nisi pertranseat omnia media illius spatij, tam communicantia, quàm non communicantia. Hæc enim est expressa sententia D. Tho: & omnium fetè Scholasticorum; posito enim, quòd Angelus existens v. g. in hoc palmo primo, illum successiuè, & continuò relinquat; relinquit consequenter per partes; & eodem modo acquirit alium palmum; ac pertransit consequenter omnia media illius spatij, siuè sine com-

communicantia, suè non; licèt vt benè aduertit Angelicus Præceptor, non sint omnia illa media in motu continuo actu numerata, & assignata, quasi distincta; cum sit impossibile petransire hoc modo spatium. In hoc enim vt dixi, omnes conueniunt. Solum ergò est difficultas de motu discreto, de quo dixit D. Tho; quòd Angelus, qui hoc modo mouetur, non necessariò transit per medium; imò impossibile est, quòd transeat per omnia media: sed quia media, vt supra diximus, alia sunt communicantia, alia non communicantia: agendum primò erit de medijs communicantibus, & postea de non communicantibus.

Dico II. Quòd si loquimur de medijs communicantibus, potest Angelus motu discreto transire naturaliter ab extremo ad extremum sine medio. Existimo hanc fuisse mentem D. Tho; in hoc loco, & probari potest hac ratione. Quia successio in motu non prouenit ratione subiecti, sed ratione medij, habentis resistentiam, &c. vnde cum respectu motus Angelici non detur ex parte spatij illa successio; sequitur motum Angeli sine huiusmodi successione fieri posse, & consequenter non esse necessarium; vt prius transeat per medium, & deindè perueniatur ad extremum; ergo poterit Angelus transire ab extremo ad extremum sine medio communicante; idest simul relinquere totum simul terminum à quo, v.g. primum palmum, & simul acquirere terminum ad quem, idest totum secundum palmum; atque adeò non transire successiue per media communicantia inter primum, & secundum palmum; ad differentiam corporis, quod cum contineatur loco, debet sequi ipsius leges: hinc est, quòd non potest transire ad extremum, nisi transeat per media communicantia, relinquendò v.g. primum digitum primi palmi, & acquirendo primum digitum secundi; vsque dum successiue deneniat ad extremum secundi palmi.

Dico III. Loquendo de medijs non communicantibus, non posse Angelum transire naturaliter suo motu discreto ab extremo ad extremum, sine medio non communicante. Hæc conclusio, si standum est rationibus, est valde probabilis; cum eam sequantur quasi omnes docti recentiores; Quod enim mirabile valde apparet, non debet asseri, fieri posse naturali virtute, absque efficaci ratione; sed est valde mirabile, mobile petransire de extremo ad extremum sine medio non communicante, & nulla est ratio efficax ad illud asserendum; vt patet ex se; ergo &c.

Si verò standum est authoritati D. Tho; puto hanc sententiam esse prorsus amplectendam; nam quamuis Angelicus Præceptor in 1. dist. 37. quæst. 4. art. 2. contrarium docuerit; mutauit tamèn postea sententiam; sicut mutauit idem S. Doctor in multis: Quod ostendo primò efficaciter; nam cum in 1. sentent. in argumento 4. concesserit S. Tho; esse paritatem in cogitatione animæ, & in transitu Angeli ab extremo in extremum sine medio; & consequenter admississet posse animam immediatè transferre cogitationem ab vrbe v.g. Panormitana in urbem Romam, non cogitando

pius de locis intermedijs; ita Angelum posse transire ab extremo in extremum, absque eo, quod transeat per loca intermedia; quamvis, inquam, hoc concesserit; tamen hic expressè negavit, nempe in *art. 5. quolibet. 1. Ostendo II.* Quia S. Doctor in eodem corpore articuli fateatur, se loqui de medijs, quæ non possunt numerari ab Angelo per motum discretum; quia aliter numerarentur infinita; sed media, quæ non possunt numerari, sunt media communicantia; cum loca media communicantia possint æquè benè numerari, ut visum est; ergo quando D. Tho: asserit, posse Angelum transire de extremo ad extremum, absque eo, quod transeat per media, loquitur de medijs communicantibus; quod nos ultro concedimus; non verò de medijs non communicantibus.

Ex duplici igitur capite colligimus, D. Thomam stare pro nostra sententia; 1. Quia postquam D. Tho: admisisset, ut supra diximus, & concessisset paritatem in cogitatione animæ, & in transitu Angeli; postea in responsione ad secundum, negavit paritatem: ubi assignat optimam disparitatem, quæ intercedit inter animam cogitantem, & Angelum transeuntem, dicens; quia anima cogitando non applicat suam substantiam, quasi localiter illis locis, in uti applicat, dum movetur; sed potius ipsa loca sunt in anima per speciem; & ita potest anima uti, qua specie voluerit atque adeo cogitatione transire ab extremo in extremum, transferendo; cogitationem ab vile latior mitana in urbem Romam, non cogitando de locis intermedijs.

Secundum caput est, quia ut vidimus, si D. Tho: concedit posse Angelum moveri motu discreto, absque eo, quod transeat per media; loquitur de medijs communicantibus; non autem de medijs non communicantibus; ut etiam apertè constat ex supradictis; ergo si S. Præceptor loquitur solum de medijs communicantibus, signum est, non posse, per ipsum, Angelum transire naturaliter suo motu discreto ab extremo in extremum, sine medio non communicante; aliter daretur agens creatum, quod posset operari in distans; quia daretur Angelus, qui applicaret virtutem suam v.g. tercio palmo, absque eo, quod applicet eandem virtutem secundo quod esset operari virtualiter in distans sine medio, quod nulli creaturæ naturaliter conceditur; ut ex Philosophia suppono.

Nec valet dicere cum P. Gonet, disparem esse rationem de creatura corporea, ac spiritali; nam verum est, non posse creaturam corpoream rem ulteriorem sine priore contingere; quia continetur à loco, & subiectatur legibus ipsius; non autem res spiritalis: & sic non debet transitus iste rei spiritalis iudicari impossibilis: & confirmat exemplo Corporis Christi, quod cum quodam modo spiritali adsit in Eucharistia, sit quotidie præsens sine ullo medij transitu in cælo simul, & in varijs terræ locis. *Non valet*, inquam, hoc dicere; quia licet res spiritalis, & Angelus non subiectetur legibus loci; cum operatio ipsius, quæ applicat se ipsum alicui loco, antecedenter ad motum loci, non sit operatio

ratio recepta in loco, sed in Angelo; dicit tamen ex se ordinem ad intimam presentiam talis loci; atque adeò ad locum; & ita æquiparatur operationi transeunti, receptæ in loco; ergo Angelus v. g. existens in hoc primo palmo, non potest primò mouere tertium, vel quartum palmum, & non mouere secundum; & sic disparitas assignata est nulla. *Ad exemplum* autem adductum de corpore Christi in Eucharistia, quod sit præsens in varijs hostijs, non transeundo per medium, tamen si non deferat in Cælo locum, in quo ante erat. *Resp.* hoc fieri potentia diuina: quando autem nos inquirimus, vtrum Angelus possit transire ab extremo in in extremum, non pertransito medio non communicante? intelligitur per suas vires naturales; nam dubitandum non esse puto, diuina potentia id fieri posse.

Replicabis *Æ* juè difficile videtur intellectui, posse Angelum transire de extremo ad extremum sine medio communicante, ac transire sine medio non communicante; sed potest in nostra sententia Angelus transire de extremo ad extremum sine medio communicante; ergo etiam sine medio non communicante. *Resp.* negando maiorem, & concessa minori, negamus consequentiam; disparitas est, intantum Angelus potest dñi est applicatus in primo palmo transire suo motu discreto in palmum proximum, quod est aliud extremum, sine medio communicante; quia iam habebat suam substantiam prius applicatam extremo palmi proximi; & ita potuit totum se ipsum transferri in secundum simul palmum; nam, vt ex Arillotele, & certissima experientia compertum est, nullum agens creatum potest agere in aliquod primum passum; nisi vel sit illi incimè præsens, vel certè præsens extremis illius; unde non poterit Angelus applicare suam substantiam, & virtutem alicui loco, nisi prius saltem sit in termino illius: & sicuti, vt supra vidimus, agendo de Loco, non potest Angelus applicare operationem suam passo primo, nisi applicet suam substantiam saltem eius extremis; multominus poterit applicare suam substantiam, & virtutem, nisi saltem prius natura sit in eius loci extremo.

Non potest autem Angelus applicatus in primo palmo v. g. transire suo motu discreto ad aliud extremum, nempe ad quartum, vel quintum palmum, sine medio non communicante, quod est secundus, & tertius palmus; aliter numquam fuisset Angeli substantia applicata extremo secundi, vel tertij palmi; vt ex hoc extremo possit intelligi Angelus simul applicari ad quartum, iuxta supradicta.

Est hic valdè notandum ad soluenda multa Aduersariorum argumenta, Nos vtrique concedere, Angelum non esse subiectum legibus loci; sed videndum est, quænam sit lex loci? hæc enim non est alia, nisi, vt locus successiue pertranseat; & cum Angelus possit, (vt visum est,) successiue ipsum non pertransire; sequitur, Angelum non subiectari legibus loci: non posse autem pertransire ab extremo in extremum, non est lex loci; sed est

lex operantis creati; cū nullū tale possit agere indistans sine medio; & cum Angelus sit operans creatum, sequitur, non posse pretransire ab extremo in extremum sine medio, vt dictum est, non communicante. Coeterum, qui sustinent in Philosophia, posse agens creatum agere indistans; possunt hic concedere, posse Angelum transire ab extremo in extremum sine medio, dummodo extrema contineantur intra sphæram loci Angelici.

II. Est notandum, quod motus continuus, qui, vt dictum est, sequitur leges loci, & temporis, aliquo modo illi proportionatur; taliter vt incipiat, & desinat, sicut motus corporis: vnde si Angelus existens v.g. in hoc palmo, velit motu continuo moueri; eius motus incipit in instanti extrinseco nostri temporis; & consistit formaliter hic motus in quadam operatione spiritali, recepta in Angelo, habente partes sibi inuicem succedentes, & applicantes virtutem Angelicam distinctis, & distinctis partibus loci continuo, & successiue: vnde hæc operatio est diuisibilis quoad successionem, vt supra visum est. Motus autem discretus Angeli non sequitur leges motus physici; nam non est diuisibilis in infinitum; nec eius quidditas consistit in vna simplici operatione; sed consistit formaliter in multitudine plurium operationum sibi inuicem succedentium sine continuitate, per quas operationes Angelus totus simul definit esse in vno termino, & simul incipit esse in toto alio, vt visum est; & hic motus discretus, etiam si constaret duplici tantum instanti temporis Angelici, potest coexistere vni horæ, aut maiori, vel minori parti nostri temporis; prout Angelus voluerit in illis suis mutari esse, diutius, vel non diutius perseuerare; quamdiū enim Angelus durat in vno mutato esse sui motus, tamdiū dicitur durare instans Angelicum. Hæc autem existimauimus notare necessaria, ad hoc vt facilius decidatur

Vtrum Motus Angeli possit fieri in instanti?

Loquendo primò de motu continuo Angeli; Vult communis, & vera ferè omnium Scholasticorum sententia, Angelum non moueri in instanti motu continuo; sequeretur enim Angelum in eodem instanti simul esse in duobus, vel pluribus locis adæquatis; quod est absurdum, vt visum est supra: siue illum ponamus permanentem in illis, siue transeuntem. Neque dicas, posse hoc facere corpora glorificata. Nam hoc est falsum; & dato, quod possint, illud esset virtute diuina; in Angelis autem fieret virtute naturali, quod implicat; etiam si nulla sit in medio resistentia respectu Angeli; nam de intrinseca ratione motus continui localis est, vt pars post partem pertanseatur.

Si verò loquimur de motu discreto, Puto probabilius cum D. Thoma nullum motum Angeli fieri in instanti, neque Angelico, neque nostri temporis; cum enim motus discretus Angeli non consistat in aliqua simplici operatione, sed in pluribus sibi inuicem succedentibus, sine continuitate,

nitate, iuxta dicta in superiori notando; non erit, nec esse potest in vno instanti Angelico; cum plures ipsorum operationes sint plura instantia. Insuper cum eadem plures operationes Angeli, quibus componitur ipsorum motus discretus, sint ad inuicem impossibiles, non possunt correspondere vnico instanti nostri temporis; importat enim motus discretus Angeli duas adminus operationes, vnā, per quam Angelus sit in termino *à quo*, & aliam, per quam sit in termino *ad quem*; & sic si idem motus fieret in instanti, importaret vtramque operationem simul existentem: & sic esset Angelus in eodem instanti in termino *à quo*, & in termino *ad quem*; ergo non transiret de loco ad locum.

Quæres hic, Vtrum motus discretus, seu operatio discreta Angeli possit incipere, & incipiat in instanti intrinseco nostri temporis; an verò incipiat extrinsecè in ordine ad instantia nostri temporis? *Antequam* respondeam, oportet explicare, quid sit Angelum incipere intrinsecè, vel extrinsecè in instanti nostri temporis: Tunc enim diceretur Angelus incipere extrinsecè in instanti nostri temporis, si esset verum dicere, in hoc instanti vltimo huius horæ nostri temporis Angelus est in toto hoc primo palmo, immediatè post erit in toto secundo palmo. Diceretur verò incipere intrinsecè, si esset verum dicere, tota hora Angelus fuit in hoc primo palmo, & in vltimo instanti illius horæ fuit in secundo. *Respond.* operationes discretas Angeli non posse incipere in instanti intrinseco nostri temporis, sed necessariò incipere extrinsecè; videtur enim expressè fateri hoc idem D. Thomas hoc loco, qui loquendo modo conaturaliori, & secundum ea, quæ nobis inductione sunt nota, vult, quòd numquam sit verum dicere, quòd Angelus tota hac hora v.g. sit in primo palmo, & in instanti vltimo huius horæ in secundo; numquam enim per S. Doctorem est subiectum sub aliqua forma toto aliquo tempore, & in vltimo instanti non sit sub illa; nisi illud instans sit in termino alicuius motus necessarij ad talem instantaneam mutationem: & quia hæc operatio Angelica non est terminus alicuius motus, existimauit Angelicus Preceptor, Angelum non posse moueri conaturali quodam modo, nisi in instanti extrinseco nostri temporis; taliter vt sit verum dicere, in hoc instanti vltimo huius horæ nostri temporis Angelus est in toto hoc primo palmo, immediatè post erit in toto palmo secundo. Repugnat igitur; quòd in eodem instanti, quo acquiritur terminus *ad quem*, deferatur terminus *à quo*, vel è contra; sed ad hoc requiruntur ad minus duo instantia, non quidem nostri temporis; quia non possunt sibi immediatè succedere; sed temporis Angelici, & discreti: scilicet, vt priori instanti Angelico mensuranti existentiam ipsius in termino *à quo*, nempe in primo palmo, correspondeat pars nostri temporis, quæ est hora; posteriori verò instanti mensuranti acquisitionem termini *ad quem*, correspondeat instans nostri temporis. Sed meo iudicio, quamuis D. Tho: ex inductione facta viderit constare numquam esse nouam aliquam mutationē in-

instantaneam, nisi in termino alicuius motus continui, siue recepti in eo, quod mutatur, siue in alio requisito ad hanc mutationem; puto tamen probabiliter D. Tho: non existimasse, contrarium implicare contradictionem; operationes scilicet discretas Angeli posse incipere in instanti intrinseco nostri temporis.

Quæres II. Quænam sit duratio propria Angelorum? Respond. quod duratio Angelorum dicitur, *Æuum*; hæc enim est debita Angelo, qui naturaliter exigit durare per integram æternitatem à parte post, nec patitur aliquam variationem substantialem, vel accidentalem alteratiuam. Duratio igitur Angelica habet partes; cum numquam sit tota simul; & repugnet, vt docui in Philosophia, duratio creata essentialiter permanens, & indiuisibilis: sicut repugnat creatura essentialiter indestruibilis; nam si daretur duratio permanens per horam v.g. non posset in illa hora à Deo destitui; vt ostendi in Philosophia. Potest solum duratio Angelica dici indiuisibilis; quatenus semper conformiter profluit.

De Cognitione Angelorum.

Virum Angelus ad cognoscenda alia à se indigeat speciebus?

Suppono hic I. tamquam certum cum D. Tho: & communiter cum omnibus Scholasticis; Intelligere Angeli non esse eius substantiam, & essentiam, sed est accidens, habens omnino suam propriam realitatem, & entitatem: & sicut intellectio non est ipsa substantia animæ nostræ, nec intelligere Angeli est eius substantia, & essentia; ratio est, Quia actus beatifici sunt supernaturales, idest intellectio, quæ elicitur in visione beata est supernaturalis; ergo distinguitur à substantia Angeli; quia hæc est naturalis; ergo si operatio vitalis, & actus secundus supernaturalis qualis est actus visionis beatæ Angeli, non est eius substantia, nec etiã operatio quælibet vitalis, & actus secundus naturalis erit eius substantia: Quod neque sit eius essentia est omnibus notum; dicente etiam D. Dionysio cap. 11. *Cælestis hierarchia*; mentes cælestes diuidi in essentiam, virtutem, & actionem: Est communis igitur sententia, intellectum, & voluntatem in Angelis distingui, saltem ratione, ab eorum essentia,

Suppono II. Quod in præsentī loquimur de specie impressa, quæ vt ex Philosophia est notum, est qualitas quædam concurrens simul cum potentia cognoscitiua ad eliciendam cognitionem nomine obiecti, siue absentis, siue inproportionati, siue ob aliam causam defectu non concurrentis: Ad hoc ergo, vt possit albedo videri, necesse est; vt recte ante oculos existat; quod si in medio ponatur corpus opacum, eo ipso impeditur visio; ergo signum est, quod potentia aliquid accipit ab obiecto, quod

quod linea recta ad ipsum mittitur, ratione cuius constituitur potens ad videndum; & hoc vocant Philosophi speciem impressam: cuius necessitas etiam ostenditur experientia, desumpta etiam ex intellectu; non enim possum habere cognitionem memoratiuam de homine, quæ non vidi; possum autem habere de eodem, postquam illum vidi, cuius non potest esse alia ratio, quàm quod ex ea visione producta fuerit in intellectu aliqua qualitas.

Suppono III. In Angelis non esse intellectum agentem, & possibilem, sicut in nobis: nomine intellectus agentis, intelligunt Doctores ipsum intellectum, prout est illuminatiuus phantasmatum, & productiuus specierum per ipsa phantasmata, tamquam causa principalis; nomine intellectus possibilis venit ipse intellectus, ut recipiens species, & actu intelligens: cum igitur Angelus non recipiat species à rebus, ut infra videbitur, non erit in ipso intellectus agens, & possibilis.

Prima conclusio, Angelus non indiget aliqua specie accidentali ad sui cognitionem, sed cognoscit se ipsum per suam substantiam, & essentialiter, tamquam per formam, siue speciem intelligibilem. Nam quod est actu intelligibile, vnitum, seu identificatum cum ipsa potentia cognoscitiua, & illi proportionatum, non intelligitur ab illa potentia per speciem distinctam; ut colligitur ex suppositione secunda; huiusmodi est substantia Angeli, quæ ut potè spiritualis, est actu intelligibilis; cum supponam ex philosophia, substantiam spiritualem esse essentialiter intellectiuam: est etiam sibi identificata, & intimè coniuncta: & denique proportionata, ut potè eiusdem immaterialitatis cum proprio intellectu; ergo dicendum est, Angelum non indigere aliqua specie accidentali ad sui cognitionem, sed se ipsum per suam substantiam cognoscere. Propter hanc rationem cognoscit etiam Angelus per se ipsum omnes suas proprietates, & accidentia sibi naturaliter inhærentia; cum hæc sint etiam intelligibilia ab illo, ut potè spiritualia, & illi naturaliter unita.

Secunda conclusio: Indiget Angelus speciebus distinctis ad cognoscenda alia extra se; siue sint obiecta materialia, siue spiritualia, siue præsentia, siue distantia. Angeli enim cognoscunt res exteriores, & obiecta, siue materialia, siue spiritualia; ut Fide ex scriptura tenemus; ergo huiusmodi res debent esse præsentibus intellectui Angelico; ut ex supranotatis constet; sed non sunt præsentibus secundum se, cum supponantur esse extra intellectum; ergo erunt præsentibus in sua specie; ergo Angelus ad cognoscenda alia extra se, indiget specie sibi intrinseca, & superaddita: nam nullum obiectum creatum, non vnitum potentie intellectui, habet vim immediatè naturaliter mouendi intellectum, iuxta supra dicta. Vtrum autem hæc species sumantur ex obiectis, vel acceperint à Deo in primo instanti creationis? videbitur in tertia conclusione.

Aduerte hic, quod hæc eadem ratio militat etiam de anima separata: unde anima separata non indiget specie distincta ad se ipsam cognoscendam

dam; indiget verò anima vnita; cum enim hæc dependeat in operando à corpore, non potest se, nisi dependenter à phantasmate cognoscere; & cum non possit nostros mouere sensus per se ipsam, non est mirum, si neque possit per se ipsam, ad se ipsam intelligendam immediatè concurrere.

Dices I. Per hoc, quòd Angelus habet sibi præsentem, & vnitam suam substantiam, cognoscit seipsum per suam substantiam sine specie distincta; ergo poterit etiam sine specie distincta cognoscere alium Angelum sibi intimè præsentem. *Respond.* negando consequentiam; nam actus cognitionis versans circa obiectum imperfectum naturaliter exigit esse adæquatè ab intrinseco; quare nullus Angelus habet vim mouendi immediatè ad sui cognitionem intellectum alterius; dixi, *versans circa obiectum imperfectum*, idest circa obiectum habens defectum intelligibilitatis; adhuc vt excludatur essentia diuina, quæ intimè præsens per suam perfectionem supplet defectò totum illud bonum intrinsicatis speciei.

Dices II. Defectò Angelus non eget specie ad se ipsum intelligendù; ergo neque ad cognoscendum alia extra se. *Respond.* negando consequentiam; quia indigentia specierum in Angelo est in ordine ad obiecta, cum quibus non est intrinsecè vnitus, seu identificatus. Hinc aduerto, quòd licèt sit verum, posse ab Angelo multa obiecta cognosci ex vi alterius obiecti in se ipso ab eo cogniti, & consequenter venire per suam substantiam in cognitionem Dei, & multarum creaturarum ab ipso factibilium, propter connexionem, quam inter se habent, absque eo, quod illorum obiectorum species intelligibiles habeat; non sequitur, posse Angelum absolutè cognoscere alia extra se sine specie; nam nostra quæstio procedit de cognitione immediata obiectorum in se ipsis; non autem de mediata in alio, tamquam in medio cognito: vnde semper stat quòd ad cognoscenda supradicta obiecta immediatè in se ipsis, indiget Angelus speciebus. Est igitur necessaria species in Angelo ad cognoscendum immediatè quodlibet obiectum extrà se, siue sit materiale, siue spirituale; colligimus autem indigentiam specierum in Angelo, non solum ex necessitate præsentis obiectorum quomodocumque; sed etiam ex necessitate præsentis in debita distantia, cum negatione impedimentorum, iuxta supra notata.

Tertia conclusio: Intelligit Angelus res extra se per species acceptas, & immediatè productas à Deo in primo instanti creationis ipsius. Probat; Quia intellectui Angelico debetur initio suæ creationis scientia, cuius naturaliter est capax; cum sit iuxta suam capacitatem ab initio creationis perfectus; ergo ab initio suæ creationis debentur Angelo species omnium obiectorum, quorum scientia est ipsi debita; sed huiusmodi species non potest Angelus recipere immediatè ab obiectis ipsis, & rebus, quas cognoscit; vt vult communis opinio cum D. Tho: nam obiecta

ita ista possunt esse, vel materialia, vel spiritualia, vt supra diximus; sed à neutris potest Angelus recipere species; non ab obiectis materialibus; cum sint diuersi ordinis: vnde non potest res materialis viribus suis partialiter in spiritualem influere: & licet res naturalis, vt est intellectus, partialiter concurrat per nos, ad rem supernaturalem, nempe visionem producendam, à re, & concausa supernaturali adiutus; hoc Aduersarijs non sauet; nam intellectus non agit per potentiam naturalem; sed per obedientialem, vt omnes fatentur. Neq; potest recipere species ab obiectis spiritualibus sibi extrinsecis, cuiusmodi sunt alij Angeli; nam sicut vnus Angelus non est principium creationis alterius Angeli; ita neque principium perfectionis naturalis, quæ debetur alteri Angelo ratione suæ creationis. *Neque* potest Angelus recipere species ab obiectis, siue istæ sint species obiectorum particularium, siue vniuersalium; alioquin Angelus non posset naturaliter cognoscere res distantes, etiam actu existentes; quoniam obiecta non possunt in quacumque distantia, & quomodo-cumque suam actionem protrudere. *Neque* valet dicere sufficere adhuc virtutem Angeli determinatam tantum ad existentiam obiectorum, siue præsentium, siue absentium; *Aliter* dici posset idem de intellectu humano; nempe quod intellectus humanus intelligere posset absque specie, solum per virtutem suam determinatam ab obiecto; idẽ posset etiam anima separata, quæ habet virtutem ad intelligendum: vnde naturaliter intelligere posset ea, quæ sunt in mundo. *Dicendum* est igitur, quod cum non possint species tribui Angelo ab alia causa, & sit naturale illi species habere; quod infunduntur immediatè à Deo, vt à prima causa operante iuxta exigentiam naturæ Angelicæ in primo instanti creationis ipsius Angeli.

Huiusmodi autem species à Deo infusæ vnicuique Angelo initio creationis ipsius, siue plures, siue pauciores iuxta diuersitatem Angelorum, vt mox dicemus; primò, & per se repræsentant naturas secundum species, & quidditates, & indiuidua, licet de istis non habeant Angeli, nisi cognitionem confusam, antequam indiuidua existant; & sic cognoscuntur in suis rationibus vniuersalibus: posita autem, decursu temporis, existentia indiuiduorum, acquirit Angelus distinctam cognitionem ipsorum; non quia cognoscat absolute noua obiecta; sed quia magis declarat obiectum prius cognitum, distinguendo videlicet eius partes: nec acquirit Angelus, quando de nouo cognoscit indiuidua clare, & distincte, nouam speciem adæquatam; hoc enim expressè negat Angelicus Præceptor, sed solum nouam quandam illustrationem, & illuminationem, declarantem hoc indiuiduum v.g. contineri sub illa specie vniuersali. Quid autem sit hæc illustratio, & illuminatio; probabiliter censeo cum quodam recentiorum, esse eandem speciem adæquatam Angeli in principio creationis habitam, determinatam, politis his circumstantijs, ad repræsentandum nouum indiuiduum.

Arguunt I. Aduersarij, Est cōnaturale omnibus rebus posse proprijs, & naturalibus viribus acquirere perfectiōē sibi naturaliter debitā; sed intelligere est perfectio naturalis Angeli, ergo potest viribus suis naturalibus acquirere species necessarias ad suam intellectuē; ergo cum tales species non defumant ab obiectis, vt visum est in tertia conclusione; necessariō debent profluere ab eius essentia. *Respond.* quōd ad connaturalem perfectiōem alicuius, satis est, vt talis perfectio, vel connaturaliter à se ipso habeat, vel ab alio connaturaliter operantes; quā ratione se habet Deus in infusione specierum Angeli. Non possunt igitur species profluere ab essentia Angeli, nec poterit in se producere species etiā indiuiduorum; quæ in tempore cognoscit; quia nec eminenter, nec formaliter illa in se continet, nec ab illis determinatur per actionem eorundem immediatam, vel mediatam; sicut determinatur anima rationalis medijs sensationibus ab obiecto materiali: vnde si quis veller declarare illustrationem, & illuminationem illam, qua Angelus cognoscit indiuidua de nouo existentia, per speciem aliquam particularem de nouo acquisitam, quæ simul concurrat cum specie illa vniuersali ingenita ad exprimendum hoc indiuiduum; teneretur dicere tales illustrationes, seu species, in tempore de indiuiduis acquisitas, causari immediatē à Deo, ad exigentiam, tum ipsius substantiæ Angeli, tum obiecti de nouo positi.

Arguunt II. Si Angelus non haberet hanc virtutem actiuam producendi species ad cognoscenda alia extra se, sequeretur, quōd solum haberet potestatem passiuam ad species recipiendas; cum à Deo ipsi infunduntur; ergo non erit magis connaturale Angelo species recipere, & per eas intelligere, quàm fuerit animæ Christi Domini recipere species infusas, & per eas operari; quinimō non magis connaturale, quàm sit Beatis recipere essentiam diuinam loco speciei, eamque clarē intueri; & per consequens, sicut violentum non est animæ Christi Domini, & Beatis, speciebus, & lumine gloriæ carere; ita nec Angelo violentum erit nullas habere species, & nihil extra se cognoscere, quæ omnia ex se videntur absurda. *Respond.* negando secundam consequentiam, anima enim Christi Domini, & Beati ad recipiendas species infusas, & lumen gloriæ, atque diuinam essentiam loco speciei, habent potentiam passiuam obedientialem; Angeli verò ad recipiendas species obiectorum, naturalium habent potentiam passiuam naturalem, naturaliter illas species exigentem; taliter, vt non possit Deus de potentia ordinaria creare Angelum sine speciebus; nam eo ipso, quōd velit illum creare, tenetur suauis eius prouidentia ipsi species intelligibiles infundere.

Arguunt III. Si Angelus nō abstraheret species à rebus, esset imperfectior anima, nam abstrahere species intelligibiles à rebus est perfectio animæ rationalis. *Respond.* negando sequentiam; quia etiam si Angelus non abstrahat species à rebus, sicut anima nostra, adhuc est per-

fectior illa; quia intelligit adhuc Angelus modo longè perfectiori, quàm anima. Addo quòd talis modus educendi species à rebus, quem dicit anima est potius imperfectio; supponit enim imperfectionem potentia-
litatis, & inferioritatis in gradu intellectui.

Nota hìc I. Quòd per hoc, quòd species Angelorum fuerint infusæ à Deo modo supradictis; non sequitur tales species esse supernaturales Angelis; quia tales species sunt iuxta exigentiam, tum potentia, tum obiectis: vnde dicendæ sunt naturales: ad inferendum enim formam aliquam esse supernaturalem, non sufficit dicere, eam non posse ab alio, quàm à solo Deo immediatè produci; sed vltèrius requiritur, vt non habeatur in hoc rerum naturalium ordine principium aliquod exitium illius. II- Ex hac infusione speciei: um facta in instanti creationis in Angelis, non sequitur, ipsos debere, & posse cognoscere futura contingentia, & secreta cordium; nam vt infra videbitur, ad hoc vt species istæ repræsentent in actu secundo futura, & secreta cordium; requiritur, tamquam conditio sine qua non, existentia futurorum, & manifestatio secretorum cordis: Addo, quòd prophetia, & futurorum reuelatio semper fuit in Ecclesia certissimum signum assilientia, & autoritatis diuinæ.

Quarta conclusio: Quòd Angelus est superior in essentia, eò per species vniuersaliores intelligit: & sic superiores Angeli intelligunt per species magis vniuersales, quàm inferiores: hæc conclusio habet duas partes, prima est, quòd dentur species Angelorum vniuersales; & secunda; quòd Angeli superiores, & perfectiores, intelligant per species magis vniuersales: vnde probabitur per singulas partes; ad probandam autem primam partem, nempe quòd dentur species Angelorum vniuersales, oportet notare; Quòd per speciem vniuersalem non intelligitur, nisi illa, quæ cum sit simpliciter vna, apta est plura repræsentare: & sic si vna species posset repræsentare omnia animalia, diceretur magis vniuersalis in repræsentando, quàm ea, quæ solum posset repræsentare v.g. omnia volatilia.

Probat igitur conclusio quoad primam partem, nempe, quòd dentur species Angelorum vniuersales; nam datur defectò vna potentia sensitiva attingens omnia obiecta sensuum exteriorum, qualis est phantasia; ergo etiam à pari poterit dari species vniuersalis, attingens plura obiecta simul, quæ per diuersas species repræsentantur. Probat igitur secunda pars; quia species vniuersales, cum nihil de supernaturalitate contineant, possunt alicui substantia intellectiue connaturaliter conuenire; ergo dicendum est conuenire naturæ Angelicæ; cum enim intellectus Angelicus excedat ordinem creaturarum intellectualium, exigit principium cognoscendi in eodem ordine, cuiusmodi est species vniuersalis in repræsentando. Vnde differt modus cognoscendi Angelorum à modo cogno-

scendi Dei, & hominum; quia Deus intelligit omnia per vnicam speciem; homo autem per species particulares.

Quando D. Tho: hic art. 3. ait: *Quanto Angelus fuerit superior, tantò per pauciores species vniuersitatem intelligibilium apprehendere poterit*: iuxta expositionem Ferrariensis, & aliorum Thomistarum, S. Thomas loquitur de superioritate in Hyerarchia, vel ordine; non autem in gradu specifico, & in natura. Vndè est valdè notandum, iuxta D. Tho: doctrinam, Angelos superioris ordinis, aut hyerarchiæ intelligere per species pauciores, & vniuersaliores; Angelos autem eiusdem ordinis intelligere per æquales species: & sic sumamus v. g. vnum Angelum infimi ordinis comparando illum ad res corporeas; tot habebit species huiusmodi obiectorum, quot sunt naturæ ipsorum; & tot habebit species pro accidentibus, quot sunt ipsa accidentia, vel in specie, vel in infimo aliquo genere. Angelus autem secundi ordinis habebit pro eisdem obiectis duplo pauciores species, & Angelus tertij ordinis duplo pauciores, quàm secundus; & sic de reliquis, vsque ad Angelum supremi ordinis. Diuerso autem modo est philosophandum, si comparemus Angelos in ordine ad seipsos; quantò enim obiecta sunt præstantiora, tantò per plures species intelliguntur: hoc idem dicimus respectiuè ad obiecta inferiora; si ergo Angelus infimus intelligit v. g. secundum per duas species, & tertium per quatuor, & quartum per sex, & c. & Angelus secundus, tertium per duas species, & quartum per quatuor, & c. ita supremus, & primus Angelus intelligit omnes Angelos infimi ordinis v. g. per duas species, & tertij ordinis per quatuor, & sic de cæteris. Non nego, quòd qui dicunt, Angelos superiores in natura, & specie; non verò in hyerarchia intelligere per species vniuersaliores; non sunt deserendi; utramque enim sententiam probabilem existimo; cum præcipuè mens Angelici Præceptoris sit valdè dubia in hoc.

Dices I. contra quartam conclusionem; Omnis ratio cognoscendi habet aliquem actum sibi adæquatam; sed species Angeli, si plura repræsentaret, illum habere non potest; quoniam ex S. Tho: hic *quæst. 58. art. 2.* Non potest Angelus vno actu simul plura cognoscere. *Respond.* negando maiorem; & esto, quòd sit vera, negatur minor; S. Tho: autem solùm negat intelligi simul posse plura; ut plura; non autem plura per modum vnius.

Dices II. Si Angelus posset plures quidditates cognoscere per vnā speciem; non minus virtus Angeli, quàm species ipsius esset infinita; si enim per vnā speciem intelligit v. g. leonem, & hominem per eandem, intelligere poterit omnes alias inferiores naturas, & minus perfectas homine, & leone; & consequenter omnes inferiores possibiles; & sic virtus eius, & species essent infinitæ perfectionis. *Respond.* negando sequelam; cum enim species debeat proportionari virtuti intellectiue

Angelica; hæc autem cum sit finita, & limitata non potest ad omnia obiecta, etiam inferiora se extendere. Addo, quòd potest esse, vt hæc species, ita sit secundum suam essentiam limitata; vt non contineat, nisi virtutem duarum specierum, vel trium: vnde potest dari species, quæ repræsentet tria, vel quatuor, & non omnia; extensio enim speciei non debet sumi ab illa ratione comuni, in qua conueniunt repræsentatæ; sed à sua virtuali continentia respectu specierum possibilium, quas D. Tho: vocat species adæquatas vnius naturæ: vnde per hoc, quòd vna species repræsentet duas naturas animalis, non est necesse, vt repræsentet plures.

Dices III. Si Angelus superior intelligeret per species vniuersaliores; sequeretur posse dari Angelum, qui intelligeret omnia per suam substantiam; nam supposito, quòd supremus Angelus nunc intelligat se ipsum per suam substantiam, & alia extra se per vnicam speciem; cum Deus possit creare alium Angelum isto perfectiorem, consequenter intelligeret omnia per suam substantiam. Respond. negando sequelam, ad probationem dico, Quòd in illo casu Angelus ille superior cognosceret eandem prorsus obiecta, sed per speciem vniuersaliorum, causantem actum intellectus, versantem circa illa obiecta, magis distinctum, & exprimerem plura illorum prædicata; & sic numquam deueniendum esset ad alium Angelum, omnia cognoscentem per suam substantiam; nam species istius supremi Angeli de nouo creati esset magis vniuersalis intensiue; quàm species alterius Angeli; quamuis non sit magis vniuersalis extensiue, quæ vniuersalitas trahit pluralitatem obiectorum in rebus.

Nota hic I. Quòd dato, quòd vnica specie intelligibili repræsententur Angelo omnes homines v.g. qui exituri sunt vsque ad finem mundi; & etiam si in infinitum eius duratio protrahenda esset: hæc species, esset, quo ad vim suam productiuam, simpliciter, & intrinsecè finita, & solum synchæregorematicè infinita. II. Non implicat, quòd ista species sit similitudo rerum dissimilium; nam non est similitudo formalis, quæ importat convenientiam in prædicatis quidditatiuis, sed solum similitudo intentionalis, quæ solum importat, quòd vna res alteram intentionaliter repræsentet. III. Species istæ vniuersales rerum, etiam dissimilium v.g. leonis, equi &c. quæ ponuntur in Angelis, continent equidem species particulares, sed secundum ea prædicata tantum, secundum quæ non habent inuicem repugnantiam: vnde licet species repræsentatiua leonis v.g. sumpta secundum suum specialem modum repræsentandi leonem repugnet coalescere in vnam tertiam speciem, quæ simul repræsentet equum, & leonem, non tamen sequitur, quòd non possit dari species vniuersalis, quæ contineat species particulares; nam talis species vniuersalis, vt dixi, ponitur à nobis, quòd contineat particulares secundum ea prædicata tantum, secundum quæ non habent inuicem repugnantiam, & se inuicem excludunt.

IV. Possumus æquè benè nos assignare vnicum specificatiuum talis speciei vniuersalis, quod essent plura illa obiecta dissimilia, ab Angelo cognita; & sic illa plura obiecta, veluti inadæquata, constituunt vnicum obiectum specificatiuum adæquatū vnius speciei vniuersalis: sicuti plura obiecta dissimilia, quæ videntur vnica visione, constituunt vnum specificatiuum illius ratione vnius consueti, quod resultat ex illis pluribus obiectis inadæquatis; quamuis quodlibet ex illis obiectis respectu alterius visionis esset adæquatum. V. *Non valet dicere*, in animalibus perfectioribus, & perfectioribus species non sunt magis, vel minus vniuersales; ergo neque etiam in Angelis. *Quia* omnia animalia habent species acceptas à rebus, consequenter limitatas à suo efficiente; Angelus autem recipit species à prima causa, & suæ naturæ proportionatas.

Quenam sint obiecta, quæ naturaliter Angelus cognoscit?

SUPpono I. tamquam certum, & constat ex supradictis, Angelum cognoscere se ipsum per suam substantiam; cum sit eius substantia per se ipsam intelligibilis, & immaterialis, & sufficienter præsens intellectui, non minus, quàm esset eius species: sicut etiam cognoscit per se ipsum omnia accidentia, quæ immediatè sunt in ipsius intellectu. II. Suppono hic iuxta sententiam D. Tho: *quest. 8. de verit. art. 7.* & alibi, cognoscere vnum Angelum alium per speciem illius à Deo sibi initio suæ creationis infusam; alioquin, vt benè notat D. P. August. 2. *super Genes. ad litteram cap. 3.* Angelus absens non posset cognosci ab alio; quod est contra testimonia sacre Scripturæ; Solùm potest esse primò difficultas, an Angeli inferiores comprehendant superiores? nam quòd superiores comprehendant inferiores, non est dubium; dummodo consideremus Angelum, vt substantiam quamdam naturalem perfectionis finitæ; non autem in ratione principij liberi, aut potentie obedientialis; nam hoc modo creatura à solo Deo comprehenditur, vt vult sententia valdè probabilis: pro solutione ergo videtur

Dicendum I. Quamuis Angelus inferior cognoscat quidditatiuè, & distinctè superiorem, naturaliter ipsum minimè comprehendit. Ratio est, quia vt diximus in tract. de Visione beata, ad comprehensionem requiritur, vt res cognoscatur tanta claritate, & perfectionis cognitione, quanta exigit ex se cognosci, & perfecta est ipsa res; sed Angelus inferior non intelligit superiorem, & quanta exigit cognosci; nam Angelus potest clarius, & clarius cognosci iuxta perfectionem Angeli cognoscentis: vnde nisi habeatur cognitio, tam perfecta, quam perfectum est obiectum cognitum, non habetur conceptus comprehensionis: potest autem Angelus se ipsum comprehendere; cum claritas illa, qua Angelus se ipsum intelligit, sit adeo iuxta exigentia suam nullus alius intellectus sit magis proportionatus suæ substantiæ, quàm proprius. Lo-

quen-

quando de substantijs purè spiritualibus, Deum etiam comprehendere Angelum, non est cubium, quinimò cognoscitur infinita claritate, & tanta, quæ excedit exigentiam ipsius Angeli. Si D. Tho: *quæst.* 16. *de malo art.* 5. *in corpore cap.* 98. & 2. *contra gentes.* docuit, ex eo, quod substantia a qua est spiritualis; est comprehensua totius-entis; Sumpsit Angelicus Præceptor nomen *comprehensionis* latè, idest cognoscitiuæ. Vndè

Colligitur ex his I. Possè Angelum cognoscere distinctè, & pro ut sunt in se omnia obiecta naturalia sibi coexistentia, à Deo contradistincta; cum hæc obiecta habeant, si existant actualem cognoscibilitatem, & cum intellectu Angelico non impedito proportionem non minorem, quam habent singula sensibilia cum suis sensibus. Colligitur II. Angelum defectu existentem non possè Deum intuitiue cognoscere naturaliter; hoc remanet adæquatè probatum in tract. de Visione beata. Vtrum autem potuerit Deus creare Angelum, cui sit connaturalis visio Dei, aut exitium luminis gloriæ, vel aliud simile? Videte, quæ docui in eodem tractatu, agendo de creatura substantiali, supernaturali, visuæ Dei. I potest solùm Angelus naturaliter Deum abstractiue cognoscere, cum in se ipso, tum in rebus alijs creatis, quarum habet species, & cognitiones; reuera enim substantia Angeli primò repræsentat se ipsam; Deum autem, quatenus est quædam participatio ipsius: ex cognitione autem aliarum rerum perfectius Angelus cognoscit primam causam, quam nos; nam Angelus potest immediatè se ipsum per se ipsum cognoscere, & cognoscendo se ipsum, potest sine illa specie impressa Deum cognoscere; nos verò, quia quidquid cognoscimus in hac vita, cognoscimus per speciem superadditam; idèò neque cognoscimus Deum, nisi per speciem alicuius creaturæ.

Vrgent aliqui dicentes, Non potest homo comprehendere vi sua intellectiua obiecta inferiora, v. g. muscam; ergo neque Angelus superior poterit comprehendere inferiorem. Respond. negando consequentiam, disparitas est; quia vis intellectiua hominis dependet à corpore; vndè non est mirum, si non possit, nec muscam comprehendere.

Dicendum II. Angelos cognoscere res materiales, & corporeas per species impressas, quas à Deo habuerunt in instanti creationis ipsorum, ratione quarum specierum res materiales dicuntur esse in intellectu Angeli, secundum esse intelligibile: Hoc enim est certum in sententia D. Th. sicut etiam possè Angelos cognoscere singularia materialia: hæc autem non intelliguntur ab Angelis per species acceptas ab ipsis, ut supra visum est, sed per species vniuersales, quæ sunt similitudines rerum, & quantum ad principia vniuersalia, & quantum ad principia indiuiduantia. Quando autem I'hylolophus dixit, singulare non est cognoscibile; Loquutus est de singulari materiali, & subiecto accidentium respectu hominis; quod libenter conceditur; cum singulare materiale non sit ab homine

mine intelligibile primò, & per se, sed medijs sensibus, & per quandam reflexionem; vt notat S. Tho: quamuis intellectus humanus attingat rationis vniuersales, quas non attingit sensus.

Dicendum III. Angelum non posse naturaliter, secluso lumine diuine reuelationis, cognoscere futura contingentia libera, & effectus à sola libera alicuius volūtate pendentes: nec effectus item futuros ab alijs causis naturalibus; concurrente tamen simul aliqua causa libera; quales sunt multi effectus, qui sunt ab homine, applicante actiua passivis, aut ab ipsis causis naturalibus; cum dependentia tamen ab aliqua op̄ratione libera: Est enim certum de Fide, quòd hæc futura soli Deo sunt nota; nam *Isaia 12. & 41.* legitur, *Annunciate, quæ ventura sunt, & sciemus, quia Dy estis vos.* Probatur etiam ratione à priori; Quia causæ liberæ, etiam proximæ, ex se sunt indeterminatæ, & æquè indifferentes ad veramque partem; ergo futura, quæ pendent à causis liberis, etiam proximis, non possunt cognosci ab Angelis, certò; quia in istis causis non sunt determinata: & hoc est verum, cum de effectibus, qui pendent à causis liberis immediatè, quàm de his, quæ mediatur, vt v.g. est ignis ad comburendum, qui liberè ab homine, vel ab Angelo applicetur, impeditur, remouetur, &c. Solum potest Angelus coniecturaliter, & probabiliter aliquem ex huiusmodi effectibus dependentibus à causa libera cognoscere, nempe ex inclinatione agentis, complexionis corporalis, consuetudinis, præsentis obiecti, & aliarum causarum naturalium, quæ valdè mouent, & inclinant appetitum. Et hoc modo intelligimus, demones aliquando huiusmodi futura prædicere: Vel dic, hoc exequi experientia præteritorum, vel per notitiam habitam à bonis Angelis, vel SS. hominibus tali cognitione Dei instinctu præditis.

Dicendum IV. Si nullum de præsentis datur necessariò connexum cū futuris necessarijs, non posse Angelos certò cognoscere futura necessaria, antequam sin.: Est doctrina D. Tho: nam futura ista, vel effectus huiusmodi futurorum non sunt actu in se ipsis, & consequenter à nullo intellectu creato possunt naturaliter cognosci, vt præsentis; sed à solo Deo, cuius cognitio mensuratur æternitate, quæ est causa omnis durationis creatæ, & mensura superexcedens: Insuper futurum est aliquod indiuiduum; sed indiuidui cognitio non est debita Angelo, nisi vel existat ipsum indiuiduum, vel aliquod cum illo connexum; ergo, &c.

Dicendum V. Neque Angelos posse certò cognoscere certitudine metaphylica effectus futuros, qui dependent à causis necessarijs, & cum illis necessario connexis, v.g. quòd tali tempore futura sit Eclipsis, quia connexio illius obiecti cum futuro est naturalis, & miraculose impedibilis à Deo, ne trahat suum terminum, nec Angelus potest scire voluntatem diuinam libere, nisi Deo reuelante: vnde Angelus non potest cognoscere illum effectum, nisi sub hac conditione,posito scilicet, quòd Deus non impediat. Loquendo autem de effectibus futuris, qui dependent

dent à causis necessarijs, & non impedibilibus; possunt per certam scientiam ab Angelo cognosci in suis causis; quia hi effectus habent necessariam determinationem in sua causa non impedibili; ergo qui comprehendit causam sicut est Angelus cognoscit in illa hos effectus: unde si homines multos huiusmodi effectus cognoscunt ex causis, multò perfectius cognoscere debent Angeli. Non est autem hoc modo discurrendum de causis naturalibus, ordinatis ad aliquem effectum, qui sunt defectu ibi es, & impedibiles ab alijs causis, quales sunt causæ sublunares; nam illi effectus possunt cognosci in suis causis; nō tamen omnia evidenter; sed coniectura quadā maiori, vel minori, pro ut impedimenta sunt ratiōis, vel frequentiora: cum enim nesciat impedimentum, dubitare potest de futuritione illius effectus, plus minusue, iuxta conditionem causæ impedibilis: & sic non habebit evidentem noticiam de illis.

Dicendū IV. Si loquimur de factō, non solū Angelus ab initio suæ creationis non sciuit, aut scire potuit naturaliter omnes effectus contingentes, qui hucusque fuerunt, aut futuri sunt à causis sublunarijs; sed nequāquam scire potest eos, qui futuri sunt in posterum: Quia de factō actiones causarum sublunarium ita immixtæ sunt, & connexæ cum humanis actionibus & quibusdam alijs miraculosis, quos Deus sæpe facit per homines; ut vix nullus effectus merè casualis ab illis contingat, cui non admisceatur aliqua operatio humana, siletem antecedenter: quod patet etiam in ipsis pluvijs, ventis, tempestatibus, &c. qui videntur esse effectus minus dependentes ab homine. Solū ergo potest Angelus cognoscere aliquem effectum particularem, contingentem paruo aliquo tempore antecedenti, iuxta maiorem, vel minorem vim intellectus ipsius; nam ad hoc, ut ait D. Tho: præcognoscat Angelus effectus longè distantes, & casuales deberet simul posse comprehendere has omnes causas creatas, & unico se. e intuitu distinctè ferri in omne, quod est in vnoquoque cognoscibili, quocumque tempore per comparisonem ad omnia, quæ quocumque modo sunt in alijs cognoscibilia, etiam pro quocumque tempore: sicut potest facere Deus, quæ Angelus præsta e non potest.

Nota, Quod licet species Angelorum, quantum ad vniuersalitatem, sint perfectiores speciebus infusis animæ Christi Domini; non sequitur, quod sicut Christus Dominus per species infusas cognoscit futura contingentia, & libera; quod possit etiam Angelus. Ratio est, quia ut ait S. Tho: 3. p. 9. 11. art. 4. *Scientia innotat animæ Christi Domini fuit multò excellentior, quàm Angelorum scientia, quia lumen spirituale gratiæ, quod est inditum animæ Christi est multò excellentius quàm illud quod pertinet ad naturam Angelorum; & sic licet species Angelorum, quoad vniuersalitatem, sint perfectiores, ut dixi, speciebus animæ Christi Domini, species autem istæ, ut potè præternaturales, re præsentarent actu futura contingentia, & libera; non tamen species connaturales Angelis, & infusæ ab initio creationis ipsorum.*

Solet hic dubitari, Vtrum Angeli naturaliter cognoscant omnia præterita? *Respond.* quod si sermō est de rebus præteritis, quæ aliquando Angeli viderunt præsentia, nullum est dubium; quod illas Angeli cognoscant, & recordentur esse præterita; Quia si homines præteritorum recordantur, multò magis Angeli, qui sunt præstantiores: sicuti etiam, nullum est dubium, Angelos naturaliter cognoscere ea præterita de quibus constare potest esse præterita ex vestigijs relictis suæ existentiae. Ad hoc autem non est necesse, vt de nouo habeant speciem, sed modificationem speciei repræsentantis suam priorem cognitionem; sed satis est, species ab initio infusa repræsentatiua notitiæ cum sua duratione, vel species ab initio infusa repræsentatiua obiectorum cum suis durationibus. *Solum* potest esse dubium de præteritis, de quibus nullum datur actuale signum, & vestigium, ostendens illa fuisse. *Dico* igitur, huiusmodi præterita non esse proximè intelligibilia, neque intra obiectum intellectus creati: cum non habeant absolutè, neque sint in se intelligibilia; est igitur de illis eodem modo phylosophandum, ac de futuris, & non dum existentibus.

Dubitabis II. Vtrum Angeli possint sua naturali virtute, seclusa Dei reuelatione, & speciali directione, & communicatione elicientis, & cogitantis, certò, & euidenter cognoscere secreta cordium, & actus liberos, siuè hominum, siuè aliorum Angelorum? *Respond.* esse adeo certum, non posse Angelos sua virtute naturali certò, & euidenter cognoscere actus liberos alienos independentè à voluntate alterius; vt contrarium sine errore sustineri non possit: & Suarius hanc conclusionem putauit esse de Fide. Probatur; quia in scripturis talium cognitio tribuitur Deo, vt illius propria: legitur enim *Regum* 8. *Tu solus nosti corda omnium filiorum hominum.* & 16. *Homo videt ea, quæ patent, Dominus autem intrinsetur cor.* Ratio autem, cur Angeli non habeant huiusmodi species, est; quia voluntas soli Deo subijcitur in suis operationibus; cum sit potentia libera, & habeat dominium liberum in suos actus; ergo Angeli non habent species actu repræsentatiuas affectionum voluntatis independentè ab ipsa voluntate operante.

Neque valet dicere, Angelos cognoscere hos actus liberos secundum substantiam, non autem secundum respectum ad obiectum: id est non cognoscere circa quæ obiecta actus illi versentur, an per assensum, vel dissensum, per complacentiam, aut displicentiam, fugam, aut prosecutionem, &c. *Nam isti* respectus sunt horum actuum substantia, & isti, & similes modi includuntur essentialiter in obiectis istis, & actibus, imò sunt ipsi actus.

Nota, I. Quòd eodem modo est discurrendum de actibus intellectus; & licet cogitationes intellectus non sint formaliter, & per se primò libere; sufficit enim esse liberas radicaliter, & quòd non possint actus voluntatis esse liberos formaliter, nisi quia voluntas dirigatur ab intellectu;

Qu: Alij verò actus potentiarum suæ internarum, suæ externarum, cum non requirant libertatem, & directionem ab intellectu, possunt propterea ab Angelis cognosci. Insuper actus intellectus, qui sunt necessarij propter impedimentum vsus liberi arbitrij; vt accidit in amentibus, possunt ab Angelis cognosci in suis causis, durante illo impedimento: eo modo, quo cognoscuntur alij actus necessarij à suis causis naturalibus provenientes. Nota II. Quòd actus supradicti sunt naturaliter incognoscibiles ex suppositione, quòd nolit eliciens illos manifestare: unde respectu elicientis, & illius, cui voluerit manifestare, sunt actus illi naturales. III. Si aliquando demones reuelant aliqua cordis humani secreta; id solum coniecturaliter faciunt, vel ex immutatione scilicet interni temperamenti corporei, vel ex quibusdam externis indicijs illa explorant.

Dubitabis III. Vtrum Angeli virtute naturali mysteria gratiæ cognoscere possint? Per mysteria gratiæ intelligit D. Tho: effectus omnino, & secundum substantiam supernaturales, quales sunt. vt plurimum, qui pertinent ad gratiam, & gloriam; v. g. vnio hypostatica in Christo Domino, & alia dona, siue in ipso, siue in alijs supernaturalia, & gratuita. *Dico* igitur hæc non cognosci ab Angelo sua naturali virtute. Probat ex Scriptura 1. ad Corinth. 2. *Quæ sunt hominis nemo nouit, nisi spiritus hominis, qui in ipso est; ita & quæ sunt Dei nemo nouit, nisi spiritus Dei.* Probat etiam ratione, Quia Angelorum natura essentialiter solum exigit species rerum, quas ad naturalem eius perfectionem, ac proinde ad eius naturalem scientiam pertinent, quæ naturalis perfectio terminari debet intra latitudinem rerum naturalium: Et hoc voluit D. Tho: cum docuit, mysteria gratiæ cognosci non posse, quoniam pendent à sola Dei voluntate; idest quia à Deo producuntur absque vlla exigentia rerum naturalium, & supra id, quod naturaliter postulant causæ secundæ.

Possunt solum Angeli cognoscere mysteria gratiæ, vel per illuminationem, & reuelationem à Deo immediatè factam; vel per illuminationem factam ab Angelis superioribus, qui modi explicantur ab aliquibus: vel per visionem beatam: quatenus Deus infundit per ipsam lumen gloriæ, quo mediante videntur huiusmodi mysteria in Verbo, vel per habitum Fidei, vel per scientiam infusam talium mysteriorum, quæ fit per infusionem specierum supernaturalium representantium illa mysteria, in proprio genere: Insuper potest Angelus, & etiam homo naturaliter cognoscere id, quod est supernaturale quo ad modum; v. g. visus cæco restitutus à Deo, & similia; nam hæc cum dicant naturalem aliquam propensionem, aut exigentiam in aliqua re merè naturali, sunt simpliciter, & merè naturalia.

Utrum in Angelis possit esse discursus ?

PRænoto I. Non esse in Angelis admittendam simplicem apprehensionem distinctam à iudicio ; solus enim intellectus humanus necesse est, ut prius apprehendat quàm iudicet ; quia postquam recipit speciem à sensibus , debet formare apprehensiones, inter se comparando, ad conuenientiam, vel disconuenientiam terminorum apprehendendam ; & indè moueri ad affirmandum, vel negandum : Angelus autem ob suam perfectionem assentitur absque præuia apprehensione. II. Cum ex D. Dionysio sit Angelus speculum purum, & clarissimum, repugnat perfectioni intellectus ipsius naturaliter tendere in obiecta , componendo, & diuidendo ; hoc enim supponit præcessisse simplices apprehensiones ; ubi ergo non est locus simplici apprehensioni, neque erit locus compositioni, aut diuisioni ; cum componere sit vnum ex prædicatis apprehensis applicare alteri : & diuidere sit segregare ab alio : Angelus igitur sine vlla compositione , sed simplici intuitu intelligit, vel causas in effectibus, vel effectus in causis, vel accidentia in subiecto . Non nego autem Angelos in Scripturis suos sensus manifestare hominibus modo humano ; ut ab illis possint percipi, quod etià facit Deus. III. Ad decidendum, utrum in Angelis possit esse discursus, est notandum, Non sufficere ad discursum cognoscere effectum ex vi causæ, vel in causa ; sic enim etiam Deus discurreret ; sed necessarium requiri pluralitatem cognitionum, quarum vna sit causa ; altera verò causata . Nec sufficere ad discursum, quòd vnum obiectum sit ratio cognoscendi aliud ; sed debet ex vi, & causalitate vnus aliud inferri : vnde discursus essentialiter dicit plures operationes intellectus, per quas ex vna re prius saltem natura cognita inferatur alia, quæ cognoscatur per aliam cognitionem, saltem perfectiorem natura.

Dico igitur, Angelos naturaliter non discurrere. Est conclusio D. Th. & colligitur ex dictis ; Angelus enini, omnia, quæ naturaliter videt, vel videt in se ipsis, vel in suis causis, & signis ; ita ut vnica cognitione feratur in causam, & effectum ; sicut Beati vnico intuitu vident Deum, & creaturas ; ergo modus cognoscendi proportionatus Angelo, non est discursiuus : cum discursus requirat pluralitatem cognitionum, ut visum est. Discursus autem in nobis oritur ex imperfectione luminis intellectusualis, & modo cognoscendi : ex quo colligitur contra Molinam, nec per accidens posse Angelos discurrere ; nec etiam circa obiecta à se imperiectè cognita proficere per discursum, neque ex cognitione vnus connexi tamquam ex antecedente transit ad cognitionem alterius occulti ; sed si velit Angelus perfectius cognoscere, quod antea imperfectè cognoscebat, acius in illud animum intendit, auocatis eo viribus suis cognoscitiuis antea dispersis.

Quæres I. Vtrum in intellectu Angeli possit esse falsitas circa res naturales? *Respond.* negatiuè; nam quorum Angelus habet species, cuiusmodi sunt res naturales, cognoscit simplici intuitu positis debitis conditionibus, & illis non positis non cognoscit; & quia eius intellectus, & species sunt perfectæ, iam non fallitur; cum obiecta sint ab ipsis quidditatiuè cognita. *Non nego* probabiliter posse sustineri intellectum Angelorum falsitatem pati posse, circa obiecta, quæ imperfectè solum, & coniecturaliter cognoscit, aut cum sola certitudine physica; fieri enim potest, vt à propria voluntate dirigatur intellectus Angelicus ad temerè iudicandum, ita se habere obiectum, vt apparet per coniecturas fallaces; quod totum oritur ex praua adhesionè ad obiectum, causante præcipitem voluntatem, qua inducatur intellectus ad illud iudicium temerarium. *Circa* autem res supernaturales, quarum non habet Angelus species; videtur etiam, quod possit esse in eius intellectu falsitas; & sic demon potest decipi circa res supernaturales, præcipuè si ex rebus naturalibus sibi cognititis aliquid absolute affirmaret, aut negaret contra superiorem ordinationem Dei; vt si videns hominem mori, iudicaret nunquam resurrecturum; licet hanc falsitatem non habeant Angeli boni; cum semper iudicent de rebus naturalibus salua ordinatione diuina.

Quæres II. Quid senserit D. P. August. per matutinam, & vespertinam cognitionem Angelorum? *Respond.* secundum mentem D. Tho: quod nomine cognitionis matutine venit chrestè, & perse cognitio rerum increatarum, in quibus dicuntur contineri entitèter creaturæ; taliter, vt primario talis cognitio terminetur ad illas increatas, in quibus cognoscuntur creaturæ; cognitio verò vespertina est cognitio creaturarum tantum per proprias species; quatenus immediatè terminatur ad illas,

De Illuminatione, & Locutione Angelorum.

ANtequam videamus, vtrum, & quomodo vnus Angelus alteri loquatur; aliqua sunt præmittenda circa illuminationem ipsorum; licet hæc confundatur cum locutione: Et I. est sententia D. Tho: & omnium Theologorum, quod vnus Angelus alterum illuminat, idest Angelus superior inferiorem illuminat, non tamen è contra: illuminatio pro vt accipitur è Theologis, & P. P. Est manifestatio veritatis ignotæ; versatur autem circa res spectantes ad naturam, gratiam, & gloriam. II. Ad illuminationem duo requiruntur, primò manifestatio veritatis incognitæ, idest, quod Angelus superior proponat inferiori obiectum, antea ipsi incognitum; secundo, vt ostendat medium, siuè conceptum, proportionatum ad illud concipiendum. III. In demonibus non datur illuminatio: & sic quamuis demones sint superiores, non illuminant inferiores; nam illuminatio est actus hierarchicus; inter ipsos autem,

nulla est propriè dicta hyerarchia. His præhabitis circa illuminationem: remanet videndum, Quomodo vnus Angelus possit cognoscere arcanæ, & secreta alterius ipsum alloquentis.

Est certum Angelos inter se loqui; Conclusio est D. Tho: & habetur expressè in Scripturis, *Apocalipsenim* 7. legitur, *Angelus clamanit quatuor Angelis. Zaccharia* 2. *Vnus Angelus egreditur in oculum alterius; & dicit ad eum.* Ratio naturalis, est, Quia natura intellectualis habet naturalem appetitum ad societatem; hæc autem societas sine mutua conceptu cognitione consistere non potest; cum ergo cogitationes, & volitiones sint Angelis naturaliter ignotæ, debent aliqua ratione manifestari, quod est ad inuicem loqui. Conceptus igitur ipse mentis Angelicæ, vt per voluntatem directus, & ordinatus ad alium, cui vult Angelus loqui, dicitur locutio: & sic duo videntur requiri ad locutionem. Prmo voluntas significandi alteri rem aliquam. Secundo expressio, & manifestatio illius rei per internum conceptum ex tali voluntate procedentem.

Difficultas igitur in præsentī est de modo, quo vnus Angelus alteri alloquitur; & relictis varijs sententijs, quæ circa hunc modum locutionis feruntur; Dico cum D. Tho: & omnibus Thomistis, non melius explicari conceptus locutionis Angelicæ, nisi per directionem conceptuum per voluntatem loquentis ad eum, cui loquitur; & sic dicimus, Angelos ad inuicem loqui per directionem conceptus factam ab vno ad alterum, cui vult suos conceptus manifestare. Ratio est, quia posita voluntate, & directione conceptus obiectiui, & formalis Angeli, volentis manifestare suos conceptus alteri; iam actus voluntatis, & intellectus vnus Angeli sunt cognoscibiles ab alio Angelo; nam sola ratio dominij, quod habet vnus in suos actus voluntatis, & intellectus, facit, vt huiusmodi actus non sint cognoscibiles ab alio; sed hæc ratio specialis dominij cessat per hoc præcisè, quod vnus Angelus velit suos conceptus alteri manifestare; ergo benè potest constitui locutio in illa voluntate, & directione conceptus &c.

Colliges I. Malè aliquos putare, Angelos loqui ad inuicem per signa, & nutus externos spirituales: aliter non posset vnus Angelus cum alio loqui, cæteris non audientibus, si attendant; cum signa illa externa ab omnibus cognosci possint. II. Neque potest dici, loqui per species acceptas, & infusas à Deo in instanti creationis: aliter possem dicere de speciebus singularium existentium, habuisse scilicet Angelos species rerum singularium existentium; quod est contra supradicta, & contra doctrinam Angelici Præceptoris. III. Neque potest dici, Angelos loqui, efficiendo ad inuicem actuales conceptiones rerum, quas volunt manifestare, eas imprimendo in alijs, quibus manifestare volunt suos conceptus: Quoniam actus vitales non possunt ab extrinseco in intellectum alterius causari, sed effectiue procedere ab eo, in quo sunt. IV. Neque potest dici, hoc fieri producendo in absentem speciem sui conceptus, per quam
deinde

deinde ille alius intelligat : Quoniam daretur actio indistans sine medio. V. Neque potest dici, quòd producat^{ur} liberè talis species in eum solum Angelum, cui manifestare vult suum conceptum : Nam hoc sine fundamento asseritur; cum videamus habitus, & alios omnes effectus, qui immediate procedunt ex actibus voluntatis, & intellectus non fieri liberè.

Norabis hæc I. Quæstionem hanc procedere de locutione Angelorum ad inuicem; non verò de locutione Angelorum cum hominibus; nam hæc fit vel per voces, & signa sensibilia, tum per internas, siuè inspirationes bonorum, siuè malorum. II. Hæc locutio fieri potest ad quamcumque distantiam; taliter, vt possit vnus Angelus loqui vni, & non alteri, & ab vno tantum intelligatur, dirigendo scilicet suum conceptum vni tantum. III. Hæc locutio inseruit, & est necessaria in Angelis, præcipuè ad manifestandas res occultas, videlicet suas volitiones, & intellectiōnes, vel volitiones, & intellectiōnes alterius sibi quidem notas, sed alteri ignotas. IV. Quando Angelus superior loquitur ad inferiorem; manifestando illi res diuinas, & supernaturales, quas nobiliori modo cognoscit, & cicitur alium illuminare; & hoc modo locutio conuenit cum illuminatione; differunt autem, quia illuminatio est manifestatio alicuius rei, vel supernaturalis, vel prout est à Deo formaliter, subindeque veri, sub ratione veri formaliter; locutio verò est manifestatio occulti, pro vt est à voluntate Angeli loquentis: vnde per hanc loquelam internam potest vnus Angelus naturaliter alteri mentiri; vt defaciò possunt facere dæmones, aut aquiruocare, aut quomodocumque alium decipere hoc enim esset, si dæmon exprimeret suo conceptu, quod aliquid velit, aut intelligat; cum tamen neque velit, neque intelligat. V. Respectu Dei neque in homine, neque in Angelo datur vera locutio, per manifestationem scilicet conceptus; sed solum actus quidam intellectus, quo declaramus nostram miseriam, eamque notam esse Deo volumus, & Deum nobis subuenire. VI. Per illam manifestationem, non solum Angelus signatè vult loqui, sed simpliciter loquitur; dum vult, vt alius Angelus cognoscat suos actus internos, realiter, vel saltem obiectiue existentes; & sic exercitè scitatem vult loqui. VII. Non valet dicere, in hominibus non fit locutio per talem manifestationem; ergo neque in Angelis; ratio est; quia homo audiens non potest percipere res spirituales, & etiam aliquas corporales, nisi dependenter à quibuscumque signis sensibilibus, & externis. Sunt tamen aliqui, qui probabiliter sustinent, esse possibilem locutionem purè internam hominis cum Angelis, & spiritibus beatis; cum dæmonibus autem videtur certum, non posse homines colloqui inere interne, videmus enim maleficos, & magos indigere signis externis ad inuocationem dæmonum. Vltimò; quando diximus, illuminationem fieri iuxta D. Tho.; et confortationem potentiae. Non intelligimus, quod aliquid producat^{ur} ab Angelo superiori in intellectu inferioris, per quod intellectus ipse confortetur; ac
proinde

proinde accipiat virtutem cognoscendi, quam antea non habebat; sed solum intellectionem Angeli inferioris accommodari per aptas propositiones, similitudines, & exempla, ad intelligendum id, quod antea non intelligebat: hæc autem illuminatio vocatur à D. Tho: Artificioſum magiſterium;

De Perfectione Angelorum in eſſe Gratiæ, & Gloriæ.

QUæſitur hic. Verum Angeli fuerint in ſua creatione beati? *Reſp.* quod loquendo de beatitudine naturali, quæ conſiſtit in cognitione Creatoris: habita ex cognitione ſui, vult D. Tho: quod poteſt dici quodammodo, Angelos fuiſſe in primo inſtanti creationis ipſorum creatos in ſua beatitudine, & felicitate naturali; cum omnes Angeli per D. Thomam habuerint ab inſtanti creationis intellectum perfectum, etiam quoad omnia pertinentia ad eorum naturam: quare perfecte cognouerunt ſe ipſos, & Deum cognitione naturali. *Ex hoc* autem non valet inferre, Dæmones etiam nunc eſſe hoc modo beatos; Nam ad beatitudinem huius viæ requiritur rectitudo voluntatis, quæ dæmon caret, quin non ex Dei cognitione per peruerſitatem ſuæ voluntatis auertitur ab ipſo. *Loquendo* autem de beatitudine ſupernaturali gloriæ, quæ eſt beatitudo in Patria; vult communis ſententia Theologorum, Angelos non fuiſſe creatos beatitudine ſupernaturali; id eſt nulli Angelorum, ſiue bono, ſiue malo fuiſſe primo inſtanti creationis datam viſionem beatam Dei, quoniam viſio beata non admittit ſecum peccatum, aut meritum; ſed Angelorum aliqui peccauerunt, alij meruerunt; ergo neutri habuerunt viſionem beatam; & conſequentér non fuerunt creati in beatitudine ſupernaturali gloriæ: nec Angeli boni fuerunt beati per claram Dei viſionem, niſi in termino viæ, in quo alij fuerunt damnati per peccatum.

Si aliqui SS. PP. videntur interdum dicere, Angelos fuiſſe in ipſorum creatione beatos: Loquuntur de beatitudine naturali ſupra dicta, & aliquando loquuntur, etiam de beatitudine ſupernaturali gratiæ, non gloriæ, & Patriæ: & ſic dicuntur Angeli beati: ſicut primus homo in Paradifo terreſtri, qui fuit beatus beatitudine ſupernaturali gratiæ, non gloriæ.

Quamvis abſolutè potuiſſet Deus dare gloriàm Angelis bonis ſine vilo merito; deſactò tamen nulli Angelo, aut puro homini ratione videnti, decreuit illam dare ſine ſuo merito: vnde in omnium Scholaſticorum ſententia, Angeli ſuam beatitudinem meruerunt per proprios ætus; quia hic eſt modus perfectior, & congruentior acquiendi beatitudinem; in adultis, videlicet ex meritis, niſi aliud obſtet. Loquendo autem ſecundum legem ordinariam, & conſiderata natura creaturæ rationalis ordinatæ ad beatitudinem, Puto dicendum cum D. Thoma, & communij ſententia, meritum Angelorum non fuiſſe inſitum cum beati-

titudine in primo instanti, quo creati sunt; sicut nec poenam malorum Angelorum cum eorum demerito; sed post meritum, & demeritum fuisse premium, & poenam. Nam non ordinatur Angelus ad beatitudinem connaturaliter, nisi per Fidem, & gratiam per Fidem operantem; ergo, tandiu fuit in statu viæ, & meriti, quandiu per Fidem potuit operari; sed non potuit saltem connaturaliter operari per Fidem in eo instanti, vel tempore, in quo habuit beatitudinem; ergo neque tunc fuit in statu viæ, & meriti. *Probabiliter* igitur censeo, Angelos meruisse suam beatitudinem prius duratione, quam illam habuerint; hanc autem durationem bonorum Angelorum circa meritum, & beatitudinem, puto duobus instantibus fuisse completam; taliter ut in primo fuit meritum, in secundo premium; malorum autem Angelorum via tribus instantibus; primum, in quo fuerunt creati in gratia, illamque meruerunt, ut boni; secundum, in quo non perseverauerunt sed ceciderunt; tertium, in quo poenam consequuti sunt: primum autem, & secundum instans malorum Angelorum æquivalet primo instanti bonorum. In primo igitur instanti omnes Angeli fuerunt creati in gratia; boni verò Angeli perseverantes in gratia, & dilectione Dei supernaturali, meruerunt: & hoc totum intervallum, seu spatium vocatur unum, & primum instans Angelicum; quia vno perfecto actu completur, & est una duratio eiusdem operationis, (instantia enim Angelica non sunt, nisi durationes diversarum operationum.) Post hoc instans, seu post hanc durationem, & in qua fuit meritum beatitudinis, successit beatitudo ipsa, quæ cum sit distincta operatio, facit distinctam operationem, & consequenter distinctum instans: hoc enim modo censeo disponenda esse instantia meriti, vel demeriti, præmij, vel poenæ, bonorum, vel malorum Angelorum; quidquid sentiant in oppositum, aliqui ex Thomistis. Quantum autem duraverit tempus illud viæ Angelorum, nihil certi sciri potest, nisi quod fuerit brevissimum.

Quæritur II. Vtrum Angeli sint creati in gratia? *Respond.* cum D. Tho: omnes Angelos fuisse a Deo creatos cum gratia sanctificante: & sic habuerunt in primo instanti creationis gratiam sanctificantem, per quam homines dicuntur simpliciter sancti, & amici Dei, & hæredes vitæ æternæ. Hæc sententia est communissima, & conformior modo loquendi Scripturæ: legitur enim *Ezechiel. 28. In medio lapidum ignitorum ambulasti perfectus in vis tuis à die conditionis tue, donec inuenta est iniquitas in te;* quæ verba in sensu spiritali accipiuntur à PP. de Angelo in persona Regis Tyrj. *Apocalyps.* etiam, ubi legitur, *Angeli, qui non servauerunt suum principatum.* Principatus autem exponitur à PP. per gratiam. Probatur etiam ratione. Quoniam ex communi PP. sententia, primus homo creatus est in gratia; ergo multo magis Angelus, qui cum perficiatur in instanti, non debuerat expectare tempus ad suam perfectionem, & sanctitatem.

Ex hoc colligitur, quod sicut in eodem instanti, in quo Adamus fuit

creatus in gratia, fuit consensus Adami ad eandem gratiam; sic etiam longè congruentius fatendum est de Angelis: nempe posito, quòd in primo instanti fuerit in omnibus aliquis actus supernaturalis erga Deum, procedens ab auxilio gratiæ, fuisse gratiam sanctificantem datam Angelis secundum hanc dispositionem supernaturalem; cum sit commune ultimæ dispositioni, quòd sit in eodem instanti simul cum forma: vnde D. Tho: docet hic *art. 6. Gratiam, & gloriam, sicut hominibus adulsis; ita, & Angelis fuisse datam secundum maiorem, aut minorem efficaciam conversionis in Deum*: videtur enim modus congruentissimus dandi gratiam naturæ rationali perfectæ cum suo scilicet consensu, & dispositione; dummodo non debeatur talis gratia per modum naturalis proprietatis; sicut fuit gratia Christi Domini, posita vnione hypostatica: Quomodo autem intellegendum sit, Angelos se disposuisse ad gratiam: clarè videbitur in tractatu de gratia, agendo de modo, quo possit creatura se ad gratiam disponere.

Nota hic I. Quòd Angelus per hoc, quòd habuerit in primo instanti operationem naturalem, non sequitur habuisse operationem supernaturalem in secundo instanti: quia vt supra diximus, instans Angelicum est duratio diuersarum operationum, inter quas potest dari aliqua prioritas naturæ in diuerso genere causæ: vnde operatio naturalis fuit prior operatione supernaturali in genere causæ materialis; operatio autem supernaturalis fuit prior in genere causæ formalis. Nota II. cum D. Tho: Deum ita se gessisse in distribuenda gratia, & gloria Angelis; vt quo Angelus fuerit secundum naturam perfectior, eo ad maiorem gratiam, & gloriam fuerit ordinatus; vt scilicet habuerit maiora auxilia gratiæ, & consequenter perfectiorem dispositionem; non quia perfectio naturalis in Angelis fuit dispositio necessaria, vel meritum ad gratiam, & gloriam; sed quia Deus omninò gratis concessit cuique Angelo; tantam scilicet gratiam respexit ad proportionem naturalis perfectionis cuiusque Angelis; cum tamen id non facere omnino potuisset.

De Angelorum malitia.

Circa Angelorum malitiam quo ad culpam, videndum est primò, Quenam peccabilitas comperat Angelo ratione suæ libertatis: Suppono autem certum, Angelos defacto existentes esse peccabiles; Patet ex illo *Iob. 4. In Angelis suis reperit prauitatem*: possunt enim Angeli per suum liberum arbitrium declinare à recta ratione, & lege Dei, & consequenter peccare, non solum contra legem supernaturalem, sed etiam contra naturalem, tam committendo, quam omittendo. Insuper cum Angeli, qui peccauerunt, sint eiusdem naturæ cum illis, qui in accepta iustitia perseverauerunt, etiam isti peccare potuerunt: Vnde D. P. August. 3. contra Maximam cap. 2. ait, *Et omnes, qui non peccauerunt, peccare potuerunt*: hoc

hoc enim, ut dixi, est certum; solum hic occurrit grauis quædam difficultas circa creaturam rationalem, quæcumque illa sit, siue Angelica, siue humana, quæ sit natura sua simpliciter impeccabilis; id est præcisa eleuatione ad statum supernaturalem: vno verbo videndum est

Verum sit possibilis pura creatura rationalis ex natura sua essentialiter impeccabilis?

Questio procedit de pura creatura rationali, ad excludendam creaturam rationalem hypostaticè vnitam Personæ diuinæ, quæ est impeccabilis propter immediatam vnionem cū eadem Persona diuina; quæ vnio trahit, tamquam necessariam proprietatem, impeccabilitatem: Insuper loquimur, tum de peccato omissionis, tum commissionis; circa peccatū autem commissionis est aduertendum, quod hoc nō semper contingit ex ignorantia, & errore, apprehendendo scilicet tanquā bonum, & congruum, quod reuera non est tale; ut esset, si aliquis eligeret v.g. mendacium, vel quid simile; sed multoties etiam accidit ex inaduertentia earum rerum, ad quæ homo; vel Angelus deberet aduertere, vel non, considerando omnia, quæ deberet considerare; ut esset si aliquis v.g. vellet ieiunare contra præceptum superioris, vel simile: & hoc secundo, saltem modo; docet D. Tho: Angelum peccare posse, refundens peccabilitatem Angeli, non in errorem Angeli circa sua bona, sed in defectum considerationis circa bona diuina. His igitur præhabitis

Puto probabilius dicendum, Impossibilem esse creaturam rationalem liberam, quæ secundum sua naturalia sit essentialiter impeccabilis. Clarissimè docet hanc conclusionem D. Ambros. 3. de Spiritu sancto cap. 19. dum inquit: *Spiritus sanctus, quia sine peccato est, creatura non est; omnis enim creatura peccatorum capacitati obnoxia est; sola autem est a peccato immunis, & immaculata sempiterna Diuinitas*: similiter hoc idem asserunt alij SS. PP. docentes, non posse præuaricari, non posse in peccatum cadere esse signum Deitatis. Et D. P. August. lib. 22. ad Marcellinum cap. 30. inter Deum, & creaturam distinguit; quia Deus habet ex natura sua impeccabilitatem; at creatura etiam beata, non nisi ex munere Dei liberali; ergo per D. P. August. & alios SS. PP. omninò implicat pura creatura rationalis libera, natura sua essentialiter impeccabilis.

Probatur conclusio ratione; Quia nulla pura creatura rationalis libera habet ex natura sua impotentiam ad auertendum se à Deo; ergo nulla pura creatura rationalis libera est essentialiter impeccabilis; nam impeccabilitas nihil aliud importat, nisi impotentiam ad auertendum se à Deo: antecedens in quo est difficultas probatur, Quia impotentia auertendi se à Deo, non potest oriri, nisi, vel quia creatura est natura sua determinata ad vnum, videlicet ad bonum; vel quia est tantæ perfectionis; ut in sua operatione sit indefectibilis; sed nulla est possibilis creatura ra-

tionalis cum voluntate natura sua determinata ad vnum v.g. ad bonum; cum voluntas sit potentia vniuersalis: & sic non se habet sicut natura sensitua, quæ habet appetitum determinatum ad obiectum delectabile, à quo trahitur, sed habet obiectum indeterminatum, siue honestum, siue vile, siue delectabile: vnde non trahitur consequenter determinatè ab aliquo ex his. Neque potest dici secundum, nempe quòd talis creatura sit tantæ perfectionis, vt sit in sua operatione indefectibilis: aliter intellectus, & voluntas talis creaturæ esset sibi regula suarum operationum; nam hoc importat conceptus impeccabilitatis, vt sit regula suarum operationum; sed hoc repugnat creaturæ rationali; cum hæc regula prima, & indeficiens sit intellectus, & voluntas diuina; ergo est impossibile, vt intellectus, & voluntas creata sint sibi regula suarum operationum, idest vt non habeant supremam regulam cui non conformare debent, tamquam primæ, & indeficienti.

Colliges ex his. Nullam habere vim argumentum illud Aduersarium afferentium, quòd sicut Deus fecit appetitum sensituum determinatum ad bonum proprium, & delectabile, & ad sequendam cognitionem sensituiam; ita facere potest voluntatem determinatam ad bonum, vel ad sequendam rectam rationem. Disparitas enim remanet sufficienter assignata in probatione nostræ conclusionis.

Dices I. Est possibilis creatura aliqua supernaturalis substantialis intellectiua, exigitua naturaliter visionis Dei; sed talis creatura esset naturaliter impeccabilis; cum sit naturaliter visiva Dei; qui enim clare Deum videt, peccare non potest; ergo &c. *Respond.* concedendo maiorem, & negando minorem, ad probationem minoris dico, Aduersarium supponere aliquid falsum; debitum scilicet visionis trahere essentialiter debitum amoris, & amicitie Dei; cum visio, neque dicat essentialem connexionem cum gratia, nec cum amore, & amicitia Dei: vnde impeccabilitas in Beatis non procedit ex visione beatifica, sed ex amore beatifico; & cum Deus posset huic creaturæ denegare concursum ad amorem; sequitur talem creaturam posse esse naturaliter visuam Dei, & peccabilem; lege, quæ diximus in tractatu de visione Dei, agendo de creatura supernaturali, substantiali intellectiua, naturaliter exigitua visionis Dei; vbi plura inuenies ad hanc materiam spectantia notatu digna.

Dices II. Defectus voluntatis supponit defectum in intellectu, à quo illa dirigitur; sed nullus potest esse defectus in intellectu Angelico circa finem, & media, siue naturalia, siue supernaturalia; ergo Angelus est impeccabilis, tum contra legem naturalem, tum etiam supernaturalem. *Respond.* negando minorem; quamuis enim Angelus, vt supra diximus, non possit deficere per errorem,tribuendo Deo prædicatum illi repugnans, aut auferendo ab eo prædicatum aliquod necessarium; vt faciunt plerumque homines; deficit tamen in cognitione diuinorum, cum illa neque comprehensiuè, neque intuitiuè, & sicut sunt attingat:

& dato quòd possit dari Angelus, qui naturali virtute possit intuiuè res diuinas attingere (cum per nos non implicet) & consequenter non errare; non sequitur talem Angelum esse impeccabilem; nam stante, omni reèitudine intellectus, & etiam voluntatis in hoc Angelo; nisi concurrat specialiter Deus ad amorem, non posset Angelus ille Deum amare, vt supra visum est, etiam si naturaliter res diuinas intuiuè attingeret.

Dices III. Corpora cœlestia sunt naturaliter incorruptibilia; ergo & Angeli sunt moraliter incorruptibiles ex natura sua. *Respond.* negando consequentiam, dispari as est, quia corpora cœlestia, & omnia agentia naturalia non possunt pati malum inordinationis in nulla sua ordinatione; cum omnis eorum naturalis actio procedat ex solo appetitu innato, seu ex sola directione diuinæ sapientiæ, substantiæ autem intellectuales habent etiam actiones liberas: vnde in his possunt relatiuè ad voluntatem diuinam admittere deordinationem.

Dices IV. Cum aliquibus recentioribus Thomistis, qui putant esse possibilem creaturam aliquam rationalem impeccabilem secundum quic, seu contra legem naturalem. Potest dari creatura intellectualis cui amor Dei, vt authoris naturæ sit connaturaliter debitus, & consequenter, quæ non possit diuelli à motu dilectionis naturalis in Deum; sed talis creatura esset impeccabilis contra legem naturalem, saltem in his quæ pertinent ad ipsum Deum ergo & c. *Resp.* possem in primis negare maiorem, de amore perfecto, & solum concedere de amore imperfecto composibili cum peccato; data tamen maiori, nego minores; satis enim est, vt dicatur creatura illa peccabilis; vt possit abui illo motu dilectionis naturalis in Deum; quamuis de reliquo non possit diuelli à tali motu; cum enim ille motus sit actus merè naturalis, idest necessarius, sicuti est grauitas in lapide, potest illo abui creatura rationalis, siue Angelus, siue homo; sicuti potest abui cognitione, & amore sui naturali. Hanc autem abusionem explicat D. Thomas p. 2. quest. 89. artic. 4. vbi docet, Quòd quamuis sit in dæmonibus appetitus naturalis boni, idest dilectionis naturalis sui boni cognoscendo suam naturam non esse malam, sed bonam à Deo creatam; tamen ipsi in nihil mouentur motu libero, nisi in ordine ad hanc peccati superbiæ eorum; & ideo in omnibus, quæ propria voluntate agunt, peccant mortaliter; Ex quo constat, dæmones peccare non ex eo quòd careant motu appetitus naturalis in Deum; sed ex eo quòd ea quæ liberè volunt, non dirigunt in hunc finem; ergo potuit in voluntate substantiæ separatæ esse peccatum, ex eo quòd proprium bonum & perfectionem in vltimum finem non ordinauerit.

Dices V. D. P. August. 11. de Genes. ad litteram cap. 7. ait: Talem Deus potuit hominem fecisse, qui nec peccare posset, nec vellet, & si talem fecisset, quis dubitaret eum meliorem fecisse? *Respond.* quòd est valde probabile huiusmodi verba eo loco non haberi, sed solum hæc, Concedant, & ipsi (idest

(idest Hæretici) non esse malam naturam, quæ sic facta est, ut posset non peccare si vellet: vnde solum docuit, Deum facere potuisse hominem, qui noller omnino peccare; non autem qui non posset peccare.

Nota hic I. Quòd dato quòd Angelus sit impotēs peccare venialiter, non sequitur, quòd neque possit peccare mortaliter; non enim vim habet illud axioma, *Quod non potest minus, neque poterit maius infra idem genus*; hoc enim axioma est verum, quando maius est inseparabile à minori; nam si maius est separabile à minori, quamvis eiusdem generis; non est necesse, ut qui potest maius possit etiam minus; Deus enim potest certò cognoscere res; non tamen probabiliter; & qui potest offendere Deum simul, & proximum, non potest solum proximum offendere. II. Voluntas potest solum fieri impeccabilis per gratiā, ex eo quòd eo modo physice prædeterminatur, absque eo quod fiat sibi regula suarum operationum; non potest autem esse impeccabilis per naturam, nisi sit regula suarum operationum. III. Non potest intelligi creatura aliqua impeccabilis naturaliter nisi saltem poneretur physice prædeterminata circa honestum naturale in communi; hoc autem implicat, tum ex parte intellectus, tum ex parte voluntatis; ex parte intellectus, quia cum hic sit potentia vniuersalis, implicat, ut eius obiectum adæquatum sit solum bonum honestum; ita ut non possit cognoscere bonum utile, & bonum iucundum: neque ex parte voluntatis, quia cum hæc etiam sit potentia vniuersalis essentialiter, non potest esse naturaliter tantum determinata ad vnum bonum, nisi ipsa sit regula suarum operationum; nam esset sibi ipsi summum bonum, & finis; tunc enim nihil illi esset iucundum, aut utile, nisi esset honestum; imo ex eo quòd illi placeret, esset honestum; quod est esse regulam suarum operationum.

Vltimo est maximè norandum, Quòd quando dicunt Aduersarij, Esse possibilem creaturam impeccabilem contra legem supernaturalem: vel supponunt hanc creaturam, siue sit Angelus, siue homo, habere dona gratiæ requisita ad obseruandam legem supernaturalem, quæ consistit in amore, & cognitione supernaturali vltimi finis, vel non habet hæc dona gratiæ: si primum, non sumus in casu; quia iam concedunt, quòd fieret impeccabilis per gratiam, quod est extra controuersiam: si secundum, impossibile est esse impeccabilem hoc modo; idest contra legem supernaturalem, quia sine gratia non potest hoc facere. Neque valet dicere, esse possibilem per nos creaturam supernaturalem intellectuam, quæ sit naturaliter visiva Dei, sine dono superaddito eleuationis; ergo etiam quæ non possit peccare contra legem supernaturalem sine gratia. Nam, ut diximus agendo de visione beata, donum visionis non est exigitiuum gratiæ; sed potius gratia est exigitiua visionis, aliter dicam, quod si poneretur gratia in lapide, lapis esset exigitiuus visionis.

Virum primum Angelorum peccatum fuerit Superbia?

Remanet ex dictis probatum, quamlibet creaturam, siue Angelicam, siue humanam esse ab intrinseco peccabilem; est etiam ex Fide, certum Angelorum nonnullos peccasse quidem mortaliter, ac damnatos fuisse: illud autem, quod in presenti quaeritur est, utrum primum Angelorum peccatum fuerit superbia; taliter, ut non aliud esse potuerit? *Prænoto* autem ad hoc decidendum, quod nomine *Superbia*, non venit hic negatio subiectionis regulæ superioris; hoc enim modo accepta superbia, non est speciale peccatum; sed conditio vniuersalis omnis peccati; ut docet D. Thomas: nec est necesse, ut superbus se præferat alijs; sed satis est si tendat modo indebito in bonum propriæ excellentiæ, contra ordinem supremæ regulæ: unde accipitur superbia, pro inordinato appetitu propriæ excellentiæ, dignitatis, aut honoris. Dicitur autem superbus, inordinatè appetere propriam excellentiam, non præcisè quia persistit in sua intrinseca excellentia utique bona; sed quia, vel inordinatè inde contendit alia bona, vel appetit aliquod bonum sibi indebitum, contra diuinæ regulæ dictamen; ut esset si demon voluisset, ut si Deus vellet illi dare beatitudinem supernaturalem data ei fuisset, non medijs actibus Fidei, Spei, & Charitatis, per quos mereri debebat talem beatitudinem, sed absolūtè secundum virtutem, & excellentiam suæ naturæ: unde diceretur similis Deo in sua beatitudine naturali, per hoc, quod sicuti Deus est bonus per ea solum, quæ habet virtute suæ naturæ, absque eo quod hæc ordinare debeat ad vltiorem finem; ita, & demon.

Est communis SS. PP. & Theologorum sententia, Primum Angelorum peccatum fuisse superbiæ: Ostenditur conclusio, ex illo *Ecclesi. 10. Initium omnis peccati est superbia. & Tobia 4. In superbia initium sumpsit omnis perditio.* Hoc enim est certum. Quod autem non fuerit possibile aliud peccatum nisi superbia, potest congruenter hoc demonstrari; Quia motuum superbiæ, quod est ex propria excellentia est efficacissimus, in natura spiritali, & multo magis vehemens, quam quodlibet aliud; ergo illud fuit motuum, quod primò mouit; nec aliud primò mouere potuit Angelos ad peccandum. Per ly autem, *monere potuit*, intelligo non simpliciter, sed moraliter: & sensus est, quod Angeli, loquendo moraliter, non nisi peccatum superbiæ committere potuerunt, & defacto commiserunt; licet simpliciter loquendo, negari non possit, alia peccata commississe, imo committere potuisse ex alio motiuo, quam ex motiuo superbiæ.

Colliges I. Ex his, Angelos eodem peccato superbiæ appetiisse peculiarem aliquam similitudinem cum Deo affectu inordinato, erga propriam excellentiam, in qua ita sibi complacuerunt; ut simul eis displicerent, & indignum existimarent, se ad fœlicitatem consequendam indigere aliqua
alia

alia supernaturali perfectione, quam à Deo expectare deberent: & sic cum quolibet excellentia spectet ad similitudinem cum Deo, in quo est per essentiam omnis gradus excellentiæ, & dignitatis; sequitur quòd si primum Angelorū peccatū fuerit Inordinatus propriæ excellentiæ amor, ipsum includere aliquam similitudinem cum Deo. Vel dicendum, appetuisse Angelos eorum superbia beatitudinem supernaturalem, ex inordinato affectu ad propriam excellentiam; indignum existimantes talem naturam tali perfectione carere: & sic, vel voluerunt suis viribus naturalibus illam acquirere, vel ad eam acquirendam tales vires habere, & nullo modo subijci ordinationi diuinæ, qua illos ordinabat ad beatitudinem consequendam medijs actibus Fidei, Spei, & Charitatis: & quo etiā appetebant similitudinem aliquam cum Deo, nempe esse beatos beatitudine essentiali, & imparticipata, quod est proprium Dei.

Colliges II. Post peccatum superbiæ sequutum est peccatum inuidiæ, vt benè notat D. Thomas, quatenus de mon de bono hominum, & Angelorum beatorum doluit, & de excellentia diuina, in quantum potest Deus vti, & vtitur ipso demone inuito ad sui gloriam; nam nimius affectus erga dignitatem, & excellentiam propriam coniungitur cum odio dignitatis, & excellentiæ alienæ, quam superbus apprehendit sibi nocituram.

Colliges III. Nullum fuisse in Angelis errorem speculatiuum appetendo beatitudinem naturalem; quia non appetierunt aliquod obiectū, quod ex se non esset bonum, putantes per ignorantiam esse bonum; sed quod non erat bonum propter extrinsecam, & merè accidentalem conjunctionem cum imperio diuino explicato: vnde si Deus non ordinasset illos ad vltiorem finem supernaturalem, fuissent tales, quales ipsi re vera videbant se futuros. Fuit solum in illis error intellectus practici, quatenus iudicauerunt, omnibus consideratis, bonum esse, ita operari. Loquendo autem de beatitudine supernaturali, per hoc quod Angeli voluerunt beatitudinem hanc dari sibi sine merito, posito quòd Deus vellet illam dare, non appetierunt aliquod impossibile; quia hoc potuisset Deus facere. Fuit autem in illis inconsiderantia; non autem illa quæ oritur per naturalem quamdam inaduertentiam ex distractionibus parum voluntarijs; sicut aliquando est in nobis: sed fuit inconsiderantia prorsus affectata; cum enim omnia præ oculis haberent, tam naturalia, quam supernaturalia, voluntati adhæserunt considerationi sue pulchritudinis, & naturalis felicitatis, quam præsentem intuituè cognoscebant.

Hinc reijcio I. sententiam docentem, Angelos peccasse peccato superbiæ, appetendo sibi absolute auitatem. *Vt enim* benè probat D. Th. Non potuit Angelus peccare appetendo esse diuinum per omnimodam æqualitatem; quia ante primum peccatum non præcessit in Angelo habitus aliquis prauus, aut pertinax a voluntatis in malo, vt potuerit appetere id, quod euidenter videbat esse sibi impossibile, imo & destru-

struatum naturæ suæ, quale esset æqualitas omnimoda cum Deo: appetit solum Angelus aliquam similitudinem sibi absolutè, & simpliciter possibilem, ut supra insinuaui.

Reijcio II. Sententiam Scoti asserentis, Angelos peccasse peccato aliquo luxuriæ spiritualis, eo quòd dicat, inordinatum illum amorem sui, propter delectationem quam importat, ad speciem luxuriæ pertinere. In primis enim est falsum, omnem inordinatam delectationem ad speciem luxuriæ pertinere; alioquin ipsum peccatum specificum, & proprium superbiæ esset luxuria: item auaritia, & gula, & alia similia possent dici peccata luxuriæ; nam per hæc amat aliquis sibi inordinatè aliqua bona: considerandum igitur est obiectum illius inordinatæ delectationis, & ad quam virtutem pertinet obiectum illud; & sic inordinata delectatio reduceretur ad vitium contrarium talis virtutis.

Reijcio III. Illam aliam sententiam, quæ asserit, Primum Angelorum peccatum fuisse appetitum vnionis hypostaticæ. Nam hæc sententia supponit talem vnionem fuisse Angelis reuelatam, quando erant in via quod nequæ PP. nequæ ex scripturis, nequæ ex scholasticis sufficienter colligi potest: Propter hæc rationem etiam reijcitur illa alia sententia, quæ asserit, Angelos peccasse, eo quòd inuidissent homini vnionem hypostaticam: Ultra quam quòd hæc sententia discordat à SS. PP. asserentibus, primum Angelorum peccatum fuisse superbiam. Neque audiendi sunt, qui dicunt, superbiam Angelorum fuisse in eo, quòd noluerint subicere se, & adorare humanitatem assumptam, indignè ferentes naturam superiorem subicci inferiori. Nam ultra rationem allatam de reuelatione, impugnatur hæc sententia: Quia supponit præceptum Angelis datum de adoranda Christi humanitate, dum essent in via; quod tamen nullibi colligitur, & propterea gratis asseritur.

Dices, D. Paulus ad Hebraeos 1. ait: Et cum iterum introducit Primogenitum in orbem terræ, dicit, & adorent eum omnes Angeli eius: vbi particula illa, iterum, supponit Primogenitum Dei iam antea fuisse introductum, & propositum Angelis, nempe secundum mysterium Incarnationis. Respond. quòd per Primogenitum non intelligitur Verbum incarnatum, sed secundum se, & ut Filius Dei est simpliciter, quod Primogenitum fuisse propositum Angelis in principio beatitudinis, & iterum proponitur post Incarnationem nouo quouam modo.

Verum Angelus potuerit peccare in primo sua creationis instanti?

Suppono I. Tamquam certum de Fide, demones non esse naturaliter malos, neque ex aliqua naturali inclinatione, & impressione, quam Deus illis naturaliter indidit, ut inclinarentur ad malum peccati, sed esse malos propria voluntate, & electione. II. Omnes Angelos creatos fuisse in gratia, ut constat ex *Epist. B. Iudæ*, vbi legitur Angelos

verò, qui non seruauerunt suum principatū &c. Vnde est certum in primo instanti suæ creationis defacto non peccasse; quinimò contraria sententia (vt D. Thomas loquitur) rationabiliter existimatur tamquam erronea. Quæstio igitur in præsentī est de possibili, vtrum scilicet in primo instanti creationis fuerit in Angelo potentia peccandi? Et quia impotentia potest esse duplex, vna moralis, alia physica; moralis est quoties voluntas ex motiui aliquo extrinseco, nempe diuinæ bonitatis, gloriæ, vel pænæ æternæ retrahitur à peccato, & excitatur ad liberè abstinendum à peccato; & sic dicitur impotens ad peccandum: Ideo videndum est, vtrum Angelus in primo instanti creationis fuerit solum moraliter, an verò physicè impotens ad peccandum?

Dicendum probabiliter puto, Angelum esse moraliter impotens ad peccatum in primo instanti creationis ipsius: Quia Angelus in priori signo ad suam omnem operationem liberam, & in primo instanti suæ creationis necessariò se ipsum comprehendit, & in se ipso comprehenso videt innumera beneficia à Deo accepta, quinimò eius bonitatem satis clarè cognoscit, omnesque insuper bonitates oppositas, quæ possent in contrarium eius voluntatem retrahere; harum enim perfectionum est Angelus in eo instanti naturaliter capax; nec talis cognitio pugnat cum statu viatoris; sed hæc omnia solum arguunt impotentiam moralein tantum ad peccandum; vt constat ex supra dictis; ergo &c.

Secunda conclusio, Sistendo rationibus, non conuincitur falsa sententia illorum, qui asserunt, potuisse Angelum spectatis eius intrinsecis, etiam pro primo instanti creationis physicè peccare. Ad hoc enim, vt Angelus diceretur impotens physicè ad peccandum pro primo instanti debuisset habere clarā Dei visionem, & concursum Dei physicè prædeterminantem eius voluntatem ad bonum, & ad amorem, vt dictum est in tract. de visione beata, agendo de creatura intellectuā supernaturali visuā Dei naturaliter; sed Angelus pro primo instanti, licet habuerit cognitionem perfectam iam explicatam; caruit tamen ea visione, & prædeterminatione intrinseca; ergo potuit, spectatis eius intrinsecis, se auertere à Deo, per conuersionem ad aliquod bonum delectabile, quod cognoscebat, & erat ipsi conueniens.

Dices contra primam conclusionem, Angelus pro primo instanti potuit physicè peccare; ergo etiam moraliter. Respond. negando consequentiam, quia non est impossibilis cum potentia physica ad peccandum status ille perfectus Angelorum in quo fuerunt creati, & quem habuerunt in primo instanti.

Replicabis, Pro primo instanti non potuit Angelus moraliter peccare; ergo neque pro secundo instanti. Respond. negando consequentiam, quia posset Angelus pro secundo instanti liberè cessare ab illa prima cognitione, & consequenter fieri potens moraliter peccare pro secundo instanti; nam Deus, qui se solo independenter ab illius libertate creat Angelum,

gelum, non illum independenter ab eius libertate gubernat: potuit ergo Angelus in secundo instanti liberè se conuertere ad maiorem considerationem bonorum sibi delectabilem, & minuire attentionem ad obiecta diuina, & consequenter pro secundo instanti peccare etiam moraliter.

Replicabis II. Angeli cum primò existunt recipiunt totam suam perfectionem, vnde non proficiunt temporis progressu; ergo si pro secundo instanti potuerunt etiam moraliter peccare, potuerunt etiam pro primo. *Respond.* distinguendo antecedens, non proficiunt temporis progressu, nec deficiunt quo ad substantiam, & proprietates naturales transeat, vel concedo, quo ad actus vitales intellectus, & voluntatis, qui subduntur eorum libertati, nego antecedens, & consequentiam quo ad secundam partem.

Dices II. Anima rationalis pro primo instanti infligitur peccato originali; ergo potuit etiam Angelus pro primo instanti etiam moraliter peccare. *Respond.* negando consequentiam, disparitas est, quia anima rationalis infligitur peccato originali non per actionem propriam, sed per vnionem ad corpus, atque ex peccato Adami: sicut igitur in primo instanti debetur Angelo cognitio perfectissima; quam potest naturaliter habere; ita & volitio perfectissima omnium, quæ potest naturaliter habere; taliter, vt intelligatur à Deo prodire perfectus, tum secundum intellectum, tum secundum voluntatem: & sic Deus, vt author perfectissimus naturæ tenetur pro primo instanti impedire peccatum Angeli. Quando autem D.P. August. docet, Angelos per peccatum amisisse, quod poterat acquirere. Loquitur de gloria supernaturali. Sicuti quando legitur in Ioannis 3. *Ab initio diabolus peccat: & cap. 8. Ille homicida erat ab initio.* Initium, non sumitur metaphysicè, sed moraliter: Sicut in eadem epistola legitur: *Hæc est annuntiatio quam audistis ab initio.* Concludimus igitur non potuisse Angelos pro primo instanti moraliter peccare, potuit solum physicè; nam spectatis suis intrinsecis, quæ tunc habebat potuit se auerte: & à Deo per conuersionem ad aliquod bonum delectabile, quod cognoscebat, & erat ipsi conueniens.

Contra secundam conclusionem, insurgunt Aduersarij, primò, illo argumento, quod est eorum Achilles, dicentes, Si posset Angelus in primo instanti creationis physicè peccare, eius peccatum tribueretur Deo; nam operatio incipiens cum esse rei tribuitur authori eiusdem rei; id est omnia quæ habet effectus in esse rei pro primo instanti tribuitur generanti; qui enim dat formam dat consequentia ad formam. *Respond.* negando sequelam, ad probationem dico, illa verificari de operationibus, & proprietatibus naturalibus, quæ incipiunt cum esse rei; non verò de attributis liberis, & peccaminosis; nam tales actus non sequuntur necessariò ad formam, sicuti sequuntur actus naturales.

Replicabis, Tale peccatū Angeli refunderetur in Deum non dampnem

cogitationem rectam, sed defectuosam; cum enim ad peccatum requiratur iudicium practicum, quo intellectus iudicet hic, & nunc hoc esse faciendum; quod iudicium, vtpotè falsum in se nostra, non potest in primo instanti esse in Angelo. *Respond.* negando sequelam, ad probationem dico, sufficere quidem ad peccatum iudicium, quòd illud obiectum sit bonum delectabile, vel vtile, & carentia concursus Dei ad visionem, & ad amorem, iuxta supradicta: hoc autem iudicium potest esse à natura, & etiam à Deo, in quantum est verum, quamvis reddat subiectum peccabile.

Replicabis II. Saltem negari non potest, quòd cum in tali casu Deus non applicuisset voluntatem Angeli ad operationem connaturalem, sed contrariam, quòd tale peccatum tribueretur Deo. *Respond.* hoc argumentum supponere, peccatum esse contra inclinationem naturæ rationalis, quod absolutè consideratum non est verum; operationes enim liberæ non possunt esse omnino contra inclinationem naturæ: Nec etiam est verum, agendo de operationibus liberis, operationem iuxta inclinationem esse priorem operatione contra inclinationem: & sic absolutè negatur sequela.

Nota hic, quòd non est verum absolutè, quod electio libera procedat ex præexistente, & necessaria intentione finis; sufficit enim quòd talis intentio præcedat ordine naturæ, non durationis: & sic non debet tempore præcedere ad peccatum intentio necessaria, sed, sufficit, quòd præcedat secundum naturam. Neque ad actum malum debet supponi actus primus malus; nam causa mali est formaliter bona, quamvis imperfecta, & defectibilis.

Vtrum Angeli sint inflexibilis arbitrij?

Suppono I. Tamquam certum de Fide contra Origenē, Dæmones siue homines dānatos esse obstinatos in peccato sine vlla spe recuperandæ amicitiae divinæ; ita enim adhærent suo peccato; vt non possint penitentiam salutarem agere, & restitui in amicitiam diuinam: hæc autem obstinatio in peccato dicitur inflexibilitas arbitrij. Possunt secundò dæmones dici obstinati in malo, & consequenter inflexibiles, alio modo, in quantum scilicet in omnibus suis operationibus liberis semper peccant, & nullum opus operari possunt, quod sit vndeque moraliter bonum; idest ex nullo capite, aut circumstantia sit malum; & tamen sit actus liber; punctum autem præsentis controuersie, est in assignanda aliqua ratione naturali, cum primæ, tum secundæ obstinationis, & inflexibilitatis dæmonum, & damnatorum.

Suppono II. Quòd quando quærimus, vtrum Angeli sint inflexibilis arbitrij? idem est ac petere, vtrum possint relinquere quod semel liberè amplexi sunt, in ordine ad omne tempus; nam certum est quasdam de libe-

liberationes concipere Angelos cum restrictione ad tempus finitum, siue determinatè, siue vagè acceptum, in quibus non est dubium posse illos subire mutationem; vt patet in præsentia ad hunc, vel illum locum, in apparitionibus varijs iuxta diuersam rerum opportunitatem, etiam cessatione à propositis circa futura conditionata, quæ cessant cessante conditione, quæ omnia potius dici possunt successio actuum exequens aliquo modo primam voluntatem, quàm mutatio.

Suppono III. Quæstionem hanc de inflexibilitate procedere circa idem motuum, taliter quòd si in Angelis apparet nouum motuum, non possunt dici tunc inflexibiles, & immutabiles; quolibet enim voluntas mutare potest, occurrente nouo motiuo, conceptum propositum, ac proinde se habet, ac si nunquam elegeret.

Dico I. Si loquimur de obstinatione, & inflexibilitate primo modo accepta, causam præcipuam, & primam obstinationis, & inflexibilitatis demonum esse subtractionem gratiæ supernaturalis, sine qua nullus peccator potest sufficienter poenitere, & ad amicitiam Dei reuerti; vt suppono tamquam certum in materia de gratia. Est communis Theologorum, & D. Thomæ sententia, qui *quolib. 8. de malo artic. 5. in fine corporis* hanc rationem admisit. Cur autem Deus voluerit, vt statim in tertio instanti inceperit damnatio demonum, & noluerit ipsis longiorem viam concedere ad poenitentias? offertur optima congruentia à D. Thoma, dicente; Quia tunc, quando scilicet incipiunt esse damnati, finitur status viatoris: vnde non pertinet ad rationem diuinæ sapientiæ, vt vltius demonibus gratia infundatur, per quam reuocentur à malo primæ auersionis. Nam Deus (vt ipse Angelicus Præceptor ait) confert dona supernaturalia cum quadam proportionem ad modum connaturalem operandi creaturæ rationalis; & quia in naturalibus talis conditionis est Angelus: vt sit impenitens, ita hac etiam ratione Deus illum ordinat ad beatitudinem; vt post primam electionem factam simpliciter ab ipso ex pleno, & deliberato iudicio, non daretur illi spatium ad poenitendum.

Quare autem Deus voluerit Angelorum viam esse breuiorem; hominum verò longiorem; potest assignari alia congruentia desumpta ex parte naturæ Angelicæ, & humanæ. Nam quia Angelus caret corpore, & sensibus, quæ solent esse impedimento operationibus; propterea Angelus, facilius, citius, diligentius, & attentius circumstantias in obiecto considerare potest, quod propter contrariam rationem homo non potest; & ideo si in operatione sua deficiat Angelus, non videtur excusabilis, sicut homo: quare via hominis debuit esse longior, quàm via Angeli, & consequenter non statim debuit ab homine, cum cecidit, omne auxilium tolli, sicut debuit ab Angelis; & consequenter talis obstinatio in Angelis prouenit ex defectu, & carentia gratiæ, & ex conditione status eorum; quia scilicet post primum peccatum statim fuerunt extra viam, & in ter-

mino, in quo neque in hominibus, neque in Angelis est mutatio, siue ad bonum, siue ad malum, loquēdo de obstinatione primo modo: Vnde sicuti mors in homine facit illum inflexibilem, non quidem naturaliter, sed ratione status, facit casus in Angelis illos inflexibiles, & obstinatos, etiam ratione status,

Dico II. Loquendo de inflexibilitate, & obstinatione secundo modo accepta, in quantum scilicet in omnibus suis operationibus liberis semper peccant, & nullum opus operari possunt, quod sit moraliter bonum: Angelos, perseverante eodem motiuo, esse arbitrij moraliter inflexibiles, non physicè. Puto hanc sententiam esse magis ad mentem D. Thomæ, quidquid in contrarium sentiant aliqui ex Thomistis, qui in hac re videntur sine vlla necessitate nimis scrupulosi, extendentes hanc sententiam plusquam par est; dum docent, Angelos non solum moraliter, sed etiam physicè esse inflexibiles, videntur enim excedere modum in defensione D. Thomæ: & sic contra eos valde vrgent argumenta, quæ fieri solent ab Aduersarijs. Probatur nostra conclusio. Angelus ex vna parte immobiliter intelligit idest non discurrendo, & omni conatu sibi possibili hæret suæ electioni, sicut intellectus noster hæret primis principijs; quam electionem ex libero prorsus, & pleno iudicio facit, nisi per gratiam auertatur; ex alia verò parte perseverante eodem motiuo, vt supponimus, quod perseveret, nulla occurrit ratio mutationis; aliter non perseveraret idem motiuum; ergo est impossibilis moraliter in Angelo mutatio voluntatis in nouum effectum; ergo est moraliter inflexibilis; dum enim nulla occurrit ratio mutationis, est moraliter impossibilis mutatio in nouum effectum. Hinc in humanis propositis interuenit mutatio, quia homo operatur ex discursu, atque adeo mobiliter adhæret vni parti, taliter, vt possit ab illa amoueri; quod contingit, quia operando per discursum non statim penetrat principia, quibus discursus innititur; & sic cognita attentius, vel melius re, stantibus ijsdem principijs, & circumstantijs solet mutare sententiam.

Secunda pars conclusionis ostenditur, Quia quando Angelus primò se determinauit ad vnā partem ex pleno, & deliberato iudicio, sicuti non habuit vllam physicā necessitatem ad ita volendum; ita continuò libere durat in illa electione, & propterea continuò peccat; ergo absolute, & physicè potest desistere. Addo quod totus actus primus non habet infalibilem connexionem cum hac operatione; ergo sic i potest in primo instanti voluntas pro suo libito coniungere, vel non coniungere, cum illo hanc operationem; ita potest pro sequentibus operationem iam positam ab illo separare. Solum ergo est verum, Angelum non posse mutare priorem electionem attenta debita proportionē ad modum suum operandi; quod est esse moraliter inflexibilem, non verò physicè.

Colliges ex hoc I. Quod eo ipso quod Angeli non sint physicè immutabiles, & inflexibiles, quā potuerint post peccatum primum peccatum,

catur, perseverantibus iisdem circumstantiis physicè conuerti: & sicuti post primum instans, in quo benè operati sunt, potuerunt peccare, cessando ab illa prima cognitione; ita post peccatum potuerunt conuerti, resumendo cognitionem similem primæ; quamuis nec vllus eorum hoc fecit, nec expectati fuerint ad pœnitentiam, propter rationes supra allatas.

Colliges II. Eodem modo esse discurrendum, cæteris paribus, de impotentia damnatorum ad faciendum opus vnde quaque bonum: est igitur hæc impotentia moralis orta ex conditione status, quæ dicitur impossibilitas moralis, non physica ad faciendum opus bonum; quatenus in eo statu, ita difficile est opus bonum propter ipsius circumstantias; vt numquam vllus damnatus operaturus sit opus bonum: causa autem huius moralis impossibilitatis oritur ex summa desperatione damnatorum, coniuncta cum tot, & tantis miserijs illius pessimi status, & cum priuatione contemplationis; taliter vt illi acerbissimi cruciatus, quibus sine vlla spe vniquam euadendi, iuste puniuntur à Deo, & destitutio omnis auxilij gratiæ, & summa desperatio; ita hebetant vim illam naturalem in damnatis, quam habent ad bonum honestum; vt neque de illo practicè cogitent, nec bonum honestum, vt sic, appetere possunt. Si autem in Scriptura Sap. 5. legitur de damnatis, quòd illis displiceant peccata præterita. *Pœnitentiam agentes*: non displicent illis ratione inhonestatis, ratione cuius in odium Dei potius illi complacent in illis; iuxta illud Psal. 37. quod accipitur de damnatis: *Superbia eorum qua te oderunt ascendit semper*. Sed displicent illis peccata, ratione pœnarum, quas nolent pati, in quo neque etiam conformantur voluntati diuinæ. Hoc idem dicendum est de quolibet actu damnatorum, qui possit videri bonus.

Vrgebis I. Dæmon in primo instanti adhæsit summo bono; & tamen in secundo instanti mutauit sententiam, & electionem; ergo dicendum est Angelum non esse inflexibilem, & immutabilem. Respond. negando consequentiam; nam ideo Angeli potuerunt in secundo instanti mutari; quia omnes in primo instanti acceperunt cognitionem vniformiter difformiter perfectam, & impossibilem moraliter cum peccato, iuxta supradicta; in secundo verò instanti, aliqui liberè animum ad alia conuerterunt attentius considerando noua motiua, & rationes: vnde non est mirum si aduenientibus nouis motiuis detur mutabilitas; adueniente enim nouo motiuo, proinde se habet Angelus, ac si numquam elegisset; vt diximus in tertia suppositione; cum sit proprium cuiuslibet voluntatis nautare propositum conceptum, si occurrat nouum motiuum. Quæ ratio si attentius consideratur maxime iuuat ad soluenda multa argumenta Aduersariorum, & ad intelligenda plura Scripturæ testimonia, in quibus videtur dæmonem mutasse defectu sententiam; vt videre est inter alia in Ioannis 13. de quo legitur, Quòd misit in cor Iudæ, vt traderet Christum;

stum; postea verò per vxorem Pilati conatus est impedire mortem Christi: hoc idem etiam contingit, dum homines tentat. Ad quæ faciliè adhibetur solutio, attenta variatione circumstantiarum, & motiuorum, ex quibus pender electio: vnde mutatis, & variatis circumstantijs, & motiuis faciliè est dæmonem mutare sententiam.

Virgebis II. Dæmon peccauit ex inconsideratione; ergo poterat rursus melius considerare, & consequenter cessare à suo peccato; & sic mutare electionem, & esse flexibilem. *Respond.* solutionem huius argumenti patere ex supradictis; potuisse scilicet dæmonem; perseverantibus tamen iisdem circumstantijs, phylicè conuerti, & consequenter cessare à suo peccato: cum non sit physicè immutabilis, & inflexibilis: loquendo autem de inflexibilitate morali, non potuit se conuertere, nec melius considerare; quia illa inconsideratio, quando dæmon peccauit, non fuit indeliberata, & veluti materialis, sicut fuit in nobis; sed fuit omnino affectata: vnde in eodem semper perseverat: & sic dæmones sunt semper immutabiles ex proprio modo operandi.

Nota, quòd quando SS. PP. dicunt, Abolutè dæmones esse mutabilis arbitrij: Intelligendi sunt physicè, & quantum est ex obiecto à quo nullam habent necessitatem circa ipsius electionem: sicuti quando SS. Anselmus, & Bernardus asserunt, Angelos lapsos casu irremediabili: Vel loquuntur de inflexibilitate morali, reficientes moralem impotentiam; vel intelligendi sunt, quatenus Angeli illico fuerunt in termino viæ, negato ipsi à Deo spatio penitentiae,

De Pœna Angelorum.

Quomodo dæmones torquantur in Inferno?

QUÆRITUR hic I. Vtrum in dæmonibus sit dolor? Est communis sententia inter Theologos, in dæmonibus esse dolorem: sumitur autem dolor non prout est passio appetitus sensitui; cum enim careant dæmones sensus: carent etiam dolore, hoc modo accepto: sed sumitur dolor, prout dicit obiectum aliquod disconueniens, saltem apprehensum, vt tale, cum quadam voluntatis renitentia, & dispicentia; siue hoc obiectum sit aliquod, quod est, & Angelus nolit esse; aut aliquod, quod non est, & Angelus vellet esse: multa enim dæmones patiuntur, quæ nollent, & multa non habent, quæ velent.

QUÆRITUR II. Vtrum spiritus damnati torquantur igne reali? Suppono autem hic ex principijs Fidei, cum communi Theologorum sententia. Quòd detur locus quidam pœnalis intra terram, qui dicitur Infernus, in quo cruciantur cum dæmonibus animæ damnatorum, & post diem Iudicij corpora; aliqui tamen dæmones detinentur vsque ad diem iudi-

cij in hoc aere, natura sua caliginoso, vt homines exerceant per impugnationem contrarij. Respond. igitur ad quæsitum, affirmatiuè, Spiritus quidem damnatos torqueri igne reali; contraria enim opinio negans illum ignem esse realem, & corporeum, est contra sensum Ecclesiæ PP. & Scholasticorum. *Isai.* enim legitur: *Quis habitare potest ex nobis cum igne deuorante, & cum ardoribus sempiternis?* & diues ille Euangelij *Luca* 26. exclamabat: *Crucior in hac flamma.* *Apocalyp.* 20. diabolus in prænam inobedientiæ dicitur missus in stagnum ignis, & sulphuris. Patres autem qui contrarium videntur docere, solum volunt ignem inferni esse valde diuersum à nostro; non quidem in substantia, sed in aliquibus accidentibus; vt, Quod sit multò efficacior nostro: Quod ardeat, & non luceat: & Quod vrat, & non consumat: Quod absque fomento conseruetur, & similia.

Præcipua tamen difficultas in hoc loco est, quanam scilicet ratione ab hoc igne corporeo spiritus incorporei crucientur: Qua in re vulgarissimum est illud S. P. August. nimirum, torqueri spiritus veris, sed miris modis. Et quidè omisissis, vel omnino falsis, vel minus probabilibus aliquorum sententijs: *Sensio* cum D. Thoma, esse probabilius dicendum, Spiritus pati ab igne per alligationem, vel præsentiam factam certò futuram ad illum. Ignis igitur inferni, vt instrumentum diuinæ iustitiæ ligat effectiue, & coercet dæmonem in inferno, qui est locus infimus, & teterrimus, vt dictum est, atque adeo impediendo virtutem, & libertatem dæmonis in ordine ad omnes actiones transeuntes: vnde sequitur magna tristitia; ad hanc autem tristitiam, & dolorem non concurrit ignis effectiue; quia hoc non videtur ex vilo capite necessarium; sed solum obiectiue; quatenus scilicet dæmones vident se à Deo alligari, & tamquam in carcere detineri igne illo corporeo, quæ detentio, cum sit contra libertatem ipsorum dæmonum, apprehenditur ab ijsdem, vt quid noxium, & disconueniens propriæ naturæ; ac proinde tristantur, & dolent dolore vehementissimo; cum sit dolor, & tristitia voluntatis. Hic autem appellatur cruciatus, & flamma, seu combustio; cum re vera nihil aliud sit, nisi actus voluntatis tristitiæ, & doloris. Et sane in Scripturis, ignis inferni vocatur *carcer*, *stagnum ignis*, & *sulphuris*. Hoc idem significare voluit fortasse scriptura diuina illis loquendi modis; vt videre est in 2. *D. Petri* 2. *Deus Angelis peccatoribus non pepercit, sed rudentibus inferni detractos in tartarum tradidit cruciandos.* & clarius loquens Christus Dominus ait: *Ligatis manibus, & pedibus projicite eum in tenebras exteriores: in epist. B. Iudæ: Vinculis æternis in caligine reuerati.* & *Apocalyp.* 20. *Angelus habens clauem abyssi, & catenam magnam ligauit diabolum, & misit in abyssum, & clausit.*

Nota, Quod detentio hæc dicitur esse ab igne corporeo; non quod non possit esse ab alio corpore, & eodem modo cruciari; sed quia ita condecabat ad hominum apprehensionem; facilius enim per ignem

imaginatur magnitudo cruciatus, quàm per aliud quodcumque corpus, & elementum: tum quia efficacius, & immobilius agit, & homines magis abhorrent ab igne, quàm à quocumque alio.

Restat solum hic examinare, in quo nam consistat hæc dæmonis alligatio in igne tartareo? *Puto* probabilius dicendum cum D. Tho: hanc alligationem non consistere in quadam qualitate producta, alligante, & captiuante potentias dæmonis: Sæpe enim D. Tho: hanc qualitatem impugnat: sed consistere in productione cuiusdam vnionis merè accidentalis in ipso dæmone, per quam ita alligatur corpori, sicut anima est naturaliter ligata suo corpori, quod informat: quo exemplo vtitur D. Tho: ad probandam possibilitatem huius vnionis; adiungens etiam exemplum dæmonū, qui per artes magicas alligantur semper aliquibus corporibus; & exemplum vnionis hypostaticæ, per quam Verbum ita se ligauit naturæ humanæ; vt posita hac vnione necessariò sit vbi ipsa est; ergo poterit simili modo spiritus vniri quodammodo licèt accidentaliter corpori.

Per hanc igitur alligationē singulæ Angeli potentiæ malum patiuntur, & impediuntur, ne iuxta propriam inclinationem operentur: impediuntur insuper ne liberè operentur, quid, quando, & vbi voluerint, & ne intellectus intelligat plura, quæ vellet ipse dæmon intelligere, & cogitur ea cogitare, ex quibus voluntas magnum capit dolorem: neque valet ab illa alligatione cogitationem auertere: insuper per hanc alligationem, cogitur remanere ita applicatus vni loco; vt non possit suam virtutem, alibi applicare; quæ omnia cum sint valde opposita inclinationi, ac dignitati spirituum, excitant in illis acerrimum dolorem, & tristitiam.

Nota hic, I. Hoc eodem igne torqueretiam dæmones, qui in hoc aëre detinentur, in quantum certò sciunt se in illius stagnum detrudendos. Hoc enim iudicium de ea futuritione omnino certa quo ad inferendam tristitiam, æquiualeat iudicio de præsentī. Nota II. Quòd illa sententia, quæ docet, ignem torquere dæmones imprimendo illis suum calorem, non facit ad rem: Quia accidens corporeum non potest recipi in substantia spiritualis tum quia sensatio caloris non est contraria animæ separatæ, sed corpori viuenti. Neque facit, qualitas illa spiritualis dissolutiua naturæ Angelicæ, cum certitudine, quòd numquam illā dissoluet: Quia stante ea certitudine, potius esset causa gaudij, quàm tristitiæ: insuper debent vterius probare quomodo saluetur, quòd possit calor aliquis spiritualis ordinari ad spiritualiter comburendum. Neque facit ad rem opinio Scoti assertentis: Dæmones pati ab igne, quatenus ignis imprimit vehementem sui speciem in intellectu dæmonis: Nam impressio speciei in substantia spirituali non est malum; neque causa tristitiæ, nisi repræsentet aliquod obiectum malum: vnde debet explicari in quo consistat hæc malitia ignis in ordine ad dæmones: insuper neque talis species esset necessaria; cum species naturalis ad hoc sufficeret, nempe ad repræsentandum ignem.

Neque valet dicere, ignem, vt instrumentum Dei concurrere effectiue, & physice per potentiam obedientialem actiuam, simul cum ipso intellectu, & voluntate Angeli ad eliciendum immediatè dolorem, & tristitiam, sicut lumen gloriæ effectiue, & immediatè concutrit cum intellectu ad visionem. *In primis* enim hæc potentia obedientialis actiua à creaturis defectò existentibus reiecitur, tamquam nullius momenti; vt videbitur agendo de Sacramentis in genere. Secundò actus doloris, & tristitiæ, cum sit simpliciter naturalis, non videtur exigere concursum alterius causæ extrinsecæ, præsertim non vitalis, in quo differt ab exemplo visionis; quæ cum non solum sit actus vitalis, sed etiam supernaturalis, ideo exigit causam aliquam partialem supernaturalem, quæ concurrat ad rationem illam supernaturalitatis.

Impugnant aliqui primò hanc alligationem, dicentes, Si pœna dæmonum consisteret in hac alligatione sequeretur, quòd omnes dæmones haberent eandem pœnam; nam omnes equè detinentur ab illo. *Respond.* negando sequelam; nam licet sit eadem detentio materialiter; non tamen est idem malum formaliter: detentio enim ignis non est proxima, & adequata ratio huius pœnæ, sed remota; proxima autem est hæc, vt apprehensa: hæc autem non est eadem in omnibus; qui enim grauius peccauerunt, apprehensionem ad maiorem tristitiam habent: vnde dæmones nobiliores, qui grauius peccauerunt, grauius torquentur: sanè pœna materialiter æqualis inæqualiter torquet creaturas rationales inæqualiter nobiles.

Dices II. Animæ puerorum, qui cum solo peccato originali decesserunt manent detenti in limbo semper alligatæ; & tamen neque patiuntur ea detensione, neque cruciantur; vt est communis Theologorum doctrina; ergo &c. *Respond.* illas non torqueri in eo loco; quia sunt in eo tamquam in loco naturaliter debito, & in quo à nulla operatione ipsi connaturaliter debita impediuntur: vnde nullam patiuntur subiectionem, & violentiam, sicuti dæmones patiuntur.

Petes I. Quomodo cruciantur, & torquentur animæ in Purgatorio? *Respond.* eodem modo esse discurrendum, cæteris paribus, de animabus in Purgatorio, & dæmonibus existentibus in inferno; torquentur enim, & cruciantur acerbissimè ex tali alligatione ad ignem Purgatorij; dum apprehendunt per talem alligationem ad ignem, impediri ipsis, etiam ad tempus, affectio summi boni, quod intensissimè amant: vnde percipiunt tristitiam, & dolorem acerbissimum acrius, ac si aliquis viuis viretur in ardentissima fornace.

Petes II. Vtrum in dæmonibus possit esse aliquod gaudium, & delectatio de re aliqua, pro eo quod eorum votis euenit? *Respond.* nullum, propriè esse gaudium, aut lætitiā in dæmonibus; etiam si succedant aliquando res, vt optant; vt esset quando iustum vincunt, & prosternunt; statuit enim Deus denegare suum concursum vniuersalem ne gaudium

aliquod resuleret ex implerione cuiuscumque rei desideratæ; & hoc in pœnam delictorum, quibus se dæmones macularunt: & si aliquando D. P. Augustinus de *Genes. contra Manichæos cap. 17.* dixit: *Diabolus de tam felici potestate letatur.* intelligit, non quia gaudium, & lætitiâ percipiat; sed quod placeat illi euentus v. g. & velit ira esse taliter, ut si eius status id pateretur, natum erat oriri gaudium, & delectatio.

De Hyerarchijs, Ordinibus, & Custodia Angelorum.

EST communis Theologorum sententia, tres esse Angelorum Hyerarchias, supremam scilicet, mediam, & infimam: Suprema est eorum, qui à Deo illuminantur, & alios Angelos illuminant, media, qui ab alijs illuminantur, & alios illuminant; infima verò, qui ab alijs quidem illuminantur, sed alios non illuminant: Distinguit D. Dionysius in vnaquaque hyerarchia tres ordines, seu choros Angelorum; nempe supremos, mediorum, & infimorum; & sic tres hyerarchiæ dicunt novem choros, seu ordines Angelorum. Prima, dicit Seraphim, Cherubim, & Thronos. Secunda, dicit Dominationes, Virtutes, & Potestates. Tertia, Principatus, Archangelos, & Angelos.

Inter Angelos supremæ hyerarchiæ ij qui supremi sunt; & primi, dicuntur Seraphini, utpotè magis in charitate diuina ardentes, atq; adeo magis familiares, & amici Dei dicuntur. Medij, dicuntur Cherubini; propter singularem secretorum communicationem, & plenitudinem scientiæ diuinæ: Infimi verò Throni; quia Deum familiariter in se quasi recipiunt, & in quibus Deus inhabitat tamquam in sua sede. Supremi Angeli secundæ hyerarchiæ, dicuntur Dominationes, quasi distinguentes ea, quæ agenda sunt, horum est statuere, quæ mandanda sunt executioni. Medij, dicuntur Virtutes, quorum est miraculis inferuire, præbentes vim, & facultatem agendi. Infimi, dicuntur Potestates, quorum est arcere, & ligare dæmones, & ordinare modum quo impleri possint, quæ præcepta sunt. Supremi tertiæ hyerarchiæ, dicuntur Principatus, qui sunt quasi præpositi Regibus, Episcopis, & capitibus huius mundi inferioris, & sunt quasi in agendo duces. Medij, dicuntur Archangeli, idest principes nuncij. Infimi denique, dicuntur Angeli, qui habent incustodia homines, & singulas priuatas personas.

Petes, Vtrum prædicti ordines mansuri sint post diem iudicij? Puto dicendum cū D. Tho:, quod remanebit tantum distinctio graduum, cū ratione gratiæ, tum ratione naturæ nō verò quo ad executionem officiorum quatenus salutis hominum attendunt: sicuti dum status Ecclesiæ militantis durat, erit etiam inter dæmones ordo prælationis pessimæ; habet enim regnum Sathanas, hoc est coordinationem pessimorum dæmonum sibi ad nutum obtemperantium, ut bellum hominibus inferant, eisque noceant, quantum potuerint ex permissione diuina.

Circa ea, quæ spectant ad custodiam Angelorum: Est de Fide certum, homines ab Angelis custodiri: patet ex illo *Psal. 90. Angelis suis Deus mandauit de te, ut custodiant te.* Vtrum autem singuli homines singulis Angelis custodiantur: vult communis SS. PP. sententia, quod vnusquisque homo suum peculiarem Angelum habet custodem: quinimo Iustinus Martyr affirmat, quod Angelus, qui aliquem custodiuit, eumque in supernam felicitatem perduxit, numquam amplius alium hominem custodiat.

Puto insuper probabilius, Angelorum custodiam incipere ab instanti natiuitatis; quod clarè docet D. Hieronymus, nec vnquam homo ab illa custodia deseritur, nec solum corpus, sed etiam animam custodiunt, ab insidijs diaboli liberant, à periculis auertunt, gressus paruulorum dirigunt, excitant etiam homines, vt resurgant à culpa &c. Hæc autem custodia finitur quando homo moritur, in quo desinit esse viator. Custodiunt Angeli non minus fideles, quàm infideles viatores. Sunt etiam qui putant ad custodiam Angelorum pertinere; vt si custoditus discedat in gratia, si aliquid expiandum habet, deduci ab Angelo custode in locum expiationis, qui tamen nihil habet expiandum in Empyreum deduci.

Est probabile, Angelum custodem Beatissimæ Virginis fuisse Gabrielem; Christus autem dominus, quatenus homo, propter vniõnem ad Verbum, non habuit Angelum custodem; vt dicemus agendo de Incarnatione. Sicut etiam est probabile, quemlibet sacerdotem peculiarem habere Angelum, qui ei celebranti assistat, illumque iuuet, & dirigat in tanto ministerio peragendo; sicut etiam diuersis Nationibus, Prouincijs, Vrribus, Religionibus, Ecclesijs, & forte peculiaribus cœnobijs Angelos deputari; ait enim Clemens Alexandrinus *lib. 6. Stromatum: Per gentes, & ciuitates sunt distributa Angelorum prefectura.*





EX SECVNDA PARTE TRACTATVS I.

De Vltimo Fine, & Beatitudine.

ANtequam ad Beatitudinem explicandam, idest statum illum felicem, in quo habet homo plenitudinem bonorum, & complementum suorum desideriorum, accingantur Doctores; solent prius aliqua, quæ ad vltimum finem hominis spectant, exagitare: & primò inquirunt, An Deus sit vltimus finis hominum? in quo omnes conveniunt cum D. Tho: Deum esse vltimum finem, non solum extrinsecum, in quantum Deus ordinavit hominem, quem creavit, ad se ipsum; sed etiam intrinsecum, quatenus homo per actus sibi intrinsecos debet in Deum tendere: vnde teneri præcepto naturali in hunc finem tendere, apud omnes Theologos est certum; cum Deus sit vnicus finis, vltimus, & verus hominis. Non nego tamèn aliquando posse hominem propter voluntatis malitiam fingere beatitudinem fictitiam, & vanum finem vltimum in creatura aliqua præfigere, & amare diuitias v.g. honorem, aut voluptatem, tamquam sui pravi affectus vltimum finem: hinc est, quòd asserant Doctores, homines semper operari propter vltimum finem, & beatitudinem in communi.

Est sententia D. Tho: *quest. 1. art. 5.* Caietani, & aliorum Thomistarum, & multorum extra Scholam D. Tho: Non posse hominem habere Deum, tamquam verum vltimum finem, & simul finem vltimum constituere in creatura; vnde absolute negant posse hominem sibi duos vltimos fines adæquatos constituere. Nam de ratione vltimi finis est, omnia, quæ sunt verè bona, posse ad illum ordinari, & quæcumque alia posse rationabiliter propter illum contemni; sed non possunt inueniri duo obiecta, quæ hoc modo se habeant; nam eo ipso, quòd inuenitur aliquod obiectum, ad quod possunt omnia ordinari, & propter illud contemni; ipsum idem obiectum non potest propter aliud contemni, neque ad aliud ordinari; ergo quodlibet obiectum, in quo apprehenditur ratio vltimi finis, & beatitudinis adæquatæ, excludit consortium alterius potentis apprehendi, & amari cum æquali excellentia: Et hoc etiam militat, etiam si ista duo obiecta essent sub disiunctione possidenda, & de diuersis rebus

rebus formaliter, & non subordinatis. Nam non potest negari, posse hominem amare duos ultimos fines solum materialiter diuersos, sub disunctione possidendos, ut esset v.g. si aliquis apprehenderet tamquam finem ultimum possessionem centum mille ducatorum, & hic idem numerus pecuniarum inueniretur multiplicatus pluribus in locis in regio ærario; posset homo ille amare hanc, vel illam pecuniam sub disunctione possidendam; cum in illarum qualibet eandem rationem formalem beatitudinis inueniat, & quilibet numerus tantum materialiter ab alio distinguatur.

Aduertite I. Quod Gentiles, qui plures Deos superstitione ponebant, non habebant plures ultimos fines, quia non poterant quemlibet illorum tamquam finem ultimum amare; sed tantum vnum, quem maximum putarent. II. Homo per peccatum constituit sibi creaturam, tamquam ultimum finem, & ad eam conuertitur, auertendo se à Deo; ita ut dum in læthali peccato perseverat, non habet Deum pro ultimo fine; Nā peccator per peccatum præfert creaturam Creatori, & impedit creaturæ amorem illum, quem debebat impendere Creatori; & cum teneretur creaturam contemnere, ut Creatori adhæreret; inique Deum contemnit, ut creaturæ adhæreret; & hoc est constituere creaturam, & non Deum pro ultimo fine. III. Quando peccator vnicè tendit in obiectum peccaminosum, respicit, ut dictum est, illud obiectum, ut finem ultimum; quando autem amplectitur simul duo obiecta peccaminosa, vel plura, illa se habent per modum vnius adæquati ultimi finis intenti.

IV. In casu, quo aliquis, dum actu peccat, vellet dari pauperi centum aureos ob amorem Dei; non sequitur, quod magis diligat Deum, quam voluptatem libidinofam v.g. nam actus ille dandi v.g. illam elemosinam posset esse, vel ex motiuo naturali pietatis, quod non importat dilectionem Dei; vel ex imperfecta, & inefficaci beneuolentia erga Deum; non tamen ex perfecta amicitia, neque propter bonitatem Dei amatam super omnia.

Quid, & quotuplex sit Beatitudo?

Beatitudo fuit à Boetio definita lib. 3. de consolat. hoc modo: *Status omnium bonorum aggregatione perfectus.* Ad quod explicandum D. Tho. quest. 3. artic. 2. ad 2. ait, *Per quod nihil aliud significatur, nisi, quod Beatus est in statu boni perfecti.* & D. P. August. lib. 1. de libero arbitrio cap. 13. beatitudinem describens, ait. *Beatè vivere est bonis, veris, certisque gaudere.* Loquendo de beatitudine vera, & non ficta, ut potè consistente, siue in bonis externis; ut sunt diuitiæ, honor, fama, potestas, &c. quæ bona fortunæ dicuntur; siue in bonis corporis; ut sunt sanitas, robur, voluptas, indoles, &c. Solet vera beatitudo diuidi in naturalem, & supernaturalem; beatitudinem naturalem habet, qui auxilijs supernaturalibus

bus eleuatus, cum illius capacitas non impleatur, beatitudinem supernaturalem inquit: Vnde asserit D. Tho: Angelos fuisse creatos in beatitudine naturali. Diuiditur etiam vera beatitudo in essentialem, & accidentalem: beatitudo accidentalis dicit omnia, quæ pertinent ad statum beatitudinis, & quæ comitantur, & perficiunt beatitudinem essentialem, quæ est visio intuitiua Dei. Vltimò diuiditur in formalem, & obiectiuam: obiectiua, est Deus optimus, Maximus; formalis, est consecutio ipsius beatitudinis obiectiuæ. Hanc formalem beatitudinem non consistere in operatione increata, sed creata, docet D. Thomas; quia ad visionem increatam nullo modo concurrere potest intellectus noster. nec agendo, nec patiendò: hinc est, quòd impossibile sit, vt per illam videat, quantumcumque ponatur illi intimè; idest si intellectio diuina immediatè vniretur animæ creatæ, illam minimè redderet videntem.

Per hoc autem, quòd substantia Verbi, vnita naturæ humanæ Christi, faciat illam subsistere substantia increata, & essentia diuina supplendo vicem speciei impressæ, constituat intellectum intellectuum in actu primò; non sequitur, quòd possit intellectio diuina reddere intellectum hominis videntem. Ratio disparitatis est, quia hæc non important causalitatem efficientis, neque important operationem vitalem; sicut important cognoscere, & amare. Similiter, quando dicitur, quòd beatitudo nostra debet esse summum bonum. Hoc debet intelligi, non formalitèr, sed terminatiuè; vt docet D. Tho: quia scilicet nos coniungit summo bono increato.

In quonam consistat Beatitudo nostra formalis?

Beatitudo, vt defectò est in Beatis; radicalitèr consistit in aliquo habitu, vel in aliquo, quòd habitui comparetur. (loquimur enim de beatitudine formali;) Ratio est, quia ad beatitudinem requiritur lumen gloriæ, & ipsa essentia diuina, habitualitèr vnita intellectui per modum speciei, ex quibus proximè sequitur visio & fruitio; vnde dici potest consistere radicalitèr in aliquo habitu. Beatitudo verò essentialis formalitèr considerata, solum in actu secundo debet consistere, seu in operatione vitali dependente à principio vitali creato, sine cuius influxu non potest Deus se solo tales operationes producere: Est commune apud Philosophos, & Theologos; nam beatitudo formalitèr est actus perfectus, & vltimus; talis autem necessariò debet esse actus secundus.

Est maxima controuersia inter Theologos, an beatitudo nostra formalis consistat in actu intellectus, an verò voluntatis? Est enim certum, & docet Angelicus Præceptor, non consistere in aliqua operatione sensuum externorum, vel interni: Non enim possunt potentie materiales eleuari ad producendos actus supernaturales, & ad attingenda obiecta purè spiritualia in se ipsis; vt probaui tract. de Visione beata. Puto igitur

tur esse probabiliorem sententiam Thomistarum, & aliorum asserentium consistere in actibus intellectus. Ratio est, Quia beatitudo formalis essentialiter consistit in assecutione, & possessione beatitudinis obiectivæ, nempe Dei; sed nullus ex actibus voluntatis potest habere rationem possessionis, & assecutionis: Non desiderium, quia hoc est de re absenti, & non dum habita: Non delectatio, quia hæc bonum non possidet, sed supponit possessum, & de possessione gaudet; quinimò delectatio, non solum respicit Deum, sed etiam visionem, de qua animus delectatur; beatitudo autem formalis tantum respicit beatitudinem obiectivam; Neque amor amicitia; quia abstrahit à bono possessio, & non possessio, præsentis, & non præsentis, Patriæ, & viæ: unde charitas viæ, quæ est vera amicitia erga Deum, probabile est, quod sit eiusdem speciei cum illa quæ est in Patria; nam utraque respicit idem obiectum, & eandem rationem formalem, nempe Deum summè bonum, & propter se amandum; & tamen per actum charitatis in via non videtur, & possidetur Deus; ergo solus actus intellectus, non voluntatis, est summi boni possessivus: Quia intellectus trahit res ad se, easque sibi præsentis efficit; vel secundum esse intelligibile, si cognitio sit rei absenti, aut materialis; vel secundum esse entitativum, si cognitio sit obiecti spiritualis intimè præsentis; sicuti est Deus clarè visus: Non nego tamen, quod beatitudo consistat formaliter complete, ut dicit D. Tho: in actibus voluntatis consequentibus: Solum aduerto, quod *ly*, *formaliter*, non sumitur à D. Tho: pro ut est idem, ac essentialiter; sed completè; quia sicuti ultimum rei complementum dici solet *forma*; hinc idem est apud ipsum hoc loco, *formaliter*, ac *completè*. Unde idem S. Doctor in hac questione. 4. ait, *Quantum ad id, quod est essentialiter ipsa beatitudo, impossibile est, quod consistat in actu voluntatis.* & inferius, *Sic igitur essentia beatitudinis in actu intellectus consistit, sed ad voluntatem pertinet delectatio beatitudinem consequens.*

Ad enervandas plures, & difficiles obiectiones, quibus solent Scotistæ hanc nostram conclusionem impugnare; Oportet notare I. Quod nostra beatitudo formalis non consistit absolute in perfectissima operatione; sed in tali operatione, quæ possit dici consecutio summi boni: unde quantumvis Aduerarii prebent operationem voluntatis esse perfectissimam operationem, non per hoc conuincunt consistere beatitudinem in ipsa: Quia operatio voluntatis non est assecutio; sed talis dicitur operatio intellectus: & licet intellectio solum vniat in esse intentionali, ut supra diximus, res materiales; intellectio autem perfectissima, qualis est visio beata, habet vniire vniione reali; idest secundum suum esse physicum, & reale essentiam Dei clarè visam; taliter, ut si per impossibile Deus non esset ibi physicè præsens ratione illapsus, & immensitatis, esset tamen in intellectu Beati realiter, & secundum propriam substantiam ratione vniõis, qua vniatur, tamquam obiectum, cum ipso intellectu. Et

hæc vnio dicitur vnio affectiua, & prima consecutio vltimi finis; actus autem charitatis, & amoris non est vnio affectiua; nam per amorem Beatus non possidet obiectum beatificum; sed potius obiectum beatificum possidet Beatus; nam per amorem amatum conuertitur in amantem: vnde amor importat vnionem affectiuam, quæ est affectio metaphorica; non autem vnionem effectiuam, quæ est realis possessio, & adeptio.

Nota II. Quod est falsum, quod eiusdem potentie sit tendere in vltimum finem, vt summum bonum, & illud consequi: Quia ordo intentionis est diuersus ab ordine executionis; & sic potentia intendens finem, est diuersa ab illa, quæ in executione illud consequitur; & non pertinet ad eundem appetitum realiter acquirere, & vnire obiectum, quod querit: vt patet inductione; nam elementa pondere, grauitate, & leuitate querunt centrum, cum quo vocatione coniunguntur: appetitus sensitius animalis appetit finem sensibilem, sed non acquirit per se ipsum, sed sensu externo, tactu, gustu, &c. ergo similiter appetitus rationalis amat finem intelligibilem; quem tamen assequitur solo actu intellectus. III. Licet Deus in hac vita non possideatur per actum scientie infusæ; non sequitur tamen, hoc idem euenire in Patria; quia scientia infusa huius viæ non est cognitio intuitiua, & quidditatiua, sicut scientia, quæ est in Patria, quæ est vera, & realis affectio. IV. Est falsum, quod in diuinis personis summum bonum possideatur ab ipsis per intellectum, & voluntatem: Sicut etiam non est verum, quod Spiritui sancto formaliter ex vi processionis communicetur per voluntatem summum bonum; sed solum materialiter, & identice: vnde cum non possideat summum bonum simpliciter, non euadit formaliter ex vi processionis simpliciter beatus, nisi donec intelligatur illi communicata natura, & attributa, & illa intuitiue cognoscat: Nam cum voluntas diuina non sit assimilatiua, solum habet communicare Spiritui sancto formaliter amorem, & impulsu personale; materialiter verò, & identice naturam diuinam. Vnde cum talis impulsus, & amor non sit summum bonum simpliciter, & in omni genere, tum relatiuo, quam absoluto; sed solum in linea relatiua; non potest esse obiectum beatitudinis ipsius ante visionem. Vnde ex hoc bene aliqui inferunt, quod potest Pater, & Filius concipi beatus prioritate originis, antequam spirent Spiritum sanctum; nam prius est, quod Deus, nostro modo concipiendi, sit beatus essentialiter, per actum intellectus, quam beatus, vt ita dicam, personaliter.

Nota V. Quod comprehensio pertinet ad visionem, & si D. Thomas videatur docere, quod pertineat ad voluntatem: loquitur de comprehensione consecuta ad comprehensionem intellectus, in quantum summum bonum comprehensum per intellectum, est obiectum voluntatis, vel quatenus intellectus præsentat voluntati summum bonum, in quo naturaliter quiescit. VI. Licet bonum physicè, & in esse entis sit præstantius

tius vero; metaphysicè tamen, & in ratione obiecti, verum, est præstantius, & nobilius, vt potè abstractius abstractione formali; & cum nobilitas potentiaè petatur ex nobilitate obiecti, formaliter sumpti; sequitur, quòd intellectus præstet voluntati. Dato tamen, quòd voluntas sit præstantior, & nobilior intellectu; non sequitur, quòd in ipsa debeat consistere beatitudo; quia ipsa non est potentia affectiua, vt dictum est supra. VII. Licèt in Patria ex visione procedat amor; non tamen ex hoc sequitur, quòd visio respiciat amorem, tamquam finem; sed tamquam effectum: sicut ex essentia procedunt proprietates; & tamen essentia non respicit proprietates, tamquam finem. VIII. Quando D. Tho: dixit, quòd perfectio charitatis est essentialis beatitudini; loquutus est de beatitudine integra, & completa: sicuti dicimus ad integritatem hominis requiritur essentialiter manus, pes, &c. cum tamen hæc membra non sint essentialia homini.

Vrgent aliqui I. Contra hanc nostram conclusionem, dicentes, Ad eandem potentiam debet pertinere meritum, & præmium; sed meritum beatitudinis pertinet ad potentiam volitiuam; ergo ad eam pertinet beatitudo. *Respond.* quòd anima, & non potentia volitiua, est, quæ mereatur; vnde anima est, quæ præmiabitur; licèt meritum exerceatur per actum vnus potentiaè, & præmium consistat in actibus alterius.

Vrgent II. Beatitudo est consecutio summi boni, vt boni; sed solius voluntatis est tendere in bonum, vt bonum; ergo consecutio beatitudinis solius voluntatis est. *Respond.* distinguendo maiorem, beatitudo est affectio summi boni, vt boni, in ratione mouentis, & allicientis, nego, in ratione possessionis, concedo: ad minorem respondeo, solius voluntatis est tendere in bonum, vt bonum, in ratione mouentis, & allicientis, transeat, in ratione possessi, nego. Vnde bonum non est obiectum voluntatis in ratione possessi, sed in ratione mouentis, & allicientis: & sic Deus non beatificat, vt præcisè bonus in se; nam vt talis possidet nos; sed beatificat, vt bonum nostrum; nam vt talis à nobis dicitur possessus: & sic beatificat sub ratione boni possessi; quia bonum sub ratione boni non possidetur, sed magis possidet, & trahit ad se appetitum. Est igitur hoc maxime notandum, Quòd in Deo, pro vt est obiectum beatificum est ratio boni, & ratio veri; ratio boni, dicitur ratio formalis sub qua beatificat; ratio veri, dicitur ratio formalis qua beatificans, quæ est vera ratio possessibilis: & sic quando dicitur, Deus est obiectum beatificum, quatenus est summum bonum; propositio est vera, & concedenda, si ly, quatenus, reduplicat rationem, qua, beatificantem; si verò reduplicat rationem, sub qua, est falsa.

Vrgent III. Si beatitudo consisteret in actibus intellectus essentialiter; Beatus posset esse peccabilis: ex eo, quia voluntas dum adhuc non intelligitur beatificata, posset elicere actum odij. *Respond.* negando sequelam; quia ad hoc, vt voluntas eliciat actum disformem recte ratio-

ni debet obiectum proponi ab intellectu; intellectus autem beatificatus non potest voluntati proponere obiectum, nisi sicuti est in se, & illud cognoscit; sed est in se, & cognoscit, ut obiectum summè amabile; ergo voluntas necessitatur ad illud prosequendum. *Posito* autem, quòd visio possit coniungi cum peccato, dico, Quòd homo ille non esset beatus; quia carentia peccati essentialiter includitur in hoc concreto, *Beatus*; quia esse beatum non solum dicit habere summum bonum positivum, sed etiam carere summo malo.

Si conciperetur homo solum cum carentia gratiæ, & amicitia Dei, sed sine peccato; idest si Deum videret, & ipsum non amaret; *Affirmo*, quòd homo ille esset completè, & essentialiter beatus; quia haberet essentialiam, & rationem formalem beatitudinis, nempe affectionem summi boni, quæ habetur per actum intellectus; non autem esset completè, substantialiter beatus; quia in eo desideraretur aliquod, quod ad substantiam beatitudinis pertinet, nempe amor, & amicitia Dei; & sic illa beatitudo esset integraliter manca, quamvis fuerit essentialiter completa: sicuti si homo careret brachijs, retineret totam essentialiam physicam hominis; non tamen totam substantiam. *Ex hoc* autem nõ sequitur, quòd possit homo ille doleri, & tristari; quia videret se cum carentia amoris Dei. *Ratio* est, quia in tali casu Beatus ille nihil apprehenderet, quod esset obiectum tristitiæ.

Pro solutione multarum obiectionum Aduerte I. Quòd sicuti pœna damni, quæ est præcipua, & essentialis damnatorum, subiectatur in intellectu, & non in voluntate; ita præmiis essentialia Beatorum debet primariò consistere, non in actu voluntatis, sed intellectus; nam pœna damnatorum essentialiter consistit in carentia visionis beatificæ. II. Aliud est loqui de beatitudine, quo ad statum, aliud de beatitudine quo ad essentialiam; ad beatitudinem quo ad statum pertinet, non solum visio, sed etiam actus voluntatis; nempe amor, & delectatio, & omnia, quæ conducunt ad beatificandam animam, & potentius Beati: sicut homo in statu perfectio non solum requirit unionem animæ, & corporis, sed etiam debitam quantitatem, pulchritudinem, sanitatem, & omnia quæ ad ipsum perficiendum concurrunt: Nos autem quando dicimus, quòd beatitudo saluatur in actu intellectus; loquimur de beatitudine quo ad essentialiam. III. Licet sit verum, quòd Beatus perfectius consequatur, & possideat Deum per intellectum, & voluntatem simul extensivè; non tamen possidet Deum perfectius intensivè. IV. Beatitudo est perfecta satietas naturæ intellectualis, quo ad omnes potentias, secundum quas natura est beatificabilis essentialiter, non completivè. V. Quando SS. PP. videntur docere, beatitudinem consistere in actibus voluntatis; loquuntur de beatitudine integra, & completa, & in statu perfectio; non autem de beatitudine essentiali.

Beatitudines supernaturales ad statum vix pertinentes, quæ sunt beatitu-

itudines latè acceptæ, numerantur octo à S. Mattheo: nulla autem ex operationibus huius vitæ potest esse, aut dici simpliciter beatitudo, & vniocè conuenire cum beatitudine Patriæ; dicitur autem beatitudo secundum quid, & imperfectè per analogiam ab beatitudinem Patriæ; & est beatitudo inchoata, idest inchoatio beatitudinis Patriæ: vnde est valè probabile, hanc beatitudinem supernaturalem vitæ consistere in actu intellectus; nam per hunc magis assimilatur beatitudini Patriæ; cum per actum intellectus habeatur possessio summi boni, vt dictum est; & ideo vbi talis possessio erit perfecta, erit etiam beatitudo perfecta; vbi verò imperfecta, & secundum quid, erit beatitudo imperfecta.

Puto etiam probabiliter, beatitudinem naturalem hominis, vel Angeli existentis in pura natura, non eleuari ad finem supernaturalem, adæquatè, & essentialiter constituendam esse in Dei cognitione; propter rationes iam dictas. *Ex hoc* autem non sequitur, quòd dæmones, qui Deum naturali cognitione cognoscunt, sint essentialiter beati beatitudine naturali. *Quia* sicuti visio intuitiua Dei coniuncta cum peccato, non redderet hominem beati beatitudine supernaturali, vt supra diximus; ita cognitio Dei, quam habet dæmon, non potest illum constituere beatum, adhuc beatitudine naturali.

De Dotibus Beatitudinis.

IN Matrimonio spirituali, & mystico animæ cum Christo, inchoato in hac via per Fidem, Spem, & Charitatem, quasi per verba de futuro; assignantur dotes, quando in celum transferuntur animæ beate: & sunt tres, nempe, Visio, Comprehensio, & Delectatio; ita vt Fidei correspondeat clara Dei visio; expectationi, seu Spei, comprehensio; & Amori, delectatio. Nomine, *comprehensionis*, venit ipsa visio, non quomodo-cumque considerata; sed cum quadam habitudine ad voluntatem; quatenus voluntas per visionem, veluti manutinet suum bonum. Non autem accipitur, *comprehensio*, pro cognitione adæquatè proportionata obiecto; cum hæc nulli creaturæ sit possibilis, vt dixi, agendo de visione.

Exigit beatitudo ad integram sui perfectionem, perpetuitatem; taliter, vt Beati sint securi de sui status perpetuitate; quinimò hanc perpetuitatem Beatos cognoscere, & de ipsa gaudere est certum. Vtrum autem visio beata ex natura sua, vel tantum ex lege Dei perpetuitatem habeat est valde dubium. Puto autem probabilius, visionem beatam, absolute incorruptibilem dici, eodem modo, quo anima rationalis, & Angelus, dicuntur incorruptibiles; licet possint à Deo in nihilum redigi: pro prima parte conclusionis stat hæc ratio. Quia visio beata nullam habet formam contrariam, à quâ possit corrumpi; nam peccatum, cum quo est impossibilis visio, non potest à Beato committi, ratione amoris,

moris, qui determinat Beatum ad non peccandum: Quod possit à Deo annihilari, etiam pater; nam nulla est ratio, quæ Deum cogat ad conseruationem visionis: vnde sicut potuit non produci, ita potuit nō conseruari; cum æquē dependeat à Deo in fieri, & conseruari.

Beatitudo non modo infert negationem peccati, sed etiam destruit, & impedit ipsam potentiam, saltem proximam ad peccandum, & determinat voluntatem Beati per modum naturæ ad oppositum; & ideo Beatus, nec potest peccare in sensu composito, idest coniungendo peccatum cum beatitudine, nec potest in sensu diuiso, idest absolutè committere peccatum, quod si poneretur, visionem expelleret: cum tamen non repugnet, vt Beatus per potentiam Dei absolutam beatitudinem amittat, in casu, quo illam amitteret, posset peccare: vnde si sensus diuisus accipitur hoc modo, asserimus, in sensu diuiso Beatum esse peccabilem. Vnde benè putant Doctores cum D. Tho: paucis exceptis, Beatos ab ipsa beatitudine, & ab intrinseco esse impeccabiles. Nam ipsa visio Dei intuitiua prædeterminat voluntatem Beati ad Deum diligendum; quia proponit obiectum infinitè bonum, & summè amabile: vnde non potest voluntas determinata ad bonum se cohibere ab illius amore; determinata autem ad hunc amorem, determinatur consequenter ad non peccandum; cum actuale peccatum cum hoc amore componi non possit. Et licet Deus possit suspendere concursum ad amorem; posita autem visione nequit Beatus appetere aliquid contra, vel præter ordinem diuinæ bonitatis: vnde in casu posito, vel nullum exercebit actum, vel si exercet, debet in quolibet à diuina bonitate incipere, & operari propter illam, quod est non posse peccare.

Amor beatificus, & delectatio consequens sunt actus necessarij: & sic voluntas Beati necessitatur ab intrinseco ad actualem amorem summi boni clarè visi: quia voluntas in ordine ad summum bonum non comparatur, quasi mobiliter operans, sed vt natura: sicut intellectus in ordine ad prima, & euidentiissima principia non comparatur, vt ratio: Vnde si tale bonum proponatur, & vniatur voluntati, sicut fit in Patria; necessè est, vt in illud rapiatur: sicut intellectus, quantum est ex vi sua, necessariò assentitur primis principijs propositis.

Delectatio, qua gaudent Beati in Patria, est immediatè per modum vnus, tum de Deo, vt bonum nostrum, tum de visione, & consecutione talis boni; nam neque ipse Deus causat delectationem sine assecutione, neque ipsa assecutio sine Deo: Vnde si tale gaudium sumitur, prout est carentia omnis mali instantis; repugnat etiam diuinitus summum gaudium cum qualibet tristitia: sicut repugnat diuinitus forma, & carentia ipsius. Non est autem visio hoc modo summum gaudium. *Sustinemus* igitur solùm naturaliter visionem Dei expellere omnem tristitiam; siquid id proueniat ex natura ipsius beatitudinis, ita id exigentis; siuè ex dispositione, & fauore singulari Dei erga Beatos. Et si *Isaie* 33. legitur. *An-*
geli

geli pacis amare flebunt: insinuatur Angelos illos solum ibi se ostendisse quo ad apparentiam externam, ac si flerent. Neque etiam triflantur de parentum, amicorum, & proximorum damnatione; nam cognoscuntur à Beatis peccatà iustissimè mereri odium Dei in amicos, proximos, & parentes: vnde sine vlla difficultate cessabunt ab eo affectu in illos, & libenter habebunt illos à Deo puniri pro suis meritis.

Resurrecturi sunt insuper Beati in die iudicii cum eisdem corporibus carnis, integris, & perfectis; vt veritas Catholica docet, & multæ congruentiæ suadent; quinimò futura sunt corpora in eo vigore iuuenili, quem homo habere solet circa trigesimum ætatis annum; quibus assignatur quatuor dotes, nimirum impassibilitas, subtilitas, agilitas, & claritas: per impassibilitatem redditur Beatus omnis actionis contrariæ incapax: subtilitas probabiliter ponitur in exigentia quadam, quam dicunt corpora, vt Deus per suam voluntatem concurrat cum Beato ad penetrandum corpora, quando Beatus voluerit: agilitas ponitur in Beatis, media quadam qualitate, ipsis superaddita, qua Beati possint, non solum progressiue, sed etiam motu simplici, se ipsos transferre velocissimè, quocumque velint: ita agilitatem explicat D. Thomas: claritas denique constituitur in qualitate quadam positiua lucida, in corporibus Beatorum recepta, maiori, vel minori, iuxta meritorum diuersitatem: & est valde probabile, quod corpora sine futura diaphana, & poterunt Beati se inuicem videre, quandocumque volent, & in quacumque distantia. Datur etiam in ipsis vicissitudo rerum in colloquijs, in motu, quinimò D. P. August. Melodiam, & musicam in cælis admittit; quem sonum, vult D. Tho: efformari; quia cæli partes diuiduntur ab Beatorum corporum motu; putat enim S. Doctor, Beatos esse intra corpus solidum. Est etiam probabile, non solum Beatorum corpora exhalatura suauissimum odorem, verum etiam cælum ipsum Empyreum odore fragantissimo esse repletum. Dicunt aliqui corpus illud respirabile odoriterum, quod est in palato, & gutture Beatorum, habere aliquam gratam, & sapidam qualitatem, quæ potest ad instar mannæ Hebræorum, pro eorum libertate diuersis saporibus æquiuale: vnde ex hoc percipit gustus suam delectationem. Vltimò tactus ipse sibi congruis abundabit delicijs: & D. Bernardus ser. 1. de Assumpt. Virginis, castissima, & dulcissima oscula, & amplexus inter Filium, & Matrem admittit: vnde idem de alijs Beatis est credendum; cum motus inhonesti nullum locum in cælis habere possint.

Si loquimur de perfectione intensiua: Habetur beatitudo perfecta sine corpore, neque post resurrectionem erit intentior visio, aut amor; si verò loquimur de perfectione extensiua, aut completiua; Non est beatitudo perfecta sine corpore; cum enim anima nostra sit forma corporis, consequenter ex beatitudine animæ debet redundare in corpus sua beatitudo; & ita hæc felicitas animæ erit perfectior completiue; & exten-

siuè cum corpore; tum ob complementum substantiale hominis per corpus, de quo anima valdè lætabitur, tum ob nouas sensuum omnium voluptates.

Assignantur à Deo in celo animis Beatorum aureolæ, quæ pertinent ad beatitudinem accidentalem: harum præcipua est aureola martyrij. Martyres autè dicuntur, qui in odium Fidei, aut pro virtute aliqua tuenda, sunt mortui, vel vulnus, aut tormentum substinuere, mortis natura sua illarium, etiamsi defactò ex miraculo incolumes euaserint: reducentur etiam ad martyres, qui in carceribus ob prædictas causas inedia, aut mala tractatione moriuntur, ac etiam in exilio: inter martyres autem non numerantur milites contra infideles pugnantes. Datur etiam virginibus, quæ in proposito seruandi virginitatem moriuntur, virginitatis aureola: vnde illi, qui habent copulam, vel voluntariam seminis effusionem, siuè illicitam, siuè licitam, vt accidit in coniugatis, virginitatis aureolam non obtinebunt; Non amittitur autem virginitas, nec consequenter aureola per pollutionem in somnis habitam, neque si cogeretur in vigilia ad copulam, in quam non consentiret. Applicatur tertio Doctoribus aureola, illis scilicet, qui docent scientias ad pietatem ordinatas; vt sunt Theologi, Scholastici, Scripturistæ, Concionatores, Canonistæ; includuntur etiam Confessarij, & in sententia aliquorum Prælati, & Superiores Religionum; nam isti consilijs, exemplis, & pœnitentijs salutaribus ad pietatem subditos promouent, & instruunt.

Vtrum homo possit appetere beatitudinem?

Potest homo habere non solum appetitum elicitem ad beatitudinem in communi, & beatitudinem naturalem in particulari; sed etiam habere eundem appetitum ad ipsam claram Dei visionem, atque adeo ad suam beatitudinem supernaturalem. Quo ad primam partem non est dubium; quo ad secundam autem, ne fiat quæstio de nomine, voco appetitum elicitem, naturale desiderium voluntatis de visione diuina, ad quod desiderium nulla interior gratia requiratur, sed fiat solis viribus naturæ cum concursu naturali primæ causæ. Ratio est, quia potest homo habere volitionem naturalem efficacem de aliquo obiecto supernaturali; nam potest homo solis naturæ viribus apprehendere, quod bonum est supernaturale; & hoc apprehendere, etiam vt possibile; quia credit Doctoribus, qui dicunt, hoc esse possibile; ergo potest homo naturaliter hoc desiderare, quando ad hoc desiderium nulla ibi opponitur difficultas.

Nullum autem habet homo appetitum innatum ad beatitudinem; talis enim appetitus est inclinatio in bonum naturaliter possibile; sed beatitudo est homini naturaliter impossibilis; in quantum non potest viribus naturæ obtineri, & est forma improporcionata inclinationi, &

exigentia ipsius hominis + ut substantialiter supernaturalis? *Quando* autem dicitur, quod homines naturaliter desiderant esse beatos; *Hoc* debet intelligi de appetitu elicitō: potest solum dici, quod homo habet appetitum innatum ad beatitudinem naturalem. *Nota*, quod appetitus innatus potest esse in qualibet potentia, imo etiam in ipsa substantia creata; quia non est operatio, & actus secundus, sed ipsa inclinatio, & propensio naturæ, aut potentia in aliqua re: vnde dicimus, quod oculus habet appetitum innatum ad videndum; & per hoc recte dicitur, quod differat appetitus innatus ab elicitō; quia elicitus est aliqua operatio, & actus secundus, per quem voluntas, aut appetitus sensitivus actu fertur in aliquod suum bonum, illud appetendo; ut cum aliquis amat sanitatem, divitias &c. & hic appetitus non est, nisi in voluntate, & appetitu sensitivo.



TRACTATUS II.

De Voluntario, & Involuntario.

Quid sit Voluntarium, & ubi invenitur?

Definiuit D. Tho: Voluntarium hic *quest. 6. art. 1. Quod est à principio intrinseco cum cognitione*: Vnde per D. Thom. ad hoc, ut actus sit voluntarius respectu substantiæ obiecti, quod sufficit, ut actus dicatur simpliciter necessarius, scilicet est, ut actus procedat à principio cognoscente obiecta. Non nego tamen, quod ad hoc, ut actus dicatur voluntarius secundum omnes circumstantias obiecti, debet ipsæ circumstantiæ cognosci; & sic actus iste voluntarius debet esse à principio cognoscente singula. Proprij actus voluntarij sunt actus appetitus, tum potentiæ internæ, tum externæ. *Nota*, quod est discrimen inter voluntarium strictè sumptum, & volitum; plura enim sunt volita, quæ nullo modo à voluntate procedunt: vnde homicidium ab alio commissum, quod aliquis committi desideravit, & de ipso gaudet; nullo tamen influxu physico, nec morali præstito in tali homicidio; dicitur in tali casu homicidium hoc, volitum; non tamen voluntarium. Quamvis in pueris, brutis, & amentibus non detur perfecta ratio voluntarij; datur tamen in illis essentialis ratio eiusdem; nam illorum actiones à principio intrinseco, & cum cognitione procedunt: Vnde voluntarium secundum rationem, secundum quam reperitur in brutis, est idem, ac spontaneum; & hoc dicitur voluntarium imperfectum; nam cognitio bruti respectu cognitionis hominis est imperfecta. *Nec* per hoc, quod

N n

bruta

bruta non operentur propter finem, sequitur quòd ipsis desit essentialis ratio voluntarij. *Nam* non requiritur ad voluntarium, nec ordinatio in finem, nec cognitio finis, in se formaliter sumpti; sed sufficit, quòd cognoscatur finis, & ordinatio ad finem quasi materialem, & existentem in ipsis medijs: & sic quamvis bruta non comparent media cum fine, nec operentur propter finem, sicut natura rationalis; ordinant tamen, suprà actus ad finem, quasi materialem, modo dicto.

In actibus necessarijs, procedentibus à voluntate ex quadam inadvertentia, & turbatione, non reperitur perfectè voluntarium; quia procedunt ex imperfecta cognitione: in actibus verò necessarijs, procedentibus ex perfectissima cognitione alicuius obiecti, in quo nulla ratio mali inveniatur; ut est actus amoris, quo Beati amant Deum, reperitur perfecta ratio voluntarij: vnde bene stat, quòd aliquis actus possit esse necessarius simul, & voluntarius: *Vtrum* autem sit magis perfectè voluntarius amor necessarius, quo Beatus Deum amat, quàm amor liber viatorum? *Sentio* probablliter, voluntarium liberum esse magis perfectum, in ratione voluntarij, voluntario necessario, quo Beatus Deum amat; quia amor liber est magis à principio intrinseco, nempe à voluntate se ipsam determinante; actus verò necessarius non tam est à voluntate, quàm ab obiecto rapiente voluntatem medià sui cognitione: vnde magis exercet dominium suarum operationum creatura liberè amans Deum, quàm creatura necessario ipsum diligens; & in hoc exercitio consistit ratio perfecti voluntarij. Non nego tamen, quòd actus amoris necessarius Beati sit perfectior entitativè amore libero viatorum. *Differit* igitur voluntarium liberum à necessario; quia voluntarium necessarium fit cum determinatione ad unum; voluntarium verò liberum fit cum indifferentia ad utrumlibet.

Quomodo dividatur Voluntarium?

Solet voluntarium multipliciter diuidi, vel penès diuersum modum procedendi ab intrinseco, vel penès diuersitatem cognitionis: iuxta diuersum modum procedendi ab intrinseco, diuiditur voluntarium in elicitum, & imperatum. Voluntarium elicitum est ipse actus voluntatis, seu appetitus, qui ab ea immediatè procedit; imperatum, fit ab alijs potentijs, ex imperio, & motione voluntatis; huiusmodi est largitio elemosynæ. *Ex eodem* capite diuiditur II. voluntarium, in directum, & in indirectum, seu interpretatiuum. Voluntarium directum, est illud, in quod voluntas tendit per positium influxum actu ordinatum ad illud; siue in se ipso, siue in causâ: huiusmodi est homicidium, sequutum ex nimia potatione; cum voluntas tendat positivè in nimiam potationem, ex qua ebrietas processit; vel homicidium præuisum in emissionem sagittæ; quamvis non fuerit formaliter intentum; vel omisso ex-

terna missæ, procedens ab actu interno, dicente, *nolo audire missam*. Voluntarium indirectum, est pura interna omisso voluntatis, siue actus, qui non exit positivè à causa illum imperante; refunditur tamen ad causam, in quantum non impedit, cum possit, ac teneatur: & hoc voluntarium dicitur interpretativum; nam qui non impedit aliquid damnum, cum possit, ac teneatur, se habet interpretativè, ac si positivè concurreret ad illud.

III. Ex eodem capite, diuiditur ab aliquibus voluntarium, in physicum, & morale. Physicum vocatur voluntarium propriæ voluntatis, id est procedens à propria voluntate; ut est actus, quo volo eleemosynam dare. Voluntarium morale, sunt actus, qui non procedunt physicè à propria voluntate, sed à voluntate aliena; imputantur tamen moraliter nobis, in quantum nostræ voluntates moraliter commissæ sunt alieno arbitrio: & hoc dicitur voluntarium voluntate aliena. Hoc modo originale peccatum est nobis voluntarium; quia voluntates omnium postum depositæ fuerunt à Deo in voluntate Adami; insuper actus Tutoris sunt voluntarij pupillo, cuius voluntas translata est publica autoritate in voluntatem Tutoris; sicut voluntas Filij non emancipati continetur naturaliter sub potestate Patris.

Voluntarium sumptum ex parte cognitionis, aliud est formale, aliud virtuale: actus voluntatis in se ipso actu physicè durans, causat voluntarium formale; idem autem voluntarium informale, non physicè, sed solum in virtute in se ipso durans, est voluntarium virtuale: vnde quando aliquis accedit ad missam celebrandam expresso animo consecrandi, quamvis distractus missam recitat; actus ille dicitur voluntarius virtualiter, & est sufficiens ad sacramentum conficiendum. Utinò ex parte eiusdem cognitionis, diuiditur voluntarium, in perfectum, & in imperfectum; hoc est illud, quod regulatur cognitione imperfecta; ut est cognitio brutorum, & hominum, quando non discernunt planè in obiecto rationem boni, & mali; voluntarium perfectum, est actus regulatus cognitione perfecta; ut est cognitio intellectiva discernens modo dicto rationem boni, & mali.

Utrum possit dari pura omisso libera?

AD decidendam vulgatam illam questionem, An sit possibilis pura omisso libera absq; omni actu positivè? oportet prenotare, Quod conceptus omissionis est duplex, nempe omissionis necessariæ, & liberæ; conceptus omissionis necessariæ est, quando intellectus nihil cogitat de obiecto, à quo actus ille specificatur; conceptus omissionis liberæ habetur, quando voluntati repræsentatur ab intellectu obiectum liberè amandum; ipsa verò non amat: si verò voluntas in hoc casu absteineat à

tali amore, vel obiectum odio prosequendo, vel sibi ipsi imperando positiue, vt non amet; omissio illa non erit pura; quia est inducta ab actu positiuo; erit verò pura, si abstineat ab ijs actibus, qui vel sunt impossibiles cum amore opposito illi omissioni, vel si abstineat ijs actibus, qui præcipiunt, & inferunt omissionem. Ad puram igitur omissionem liberam non requiritur, vt voluntas quando illam exercet ab omni prorsus actu positiuo, quantumuis disparato se contineat; sed sufficit, vt abstineat modo dicto.

Licet defectio pura omissio libera, & peccaminosa moraliter, hoc est sine magna difficultate dari non possit; physicè tamen loquendo, nobis in hac rerum serie constitutis, est possibilis. Hæc conclusio habet tres partes: vnde claritatis gratia, per singulas distinctè probabitur: Prima pars est, Quòd possit dari in voluntate pura omissio actus circa obiectum, cuius bonitas, vel malitia sit ab intellectu sufficienter proposita voluntati; quod *Probat*ur; Nam cum voluntas sit indifferens ad amandum, vel odio habendum; ita potest amare, vt possit non amare, & ita odio habere; vt possit non odio habere; ergo potest ab utroque actu cessare, & ponere se in æquilibrio; nullam enim in hoc cognosco repugnantiam: *Suppono* autem in hoc casu omissionis amoris v. g. voluntatem nullum actum odij exercere, vel alterius rei impossibilis cum amore opposito illi omissioni: vel quòd voluntas omitendo abstinere se ab ijs actibus, qui inferunt omissionem; idest abstinere se ab actu odij, qui necessariò inferret omissionem amoris v. g. vnde patet, quòd talis omissio esset pura; vt constet ex dictis: *Quòd autem* sit libera, quæ est secunda pars conclusionis, etiam probatur; nam libertas, iuxta nostra principia, dicit indifferentiam ad verumlibet; sed in potestate voluntatis est ponere, & non ponere omissionem; cum voluntas habeat plenum dominium supra omissionem; ergo si est libera, erit etiam voluntaria: Vnde remanet probata etiam secunda pars: *Quòd autem* hæc omissio possit esse peccaminosa, quæ fuit tertia pars conclusionis, probatur hoc exemplo allato à quodam ingenioso Recentiore. Ponamus, quòd præceptum affirmatiuum de eliciendo actu charitatis v. g. obliget cum latitudine temporis vnus *Amen*; & quòd homo perseveret cum proposito satisfaciendi præcepto vsque ad illam particulam temporis, quæ occupatur ab vltima voce illius orationis, quæ est, *Amen*. Tum sic: Potest ille talis in hac vltima particula temporis purè, & liberè omittere actum charitatis præceptum, & peccare; sed si hoc facit, sola eius omissio erit peccaminosa; ergo dari potest pura omissio, quæ de se erit peccaminosa: maior remanet probata ex dictis, minor conuincitur, nempe, quòd talis pura omissio erit peccaminosa; quia homo iste, qui omisit purè actum charitatis v. g. non peccauit tempore antecedente ad illam omissionem; quia supponimus eo tempore habuisse voluntatē satisfaciendi præcepto:

neque peccauit tempore consequenti ad omissionem; quia tunc cessauit præceptum; ergo peccauit ea breuissima morula, qua pura omissio libera potuit durare.

Nota, Quod pura omissio non potest habere motiuum intrinsecum, à quo videlicet essentialiter specificetur; quia pura omissio semper est eadem siue ab hoc, siue ab illo motiuo voluntas inducatur ad emittendum; potest tamen habere motiuum extrinsecum; verè enim cognitio allicit voluntatem ad omittendum purè, proponèdo illi motiuum, quod sit induciuum, vel omissionis illius, vel retardatiuum actuum positiuorum; videlicet amoris, & odij, quos voluntas liberè omittit.

Quid sit Inuoluntarium?

Inuoluntarium, & coactum est, quidquid fit contra inclinationem, elicitam, seu actum appetitus: vnde coactum est idem, ac inuoluntarium diuerso modo significatum; nam sicuti illud, quod tantum fit contra actum efficacem, dicitur inuoluntarium; sic illud, quod tantum contra eundem efficitur, dicitur coactum: vno verbo, conuertitur coactum cum inuoluntario sumpto positiuè, seu contrariè, quod est illud, quod fit contra actum positiuum, seu appetitum elicitem voluntatis; non autem conuertitur coactum cum inuoluntario sumpto priuatiuè, quod contingit ex ignorantia; nam ea, quæ ignorantèr fiunt, non dicuntur fieri coactè. Violentum autem latius patet, quàm coactum, & inuoluntarium; nam violentum extenditur ad omnia subiecta etiam inanimata; ignis enim potest pati violentiam: inuoluntarium verò, & coactum, conuenit præcisè agenti per appetitum; non enim cogitur ignis, aut lapis, sed homo, Angelus, & brutum. Vnde violentum propriè dicitur, quod fit contra inclinationem naturæ, seu subiecti, quodcumque illud sit siue rationale, siue irrationale. Definitur violentum ab Aristotele 3. *Ethicorum cap. 1. Est id, quod prouenit ab extrinseco passo non cōferente vim; ubi per ly, passo non conferente vim, oportet intelligere, passo resistente, seu repugnante*: aliter definitio Aristotelis esset manca; sequeretur enim aërem, dum illuminatur, pati violentiam; quia recipit lucem ipso non conferente vim ab extrinseco. Vnde propriè, dum frigus v.g. & lapis decinentur extra centrum, patiuntur violentiam; quia resistent, & repugnant.

Necessarium, est quidquid sine libertate fit: vnde magis latè patet, quàm inuoluntarium, & coactum; nam omnis actus voluntatis, qui fit sine libertate, vt amor Dei in Patria, & etiam actus brutorum, sunt necessarij; & tamen non sunt, neque inuoluntarij, neque coacti: vnde *Necessarium* extenditur ad agentia carentia cognitione; quia illa carent libertate; & sic calefactio est actio necessaria igni.

Quanam res consensit inuoluntarium?

Quamuis spectata inclinatione, quam creaturæ dicunt, ut obediant Deo, & quodcumque Deus erga illas faciat, videatur esse iuxta inclinationem illatum; & consequenter nullam videantur pati violentiam à Deo; existimo autem probabilius, posse à Deo illis violentiam inferri: Cum enim Deus sit agens extrinsecum respectu creaturæ, & possit auferre à subiecto creato formam, quam subiectum illud exigit; aut infundere aliam formam illi subiecto dissonam; ut esset, si aquæ auferret frigus, & calorem infunderet; consequenter inferre potest violentiam illis: nec potentia obedientialis, seu capacitas, quam habet quælibet creatura, ut à Deo moueatur, tollit, ne à Deo ipso violentiam pati possit: Et si D. P. August. dixit *lib. 26. cap. 3. contra Faustum*, Deum nil agere contra naturam, & consequenter nullam illi vim inferat; D. P. August. solum negauit, Deum nil facere contra suam voluntatem, & legem, quam naturam vocat. *Ob eandem* rationem non dubitarem, etiam affirmare, Deum posse infundere violentiam in actibus elicitis voluntatis; ut esset in casu, quo voluntas esset determinata ad amorem alicuius obiecti, per cognitionem boni in illo existentis, Deus infunderet in illo tunc, loco amoris, odium illius obiecti: in tali casu tale odium esset illi violentum, eodem modo, quo si impedirentur potentia externæ, ut audiant, ne videant, &c. utique in ipsis fieret violentia.

Voluntas etiam violentiam pati potest in actibus imperatis; ut si aliquis nollet loco moueri, & alius vi illum traheret, vel moueret manum ipsius. Motus autem appetitus insurgentes contra rationem; puto dicendum, non esse absolute violentos homini; quia sunt à principio intrinseco ipsi homini. Violentia, & metus, quamuis multoties possint esse simul; distinguuntur tamen; nam metus est timor alicuius mali imminentis, & violentia est impulsus ab extrinseco renuente voluntate.

Metus non causat inuoluntarium simpliciter; vnde illa, quæ sunt ex metu, absolute, & simpliciter sunt voluntaria; & sic metus per se non excusat à peccato; quia non tollit libertatem; nam qui ex metu mortis v.g. immolat, liberè immolat; cum sit in eius potestate non immolare; nam potest acceptare mortem; ergo, si liberè immolat ex metu, etiam voluntariè: non nego tamen, quod potest per accidens ex malo imminente turbari homini perfectum iudicium rationis, & consequenter impediri libertas.

Potest metus causare inuoluntarium secundum quid: vnde mercator, qui urgente tempestate proijceret ob timorem mortis merces in mari; illa proiectio esset inuoluntaria secundum quid; & sic duo concurrunt in hoc casu ad constituendum inuoluntarium; & voluntas proijciendi merces, & displicentia in ea proiectione: dicitur autem inuoluntaria secundum

dum quid; quia licet projectio mercium v.g. sit mala huius homini, si nihil aliud consideretur; considerato tamen fine, qui est conservatio vite, re vera est bona, & magis voluta, quam sit volitum illud malum.

Concupiscentia, quæ est morus appetitus sensitivi in obiectum delectabile, aciem mentis obtundit; & ut loquitur D. P. August. lib. 2. de Civit. ca. 16. quasi vigiliam cogitationis absumit; vehemens enim concupiscentiæ passio hominem arripit, & vix permittit iudicium, quo disconvenientiam obiecti cognoscat: vnde bene, & sine repugnantia dicitur, quod concupiscentia minuit libertatem; nam auertit oppositam cognitionem, & rationem perturbat, ut diximus. *Auget* tamen concupiscentia voluntarium, ut vult D. Tho. *quæst. 6. artic. 7.* & alij: Nam quo maior est concupiscentia, eò firmitus voluntas adhæret obiecto, & difficilius remouetur ab illo; sed quo maior est adhæsiō, & quo maior est unio, eò plus crescit ratio voluntarij; nam quo maior, & ardentior est amor, eò magis voluntarius est amant: nec per hoc, quod minuitur libertas impeditur, & decrescere debet ratio voluntarij; nam potest dari voluntarium sine libertate. *Potest* tamen concupiscentia minuere voluntarium; Nam eò minus obiectum aliquod est voluntarium; quo minus scitur, quid habeat in se; sed potest concupiscentia facere, ut obiectum non tam perfecte consideretur, sicuti deberet, & lateant ea, quæ possent deterrere ab eius amore; ergo &c. *Volunt* tamen aliqui, quod potest aliquando concupiscentia causare per accidens inuoluntarium: & esset, quando aliquis concupiscens careret illo fine.


Ignorantia antecedens, quæ est illa, quæ antecedit omnem actum voluntatis, quatenus remouet scientiam, quæ si adesset, non fieret actus; ut esset, si ego ignorans præceptum ieiunandi v.g. die Iouis, comedere carnes, nihil cogitans, nec dubitans, an sit præceptum; hæc, inquam, ignorantia antecedens causat simpliciter inuoluntarium; nam ex carentia cognitionis non potest sequi actus voluntatis. Vnde si quis occideret hominem in venatione, putans esse scram, actus iste occisionis ob dictam rationem esset etiam inuoluntarius. *Datur* alia ignorantia, quæ dicitur concomitans, quæ per accidens, & concomitanter se habet ad actum voluntatis, & quæ neque hominem mouet ad operandum, neque illum remouet; sed homo est ira dispositus, ut æqualiter, & eodem modo operetur, si talis ignorantia non adesset, ac operatur cum illa: ut si quis venationis causa, emittens sagittam occidit hostem; ignorans tamen esse hostem; talis occisio dicitur procedere ex ignorantia concomitante; quia tunc licet ignoret esse hostem: est tamen ira dispositus; ut si illum cognosceret, interficeret: talis ignorantia non causat voluntarium; quia non fit ex cognitione, nec illa actio esset de facto voluntaria, sed futura conditionaliter, si existisset ea scientia. Neque causat inuoluntarium positivè; quia talis occisio non repugnat inclinationi voluntatis, cum non inueniat ibi voluntas aliquid positivè contrarium.

Est igitur ea ignorantia causa inuoluntarij negatiuè; idest causas inuoluntarium negatiuè, nam cum in supradicto casu ignoretur circumstantia illa inimici latentis v.g. est causa, vt ea occiso sit inuoluntaria; nam nihil volitum, quin præcognitum. Talis autem ignorantia, vt benè dicit D.Tho: non excusat hominem à peccato. *Ex hoc* autem non sequitur, quòd neque excuset à voluntario: *Nam* non committitur aliquid nouum in ea actione externa; vt notat idem S.Doctor: & sic solum haberetur actio peccaminosa; quia ille homo habitualitè esset in peccato, ob desiderium habituale occidendi, si posset, inimicum.

Potest dari alia ignorantia, quæ dicitur subsequens, seu consequens; idest, quæ consequitur ad actum voluntatis: hæc dicitur ignorantia affectata; & esset, quando venator v.g. non inquit, nec adhibet diligentiam, an ille, qui later in silua, sit homo, vel fèra, & iaculatur; dubitat tamen, licèt si sciret, non iacularetur: hæc enim ignorantia subsequens causat voluntarium simpliciter; nam tale homicidium, subsequitur voluntariam electionem voluntatis: & sic dum aduertenter exposuit se periculo occidendi, factus est saltem indirectè occisor. *Non nego* tamen, quòd talis ignorantia causat inuoluntarium secundum quid; quia illa electio, quæ causat voluntarium simpliciter, est inefficax; vnde relinquit actum secundum quid inuoluntarium.

Assignatur etiam à Doctõribus alia diuisio ignorantia, in vincibilem, & in inuincibilem. Ignorantiam vincibilem vocant aliqui voluntariam, & inuincibilem inuoluntariam: habetur ignorantia vincibilis, quando posita obligatione carenti tali ignoratia, & si absolutè possit hic, & nunc eam depellere, non tamen expellit; habetur autem ignorantia inuincibilis, vel quando homo non cognoscit se errare, & teneri ad aliquod aliud faciendum; vel quando homo dubitans de aliqua re faciat, quantum est ex se, ad cognoscendam veritatem; & adhuc tamen nihil valuit intelligere: facere autèm, quantum est ex se, est adhibere media; qualia autem debent esse media, quæ essent adhibenda, non possunt generaliter determinari; quia pendet ab infinitis propè circumstantijs.

Ex parte autem materiæ ignoratæ, potest vltimò diuidi ignorantia, in ignorantiam iuris, & ignorantiam facti; iuris est, quando quis ignorat præceptum, seu legem, tam humanam, quàm diuinam, tam positivam, quàm naturalem; ignorantia facti est ignorantia actionis, aut circumstantiarum illius. Si autem petas, quænam, & quot sint circumstantiæ actuum humanorum, monstrabit



TRACTATVS III.

De Actibus Humanis.

Quanam sint circumstantiæ humanorum actuum?

Circumstantiæ actuum humanorum pertinent ad augendam, & minuendam malitiam, & bonitatem ipsorum; vel ad contractus civiles immutandos, vel confirmandos; tum etiam ad materiam accusationis, defensionis, &c. & est accidens quoddam actionem afficiens. Assignant communiter Theologi septem, circumstantias humanorum actuum, quas D.Tho: *quæst.* 7. *artic.* 3. in corpore, hoc versu tradidit.

Quis, Quid, Vbi, Quibus auxilijs, Cur, Quomodo, Quando.

Per *ly*, *Quis*, significatur dignitas accidentalis personæ, in qua est inter homines varietas; an scilicet sit subditus, an sciuus, an liber; & hæc propriè est circumstantia; non verò intelligitur de substantia ipsius personæ; nam nemo, nisi insanus se ipsum ignorare potest: attendenda est igitur per hanc circumstantiam, non solum personæ qualitas, quæ agit, an v.g. persona, quæ fornicatur, sit sacra, voto castitatis adstricta, vel coniugata; sed etiam persona, quæ patitur; si scilicet clericum occideris, vel Patrem, &c. *Quid*. significat, non substantiam actionis, sed quantitatem; an furtum scilicet commissum fuerit graue, vel leue. *Vbi*, denotat locum extrinsecum actionis; an scilicet fuerit crimen commissum in Ecclesia, vel in foro, &c. *Quibus auxilijs* intelligitur, qua persona, vel quo instrumento fuerit vsus ad crimen patrandum; an scilicet vsus fuerit aliquis re sacra ad vsum profanum. *Cur* denotat causam finalem; an Petrus scilicet Paulum v.g. occiderit ex intentione ipsum furandi. *Quomodo*. denotat intensionem operis. *Quando*. denotat tempus; an, carnes, v.g. quis comederit in die Veneris.

Nota, quòd quando circumstantia est contra distinctam virtutem ab ea, contra quam est substantia actionis; tunc circumstantia mutat speciem malitiæ; & sic, quia votum v. g. extrahit fornicationem ad aliam speciem, quæ sit contra religionem, talis fornicatio mutat speciem suam fornicatio est contra castitatem, & votum spectat ad religionem; quando verò non extrahit ad aliam speciem, sed intra eandem; auget, vel minuit malitiam; vt esset, si furtum v.g. esset centum, vel decem aureorum. II. Nota, Quòd numerus peccatorum est declarandus in confessione;

ne; non verò est necessarium declarare intensiorem actus; nam intensio actus non est propriè circumstantia: si verò sustineas esse intensiorem circumstantiam aggravantem: Dico, iuxta probabiliorē sententiam, esse necessariò explicandam talem circumstantiam; & idem puto dicendum de duratione actus; sed de hoc fusè agitur in moralibus. III. Ad contrahendam malitiam contra Deum, sufficit, quòd homo cognoscat obiecta esse mala, seu rationi naturali contraria, & simul agnoscere Deum esse.

De Regulis humanarum actuum.

Communis, & immediata regula ad cognoscendam malitiam obiecti, est prohibitio superioris; & quia vnum peccatum altero gravius prohibetur; ex eo quia materia ex se est grauior vna, quàm altera: hinc cognoscitur faciliè, accedente prohibitione Dei grauius hominem peccare, si vitam alicui auferat, quàm bona; ex eo, quia grauius est vitam alicui auferre, quàm bona. Regula autem radicalis, mediata, & vltima bonitatis, & malitiæ in obiectis ex natura sua malis, aut bonis, desumenda est ex conformitate, vel difformitate, quam habent ea obiecta cum natura rationali: dixi, in obiectis ex natura sua malis, aut bonis; nam esto Deus prohibeat, aut non prohibeat aliqua obiecta, vel actus; habent tamen illa ex natura sua malitiam, & deformitatem cum natura rationali; vt ait D. Tho. Vnde D. P. August. c. 3. de libero arbitrio ait, Adulterium non esse malum, quia prohibitum; sed è contrario, prohibitum quia malum. Cognoscitur autem hæc difformitas per ipsum lumen naturæ; nam ipsum lumen naturæ distat fornicationem cedere in detrimentum proles; & ideo natura sua malum; etiam lumine naturæ constat, mendacium esse contra confidentiam; & amorem mutuū, necessarium in republica humana; sicut etiam eodem lumine constat, iuramentum falsum facere Deum mendacij approbatorem. Non opus est igitur ad cognoscendam cōformitatem, vel difformitatem obiecti, vel actus, reflexio aliqua supra dictamen rationis; sed solum supra naturam rationalem: Vnde benè videtur, furari v. g. esse nocium Reipublicæ, etiamsi non faciam reflexionem supra meos actus voluntatis, quibus volo furari; nam eo ipso, quòd malitia illa, physitè nocina alteri, cognoscitur, & est liberè volita; eo ipso actus ille est formaliter malus; etiam si libertas reflexe non cognoscatur.

Non potest eadem indiuisibilis entitas respectu eiusdem hominis esse simul bona, & mala, seu habere bonitatem, & malitiam; nam non potest idem actus simul prohiberi, & mandari à Deo; ergo idem indiuisibilis actus non potest retinere veram bonitatem, & honestatem moralem, & esse malum ex circumstantia se tenente ex parte obiecti, vel ex parte actus.

Nota I. Quòd comparatio fit respectu vnius rei indiuisibilis; nam respectu rei diuisibilis potest eadem res esse simul bona, & mala eide' subiecto: & sic potest idem homo esse simul sanus, & infirmus, sanus in capite, infirmus in pede, pulcher in oculo, difformis in ore. II. Loquimur, vel in eodem genere physico, vel morali: vnde oppositio bonitatis cum malitia est intra idem genus: & sic non implicat, quòd peccatum sit conueniens physicè homini, & disconueniens moraliter eidem: in eodem autem genere, cum non possit esse simul conueniens, & disconueniens; consequenter non potest simul eadem res esse bona, & mala; nam omnis malitia à Deo prohibetur, omnis bonitas approbatur; vt supra dictum est; ergo non potest in eadem indiuisibili re simul inueniri bonitas, & malitia intrinseca.

Circa bonitatem verò, & malitiam extrinsecā, & denominatiuā, dico probabiliter, Non implicare vnum, & eundem actum habere simul bonitatem, & malitiam extrinsecam; in quantum malitia imperatur ab actu malo; bonitas verò ab actu bono: non enim repugnat hominem, per diuersos actus simul mereri, & demereri: vt esset, si homo v.g. audiret sacrum sine satisfaciendi præcepto, & placendi vanè hominibus in Ecclesia. Vnde nec etiam implicat eundem actum habere simul bonitatem intrinsecam, & malitiam extrinsecam: potest enim eadem res imperari ob duos fines, per duos actus distinctos: *Vtram* autem illa actio externa, quæ simul esset bona, & mala, esset denominanda bona, & mala, an verò præcisè mala? *Probabilius* puto, illam actionem denominandam esse absolutè malam; quia ad hoc, vt actus dicatur simpliciter malus; sufficit, si vel vnicum defectum habeat; quia malum ex quocunque defectu.

Iniungunt aliqui dicendo, In casu posito, quo quis v.g. audiret sacrum sine satisfaciendi præcepto, & ingrederetur Ecclesiam simul sine placendi vanè hominibus; si posset actus iste esse simul bonus, & malus; sequeretur, quòd Deus simul prohiberet actionem illam externam; quia mala; & simul suaderet; quia bona, quod repugnat; sicut dictum est de actu interno. *Respond.* quòd actio externa, de qua nos hic loquimur, in se non est prohibita; non enim Deus prohibet deambulationem; solum prohibet, ne eam efficiam ob finem malum, nempe ob fornicationem: cum quo bene stat; vt simul suadeat eam ob finem bonum, nempe ad audiendum sacrum: & sic loquimur, non de actione externa absolutè sumpta; sed voluta ob duos fines, bonum, & malum.

Nota I. Quòd non valet arguere, Idem actus internus non potest esse simul bonus, & malus; ergo neque idem actus externus; Nam actus internus sumit immediatè bonitatem à se non ab alio actu; & cum ad bonitatem requiratur integra causa; repugnat, vt simul, & integrè sit bonus, & malus, & simul prohibeatur à Deo, & approbetur: actus autem externus non habet malitiam in se, sed ab interiori; & quia potest homo

habere simul duos actus de eodem obiecto, vnum bonum, alterum malum; vt visum est in auditione sacri; ideo non repugnat, quòd idem actus externus sit simul bonus, & malus. Ex hoc igitur potest benè colligi ad euitandas multas difficultates: quòd omnis bonitas, & malitia primario conuenit actui interno, & secundario, & deriuatiuè actui externo; nam actus exteriores dicuntur magis, aut minus mali, vel boni; quatenus actus interiores sunt magis, aut minus voluntarij, aut liberi; ergo bonitas, & malitia formaliter in actu interno consistit, & de hoc transit ad actum exteriorem.

Nota II. Quòd hæc quæstio, in qua defenditur actum externum, siuè potentix volitiux, siuè alterius, adæquatè imperatum ab intentione bona, & adæquatè etiam ab intentione mala, posse esse simul bonum, & malum; hæc quæstio, inquam, dependet, & supponit quæstionem aliam philosophycam, nempe posse eundem actum dependere à duplici fine adæquato. III. Quamuis supra dictum fuerit, actionem illam externam esse absolutè denominandam malam; non nego, quòd possit partialiter denominari bona, & mala; nam sicut deriuatio malitiæ non impedit deriuationem bonitatis; sic nec denominatio malitiæ impiedet denominationem bonitatis. *Neque valet dicere*, Non potest aliquis esse simul Sanctus, & peccator, amicus, & inimicus Dei; ergo neque idem actus potest esse simul bonus, & malus: *Nam* sanctitas, & peccatum, amicitia, & inimicitia Dei inter se contradictionem inuoluunt: vnde non possunt in eodem subiecto componi: vnde sanctitas, nec diuinitus potest componi cum peccato; bonitas verò actus externi non excludit negationem malitiæ prouenientis ex alio capite: ideo potest idem actus externus esse bonus ex vno capite, malus ex altero.

Actus moralis, qui in natura rationali solum reperitur, dicitur ille, ex quo habitus gignuntur, qui, mores, dici solent: vnde solum actus liberè ab homine elicitus, dicitur moralis, & actus iste hoc modo elicitus, dicitur humanus vt benè notat Angelicus Præceptor 1.2, q.1. art.1. per hæc verba, *Illæ ergo actiones propriè humanæ dicuntur, quæ ex voluntate deliberata procedunt; si autem aliæ actiones homini conueniant, possunt quidem dici hominis actiones; sed non propriè humanæ; cum non sint hominice, in quantum est homo.* Cum detur duplex libertas, vna physica, ex vi cuius voluntas constituitur indifferens ad prosequendum aliquod obiectum propter conuenientiam, aut disconuenientiam purè temporalem, aut physicam; & alia dicatur libertas Theologica, per quam voluntas constituitur indifferens ad prosequendam honestatem actus; datur consequenter duplex moralitas, vna physica, quæ est actus ipse humanus, qui proceqit ab homine, vt habente liberum arbitrium; & altera Theologica, quæ non solum dicit actum perfectè liberum, sed insuper laudem, vel vituperio dignum; & sic actus moralis Theologicus constituitur formaliter per libertatem, includentem formaliter dictamen, ex quo proponitur bonitas, & malitia obiecti,

Nota I. Quòd libertas circa actum habentem plures malitias, vt est v.g. adulterium, quamuis in se sit simplex, & vna; est tamen virtualiter multiplex; quia ex vi illius obijciuntur intellectui plures malitiæ: vnde non sequitur, datur in adulterio v.g. vna libertas; ergo vna malitia, & vna moralitas. **Nota II.** Quòd ad hoc, vt malitia alicuius obiecti possit homini imputari, ac proinde dici possit, quòd peccatum incurrat; requiritur, vt habeat notitiam, vel expressiuam, vel apprensivam, vel dubitativam, aut scrupulosam circa malitiam obiecti: Vnde homo ille, qui nullam ex ijs habuit notitiam, dum obiectum, quantumvis in se malum, amplexus est, nullo modo fuit liber; & consequenter non potuit peccare; nam nemo potest liberè peccare, nisi velit obiectum malum, vel formaliter, vel interpretatiuè; sed non potest obiectum malum esse volitum sine cognitione illius; ergo, &c. **III.** Quòd aliud est cognoscere malitiam obiecti, aliud cognoscere actum prauum volùtatis versantem circa obiectum malum: & sic potest aliquis sine implicancia cognoscere malitiam obiecti; non verò actum prauum voluntatis.

*Virum possit dari actus, qui sit indifferens etiam in
individo?*

S Olet hic controuerti, An possint dari actus indifferentes supernaturales, quoad speciem, & quo ad individuum? Et quia hæc quæstio dependet ex conceptu supernaturalitatis, quasi infinitis modis à Theologis, & Philosophis explicato, & nullo adhuc certo principio definito; ideò hanc quæstionem omitto; & quæ ad actus purè naturales spectant, exagito; inquirendo, An dentur in voluntate actus indifferentes quo ad speciem, & quo ad individuum? Actus voluntatis indifferentes quo ad speciem, dicuntur illi, qui non habent ex specie sua bonitatem, aut malitiam vllam moralem; huiusmodi est per D. Thomam, & Thomistas, deambulatio, quæ dicitur indifferens in specie nam est apta, vt ametur in bonum, vel malum finem; ad differentiam actus v.g. elemosinæ, qui dicitur bonus ex sua specie. *Fere* communis Theologorum sententia docet, dari posse huiusmodi actum indifferentem in specie attento scilicet motivo intrinseco specifico in se, nec bono, nec malo: Negant tamen aliqui cum D. Tho: actus indifferentes in individuo; quia, eo ipso, quòd actus non habet obiectum honestum, quia tale, aut saltem finem honestum, esse malum, & peccaminosum; & sic dicunt, quòd non potest dari actus indifferens in individuo, qui nec sit bonus, neque malus; cum in homine detur obligatio referendi suos actus in finem honestum; & sic si in actione intercedit omissio boni finis, illa actio est mala; sicut ex directione boni finis euadit bona.

Contraria tamen sententia docet, Dari de facto actus indifferentes etiã
in

in indiuiduo. Si standum est auctoritatibus, puto primam sententiam esse probabiliorē, & ideo sequendam; præcipue propter auctoritatē Angelici Præceptoris; attentis tamen rationibus. Puto non esse reiiciendam secundam. Quia hæc obligatio dirigendi in Deum omnes actus, absque vlllo fundamento admittitur ab Aduersarijs: neque potest ex aliquo capite probari: neque vllum datur præceptum apponendi omnibus actionibus finem honestum; aliter dicerem, quòd qui manus fricaret ad calorem conciliandum, vel tempore hyemis, diceret, *dies frigidus est*, vel pulicem à facie tolleret, &c. non apponendo bonum finem moralem; omnes tales actiones fore malas, & consequenter hominem peccaturū; ergo cum nulla derur obligatio dirigendi similes actiones in finem honestum; & cum in illis nulla bonitas, & malitia reluceat; cum nec laude, nec vituperio illas exercendo, hominem afficiant; sequitur, quòd tales actiones sint indifferentes.

Insurgunt I. Aduersarij dicentes, Tales actiones fore malas; quia non apponitur illis aliqua circumstantia, ex vi cuius euadant bonæ. Respond. in primis, quòd redit argumentum supra factum circa obligationem apponendi talem finem honestum. II. Illud obiectum dicitur indifferens, quòd secundum se terminat actum, cui neque bonitatem, neque malitiam tribuat; ergo si datur actus, qui defacto tale respiciat obiectum, cui neque malitiam, neque bonitatem tribuat, actus iste erit indifferens; etiam si non apponatur aliqua circumstantia, ex vi cuius euadat bonus.

Insurgunt II. dicendo. Quòd talis actus manet indifferens, non posituè, sed præcisiuè; id est, non trahit bonitatem, aut malitiam ex obiecto, sed aliundè in quantum per actum reflexum, non ordinatur in finem, vel bonum, vel malum: & sic dicunt, Quòd actus ex obiecto indifferens est malus, si extrinsecè non ordinatur in Deum per alium actum; est bonus, si per actum reflexum ordinatur in finem bonum extrinsecum tali actui. Sed hæc responsio Aduersariorum remanet in primis confutata, ex supradictis circa hanc obligationem. Secundo, si hoc esset, sequeretur, quòd actus elicitus ex obiecto indifferenti, in se malus non esset; sed tantum esset mala omisso directionis extrinsecæ circa talem actum: vnde ille, qui talem actum eliceret sine illa directione, peccaret solum peccato omissionis, non verò commissionis. Cum igitur non possit, nec leui, nec apparenti ratione probari ea obligatio apponendi finem honestum in actionibus humanis; & cum homo non teneatur sub peccato, nisi ad vitanda mala; indifferentia non tenebitur vitare, nec eis apponere alium diuersum finem, quàm habent in se; & cum aliquæ actiones non habeant bonitatem moralem, sed solum physicam; non est illis apponendus alius finis, nisi physicus non moralis.

Insurgunt III. dicentes; Eo ipso, quòd actus non habet obiectum honestum.

nestum, qua tale, erit malus, & peccaminosus, adminus otiosus; sed de omni verbo otioso reddituri sumus rationem; ergo cum inter verba otiosa, & opera otiosa nullum intercedat discrimen, in sententia probabili; sequitur, quòd si actus ex obiecto indifferentes non honestentur ab aliquo sine bono, erunt otiosi, & consequenter mali. *Respond.* maiorem esse falsam; vt constat ex ipsa definitione verbi otiosi, quòd dicitur illud, *Quod nec ob commoditatem aliquam naturæ, nec ob honestam causam profertur*. Dicuntur igitur verba otiosa tantum animo loquendi ob garrulitatem, sine utilitate physica: de reliquo quando verba sunt ordinata ad commodum naturæ; vt esset, si diceret aliquis suo famulo, *accendas ignem, vt calefaciam*; vel monet alium, vt supra diximus, vt pulicem è facie tollat; nescio à quo prudenti viro possint dici hæc verba otiosa: *Erunt* igitur hæc verba non otiosa, sed indifferentia, vt potè nec bona, nec mala moraliter: & sic licet de omni verbo otioso reddituri simus rationem; poterit tamen dari verbum, aut actio indifferens in individuo.

Insurgunt IV. alij, Nihil voluntas amat, nisi sub ratione boni; ergo in omni loquutione voluntas debet apprehendere, vel rationem boni moralis, & sic actus erit honestus; vel rationem boni physici, & erit otiosus. *Respond.* antecedens est verum, si loquimur de bono, siue physico, siue morali; falsum autem, si sermo sit de bono tantum morali: consequentia autem est neganda, quo ad illam partem, in qua asseritur, quòd si voluntas apprehendit rationem boni physici in aliqua actione, vel verbo, verbum illud erit otiosum: falsitas autem apparet ex supra dictis: Verba enim otiosa nullum habent finem bonum, nec physicum, nec moralem; & ob hanc rationem verba otiosa sunt mala: verba autem indifferentia habent finem bonum physicum, non moralem; non enim apparet alia bonitas, nisi physica in hoc verbo, quo aliquis monet amicum, vt faciem v. g. lauet; quia est maculata, & in alijs etiam, exemplis supra adductis: Sicut ergo pellere maculam, non est actio otiosa; nec erit otiosum verbum ad id hortari; & sic de alijs.

Notandum est pro complemento huius quæstionis, Quòd supposito, quòd detur præceptum in homine apponendi finem honestum in omnibus actionibus, & verbis; Si non ponitur ab ipso talis finis, actiones illæ, & verba erunt mala, & otiosa: & in hoc casu concedimus sine ulla controuersia libentissimè Aduersarijs, non posse dari actus indifferentes in individuo; sed magna ipsis restat via in ostendendo eam obligationem, quam gratis ab ipsis adstrui supra ostendimus.



De Libertate.

Quid, & quonplex sit libertas?

LOquendo de libertate, non in sua latitudine accepta; prout scilicet est causa suæ potestatis, & subiectionem excludit; sed de illa, quæ reperitur in actionibus humanis, de quibus in hoc tractatu differimus; si hæc excludit determinationem ab extrinseco, dicitur libertas à coactione, & inuenitur in omnibus actibus elicitis, etiam necessarijs; ut sunt volitio boni in communi, amor beatificus, &c. nam in ijs actibus remanet voluntas immunis à violentia, & coactione, ab agente extrinseco illata; si verò excludit necessitatem, & determinationem physicam ab intrinseco cum quadam indifferentia ad utrumlibet, dicitur libertas indifferentiæ; & hæc libertas simul cum prima, dicitur ab aliquibus, libertas naturæ, quæ excludit determinationem modo dicto; ad differentiam libertatis gratiæ, quæ tollit culpam; & libertatis gloriæ, quæ est illa, quæ excludit omnem miseriam; ut eleganter de ijs loquitur D. Bernardus *lib. de gratia, & lib. arbitrio*

Diuiditur insuper libertas naturæ, de hac enim est sermo, & præcipue libertas indifferentiæ, in libertatem contrarietatis, seu specificationis, & in libertatem contradictionis, seu exercitij; libertas contrarietatis, seu specificationis dicit facultatem ad actus contrarios, nempe ad amandum, vel odio habendum. Libertas verò contradictionis, seu exercitij dicit facultatem ad actum, vel negationem, vel cessationem, nempe agere, vel non agere, velle, vel nolle.

Utrum in homine sit libertas?

EST de Fide hominem in statu naturæ lapsæ gaudere libertate indifferentiæ, & arbitrij; & ita actus eius voluntatis determinantur ad vnum; ut aliter fieri possit. Fuit hæc veritas definita in Concilio Tridentino, & Senonensi: habetur etiam expressè hæc conclusio in *Eccles. 15. Deus reliquit hominem in manu consilij sui; apposuit tibi ignem, & aquam, ad quod volueris, porrige manum tuam: ante hominem vitam, & mortem, bonum, & malum, quod placuerit ei, dabitur illi: manus autem in scriptura arbitrium, libertatem, dominium, potestatem, & imperium significat.*

Probatur etiam hæc eadem veritas ratione; Nam ablata libertate indifferentiæ ab homine, non darentur in ipso actus, nec moraliter boni, nec mali, nec meritorij, neque demeritori, laude, nec vituperio digni: insuper nulla erit necessitas in legislatoribus condendi leges, alliciendi homines per præmia, & terrendi per supplicia: vnde bene D. P. August. de *Gratia, & lib. arbit. cap. 2. ait, Quomodo posset Deus prohibere ne veli-*

mus, aut precipere, ut velimus, si ad volendum necessitatur. Dicendum est ergo in statu naturæ lapsæ reperitur in homine libertas indifferentiæ, & eandem etiam volunt SS. Patres, habuisse hominem in statu naturæ integræ. Excludenda est igitur necessitas illa Stoica, proveniens à syderum influxu, etiam Manichæa, & Calvinistica, proveniens prima, ut ipsi somniarunt à principio malo, vel anima mala, secum animam bonam, hominis arripiente; & secunda ab efficacia diuinæ motionis, aut à peccato primi parentis proveniens, per quas homo ita determinatur, & constringitur ad operandum, ut in eo non relinquatur potentia ad oppositum. Quando D. P. August. in Epist. 107. ad Vitalem, dixit, *Liberum arbitrium ad diligendum Deum prima peccati granditate perdidimus*: Solùm intellexit, hominem per peccatum amisisse facultatem expeditam, & completam ad benè agendum; nam hæc facultas habetur per gratiam, quam primus homo per peccatum perdidit, & per ipsum omnes.

Est etiam de Fide, quòd ad hoc, ut actus nostri sint boni, vel mali moraliter, meritorij, vel demeritorij, laude, vel vituperio digni, requiritur eadem libertas indifferentiæ: Opposita autem sententia, quæ dicit sufficere spontaneitatem, seu libertatem à coactione, est damnata, ut hæretica ab Innocentio X. in noua constitutione, confirmata ab Alexandro VII. *Remanet* solùm hic videre, quænam indifferentia pertineat ad rationem formalem, & quidditatiuam libertatis? Sed ad plenam intelligentiam huius quæstionis est videndum

In quonam consistat essentia libertatis?

P Remota I. Quòd indifferentia dicit capacitatem, & virtutem ad plura, & excludit determinationem ad aliquod; & hæc, alia est actiua, alia passiuæ; indifferentia actiua est virtus productiua indifferentèr diuersorum actuum, vel effectuum; passiuæ est quædam capacitas ad diuersa, ad quæ moueatur. II. Alia est indifferentia obiectiua, alia formalis; obiectiua est propositio obiecti, in quo relucet ratio prosecutionis, quæ est bonitas; & malitæ, quæ possit respici. III. Datur alia indifferentia, quæ dicitur contradictionis, & est quædam potentia ad agendum, vel non agendum; & altera contrarietatis ad bonum, & malum, quæ potentiam peccandi importat: indifferentia contrarietatis, quæ est ad amorem, vel odium v.g. includit, & supponit indifferentiam contradictionis; nam non potest aliquis habere potentiam ad odio habendum v.g. si simul non haberet potentiam ad non amandum; indifferentia autem contradictionis non supponit secundam, nempe contrarietatis. IV. Alia est potentialis, & priuatiua, seu suspensiuæ, quæ importat suspensionem potentiæ ab omni exercitio: & hæc dicit imperfectionem, & non est de essentia libertatis; sed solùm status eius imperfectus; idèò non inuenitur in Deo; quia est actus purus, ab æterno determinatus ad

agendum; nec etiam inuenitur in voluntate, quando actu operatur; quia tunc est redacta de actu primo ad secundum; & sic non est otiosa, & suspensa; vnde caret indifferentia suspensiva. Alia dicitur actualis, & positiua, quæ etiam dicitur indifferentia dominij; & est, qua voluntas se applicat, & determinat, non determinatione naturæ, sed libertatis, qua mediante retineat potentiam ad oppositum; & hæc reperitur in voluntate, quando liberè agit: hoc posito sit

1. Prima conclusio: Capacitas, & indifferentia passiuæ ad præmoueri, vel non præmoueri ad actus liberos, requiritur ad omnem libertatem creatam; ait enim Angelicus Præceptor 1. part. quæst. 2. artic. 3. *Mouentia secunda non mouent, nisi per hoc, quod sint mota à primo mouente*: Sustinent autem omnes discipuli S. P. August. & D. Tho: hanc motionem fieri media qualitate physica, intrinsecè recepta in voluntate, per modum applicationis efficacis, ad actum prædefinitum à decreto Dei efficaci; illum actum infallibiliter inferente, manente integra libertate, & potentia voluntatis ad oppositum; vt fusè in tract. de voluntate Dei visum est.

Secunda conclusio: Essentia libertatis saluatur in indifferentia contradictionis, seu in potestate ad agendum, vel non agendum; & sic; indifferentia ista, quæ dicitur actiua, est essentialiter constitutiua libertatis. Hæc conclusio est communis in schola D. Tho: contra Guilelmum Gibiufum, & alios; asserentes, libertatem nostræ voluntatis in sola spontaneitate, seu immunitate à coactione consistere. Confirmant hanc conclusionem autoritates S. Tho: & D. P. Augustini, nec non constitutiones Summorum Pontificum Pij V. Gregorij XIII. & Urbani VIII. proferibentes propositiones Michaelis Baij, asserentis, essentiam libertatis in sola spontaneitate, vel immunitate à coactione consistere;

Probatum tamen breuiter conclusio hac ratione communi in schola D. Thomæ: Voluntatem esse essentialiter liberam, est habere actus in sua potestate, & dominio, seu habere dominium suarum operationum; vt colligitur ex illo *Genesis 4. Subter te erit appetitus tuus, & tu dominaberis illius*; sed tunc voluntas est perfectè domina sui actus, quando potest illum facere, & non facere; asserente D. Tho: quæst. 24. de veritate art. 1 in 5. argum. sed contra: *In hominis potestate est facere, & non facere, & ita est liberi arbitrij*. Ergo sola indifferentia contradictionis essentialiter libertatem constituit; nam vt diximus, per hanc indifferentiam constituitur voluntas potens facere, & non facere; ergo actus purè spontanei, & à coactione immunes, non sunt verè liberi: nam non sunt sub dominio, & potestate nostræ voluntatis; cum non excludant determinationem virtutis ad vnum, & violentiam causæ exterioris agentis,

3. Tertia conclusio: Ad faciendum opus bonum, & consequenter ad merendum, sufficit libertas contradictionis, seu exercitij, & non requiritur necessariò libertas contrarietatis, seu specificationis: Nam cum per se necessariò non requiratur indifferentia contrarietatis ad libertatem,

vt supra visum est; sed saluatur in indifferentia contradictionis; ergo meritum, quod supponit libertatem, bene saluabitur per libertatem contradictionis; vt videre est in Christo Domino, in quo dum adhuc erat in via, solum erat in eo libertas contradictionis circa actus meritorios; & moraliter bonos, & nulla erat in eo libertas contrarietatis ad bonum, & malum; cum esset ab intrinseco impeccabilis; ergo ad eliciendos actus meritorios, & moraliter bonos, sufficit libertas contradictionis, seu exercitij. Vnde potest dari opus bonum, & meritorium in aliquo, etiam si in illo non sit libertas contrarietatis; vt visum est in Christo Domino. Vnde ex superius dictis, & ex doctrina D. Thomæ

Colligimus, Indifferentiam contrarietatis, quæ est ad bonum, & malum; subindeque potentiam peccandi, non pertinere ad essentiam libertatis, dicente D. Tho: in 2. dist. 25. quæst. 1. artic. 2. *Ad rationem liberi arbitrij non pertinere, vt indeterminatè se habeat ad bonum, vel ad malum; quia liberum arbitrium per se in bonum ordinatum est; cum bonum sit obiectum voluntatis, nec in malum tendat, nisi propter aliquem defectum, quem apprehendit, vt bonum: & ideo ubi perfectissimum est liberum arbitrium, ibi in malum tendere non potest.* Pertinet ergo solum ad essentiam libertatis, vt visum est, indifferentia contradictionis ad agendum, vel non agendum, dicente eodem Angelico Præceptore eodem loco, *Ad libertatem arbitrij pertinet, vt actionem aliquam facere, vel non facere possit.* Indifferentia, item ista ad bonum, & malum, seu potentia peccandi, neque etiam est pars, aut extensio libertatis creatæ, consideratæ secundum suam essentiam; aliter sequeretur, quod essentia libertatis non saluaretur integrè, totalitèr, & adquatè in Deo, nec in Beatis, & Sanctis confirmatis in gratia, in quibus non est potentia peccandi.

Pertinet ergo solum ista indifferentia, et potentia ad peccandum ad statum accidentalem hominis viatoris, non confirmati in gratia: Nam SS. PP. & Concilia explicant libertatem hominis viatoris per potestatem extendendi manum ad bonum, & malum; ergo potentia peccandi pertinet ad statum libertatis accidentalem, qui status est imperfectionibus inuolutus. *Nec valet dicere, posse errare non est pars scientiæ; ergo neque posse peccare est pars libertatis. Nam errare non est actu scire; peccare autem est liberè agere; & cum non possit dari actus secundus sine primo, potentia peccandi erit pars: vnde dicit D. P. August. lib. de vera religione. cap. 14. Vsq; adeo peccatum voluntarium est malum; vt nullo modo sit peccatum, si non sit voluntarium.*

Aliqui impugnant I. Nostram conclusionem dicentes, Libertatem, non includere indifferentiam ad opposita, sed bene saluari per meram spontaneitatem: Nam Deus caret tali indifferentia agendi, & non agendi; nam illud, quod sua immutabili voluntate decreuit, retractare non potest, & tamè est liber; quinimò omnis libertatis origo; ergo libertas bene saluatur absque tali indifferentia. Resp. Falsum esse, & ideo negandum,

Deum non habere indifferentiam; ad hoc enim, vt illud, quod decreuit, dicatur esse volitum cum indifferentia, & libertate, sufficit, vt illud potuerit absolutè non velle pro priori ante suum decretum; quantumvis de reliquo ratione suæ immutabilitatis, postquam aliquid semel voluit, non possit illud postea non velle. *Saluatur* igitur æquè benè conceptus iste indifferentiæ in Deo, per hoc, quòd ipse se determinauerit cū indifferentia, & ex propria libertate ad actum: vno verbo, antecessit in volitione creaturarum voluntas regulata iudicio indifferenti per modum principij. Vndè propter defectum huius conditionis negatur Angelos, & Beatos liberè, & indifferenter se determinare ad amorem beatificum; nam in illis ad eum amorem voluntas regulatur iudicio determinato, non verò indifferenti ad amorem.

Insurgunt II. Conceptus iste libertatis pugnat cum efficacia diuinæ gratiæ, quæ determinat voluntatem ad agendum, & volendum, & extrahit voluntatem à tali indifferentia; ergo, &c. *Respond.* quòd gratia efficax extrahit voluntatem ab indifferentia potentiā, & suspensiuā, quæ non est de essentia libertatis, & determinat voluntatem determinatione, se tenente ex parte actus secundi, seu ipsius operationis; non verò extrahit voluntatem ab indifferentia actuali, & positiua; nam hæc semper remanet in voluntate, etiam applicata per gratiam efficacem; nec determinat gratia efficax voluntatem determinatione, se tenente ex parte actus primi, seu virtutis: vndè conceptus libertatis, positus in indifferentia ad agendum, vel non agendum, non pugnat cum gratia efficaci, vt dicunt Aduersarij.

Insurgunt III. Vbi datur perfectè voluntarium, datur perfectè liberum; cum in actibus voluntarijs voluntas se ipsam moueat; sed in actibus etiam necessarijs, & determinatis ad vnum datur aliquando perfectè voluntarium; ergo, & perfectè liberum; ergo non consistit libertas in indifferentia ad agendum, & non agendum. *Respond.* falsum absolutè esse, quòd vbi datur perfectè voluntarium, datur perfectè liberum: Scilicet voluntas in omni actu perfectè voluntario se ipsam physicè moueat; quia tamen non moraliter se mouet; ideo non liberè: agens enim, vt liberè dicatur operare, debet non solum physicè se mouere; hoc enim, & omne viuens facit; cum se ipsum physicè moueat, & etiam à principio interno etiam physicè moueatur; sed vltèrius requiritur, vt moraliter se ipsum moueat, quòd fit per dominium sui actus, & ex electione voluntatis.

Est notandum I. Ad excludendos actus purè spontaneos à conceptu libertatis; quòd ratio liberi arbitrij consistit in eo, quòd ita actus nostros habeamus in nostra potestate, vt non solum, cum volumus facimus, & facimus, si volumus; sed quòd ita facimus, cum volumus; vt oppositum facere, & velle possimus; per actus autem purè spontaneos solum habetur primum, non secundum.


Notandum II. Quòd quando SS. PP. dicunt.

cunt, Voluntatem esse liberam; quia spontè agit: vtuntur hoc nomine, *Sponte*, pro vt non solum excludit coactionem rigorosè sumptam, sed etiam pro vt excludit simplicem necessitatem. III. Christus Dominus adimplendo præceptum Patris mortem acceptando, fuit liber libertate contradictionis, & exercitii, quæ importat facere, & non facere, acceptare, & non acceptare; licet Christus ratione suæ impeccabilitatis non potuerit non adimplere præceptum Patris, & non acceptare in sensu composito, & potentia consequenti; potuit tamen non adimplere (stante impeccabilitate) in sensu diuiso, & potentia antecedenti; vt ostendetur in tract. de Incarnat. agendo de libertate Christi. Si verò dicitur, quod posse omittere præceptum Patris, est posse peccare. *Respond.* hoc esse verum de potentia consequenti, & de omissione priuatiuè acceptæ; non autem de potentia antecedenti, & omissione purè negatiua: sicut fuit potentia omissionis præcepti in Christo. Quid sit ommissio priuatiua, & negatiua visum est, agendo de omissione in tract. de Voluntario, & Involuntario.

Petes, Vtrum libertas in actibus elicitis sit modus intrinsecus afficiens voluntatem; an verò solum denominatio extrinseca? *Respond.* Probabilius censeo, libertatem esse modum intrinsecum actibus elicitis à voluntate: vnde non consistit libertas, vt volunt plures extra scholam D. Th. in denominatione quadam extrinseca, proueniente à potentia ita agente, vt possit oppositum agere: loquimur de libertate circa actus elictos, non imperatos voluntatis; nam actus imperati sunt solum termini, & effectus secundarij potentie imperantis; non autem exercitia, & egressus: sicut actus eliciti, qui dicunt habitudinem, & respectum ad principium liberum, vt tale formaliter; ergo actus eliciti manent formaliter liberi per positium influxum, & perfectionem intrinsecam, & consequenter per aliquod intrinsecum; nam talis respectus est intrinsecus actibus elicitis; cum de ratione intrinseca actionis sit, quod respiciat suum principium.

Vnde est notandum I. Quod actus præcisè non sit liber, ex eo quia procedit à principio libero per modum meri effectus, sicut procedit homo à Creatore, aut à generante, & sicut est aliquis actus imperatus, qui est transiens; sed dicitur liber, in quantum procedit per modum exercitij potentie liberæ, qua talis; idest ad vnum, vel alterum contradictorium, cum reiectione dominatiua oppositi. *Nota* II. Quod est falsum illud, quod dicunt aliqui defensores oppositæ sententiæ, quod scilicet possit actus transire de necessario in liberum sola variatione iudicii intellectus, absque eo quod ponatur aliquod intrinsecum in actu voluntatis. Nam quoties actus transit de necessario in liberum, vel è conuerso, mutatur intrinsece respectus, & habitudo eius ad voluntatem; & cum iste respectus sit aliquod intrinsecum; vt supra dictum est, sequitur, quod importatur aliquod intrinsecum. III. Licet actus secundus sit incapax indiffe-

differentiæ; non sequitur, quod sit etiam incapax recipiendi libertatem in se, & denominari liber solum extrinsecè: ratio est, quia actus non dicitur liber, quia est indifferens ad vtrumlibet; sed quia est exercitium potentia indifferens, respicientis actum cum dominio, vt conseruet facultatem ad oppositum.



TRACTATVS IV.

De Vitijs, & Peccatis.

Et primò de Virtutibus in communi.

EGimus vsque adhuc de actibus humanis in communi, aliqua etiam percurrere circa honestatem, & bonitatem illorum in particulari, & vltimò, quæ ad conceptum libertatis spectant, breuiter notauimus: Nunc ordo doctrinæ postulat, vt de ipsis actibus malis, & vitiosis nonnulla agitemus: & quia D. Tho: ad explicandam essentiam vitij recurrit ad eius contrarium, siue ad virtutem: idèò commodius existimaui conducere ad intelligentiam huius tractatus, aliqua de virtutibus in communi prænotando.

Quid, & quotaplex sit virtus?

Relictis varijs explicationibus, quibus potest virtus describi; sumitur propriè virtus in hoc loco pro aliqua vi, & facultate, quæ est in creatura rationali ad benè operandum: vnde benè potest definiri, *Habitus per se inclinans in actionem moraliter honestam*: & per hoc communis sententia, quæ tribuitur D. Tho: Caiet. & alijs, censet, Habitum virtutis intrinsecè, & per suam entitatem esse virtutem, & esse per suam entitatem determinatum ad producendum actum formaliter honestum; eo ipso, quod aliquem producit; Nam habitus inclinat ad actum respicientem motiuium honestum, & consequenter ad actum honestum; ergo si actus est formaliter bonus, & honestus, etiam habitus erit honestus; ergo non potest dari habitus virtutis indifferens. Scio tamen, quod mihi subito obijcies; Diximus agendo de actibus humanis, quod dantur actus indifferentes in indiuiduò; ergo etiam dantur habitus indifferentes. *Sed respondeo* eadem facilitate, negando consequentiam; Nam actus indifferentes non sunt tales; vt possint esse boni, vel mali primariò, sed secundariò, per ordinem scilicet ad actus Internos; habitus autem indifferen-

tes repugnant; quia non possunt esse principia actuum bonorum, vel malorum ex obiecto: de reliquo si per habitus indifferentes intelligis principia actuum indifferentium; ego possem concedere dari huiusmodi habitus; sed in presenti loquimur de illis primis habitibus.

Diuiditur virtus à D. Tho: in ordine ad obiectum, in Theologicam, Moralem, & Intellectiuam; vnde si obiectum virtutis est increatum, erit virtus Theologica, quæ est illa, quæ versatur circa Deum; sicuti scilicet habent Fides, Spes, & Charitas: Si verò obiectum virtutis est creatum, & afficit appetitum, & voluntatem ad attingendum honestum, erit virtus moralis: Si verò obiectum creatum perficit intellectum in ordine ad verum, habetur virtus intellectualis. Virtutes morales diuiduntur in quatuor Cardinales, nempe Prudentiam, Iustitiam, Fortitudinem, & Temperantiam: dicuntur Cardinales, quia sunt veluti cardines, quibus adhæret firmiter tota moles vitæ honestæ, & politicæ. Virtutes intellectuales sunt Ars, Scientia, Prudentia, Sapientia, & Intellectus: à quibus censeo, Opinionem nullo modo esse excludendam.

Diuiditur etiam virtus, per ordinem ad principium efficiens, in infusam, & acquisitam; virtus infusa, est, quæ in instanti iustificationis simul cum gratia animæ potentiæ infunditur; acquisita, est, quæ proprijs actibus comparatur, & ab illis producitur. Ultimò, virtutes morales, aliæ dicuntur in ordine ad se, & aliæ in ordine ad alium; virtutes in ordine ad se dicuntur tales, quia solum respiciunt ipsum operantem; vt Temperantia, Mansuetudo, Magnanimitas, Fortitudo, Veritas, Magnificentia, Amor moderatus honoris, qui dicitur Adulorinja, & decens iucunditas, quæ appellatur Eutropelia. Virtutes autem in ordine ad alium, dicuntur tales in ordine ad bonum physicum, quod proximo afferunt; vt sunt Iustitia, Liberalitas, Misericordia, Obedientia, Reuerentia, Religio, Pietas, Observantia, Gratitude, Magnificentia, Amicitia, Vindicatio culpæ à superiore facta, & Notoria, quod omnes istæ virtutes perficiunt moraliter proprium subiectum; & sic in hoc sensu omnes dicuntur ad se.

De Virtutibus Moralibus infusis.

Circa virtutes morales infusas est celebris sententia D. Thomæ, quam ferè omnes Theologi sequuntur, dari in iustificationis virtutes morales per se infusas: vnde non solum dantur habitus trium virtutum Theologarum; vt est certum apud omnes Theologos, quibus possit homo iedere in finem supernaturalem virtute gratiæ; sed etiam dantur virtutes morales, quibus mediātibz possit etiam tendere ad finem ipsum supernaturalem; aliter nimis coarctaretur virtus ista tendendi in finem supernaturalem. Snaderetur primò hæc communis ratio ex Clemente V. in Concilio Viennensi; Nam cum ortum fuerit dubium in Ecclesia; An si-

inul in baptismo cum gratia infundantur virtutes Theologicæ, & aliæ? Pontifex indiscriminatim loquens ait, Probabilior est pars illa, quæ asserit in baptismo infundi simul cum gratia virtutes; ergo hæc definitio se extendit, tum ad morales, tum ad Theologicas virtutes. *Ratio autem D. Tho: & omnium Thomistarum fundatur in hoc, Quod virtutes morales acquisite distinguuntur specie à virtutibus moralibus infusis, per hoc, quod morales acquisite respiciunt obiectum naturale, seu motiui naturale; morales autem infusæ respiciunt obiectum supernaturale, seu motiuium, & finem supernaturalem: & sic Fortitudo v.g. vt est virtus moralis acquisita, respicit bonum naturale, puta conseruationem, aut liberationem patriæ; pro vt autem est virtus moralis infusa, respicit finem supernaturalem, puta conseruationem Fidei, & Religionis; ergo licuti dantur virtutes naturales ordinate ad finem naturalem, congruum etiam fuit, vt homini infunderentur virtutes aliquæ morales præter Theologicas, quibus possit modo supernaturali circa finem supernaturalem operari. Neque dicas, posse actum naturalem attingere obiectum supernaturale; Nam hoc negatur a multis; & dato hoc, actus ille naturalis adhuc non attingeret proportionatè, nec secundum merita obiecti; idest nec attingeret debito modo, nec ea perfectione, qua debet attingi; ergo necesse est, vt dentur actus supernaturales, quibus attingatur debito modo obiectum supernaturale. Et de hac proportionem, exigentia, & commensuratione ad obiectum supernaturale loquutus est P. Vincentius Contenson in responsione ad illud argumentum Aduersariorum, dicentium, esse idem motiuium intrinsecum, & obiectum virtutis moralis, & acquisite; Dicendo, quod ratione huius maioris proportionis, exigentiæ, & commensurationis intrinsecæ non dicunt eundem ordinem ad obiectum virtutes morales, ac acquisite; vt videre est in tom. 4. dissertat. 1. de virtutibus infusis fol. 76.*

Oritur autem hic alia subtilis difficultas, An scilicet necesse est, vt cognoscatur expressè, & explicitè in virtute infusa hæc conducentia, & relatio ad finem supernaturalem? an verò sufficiat, quod solum cognoscatur tantum ratio illa naturalis v.g. abstinentiæ; pro vt dicit virtutem, quasi obedientialem, terminandi actum supernaturalem, conducentem ad finem supernaturalem? *Puto probabilius, virtutes infusas respicere obiectum virtutis acquisite modo secundo; Nam si virtus infusa deberet expressè tendere ad finem supernaturalem, vix vnumquam daretur actus virtutis infusæ; nam finis ille supernaturalis non posset venire in mentem, nisi soli hominis litterati, nec de illo fine supernaturali cogitarent, nisi soli Theologi.*

Nota, I. Quod eadem ratio, quæ probat necessitatem actuum virtutis moralis, probat etiam necessitatem habituum virtutum moralium; nam sicut ponuntur habitus Theologici, vt cōnaturalius fiant virtutes Theologicæ; ita etiam poni debent habitus virtutum moralium, vt cōnaturalius

ralius fiant actus ipsarum virtutum. II. *Habitus isti ex quibus actus supernaturales morales fiunt non possunt ex natura sua à nobis producti nam vel producerentur per actus naturales, vel supernaturales; non primum, quia sunt omninò illis improporionati, neque secundum, quia actus illi supernaturales supponunt habitus supernaturales: addo, quòd cum habitus supernaturales dent simpliciter posse, petunt ex se esse ante omnem actum.* III. *Quamvis homo per actus virtutum Theologicarum sit sufficienter ordinatus ad finem supernaturalem; nisi tamen dentur habitus aliarum virtutum, talis ordinatio per virtutes Theologicas foret minima ad vltimum finem acquirendum; ideo requiruntur habitus isti virtutum moralium, ut homo connaturalius operetur per principia sibi inrinfeca; tùm etiam ad ornatum animæ iusti.* IV. *In Deo non dantur habitus virtutum; nam hi dantur in homine, ad suppleendam imperfectionem potentiæ; & cum in Deo quælibet potentia sit perfectissima, nullus habitus potest admitti.*

Quodnam sit subiectum virtutum?

Petes, Quodnam sit subiectum virtutum? scilicet an virtutes sine collocandæ in potentijs animæ, an verò immediatè in ipsa substantia animæ? Dico in sententia illorum, qui admittunt potentias distinctas ab anima; probabilius collocandas esse virtutes in ipsis potentijs; Nam anima non est operatiua immediatè per suam essentiam; ergo per potentiam; ergo in hac debet collocari virtus: & sic primum virtutis subiectum est intellectus, qui est indifferens ad intelligendum bonè, vel malè: vnde indiget habitu, ut firmetur, & determinetur in assecutione veri. *Secundum* virtutis subiectum est voluntas, loquor de virtutibus moralibus, etiam de illis, quæ ordinantur ad bonum proprium; nam voluntas circa ea omnia difficultatem habet, ortam tum ex ipsis obiectis, tum ex vnione ad corpus, tùm etiam ex repugnantia appetitus; ergo ut hanc difficultatem vincat voluntas indiget habitu. *Ex hoc* autem apparet, quòd ratio, quam adducit Pater Contenson pro sua sententia, asserens, Quòd virtutes, quæ ad bonum proprium ordinantur, non subieciuntur in voluntate, dicendo, quòd bonum proprium non est per se difficile voluntati; *Non*, inquam, subsistit; Nam voluntas, ut dixi, habet etiam in virtutibus, quæ ordinantur ad bonum proprium, difficultatem: primò ex parte obiecti; quia obiecta virtutum prædictarum non necessitant voluntatem ad eius amorem: vnde apparet in voluntate aliqua ratio, qua voluntas ab eius amore retrahatur: secundò ex vnione ad corpus; ut apparet in virtute v.g. Fortitudinis; non enim negari potest voluntatem mortem formidare: denique ex moribus appetitus, qui reddunt difficiles actus voluntatis; ergo manifestè apparet, quòd etiam bonum

proprium difficile videtur voluntati; ergo indiget virtute superaddita ad difficultatem vincendam.

Est notandum ad soluendam difficultatem, qua vtuntur authores contrariæ sententiæ; Quod difficultas actuum virtutum est in voluntate informatiue, quatenus reddit difficilem illius operationem; non verò subiectiue: Et sic, quando dicunt, In ea potentia ponendus est habitus, in qua est difficultas, Respondetur, si difficultas est informatiue, propositio est verâ, si est subiectiue, est falsa: difficultas enim est in appetitu subiectiue; in voluntate verò informatiue; quia motus appetitus inhærens appetitui, reddit difficilem operationem voluntatis; ideò vt voluntas possit vincere hanc difficultatem, indiget habitu.

Loquendo de obiectis sensibilibus, circa quæ versantur virtutes voluntatis; potest dici appetitus sensitius tertium virtutis subiectum: in hoc enim omnes conueniunt: Solum potest esse difficultas de obiectis spiritualibus, Humilitas v.g. Veritas, Studiositas, &c. an scilicet circa ea possint dari actus appetitus: Existimo probabilis, absolutè non posse; Quia obiecta spiritualia non possunt attingi actibus potentiæ materialis; nam isti tantum circa materialia versantur; sed ista sunt obiecta spiritualia; ergo, &c. licet intellectus, dum est corpori vnitus, versetur circa obiecta spiritualia; hoc non facit, nisi ad instar alicuius rei materialis: hinc est, quod apprehendit Angelum ad instar Iuuenis alati, scientiam ad instar lucis, vel alterius similis: Si verò dicas, appetitus versari etiam hoc modo circa virtutes, & obiecta spiritualia. Libenter concedo, posse esse subiectum virtutum moralium, quæ sunt ad se; nam circa virtutes, quæ sunt formaliter ad aliud, videtur probabilis, appetitum non versari; nam appetitus tantum fertur in obiecta, vt sibi delectabilia.

Vtrum virtutes consistant in medio?

Quia virtutes extrema prohibent, solet hic inquiri, Vtrum sit medium à virtutibus præscribendum? Virtutem in medio consistere docent plura testimonia Sacræ Scripturæ; habetur enim *Isaia 30. vers. 21. Hac est via, ambulate in ea, non declinetis, neque ad dexteram, neque ad sinistram.* Et Nissenus homil. 8. in *Cantica* inquit, *Virtus media est inter duo vitia.* Remanet autem hoc non obstante explicandum, quomodo intelligendum sit, virtutem in medio consistere: cum multoties virtus non prohibeat virumque extremum? v.g. Si aliquis omitteret sacrum in die festiui sine legitima occupatione, faceret contra præceptum audiendi sacrum; si verò audiret legitime occupatus, non ministrando infirmo grauitè laboranti, non faceret contra præceptum audiendi sacrum, sed contra charitatem proximi; vnde videtur, non prohibere semper virtutem vtrumque extremum: Dico igitur in tali casu virtutem in medio consistere; quia siue vna sola, siue duæ simul virtutes, ea extrema pro-

prohibeant; idest auditionem sacri, vel eius omissionem, non habetur, virtus, nisi quando homo in nullum extremum defleat.

Quæres II. Vtrum omnes virtutes consistant in medio? Respond. quod in virtutibus intellectualibus inuenitur medium rei. Medium rei dicitur illud, quod ex natura rei est destinatum, vt sit omnino idem in omnibus: sicut est medium iustitiæ, quod est idem, tum respectu diuicis, tum respectu pauperis, iuuenis, vel senis; cum præcipiat omnibus reddere, quod suum fuerit; ita vt nullum excessum, aut defectum patiatur in suo obiecto: & sic si deficit à recta mensura, incidit in vitium iniustitiæ; si verò excedit plus soluendo, quàm debet, potest pertinere ad liberalitatem, & incidere in vitium prodigalitatæ. In virtutibus igitur intellectualibus inuenitur medium rei; nam cum veritas sit obiectum virtutum intellectualium; & cum possit ab illo quis recedere, affirmando plus, vel minus, quàm res se habeat, vt esset, si quis diceret, elementa esse duo, vel sex: sequitur medium scientiæ esse medium rei.

Iustitia debet etiam tenere medium rei; Nam obiectum iustitiæ non potest vlla circumstantia variari; cum de eius ratione sit, vt tantum reddatur, quantum debetur: vnde si minus datur, committitur iniustitia; si verò plus, datur excessus; ille, vt diximus, pertinet ad liberalitatem, & si eius mensuras transiit, incidit in vitium prodigalitatæ. Cætera verò virtutes solum habent medium rationis: Vnde non habent medium certum ex parte obiecti; sed solum rationis; idest attentis circumstantijs, & occasionibus operantis; ita vt pro diuersa huius conditione sit diuersum; vt patet in cibo; nam id, quod esset vitiosus excessus pro puero v.g. octo annorum, potest esse pro alio iusta materia; & sic actio, quæ ex se esset mala; redditur tamen ex circumstantijs concurrentibus bona, & magni meriti; non potest autem dari aliqua regula generalis ad hæc discernenda, sed relinquuntur decidenda iudicio prudentis viri.

Virtutes Theologicæ, est communis Doctorum opinio, eas non consistere in medio per se, & ex parte obiecti; & sic non habent per se vitiosum extremum; Nam modus amandi Deum est illum sine modo, sine termino, & sine discretionem diligere; cum nemo amare possit Deum, ultra quàm ipse mereatur; potest tamen in illis euenire excessus per accidens, si nimirum impendatur tempus in eliciendis actibus illarum virtutum, quando charitas proximum adiuuare nos cogit.

Quæres III. Vtrum virtutes infusæ Theologicæ, & morales sint inter se connectæ? Dico, esse omnino certum, & constat ex Concilio Tridentino, Charitatem esse coniunctam cum Fide, & Spe; Fides autem, & Spes non est mutua cum Charitate; quia amittitur per peccatum mortale Charitas non amittitur autem habitus Fidei, & Spei. Fides, nec conseruatur sine habitu Spei, neque habitus Spei sine Fide; & est communis Theologorum consensus; & puto id ex Dei voluntate provenire. Reliquæ virtutes morales dicunt mutuam connexionem cum charitate, & cum alijs;

quia hæc infunduntur cū charitate, & dantur, vt ipsā comitentur. Insuper nec virtus supernaturalis pēdet à naturali, nec naturalis à supernaturali; aliter non posset simpliciter existere virtus naturalis, nisi haberet simul existentem virtutem supernaturalem; quod contrarium monstrat experientia in Angelis, in quibus etiam non eleuatis ad finem supernaturalem, per habitus infusos; possunt tamē esse multi actus naturales, & consequenter multæ virtutes naturales. Sicut etiam potest vna virtus naturalis esse summè perfectā in suo genere, seū intrinsecè, sine alia virtute naturali: vnde secundum hunc sensum, virtutes naturales non sunt inter se connexæ; sunt tamē solum connexæ secundum denominationem, extrinsecam: vnde absolutè bonus, & perfectus non denominatur quicquam, nisi omnis pulchritudinis, & bonitatis ornatum habeat, & contineat,

Quæres IV. An permaneant virtutes morales post mortem? Circa virtutes Theologicas agimus in tract. de Fide, Spe, & Charitate. Dico igitur, permanfuras in Beatis virtutes morales acquisitas, fert communis opinio; Nam cum istæ sint perfectiones animæ, & pertineant ad pulchritudinem Beatorum, congruum est, vt in eo statu perseuerent. Non perseuerant autem in damnatis: vnde per actus oppositos contrarios, vel otio naturaliter pereunt; habitus verò supernaturalis, nec per minimum instans permanet in ipsis. Virtutes, & habitus purè intellectuales, putat D. Tho: non repugnare damnationis statui; cum scientiæ valdè vigeant in dæmonibus; & constet damnatos recordari eorum, quæ in vita egerunt; quod inseruit ad augendam eorum tristitiam, & ipsos magis torquendum,

De Donis Spiritus sancti.

Dona Spiritus sancti vocantur speciali ratione quædam ornamenta, quibus iusti ornantur; quæ dona enumerat *Isaias cap. 11.* Septem distincta: ait enim loquens de Christo. *Et requiescet super eum Spiritus Domini, Spiritus sapientia, & intellectus, Spiritus consilij, & fortitudinis, Spiritus scientia, & pietatis: & replebit eum Spiritus timoris Domini.* Vnde communis omnium sententia est Spiritus sancti dona, tantum esse septem ab *Isaia* enumerata; quidquid in oppositum sentiat *Durandus*. Dicuntur dona Spiritus sancti, quia procedunt à quadam illustratione Spiritus sancti, cuius obiectum adhuc nullo modo potuit dignosci cognitione naturali, & improporcionata ad actum meritorium: neque circa illud potuit præcisè regulis rationis prudens iudicium confici: huiusmodi fuit actus, quo *B. Apollonia* maiori, vt refert *Ecclesia*, Spiritus sancti igne succensa, se ipsam in rogam ardentem coniecit. Septem igitur his donis homo ipse, omnes eius potentia, & operationes rectitudinem obtinent: & sic Pietate inclinatur voluntas ad exercendum cultum diu-

diuinum, & ad bonum proximi diligendum; Fortitudine roboratur appetitus sensitivus in timore periculorum; sicut Timore frænatur concupiscentia circa desideria carnalia. Dono Intellectus perficitur mens, ut veritates diuinas percipiat, & sic de reliquis.

Est sententia D. Thomæ, Bonauenturæ, Caietani & quamplurium contra Scotum, dona Spiritus sancti importare habitus à virtutibus distinctos; nam ut vult quidam Recentior, animus noster per virtutes acquisitas est facile mobilis à ratione; sicut per virtutes infusas est facile mobilis à Fide; ergo sunt necessaria alia dona, quibus homo facile, & veluti connaturaliter moueatur à Spiritu sancto. Distinguantur etiā dona per D. Th. non solum à virtutibus moralibus acquisitis, verū etiam infusis, & præcipue Theologicis; cum dicit nulla esse dona, quæ pertineant ad virtutes Theologicas; nam istæ tangunt Deum, tam alto modo; ut altiori tangi non possit.

De Vitijs.

Est primò, quid veniat nomine vitij?

Relictis varijs significationibus vitij, venit in presenti nomine vitij, non actus ipse peccati; sed habitus quidam inclinans, & facilitans ad actus malos; vnde bene definitur. *Habitus perfectè radicans, ex se inclinans ad peccatum.* Habitus siue virtutis, siue vitij formaliter, & in se ipso, neque bonitatem, aut malitiam habet formalem; hanc enim habet propriè actus voluntatis; quia sunt in se ipsis liberi, & respiciunt obiecta formalia: sic tantū actus sunt in se ipsis liberi. Dicuntur igitur habitus boni, vel mali radicaliter, quatenus sunt radices, & principia, à quibus procedunt actus formaliter boni, vel mali: & sic habitus virtutis participat rationem honestatis, per ordinem ad actum honestum, ad quem inclinatur; habitus vitij, etiam eodem modo se habet, licet non ita propriè; quia magis intrinseca, & necessaria est bonitas actui, quem respicit habitus virtutis, quàm sit malitia actui, quem respicit habitus vitij; ergo est magis propria bonitas virtuti, quàm malitia vitio. *Non nego tamen dari habitus intrinsecè, & per se ipsos inclinatos ad obiecta in se praua, & peccaminosa, & consequenter in actus ex natura sua peccaminosos; sicut est habitus odio habendi Deum, & similes; & in ipsis ratio vitij est intrinseca.*

Nota, Quòd quando actus, ad quos inclinant habitus, nec malitia n., nec aliquam extrinsecam saltè bonitatem habent; habitus, qui in illos debito modo inclinant, sunt mali: vnde eodem modo inclinarent, ac si actus illi essent prauis: & sic licet habitus illi non sint mali per ipsos actus, sunt tales propter malam habitudinem ad illos. Vnde habitus, qui inclinatur in obiecta indifferentia, semper ex se debito modo inclinatur quia inclinatur in obiectum quantumvis in eo quolibet malitia reperiatur: & sic habitus ille semper retinet rationem vitij.

Quomodo vitia cum virtutibus opponantur?

Circa oppositionem vitij cum virtute, Est sententia D. Thomæ *quest. 7. art. 1.* Quod vitium cōtrariē, & directē virtuti opponitur; quia tamen quæstio procedit de virtute, tūc supernaturali, tūc naturali, & de vitio, ac de habitu vitioso; idē primō, & distinctē examinabitur quæstio de habitibus virtuosis, & vitiosis, de quibus currit eadē cōparatio cum ipsis actibus, cum virtute supernaturalis & inquirimus, An vitium, siue habitus vitiosus opponatur cum virtute, siue habitu virtutis supernaturali? & postea examinabitur oppositio vitij, siue habitus vitiosi cum virtute, siue habitu virtutis naturali.

Est etiam in hac quæstione hoc valde nōrandum; Quod non est omnium sententia, quod habitus infusi supernaturales dent faciliē operari; Nā aliqui acerrimē sūstinent, quod habitus infusi supernaturales virtutū dant præcisē simpliciter posse elicere actus supernaturales. Hoc posito sit prima conclusio: Posito; quod habitus supernaturalis inclinat ad efficiendos actus, repugnat naturaliter habitus supernaturalis virtutis cum habitu vitioso. Nam repugnat, quod vnus, & idē habitus simul inclinet ad castitatem, & ad luxuriam v. g. & sic non potest concipi idē subiectum propensum simul ad castitatem, & ad luxuriam; vt esset, si posset habitus virtutis componi cum habitu vitij; nam cum omnes habitus ordinentur ad eam inclinationem causandam, quilibet habitus exigit, ne talis inclinatio impediatur per contrarium habitum; ergo habitus isti se inuicem excluderent, *Nota.* quod hæc quæstio procedit de habitibus intensis; nam de remissis nolo controuertere.

Dices; Non repugnat cognitio intensa delectabilitatis, quæ est in obiecto prohibito, & quæ allicit ad amandum illud obiectum, cum cognitione etiam intensa moralis malitiæ, quæ reperitur in eodem obiecto, & quæ retrahat ē contrario ab illo obiecto; ergo neque repugnabit habitus virtutis supernaturalis intensus cum habitu vitij etiam intenso. *Respond.* negando consequentiam; disparitas est, quia cognitiones istæ non pugnant ad inuicem; & sic non se excludunt ad inuicem; quia sicuti vna veritas non pugnat cum altera, neque vna cognitio cum alia; nam cognitiones solū petunt, vt declarent, quid sit in obiecto; ergo potius vna petit, vt detur altera, quā vt vna alteram expellat; habitus autem supernaturalis virtutis excludit, ob rationem dictam, habitum vitij; & sic non possunt ad inuicem componi.

Secunda conclusio: Si habitus supernaturales infusi non dant faciliē operari, sed præcisē dant simpliciter posse elicere eos actus, nullo modo opponuntur habitibus naturalibus vitiosis; potest enim homo, & de factō sic euenit, habere habitum naturalem intensum, amoris Dei v. g. & simul retinere | continentiam ad contrarium actum, id est ad odium; ergo a pari poterit

terit habitus supernaturalis virtutis, v.g. amoris, spei, &c. simul stare cum habitu naturali ad odium: antecedens est certum, consequentia patet, quia ideo potest habitus naturalis virtutis simul stare cum habitu vitij: quia posse amare, & esse inclinatum ad odium, non sunt conceptus contrarii: vnde habitus non tollit virtutem ad oppositum; sed etiam habitus supernaturales hanc virtutem non tollunt; ergo possunt habitus supernaturales, qui dant simpliciter potentiam ad eliciendos actus, simul componi cum habitibus naturalibus vitij: cum hoc nihil aliud importet, quam potentiam ad hos actus, & inclinationem ad oppositum: vnde videmus, quod peccator intensis habitibus vitiosis foedatus, cum convertitur: licet infundantur habitus supernaturales virtutum; non relinquit tamen inclinationem ad antiqua peccata; quod ostendit quod maneat antiqui habitus vitiosi cum novis supernaturalibus infusus.

Tertia conclusio, Actus vitiorum opponitur non per se, & immediate cum virtutibus naturalibus; sed solum mediate; quatenus actus vitiorum producant habitum vitij, immediate oppositum cum habitu virtutis; & actus virtutum producant habitum virtutis directè oppositum, cum habitu vitij: sumuntur autem habitus in primo sensu, pro ut scilicet inclinant ad eliciendos actus: vnde sicut actus repugnant inter se, ita & suo modo habitus ipsi: Conclusio hæc patet ex dictis, & sic cum isti effectus, & actus sint contrarii, & unus alterum impediat; ita & etiam habitus. *Est tamen* in hoc maximè notandum, impossibile esse, vitium esse oppositum virtuti supernaturali, quin etiam non opponatur virtuti naturali: & sic si amor v.g. supernaturalis Dei opponitur cum odio ipsius Dei; etiam odium Dei opponitur cum amore naturali ipsius Dei: non loquimur autem de actibus, qui correspondent habitibus supernaturalibus, pro ut habitus sumuntur per modum potentie, nam sicut isti habitus supernaturales infusi possunt simul esse, & componi cum vitio; ita etiam actus ipsi supernaturales. Concludimus ergo, quod non potest aliquis peccare contra virtutem supernaturalem, quin etiam peccet contra virtutem naturalem.

Non permanet in iustis post mortem pravi habitus; sed ad ingressum beatitudinis corrumpuntur: & probabilius videtur, quod nec etiam in Purgatorio perseuerent: permanent solum in damnatis, quinimò quotidie pravis actibus augentur. Insuper si aliqua sit comparatio inter vitium habituale, & peccatum actuale; est communis omnium sententia, Quod peccatum actuale sit vitio ipso deterius; nam nisi habitus prorumpat in actu, nemo iuste pro eo punitur, dicente D. P. N. August. *lib. de predest. SS. cap. 30. Nemo meretur, aut demeretur per id, quod facere potest, sed per id, quod facit,*

De Peccatis .

Est de Fide certum, & naturali lumine cognitum, dari peccata; quinimod est contra stolidos quotidiana experientia notum, nos quotidie labi in plura peccata: est satis nota, & apud omnes recepta definitio peccati, tradita à D. P. August. *tom. 6. lib. 22. contra Faustum.* nempe. *Peccatum est dictum, factum, vel concupitum contra legem æternam.* Ex hoc colligitur, quod peccatum siue sit ens positivum, siue negativum, de quo inferius, includit oppositionem cum Deo; quia est contra legem à Deo latam; & cum rationis dictamine: idem autem est esse contra legem æternam Dei, ut vult D. Tho: Caiet. & alij, ac esse contra rectam rationem; nam recta ratio est veluti quædam impressio, & participatio legis æternæ, quæ est in Deo: Ex hoc autem non sequitur, hominem sibi imponere legem per suum iudicium. Quia licet teneatur facere, quod iudicat faciendum esse; tenetur tamen iudicare, confirmando suum iudicium cum iudicio Dei, cuius participatio dicitur iudicium hominis; nam qui agit iuxta rectam rationem humanam, agit iuxta divinam, semper rectissimam, & qui operatur contra hanc, operatur etiam contra illam.

Malitia igitur formalis consistit in oppositione ad dictamen rationis; sicuti malitia obiectiva peccati est dissonantia quædam ad naturam rationalem, idest contra naturam rationalem; quia peccatum est malum morale, & quia illud, quod est malum homini, est contrarium illi; cum omne malum sit aduersum, & contrarium subiecto; vnde cum sit malum, quia defædans naturam rationalem, dicitur esse contra dictamen rationis. Nota tamen, quod hoc habet peccatum, etiam si nulla virtute positivum priuet; vnde claritatis gratia quærimus

Utrum peccatum consistat in positivo?

Examinanda hic est celebris illa quæstio, An malitia scilicet peccati sit aliquid privativum, an verò positivum? Quæstio autem præsens exagitur, meo iudicio, de peccato commissionis; nam circa peccatum puræ omissionis, quod admissi possibile, nulla potest esse quæstio, quod consistat in aliquo privativo; nam cum puræ omisso nihil positivum afferat, necesse est constituere eius malitiam, vel in aliquo privativo, vel negativo. Difficultas igitur solum restringitur ad peccata commissionis. Circa quæ versatur prima sententia, asserens, Peccatum commissionis, seu illius malitiam in solo privativo esse constituendam.

Secunda verò sententia docet, peccatum commissionis formaliter in positivo constitui. Deinde hanc sententiam Caietanus hic *vers. & si quæras absolute. & quæst. 22. art. 1.* cum maiori parte theologorum, præ-

cipue recentiorum : ideo hanc probabiliorē existimo : cum pro ea etiam stent plura SS.P. N. August. testimonia. Et primum occurrit illud *tract. imperfecto de Genesi ad Litteram cap. 1. nu. 3.* ubi definiens peccatum ait; *Non esse peccatum, nisi superbū libera voluntatis assensum; cum inclinamur ad ea, quę iustitia vetat :* ergo si per S.P. peccatum est assensus liberę voluntatis contra id, quod proponitur, ut iustitia vetitum, peccatum est aliquod positivum; nam liber assensus contra rationis dictamen non est aliquod priuativum, nec negativum; ergo est positivum. *Confirmat clarius hanc veritatem idem SS.P. & Patriarcha lib. 1. Retract. cap. 15. tom. 1. ubi ait. Peccatum esse factum, quod fieri non debuit. Et de perfectione Iustitię contra Cęlest. Ratiocinat. 4. ubi concedit Cęlestio: Peccatum dici, & esse actum, qui vitari potuit.* Quę testimonia clarissimę demonstrant peccatum, neque in priuativo, neque in negativo, sed solum in positivo consistere.

Circa mentem Angelici Pręceptoris non habetur aliquid firmum in hac re; cum sint eius testimonia ambigua, quamvis, qui Thomistarum nomen sibi volunt arrogare, putant se in hac sententia, sustinentes, peccatum consistere in priuativo, sequi S. Doctorem; quod si esset verum, libenter hanc opinionem rejicerem, & illorum sententię me subscriberem; sed in rei veritate potius video, S. Doctorem stare pro mea sententia; Nam in 1.2. *quest. 29.* agens de odio, videtur docere, quod peccatum etiam si sit malum respectivum, poterit in ratione aliqua positiva entis consistere: Verba S. Thomę sunt hæc. *Ens in quantum est hoc ens determinatum habet rationem repugnantis ad aliquod ens determinatum, & secundum hoc, unum ens est odibile alteri, & est malum; & si non in se, tamen per comparationem ad alterum.*

Probo igitur directę hanc conclusionem, peccatum in positivo consistere, hac evidenti ratione: Peccare, ut supra diximus, est facere contra legem, & rationis dictamen, & per consequens disconformari cum illo, & facere oppositum illi, quod dictamen, seu lex præscribit; sed facere oppositum illi, quod dictamen, seu lex præscribit, est facere actum; nam lex v.g. seu dictamen præscribens, non odio habendi Deum, præscribit carentiam, seu negationem odij; sed non ponere hanc negationem odij, est formalissimę ponere ipsum odium, seu actum odij; quia non esse negationis est actus; ergo qui ponit non esse negationis, ponit hunc actum; ergo transgressio huius legis consistit formalissimę in positiva productione odij vetiti. *Confirmatur*, Nam mala physica consistunt sæpę in positivo, videmus enim, quod dolor, & si non prius delectatione, est malus; similiter, & error est malus intellectui, non solum, quia prius scientia, sed per suammet entitatem positivam; ergo si malum physicum respectivum, seu alteri potest in positivo consistere; poterit etiam à fortiori malum morale, quod est respectivum formaliter, in positivo consistere: aliter eadem facilitate, qua Aduersarii probant, & asserunt malum

morale in priuatio consistere, eadem facilitate ego asseram, bonum physicum in priuatio etiam consistere: nam ideo Aduersarij negant, dolorem v.g. non consistere in positiuo, sed in priuatio; quia priuat voluptate; sed etiam voluptas priuat dolore; ergo si malum per Aduersarios consistit in priuatio, quia priuat voluptate; voluptas, quia priuat dolore, deberet etiam consistere in priuatio: & sic semper negabo, quod bonum debeat consistere in positiuo.

Hanc eandem doctrinam extendimus ad omissionem non puram, in qua scilicet intercedit actus aliquis positiuus, illam inducens; & dicimus, hanc omissionem, seu peccatum huiusmodi omissionis consistere etiam in positiuo. Omissio non pura, & libera, vt diximus in tract. de voluntario, & inuoluntario habetur, quando voluntas omittit v. g. sacrum per actum positiuum, nempe per volitionem positiuam, qua efficaciter dicit, *nolo audire sacrum*, seu *volo non audire*; vnde malitia istius volitionis positivæ non consistit præcisè in eo, quod me priuet volitione audiendi sacrum; sed in affectu positiuo ad obiectum prohibitum, qui affectus secundum positiuum, quod habet, est prohibitus. *Sentio* tamen hoc peccatum omissionis non puræ, dicendum esse peccatum puræ commissionis. Posito autem, quod possit dari pura ommissio libera, & peccaminosa; vt esset sola carentia v. g. volitionis audiendi sacri; malitiam eius consistere formaliter in priuatio, vt certum teneo, & supra insinuai.

Impugnant I. Aduersarij nostram confusionem multis SS. Patrum testimonijs, quibus videntur asserere malitiam peccati consistere in negatione; & præcipue testimonium S. Diophysij, qui 4. de diuinis nominibus concludit, Malum non esse aliquid eorum, quæ sunt. Respond. primò SS. PP. in illis locis intendisse impugnare Manichæos, admittentes naturas aliquas substantiales intrinsecè per se ipsas moraliter malas; contra quos asserunt, Quod nulla natura substantialis per se ipsam est mala. & sic licet SS. Patres vniuersaliter asserant, malitiam omnis naturæ consistere in negatione: non loquuntur de malitia nostrarum operationum; sed intelligunt per nomen, naturæ, substantialem tantum naturam. Sicuti quando asserunt, Peccatum esse nihil. Loquuntur de nihilo substantiali, quod est contra Manichæos. Hoc modo est etiam intelligendus D. Dionysius, quando dixit, malum non esse aliquid eorum, quæ sunt; id est, nulla substantia est mala: vel loquitur in genere physico, & in se; non autem in genere morali, & respectiuo.

Insurgunt II. SS. PP. & Theologi omnes dicunt; peccatum esse priuationem rectitudinis, priuationem gratiæ habitualis, &c. ergo signum est, quod peccatum in priuatio consistat. Respond. I. Quod SS. PP. & Theologi solum intelligunt explicare essentiam peccati per priuationem, tamquam per effectum, nobis magis notum; & sic solum voluerunt explicare inuitabilem connexionem, quam peccatum necessariò dicitur cum

cum priuatione rectitudinis actualis, gratiæ habitualis, &c. eodem modo, quo nos solemus explicare negationem per conceptum positium, & positium per conceptum negatiuum, v.g. carentiam visus per cecum, & vestitum per nudum; ergo à pari benè potest explicari disconformitas ad rationem, quæ est aliquod positium, per negationem conformitatis, & consequenter malitia peccati, per priuationem rectitudinis, quantumvis ipsa irrectitudo sit positua. *Respond. II.* Quod priuatio gratiæ non est ipsa essentia peccati; sed est pœna peccati: insuper potest assignari casus, in quo habeatur peccatum, & non priuatio gratiæ; nam in pura natura, vbi homo non esset eleuatus ad gratiam, posset peccare; & tamen non esset tunc priuatio gratiæ.

Insurgunt III. Peccatū puræ omissionis liberè cōsistit in priuatiuo; ergo etiā peccatū cōmissionis; antecedens est certum ex supradictis, consequentia patet; quia peccatum omissionis, & cōmissionis vniuocè conueniunt. *Respond.* negando consequentiam, quæ si benè inferretur ex conuenientia vniuoca, possem etiam ego benè inferre, quod virtus, & peccatum debeant consistere, vel ambo in priuatiuo, vel in posituiuo; nam virtus, & peccatum vniuocè conueniunt in ratione actus moralis. Conueniunt igitur peccatum omissionis, & cōmissionis vniuocè solū in genere moris, scđ moraliter; quatenus ambo opponuntur legi, & Deum offendunt, &c. non autem conueniunt in genere physico; & idē rectè negatur consequentia.

Insurgunt IV. Omnis malitia doloris, & tristitiæ consistit in priuatione; nam tristitia priuat delectatione, quam percipit homo de carentia mali; ergo etiam peccatum. *Respōsio* huius argumenti patet ex supradictis: solū hic addo, Quod tristitia, & dolor, seclusa quacumque priuatione, sunt mala, & disconuenientia subiecto; quia per se ipsa affligunt naturam; experimur enim, quod quando aliquis verberatur, non dolet de voluptate, qua caret, cuius non recordatur; sed de malo posituiuo, quod patitur; & sic ex falsitate antecedentis patet falsitas consequentia.

Insurgunt V. Positium hoc, in quo consistit peccatum, scđ actus ille disconformitatis, cum sit ens, est aliquod bonum; ergo in se non potest esse malum, & consequenter neque alteri; nam quod in se est bonum, alteri malum esse non potest. *Resp.* Vnde nam colligunt Aduersarij, quod actus ille, qui in se est physice bonus, quatenus est ens, non posse ratione posituiui, quod includit, esse malum alteri, non solū physice, sed etiam moraliter? error enim in scientia, & dolor in se sunt physice bona; & tamen nulli subiecto sunt physice bona; ergo idem etiam est dicendum de malo morali.

Malitia igitur per nos consistit in substantia positua illius actus, & circumstantijs omnibus requisitis ex parte intellectus, & voluntatis. Ex hoc autem non sequitur, quod sicut actus denominatur malus; ita etiam

debeant denominari malæ cogitationes ; quia actus est conformandus cum cogitationibus ; non autem cogitationes cum actu : vnde vltima ratio disconformitatis est actus.

Nota hic I. Quod malè ab aliquibus infertur contrà hanc sententiam, Deum esse causam peccati ; cum sit causa omnis entitatis positivæ, quæ in actu reperitur ; Nam si hoc esset verum, sequeretur, quod Aduersarij, qui sustinent malitiam consistere in priuatione afficiente actum, deberet concedere , quod Deus, qui est causa actus, esset causa illius priuationis, & cõsequenter peccati. *Peccatum* igitur est solum imputandũ principio, quod est causa actus ; & cum Deus non sit, neq; esse possit causa actus, neq; esse poterit causa peccati. Nota II. Ad soluenda plura argumenta, Quod aliquando conformitas ad legem est quid positivum, v. g. quando lex præcipit esse audiendum sacrum ; aliquando verò conformitas ista ad legem est quid priuativum, seu negativum ; vt cum lex dicit, non fureris ; nam ipsum non furari, quod est aliquod negativum, est conformari legi. Quando igitur aliquis peccat, ponit vtrique carentiam huius conformitatis ; sed carentia huius conformitatis est quid positivum ; quia carentia priuationis est quid positivum ; ergo qui non ponit hanc conformitatem, quæ est aliquod negativum, seu priuativum, ponit carentiam priuationis, quod est ponere aliquod positivum.

Nota III. Quod minùs consequenter loquitur, qui dicit, malitiam consistere in hoc, quod priuet voluntatem actu bono, casu, quo operari voluisset circa obiectum. Nam voluntas non tenetur, hic, & nunc efficere actum bonum. *Nec valet* dicere, teneri facia suppositione, quod velit operari. Quia sequeretur, quod dato, quod voluisset homo operari circa Deum v. g. non fuisset obligatus ad eliciendum amorem Dei ; poterat enim dicere ; *Nolo neque odio habere Deum, neque amare ; quia volo me studijs occupare* : vnde constat talem priuationem non posse constituere malitiam.

Neque etiam bene loquitur, qui constituit malitiam moralem in se, seu absolutam in priuatio, & malitiam moralem respectivam, seu in ordine ad subiectum in positivo : Nam actus edij v. g. non est moraliter malus, nisi respectu ad hominem ; ergo malè distinguitur in genere moris malitia in se à malitia respectivè ad alium : ultra quam quod hoc est, quod nos inquirimus ; vt scilicet concedant, quod malitia respectiva consistat in positivo.

Neque audiendi sunt, qui distinguunt malitiam in radicalem, & proximam, constituunt radicalem in positivo, & proximam in priuatio, dicentes, Quod malitia radicalis est actus ; proxima, & formalis est priuatio actus. *Sequeretur* enim ex hoc, Quod actus aliquis non haberet aliam malitiam, nisi quatenus priuat hac, vel illa volitione, bona, vel mala ; ergo si aliquis non apponeret circa aliquod obiectum, nisi finem venialiter malum, vt esset, si diceret, *nolo v. g. furari ob vanam gloriam,*

per actum posset satisfieri præcepto non furandi; ergo è contrario volitio positiua furandi non habebit aliam malitiam, quàm vanæ gloriæ; quia solum priuat voluntatem volitione illa mala ob vanam gloriam: & sic furtum non erit contra virtutem iustitiæ; quæ quanta sint absurda, vnusquisque cognoscit. *Addo* quòd malitia moralis proxima debet esse libera; sed illa priuario, quæ sequitur per Aduersarios, non est immediatè in se libera, sed in actu positiuo; ergo, &c. *Excludimus* denique omnes alios modos, quibus Doctores malitiam explicant; nisi dicant ipsam formalissimè constitui per entitatem positiuam, seu per actum, disconuenientem rectè rationi, & legi, connotantem cognitionem, &c. ita vt malitia dicat in recto ipsum actum disconformitatis, & in obliquo cogitationes, & reliqua libertatis principia. *Et sic frustra*, defatigatur etiam Pater Vittoria celebris Thomista, asserens peccatum, secundum rationem genericam dicere priuationem, & secundum specificam importare formalitatem positiuam: I. Quia genus priuatiuum semper contrahitur per differentiam priuatiuam. II. Genus, & differentia identificantur; positiuum autem, & negatiuum identificari non possunt. III. Repugnat in terminis, quòd rationi genericæ, vt sic, debeat utriusque aliquid; quod non debeat utriusque omnino speciebus. *Facile* etiam respondetur instantiæ alterius Thomistæ, asserentis, Peccatum esse quid positiuum includens, & imbibens in se priuationem. *Nam* nihil positiuum potest in se priuationem includere; & licet conceptus positiui aliquando explicentur per negationes; sunt solè nomine negationes, non in re; nam semper formalitatem positiuam includunt.

Utrum ad peccatum requiratur expressa cognitio Dei offensi?

CUm sit certum de Fide, peccatum esse offensam contra Deum; op-
ponitur enim cum lege diuina, eo præcisè, quòd sit contra ratio-
nem: *Quæritur* à nonnullis, an ad peccatum mortale, & ad hoc, vt actus
sit malus, & dignus pœna æterna, requiratur expressa notitia Dei offen-
si, seu oppositionis cum voluntate diuina? an verò sufficiat cognitio op-
positionis ad naturam rationalem, in qua includitur oppositio cum vo-
luntate diuina, quamuis de reliquo quis inuincibiliter ignoret Deum
existere. *Respond.* I. Quòd quamuis ignorantia hæc inuincibilis circa Dei
existentiam existimetur moraliter impossibilis; illa tan en admissa, sen-
tio contra nonnullos, Quòd ad hoc, vt actus sit malus, sufficit sola co-
gnitio oppositionis ad naturam rationalem, & non requiritur expressa
illa notitia oppositionis cum voluntate diuina: & sic in omni peccato
reperitur offensa Dei, etiam si quis inuincibiliter ignoret Deum existere.
Ratio est, quia seclusa Dei notitia, homo, qui rationalis est, non opera-
ri debet contra dictum men rationis; ergo si operatur contra illud in ma-
teria

teria graui, eo præcisè grauitèr peccabit; quia sic operatur. II. Posito, quòd hæc Dei ignorantia inuincibilis pro aliquo breui tempore non repugnet; si esset vera contraria sententia, sequeretur, quòd homo, qui committeret v. g. adulterium, solùm cum plena notitia iniustitiæ factæ proximo, & sine aduertentia ad Deum offensum, nõ peccaret lethali-ter. *Non hego* tamen, quòd quando peccatum fit cum cognitione Dei, tunc maiorem esse iniuriam; hæc autem circumstantia non mutat speciem, sicut nec etiam ingratitudo, & inobedientia generalis, quæ in omnibus peccatis reperitur: & sicut malitiæ, quæ sunt communes omni peccato, vt sunt inobedientia, violatio amicitiae Dei, iniustitia, ingratitudo, &c. non sunt necessariò explicandæ in confessione, nisi peccatum specialiter vnâ, aut alteram ex ijs malitijs contineat; sic etiam nec illa circumstantia cognitionis Dei.

Nota, Quòd licet verum sit, quòd per peccatum mortale creatura ametur supra Deum; non sequitur ex hoc, quòd debeat dari in peccato expressa cognitio Dei; Nam quando peccator peccat, non comparat expressè, & formaliter Deum cum creatura, nec creaturam cum Deo; sed solùm virtualiter, & implicite, quia in actu exercito amat id, quod Deo displicet, & quod à Deo auertit.

Fuit Stoicorũ error, cui adhæsit Iouinianus, vt videre est apud S. P. N. August. *Ep. st. 19.* omnia peccata esse æqualia: Contrarium docet Ecclesia Catholica, & pro ea stant plura testimonia sacræ Script. vt Ioan. 19. vbi Christus dixit Pilato, *Propterea, qui me tradidit tibi, maius peccatum habet.* Pauli 1. ad Corin. 5. *Audiuir inter vos fornicatio, qualis nec inter gentes.* & multa alia loca id demonstrant: sicuti igitur, (vt est certum) in meritis est inæqualitas; sic etiam, & in demeritis.

In nostra sententia, quæ constituit peccatum in positiuo, nimirum in dissonantia ad rationem; clarissimè explicatur, quo pacto vnum peccatum sit grauius altero: cum enim in distinctis actionibus reperiatur maior, vel minor dissonantia; erit consequenter vnum peccatum grauius altero: vnde maior dissonantia reperitur in eo, quòd aliquis contumelijs afficit Deum, quàm qui hominem lædit iniurijs: & licet in obiecto indiuisibili non sit maior, vel minor disconformatio; vt esset in præcepto de non recipienda Eucharistia sumpto cibo, cuius obiectum esset vsus Sacramenti, qui est indiuisibilis; & ita non magis in hoc casu transgreditur præceptum, qui recipit post duas comestiones Eucharistiam, quàm qui post vnâ: quidquid sit, an ex circumstantia crapulæ dicatur maior transgressio, quasi intensiue, non verò extensiue. *In obiecto* autem diuisibili, vt esset v. g. præceptum de omnimoda abstinentia carniũ; quia potest dari conformatio circa vnâ partem, & non circa aliam, quidquid harum editur, est disconformatio cum præcepto; & quia aliquis potest magis, minusque comedere; poterit consequenter magis, minusque disconformati.

De Diuisionibus peccatorum.

Circa diuisionem peccatorum solet in præsentem diuidi peccatū actuale, de habituali non quærimus, cum sit idem peccatum actuale moraliter permanens, in peccatum commissionis, & omissionis. Solent peccata commissionis, vel omissionis sumi, vel quatenus vnum opponitur præcepto positiuo, & alterum negatiuo, qua ratione inter se differunt, vt est certum; Vel quatenus vnum committitur per actionem positiuam, & alterum per puram negationem actus: sicuti furari, & non restituere, quæ eidem præcepto negatiuo opponuntur; & sic furtum dicit positiuam actionem, non restitutio negationem actionis. Facilius inter se dignoscetur distinctio specifica omissionum ex actibus, seu bonitatibus, quibus priuatiuè opponuntur; nam sicuti actus v.g. amoris proximi, & religionis, illius bonitates specie distinguuntur, sic eorum etiam omissiones necesse est, vt specie distinguantur.

Nota, I. Quod est aliquantulum grauius peccatum omittere per actum positiuum, directè volentem omissionem; vt esset, si quis diceret, *volo studere eo tempore, quo sacrum est audiendum*, quàm per puram omissionem, seu purè omittens præceptum; quia illud, quod fit per actum positiuum, est maius voluntarium, quàm quod fit per solam omissionem; Nam quod est maius voluntarium, arguit maius exercitium libertatis in actu secundo, cæteris paribus; quinimò ipsa voluntas magis coniungitur obiecto malo per eam volitionem, quàm per omissionem. Vnde colligitur, quod in tali omissione sacri, tunc committitur peccatum, quando voluntas voluit v.g. primò non audire; non autem quando postea celebratur vltimum sacrum; nam culpa propriè tunc est, quando ponitur actus liber de obiecto malo.

Nota II. Quod inter peccata omissionis dantur aliqua, quæ sunt directè volita; vt esset, quando quis diceret, *Nolo v.g. audire sacrum*, & alia, quæ sunt indirectè volita; vt cum quis vult studium, ex quo videtur sequeturam omissionem sacri: comparando igitur ista peccata omissionis inter se: *Puto*, cæteris paribus, Quod omissio directè volita, est grauior, quàm omissio volita indirectè; cum sit magis voluntarium directum, quàm indirectum; si verò sit comparatio inter ipsa peccata commissionis, & omissionis, quæ versantur circa diuersas virtutes, v.g. circa odium Dei, & omissionem sacri; distinguuntur specie hæc peccata ex diuersitate virtutum, quibus opponuntur; vt est certum: circa ea verò, quæ opponuntur eidem virtuti, qualia sunt non amare Deum, & odio habere ipsum Deum: *Puto* dicendum cum communi sententia, Non solum ea differre physicè, seu materialiter; sed etiam differre saltem specie acoma in genere moris, seu mali: quis enim non videt, longè gra-

gravius esse ipsum odium Dei positivum, quàm non amare illum urgente præcepto ?

De Distinctione specifica, & numerica peccatorum.

LOquimur primò de peccatis omissionis; & petimus, Quomodo distinguantur peccata omissionis inter se? Sunt aliqui, qui putant, quòd distinctio specifica peccatorum omissionis desumitur ex distinctione specifica virtutum, quibus opponuntur: *Puto* tamen ego, non posse distinctionem specificam peccatorum adæquatè desumi ex distinctione virtutum; nam si valeret inferre distinctionem specificam peccatorum, omissionis ex distinctione specifica virtutum, quibus opponuntur: valeret etiam inferre unitatem specificam peccatorum ex unitate specifica virtutum, quibus opponuntur; sed ex unitate specifica virtutum non valet inferri unitas specifica peccatorum; nam non valet, peccata opponuntur eidem virtuti secundum speciem infimam; ergo sunt eiusdem speciei; quia periurium, & idolatria opponuntur eidem virtuti religionis; sicuti furtum, & honoris detractio eidem virtuti iustitiæ, & tamen inter se differunt specie. *Scio*, quòd respondebis; Hæc peccata specie differre, quia opponuntur diverso modo his virtutibus, Ergo iam recutris pro diversitate specifica ad aliud caput, nempe ad diversum modum attingendi obiectum, & non amplius ad virtutem.

Ex hoc probabilius censeo, Distinctionem specificam peccatorum commissionis; de his enim est sermo in præsentī; desumendam esse per ordinem ad præcepta specie distincta, quibus opponuntur, aut à diversitate obiecti formalis, seu motui attingendi obiectum formale, ex quo sumitur diversitas specifica præceptorum. *Suppono* autem in præsentī, quòd dantur aliquæ actiones externæ, intrinsecè pertinentes ad determinatam virtutem; ut actus iustitiæ, temperantiæ, &c. quæ apud omnes gentes, & nationes manent idem: hæc autem actiones possunt præcipi intuitu illius virtutis, ad quam conducunt: in hoc casu, si Legislator non intelligit per suum præceptum inducere novam obligationem, nisi solum præcipere eam virtutem, non constituitur res præcepta in duplici specie; & consequenter eius transgressio non esset futura duplex peccatum, vnum contra præceptum naturale, & aliud positivum contra legislatorem; sed tantum vnum peccatum contra præceptum naturale; esset tamen duplex peccatum, si legislator intenderet inducere novam obligationem, & velit suo præcepto magis ad eam virtutem cogere; ut esset transgressio cuiuscumque præcepti formalis, facta à religioso, quæ contrahit duplicem malitiam, una contra virtutem, ad quam pertinet illius materia, & alia contra votum observandi regulam.

Suppono II. Quòd sunt aliæ actiones externæ, quæ non habent intrin-

insecè, & per se honestatem talis virtutis, sed solum ex libera hominum impositione habent rationem obiectiuam honesti; sic se habent æquus cultus, & religionis erga Deum, obseruantia erga Sanctos, &c. Nam, communis vsus, consuetudo, & Principum decreta possunt statuere, qualis honor, & cultus Deo, & hominibus sit deferendus; ita vt non cui-cumque liceat actiones, quas maluerit ad hunc finem assumere. Circa has actiones externas ex se decentes fert communis opinio, quod Ecclesia potest illas liberè præcipere intuitu religionis tantum, non temperantia, iustitia, &c. vel quia actus isti ex se, & ex sua natura pertinent ad determinatas virtutes; Non enim implicat, rem alioquin optimam, posse præceptum illam reddere malam; & sic circa transgressionem huius præcepti est regulandum modo supradicto.

Quando verò non constat ex circumstantijs, aut verbis præcepti, quod res præcipiatur intuitu huius, vel alterius virtutis, iudicandum est, præcipi intuitu illius virtutis, ad quam intrinsecè pertinet res præcepta: Si autem Prælatus materiam præceptam constituit, supposito semper, quod habeat præcipiendi iurisdictionem; si ille, qui transgreditur, est religiosus, commi teret peccatum contra illam virtutem, & aliud contra religionem ratione voti emissi: loquimur autem in sensu, quo Prælatus intendit inducere nouam obligationem per suum præceptum.

Colliges I. Ex his, Quod præceptum v.g. non comedendi lacticia in diebus Quadragesimalibus, differt specie à præcepto non comedendi carnes eisdem diebus; quia respiciunt materiam notabiliter differentem; quamuis sint, & versentur circa eandem virtutem: & sic transgressio horum præceptorum fundat malitiam specie differentem, & distinctionem, necessariò in confessione explicandam; obiecta autem ista notabiliter differentia, quorum transgressionem fundat malitias specie distinctas; puto esse potius dicenda obiecta formalia, ex vi quorum præcepta, illa, & transgressionem horum præceptorum pertinent ad hanc certam, & determinatam speciem. *Distinctum* igitur peccatum in specie committit, qui comedit carnes tempore quadragesimali ab eo, qui lacticia tantum comedit; vnde est necessariò explicanda qualitas cibi; cum hoc tamen discrimine, quod qui simul comedit carnes, & lacticia, non est necessarium explicare se lacticia comedis, sed sufficit explicare comestionem carnum; nam præceptum abstinendi à lacticijs est accessorium præcepto non comedendi carnes; ablato autem principali, auferretur etiam accessorium; non vero è contra.

Colliges II. Quod quoties præcepta specie distincta respiciunt duplex motuum formale, & obiectum materiale specie distinctum; vt esset præceptum se continendi, & præceptum iustitiæ; violatio vtriusq; præcepti eandem rem prohibentis, constituit malitiam specie distinctam; sic qui fornicatur cum coniugata peccat duplici peccato, vno contra castitatem, & alio contra iustitiam: si verò, nec motiua formalia, nec

obiecta differunt specie, præcepta non contrahunt malitiam specie distinctam; vt esset, si quis omitteret ieiunium in die, quo occurrunt duo præcepta ieiunandi, v.g. vigilia alicuius Sancti, & dies quadragesimæ.

Loquuti sumus vsque adhuc de distinctione specifica peccatorum, nunc autem breuiter tractabitur de distinctione numerica illorum. Communis Theologorum sententia vult, Peccata multiplicari numero, primo per actuum interruptionem: censent autem, quod non quæcumque temporis interruptio potest actum discontinuare; sed quando intercedit notabilis temporis interruptio; quod est iudicandum ex circumstantijs extrinsecis: Loquimur autem in presenti de peccatis, quæ consumantur interius, vt esset odium Dei, inuidia, iudicium temerarium, &c. Quando igitur intercedit in actibus notabilis temporis interruptio, censentur duo peccata; quia illæ volitiones hoc modo interruptæ non coniunguntur in vnum, cum interueniat illa moralis inter illas; ergo censi debent absolute duo peccata completa: *Est qui putat*, quod circa hæc peccata interius consummata, interruptio quadrantis est sufficiens ad moralem discontinuationem actuum.

Hoc idem sentio dicendum circa peccata exterius consummata, dummodo peccata in effectu non permanent; si verò aliquo modo permanent in effectu; vt esset, si quis decreuit inimicum occidere, & cum hac intentione surgeret è lecto, arriperet gladium, descenderet ad plateam, vel per viam transiturum expectat; quantumvis repetat intentionem occidendi, & fuerit distractus in ipso exteriori opere; tantum reputatur oraliter vnus actus, & vnum tantum esset peccatum; nam omnes illæ actiones externæ censentur vnum quid, & connectuntur, veluti in vnum, illas volitiones interiores: Si verò illa voluntas fuerit retractata, vel interrupta magna distractione; censetur secundum peccatum committere, & sic successiue.

Censetur probabiliter, quod circa peccata omissionis affectus continuatur moraliter in ipsa omissione toto tempore apto ad adimplentionem præcepti, non verò in omissione habita ante hoc tempus: v.g. si quis decreuit primo mane officium omittere, quod debebat recitare; etiamsi sæpè vsque ad mediam noctem repetat eundem actum, tantum committit vnum omissionis peccatum, Si verò hodie decerneret cras, vel post duos dies omittere officium diuinum, toties peccaret, quoties propositum hoc repeteret ante tempus aptum ad præceptum adimplendum; quia ante illud non incipiebat executio peccati: idem dico de quacumque omissione operis intra certum tempus exequendi.

Aliud caput, ex quo desumitur multiplicatio numerica peccatorum, est multiplicatio obiectorum: & sic in hac sententia, quam probabiliter existimo, peccata numero multiplicantur, quoties multiplicantur obiecta: vnde si aliquis eodem actu decerneret quatuor v.g. fornicationes committere, in tres personas maledicta iniicere, tot peccatis numero distinctis pec-

peccare; & ita tenetur explicare in confessione numerum personarum, quæ sunt obiecta, circa quæ actus versantur. Loquimur autem de obiectis, quæ non habent inter se aliquam vnionem moralem; nam circa obiecta, quæ habent eam vnionem, esset tantum vnum numero peccatum; vt esset, si quis pluribus Eucharistiæ Sacramentum porrigit in culpa læthali, vel sub eodem iuramento plures articulos falsò per iuraret; quia materia peccati est in primo casu administratio vnius conuiuij, in secundo est vna tantum assertio: si verò aliquis rem, vnam iuramento falso firmaret, & immediatè aliam alio iuramento, duplex committeret peccatum; quia illæ assertiones sunt distinctæ, & quælibet est adæquata in suo genere, nec vniri possunt inter se.

De reliquis peccatorum diuisionibus.

Diuiduntur secundò peccata actualia per D. Thom. & Theologos, in peccata carnalia, & spiritualia: nomine peccati carnalis latè sumpti venit omnis defectus rationis humanæ, qui initium habet aliquo modo ex sensu carnali; vel vt aliqui volunt, quòd circa materiam corporalem externam versatur: strictius autem peccatum carnale sumitur pro luxuria, & pro eo quòd delectationem carnis secum affert, & corporis tactu consumatur; vt est gula. Peccata verò spiritualia sunt illa, quæ magis ad spiritum, seu animam, quàm ad corpus pertinent. Cæteris paribus peccata spiritualia esse grauiora corporalibus vult D. Tho: *quæst. 73. art. 5.* & D. Gregorius; quia bona spiritualia sunt maiora, quàm corporalia.

Tertiò, diuidi solent peccata, in ea, quæ sunt cordis, oris, & operis; per peccatum cordis solet accipi primò id, quod interius consumatur; vt est odium, inobedientia, hæresis, &c. per peccatum oris illud, quod loquutione perficitur; vt mendacium, detractio, & contumelia; per peccatum operis illud, quod opere completur; vt furtum, adulterium, vel homicidium. *Secundò*, accipi solet hæc diuisio alio modo, taliter; vt habeatur peccatum cordis, quando primò concipitur animus peccandi, etiam per peccatum externum; habetur peccatum oris, si idem animus peccandi verbis propalatur; habetur denique peccatum operis, idest opere consumatum, cum internus animus in externum opus erumpit: quando hæc tria peccata in vno opere concurrunt, sola operis consumatio est in confessione aperienda; satis enim, superque intelligitur cum aliquis de adulterio se accusat, & illud voluisse, & hanc voluntatem verbis propalasse.

Quartò, diuiduntur peccata, in ea, quæ sunt contra Deum, contra se ipsum, & contra proximum; quia vitijs virtutibus oppositis, vel Deum, vel nosmetipsos, vel proximos offendimus. Et sic peccata in Deum

sunt, quæ opponuntur virtutibus ad Deum ordinatis; ut sunt virtutes Theologales, insuper religio, & pœnitentia. Peccata contra proximum, sunt, quæ opponuntur virtutibus ad proximum ordinatis; ut sunt iustitia, pietas, & misericordia. Peccata denique contra se ipsum appellantur, quæ opponuntur virtutibus ordinatis ad ipsum operantem, ut sunt continentia, & temperantia. Vndè licet omnia, & singula peccata sint contra Deum, à quo auertunt; attamen in nonnullis eminet magis iniuria Dei, in alijs nocumentum proprium, & in alijs damnum proximi; tum ratione obiecti, quod respiciunt, tum ratione virtutum, quibus aduersantur.

Quintò, datur aliud genus diuisionis, & est, peccatum ex ignorantia, ex fragilitate, & ex malitia: peccare ex ignorantia dicitur ille, qui peccat ratione ignorantie vincibilis, iuris, vel facti; peccare ex fragilitate dicitur ille, qui peccat incitatus vehementi passione, quæ est infirmitas, & fragilitas quædam animæ: peccat denique ex malitia ille, qui ex pura voluntatis libertate delinquit. *Additur etiam aliud genus peccati, nempe commissiois, & omissionis, de quo plura diximus in tract. de Actibus humanis.*

Sextò, alia peccata sunt capitalia, alia consecuta. Dicitur peccatum capitale, non solum quia est principium aliorum, sed etiam directiuum, & ductiuum eorum: vndè ex eis frequentius alia peccata oriuntur: peccata capitalia septem dicuntur esse, nempe Superbia, Auaritia, Luxuria, Gula, Acedia, Ira, & Inuidia. Peccata consecuta sunt veluti germina iniquitatis nata, & consecuta è radicibus illis.

Septimò, peccatum aliud est Actuale, aliud Habituale, aliud Originale. Peccatum Actuale est ipsum peccatum actualiter commissum, & patratum cum libertate propria adulti. Peccatum Habituale, est ipsum actuale peccatum physicè præteritum; moralitertamen permanens; in quantum illud, in quo est tota malitia, & totum obiectum displicentiæ, & odij Dei moralitèr permanet in obligatione satisfaciendi, quam inducit: & sic vno verbo, peccatum Habituale erit actio præterita, & obligatio satisfaciendi. Peccatum denique Originale est illud, quod à Protoparentibus per generationem in posteros transfunditur.

Vltima, & celebris diuisio peccati, est in peccatum Mortale, & Veniale; hæc quidem diuisio ad omnes materias se extendit; nam in omnibus habet locum malitia grauis, & leuis, vndequeque ea proueniat. Est veritas inter omnes Catholicos omninò certa, ac definita in Tridentino sess. 8. cap. 1. 1. & 13. dari de facto aliqua peccata mortalia, quæ merentur pœnam æternam; aliqua verò solum venialia, quæ non puniuntur pœna æterna. Peccata venialia colligit SS. P. August. ex illo 1. Ioannis 1. *Si diximus, quoniam peccatum non habemus, ipsi nos seducimus*; & D. Hieronymus ex illo Proverb. 27. deducit. *Septies in die cadet iustus, & resurget. Esce autem aliqua mortalia, patet ex illo 1. Ioannis 3. Qui non diligit, ma-*

net in morte. Et ex illo *Ezech. 18.* *Anima, qua peccauerit, ipsa morietur:* hæc enim sunt certa. *Solum* est maxima difficultas, & controuersia inter Theologos, in explicanda differentia propria, per se, & essentiali peccari mortalis à veniali, quod est idem, ac inquirere; Quodnam sit constitutiuum formale, ex vi cuius differant peccatum mortale, & veniale?

Quodnam sit discrimen inter peccatum Mortale, & Veniale?

CEnseo cum Angelico Præceptore, differentiam constitutiuam, & essentialiam peccati mortalis, & venialis non melius explicari, quam per auersionem affectiuam, per quam homo per peccatum mortale auertitur ab ultimo fine, & dicitur magis velle creaturam, quam Deum. Vnde differt formaliter peccatum mortale à veniali per differentias constitutiuas, per hoc, quod peccatum mortale dicit duo, nempe affectum ad creaturam, & auersionem affectiuam à Deo, saltem virtualiter, & implicite; veniale verò dicit affectum ad creaturam, sine hac auersione à Deo. *Probat*ur breuiter conclusio; Nam illud est constitutiuum peccati mortalis, & venialis, & ex vi cuius inter se differunt, quod primò concipitur in ipsis, & ex quo reliqua oriuntur; sed illud, quod primò concipitur in peccato mortali, est affectus ad creaturam, cum implicita, & virtuali auersione affectiua à Deo; & illud, quod concipitur in peccato veniali, est solum affectus ad creaturam; & ex hoc reliquæ oriuntur; ergo non melius explicatur differentia essentialis, & intrinseca peccati mortalis, & venialis, quam per talem auersionem; nam non melius explicari potest rerum essentia, quam per ordinem ad ea, quæ sunt omnino intrinseca; & cum hæc prædicata sint omnino intrinseca, & aliz differentię assignatę ab alijs sint per ordinem ad extrinseca, vt constabit; ergo &c.

Nota I. Quod talis auersio, in qua nos constitutiuum ponimus peccati mortalis, est auersio affectiua; hæc differt ab auersione effectiua; nam per auersionem affectiuam, intelligimus illam, per quam homo virtualiter saltem, & implicite magis vult creaturam, quam Deum; per auersionem autem effectiuam intelligimus illam, per quam homo auertitur ab ultimo fine, media expulsionem gratiæ: & sic respicit, tamquam effectum, expulsionem gratiæ habitualis; & cum talis expulsio sit effectus secundarius; ideo non ponimus constitutiuum peccati, (quod debet esse prima ratio) nisi in tali auersione affectiua, *Nota II.* Quod nos vsque adhuc assignauimus differentiam propriam constitutiuam peccati mortalis, & venialis; de reliquo non negamus, plures alias differentias intercedere inter peccatum mortale, & veniale; licet non sint constitutiuæ; & prima est, quod peccatum mortale tollit ordinem ad ultimum finem; quia per ipsum constituitur creatura à peccatore, tamquam ultimus finis sui, & conuertitur per ipsum peccator ad creaturam, & auertitur à Crea-

tore;

tores; per peccatum autem veniale commissum non ita conuertitur peccator ad creaturam, vt auertatur à Deo. Secunda differentia est, quòd peccatum mortale conuellit omne principium intrinsecum vite spiritalis, quod non tollit peccatum veniale. Tertia, quia peccatum mortale est dignum pœna æterna; peccatum verò veniale pœna temporali. Quarta, quia peccatum mortale est contra præcepta necessaria ad salutem; peccatum verò veniale est contra præcepta, non ita necessaria ad salutem.

Colliges I. contra Scotum, Non differre peccatum mortale à veniali, nec eius essentiam desumendam esse, ex hoc, quòd peccatum veniale sit contra consilia, & peccatum mortale contra præcepta; Nam qui tantum operatur contra consilium, nullum peccatum veniale committit; Quis enim diceret, peccare venialiter, per hoc, quòd aliquis vellet ducere uxorem? vel ille, qui diceret, *Nolo religionem ingredi*: è contrario neque etiam est peccatum mortale facere absolute contra præceptum rem aliquam; nam qui furatur materiam leuem, verè facit contra præceptum, non furandi, & non peccat mortaliter.

Colliges II. Nec esse constitutum peccati mortalis, per quòd distinguitur à veniali, illud, quod aliqui sustinent, nempe, quòd mortale sit contra legem, & veniale præter legem; Nam opera consilij sunt præter legem: cum ex vi illius non præcipiantur, nec prohibeantur; & tamen non sunt peccata venialia; sicut etiam quod libet opus indifferens est præter præceptum; & tamen qui facit illud, non peccat venialiter. Insuper datur aliquod, quod sit contra legem; & tamen nõ est peccatum mortale: sicut est iuramentum, licet verum, sed sine necessitate factum, quod est contra legem Matth. 5. *Ego autem dico vobis non iurare omnino*, (hoc est sine veritate, iustitia, & necessitate;) & tamen est veniale. III. Neque consequenter loquuntur, qui dicunt, differre, per hoc; quòd peccatum mortale sit offensa Dei; veniale verò minimè: Nam peccatum veniale est etiam offensa Dei; vel saltem debent explicare, quomodo peccatum veniale, cum non sit offensa Dei, sit tamen verè peccatum. Non melius igitur explicari potest differentia constitutiva, & distinctiva peccati mortalis à veniali, quam per auersionem illam affectiuam supra assignatam:

Nota, si quis diceret, Peccatum mortale constitui, & distingui essentialiter à veniali, per hoc, quòd peccatum mortale sit malum grane, & grauis offensa Dei, & veniale leue: Censeo hanc sententiam esse amplectendam; quia non differt secundum aliquam formalitatem à nostra, sed solum in modo significandi; Nam ideo per hos authores peccatum mortale dicitur malum graue, & grauis offensa Dei; quia dicit auersionem affectiuam à Deo, & recessum ab illo, tamquam ab ultimo fine, & conuersionem ad creaturam; peccatum verò veniale dicitur malum leue; quia quantumvis dicat affectum ad creaturam; non dicit tamen auersionem

nem à Deo: & sic per hanc sententiam facilius explicatur differentia inter peccatum mortale, & veniale.

Petes, An peccatū mortale, & veniale conueniant vniuocè, & differant accidentaliter? an verò conueniant analogicè, & differant essentialiter, seu specificè? *Respond.* Si peccatum mortale, & veniale considerantur metaphysicè, conueniunt vniuocè in ratione peccati; & differunt tantum accidentaliter; idest penes magis, & minus: & sic quia malitia per nos consistit in dissonantia ad naturam rationalem, seu in oppositione ad legem, differunt peccatum mortale, & veniale, per maiorem, & minorem dissonantiam ad naturam rationalem: Hæc autem maior, vel minor dissonantia explicatur implicitè in graui, vel leui offensa, per quam, supra diximus, differre peccatum mortale à veniali; & cum grauis, & leuis differant secundum magis, & minus; vt patet in furto graui, & leui; nam graue se extendit ad magnam quantitatem, leue ad exiguam; ergo peccatum mortale, & veniale differunt penes magis, & minus, & consequenter accidentaliter: Et in hoc sensu puto intelligendum esse D. Tho: quando dixit: *Tollere alienum in parua, vel magna quantitate, non diuersificat speciem peccati. Si verò peccatum mortale, & veniale considerantur Theologicè, seu moraliter; idest secundum moralem æstimationem, diuiduntur analogicè, & differunt specie; Nam peccatum hoc modo sumptum est mors animæ, & illam auertit à Deo summo bono, & vltimo fine; peccatum verò veniale est solum dispositio ad hanc mortem; sed forma, & dispositio, quæ ordinatur ad illam, specie differunt; ergo &c.*

Est obiter hic notandum quoddam maximum discrimen, quod intercedit inter peccatum mortale, & veniale; Quod peccata, quæ sunt venialia ex obiecto, v.g. mendacium, ex nullo capite potest fieri mortale intra eandem speciem malitiæ; vnde quantumuis sit maximum, fiatque summa aduertentia, semper in ratione mendacij est veniale, nisi ex circumstantia mala adiuncta, quæ constituit nonam specie malitiæ; nam in isto casu potest fieri mortale; vt esset, si quis dicit mendacium intentione fornicandi. Peccata verò mortalia ex obiecto possunt fieri venialia ex paruitate materiæ, aut ex defectu aduertentiæ; vt patet in furto, quod ex obiecto est mortale, & potest esse veniale in vtroque capite.

Deciduntur aliqua dubia spectantia ad peccatum Mortale, & Veniale.

Petes I. An ex multiplicatione materiæ peccati venialis, v.g. ex multis voluntatibus furandi parua, possit fieri vnum peccatum mortale? *Antequam respondeam, suppono tamquam certum inter Catholicos; ex pluribus venialibus non posse fieri vnum mortale per puram illorum repetitionem; & sic non potest resultare peccatū mortale ex aggregatione venialium; vt D. Tho: ait quæst. 88. art. 4. & omnes illius interpretes.*
Vnde

Vndè ad dubium *respondeo*, Quòd si voluntates illæ sunt inter se disparatæ; ita vt quælibet velit solum exiguum quid furari, numquam ex illis fieri peccatum mortale; Nam quælibet est tantum peccatum veniale; si verò voluntates non sunt inter se disparatæ; idest si aliquis successiue furatus sit rem leuem, si postea accedit actus, quo vult etiam furari rem aliam leuem, quæ tamèn cum præcedenti non sit disparata, vt dixi, sed constituat materiam grauem; illa volitio fit iam peccatum mortale; quia est volitio retinendi rem grauem. Peccat etiam mortaliter, qui eodem voluntatis actu decreuit rem grauè furari, sed per partes leues successiue; & sic accidentaliter se habet, quòd exequatur ea voluntas per partes. *Insuper* si summa totalis, quam quis furatus fuerit, sit magna, teneatur sub pœna peccati mortalis restituere, quod ablatum est per pauca, furta; taliter, vt contraria sententia, quæ asserit: *Non teneri quis sub pœna peccati mortalis restituere, quod ablatum est per pauca furta, quantum cumque sit magna summa totalis*. Fuit à SS. Patre, & D. N. Innocentio Papa XI. tamquam propositio scandalosa, & in praxi perniciofa damnata, & prohibita in Decreto edito die 2. Martij, Feria V. Anno 1679. in Generali Congregatione Sanctæ Romanæ, & Vniuersalis Inquisitionis, habita in Palatio Apostolico Vaticano.

Petes II. An propositum in religioso transgrediendi omnes regulas, ad culpam non obligantes, contineat malitiam peccati mortalis? *Respond.* Sunt, qui probabiliter sustinent, religiosum illum peccare mortaliter in tali transgressionem regularum, ad culpam non spectantium: & hoc probant ex obligatione, quam habet religiosus quilibet tendendi ad perfectionem, à qua longe discedit per transgressionem regularum, etiam si hæc sub peccato non obligent, vt esset per nos fractio silentij, ingressus in cellam alterius, epistolas sine licentia mittere, & similia. *Verùm* non deficiunt Doctores, qui dicant, quòd præceptum tendendi ad perfectionem, non est speciale præceptum, neque positium; cum nullibi reperiatur scriptum, nec aliqua consuetudine introductum; nec etiam naturales cum nullum sit fundamentum, ex quo dicatur hoc præceptum in religioso resultare; sed est præceptum imibitum in alijs præceptis seruandi vota, & statuta religionis: vndè concludunt, quòd religiosus tantum peccat contra obligationem tendendi ad perfectionem; quatenus peccat contra votum, legem, aut præceptum; & consequenter illa, quæ nullam habent malitiam contra votum, legem, aut præcepta, neque illam habebunt contra hanc obligationem tendendi ad perfectionem. *Sed quidquid sit de hac sententia*, Puto, religiosum illum, frequentèr transgredientem omnia statuta religionis, etiam ad culpam non obligantia, peccare mortaliter; Primò, quia ineptum se redderet ad perseuerandum in religione, si tali animi relaxatione viueret. Secundò, quia alijs graue scandalum, & ruinam non mediocrem afferret. Et tertio, religioni graue nocumentum inferret: vnde esset, tamquam perniciofa pectis, à reli-

ligione excludendus; nisi aliud in contrarium sit per regulas definitum circa incorrigibiles.

Est hic obseruanda communis quædam doctrina circa periculum peccandi, quæ est valde necessaria Theologis. Quod eodem præcepto, quo tenetur homo, peccatum mortale non committere; tenetur etiam fugere periculum proximum illius; hoc enim est certum apud omnes. Sed est obseruandum, quod potest dari actio, quæ sit periculum peccandi, & non sit intrinsecè mala: v. g. tactus inter personas distinctas, siue eiusdè, siue diuersi sexus, in verendis sunt pericula peccandi; non tamen sunt intrinsecè mali, qui exculantur in Chirurgo; nam potest secretiores partes curare, etiam femine; & potest dari actio, quæ sit periculum peccandi, & sit intrinsecè mala: talis est fornicatio, quæ est periculum peccandi, & intrinsecè mala, cum nullo modo possit excusari; quia intrinsecè est periculum prauæ educationis. *Ex hoc autem*, quod tactus impudici in verendis inter personas distinctas non sint intrinsecè mali, non valet inferri, tantum esse malos ratione periculi; & consequenter si non timeretur pollutio, vel delectatio venerea sequutura, potest aliquis sine culpa lethali tangere verenda alterius sine causa honesta, & absque necessitate; *Nam* periculum intrinsecum, & absolutum non desumitur ab euentu futuro, cum quo semper est connexus; sicut in omnium Doctorum sententia, se habet periculum prauæ educationis prolis in fornicatione: neque ratio periculi inuititur præsumptioni casus particularis; sed præsumptioni communis: ac proinde licet in casu particulari effectus deficiat, in quantum quis credit similibus tactibus nullatenus esse polluendum, neque in veneream delectationem consensurum; adhuc tamen in illo est ratio periculi, & malitiæ desumptæ ex ipso periculo. Solum igitur ob causam iustam, & honestam, vt vult D. Tho: 2. 2. quæst. 10. art. 9. potest homo se exponere periculo peccandi; vt visum est in Chirurgo, & similibus.

De Causis externis peccatorum, & penis ipsorum.

Examinatis his, quæ pertinent ad constitutionem, & essentiam peccatorum; examinanda breuiter hic sunt, quæ extrinsecè, & per modum causæ, & effectus ad peccata pertinent: Et difficultas potest esse de diabolo, de homine, & de Deo; & circa primum est certum, Diabolum posse hominem ad peccandum inducere suggestione, vel commotione appetitus; nam vel excitare potest humores, qui valent in phantasia excitare cogitationes de hoc, aut illo obiecto turpium etiam circa gulam, iram, &c. Vel etiam commouendo spiritus animales ad iram, luxuriam, &c. Vnde D. P. August. lib. 4. de Trinitate cap. 12. ait. *Diabolus suæ societati malignos effectus inspirat.* & Beda in cap. 5. Act. *Diabolus animam in affectum malitiæ trahit*: implicat autem hominem à diabolo ita cogi ad peccandum, vt non retineat libertatem; & sic solum arte, &

dolo homines aggreditur, inspiciendo prius complexionem vniuscuiusque, & tunc laqueostentationis apponendo. *Omnia* autem omnino peccata non sunt infligante dæmone; nam possunt etiam homines (vt sapi-
simè accidit) esse causâ alieni peccati; scilicet exemplo, consilio, minis, prænijs, &c. *Potest* etiam homo, vt vult D. Tho: *quæst.* 81. esse causam peccati alterius per generationem; nam posita generatione, vt conditio-
ne, transfunditur peccatum originale, ex quo postea cetera peccata se-
quuntur -

Circa Deum, est veritas Catholica, & definita in Tridentino, Deum, neque esse causam, neque auctorem peccati: primus autem, qui fecit Deum auctorem, & causam peccati, fuit Simon Magus. Scripturæ testi-
monia, quibus videtur tribui peccatum Deo, tamquam causæ, aut auctori, intelligenda sunt tantum de voluntate permissiua: non verò de in-
tentiua. Quomodo autem Deus non sit causa peccati, est aliqua con-
trouersia, in hoc explicando, inter Theologos: Qui docent, peccatum, consistere in priuatio, putant, quòd melius explicant, quòd Deus non,
sit causa peccati, quam nos, qui dicimus consistere in positiuo: Sed meo iudicio patitur maiorem impugnationem sententia illa, quæ con-
sistit in peccatum in priuatio. Dicere enim, quòd Deus cõcurrit ad actum, & entitatem positiuam, non verò ad priuationem, & consequenter ad
malitiam: non illis suffragatur; Quia quidquid est causa entitatis positi-
uæ, est etiam causa negationis, seu priuationis, cum qua est connexa,
entitas positiua: sicut, qui est causa introductionis formæ; est etiam causa
expulsionis, seu carentiæ formæ oppositæ; ergo si Deus est causa actus
positiui peccaminosi, est etiam causa priuationis eum consequentis.

Nec valet dicere, Quòd priuatio non consequitur ad entitatem, nisi
quatenus est ab homine deficiente; Quia hoc solum probat, quòd Deus
non peccat, seu non deficit producendo, & causando eam entitatem;
non autem probat, Deum non esse causam peccati; quia siue homo di-
catur deficere, siue non in ordine ad causandam priuationem, non ha-
bet distinctum influxum ab eo, qui est in ordine ad entitatem positiuam,
ex qua consequitur: id est per eundem influxum, per quem causat priua-
tionem, causat etiam entitatem positiuam; sed Aduersarij concedunt eo-
dem modo Deum influere in entitatem positiuam peccati, sicuti influere
in eandem entitatem positiuam homo; ergo si homo non potest influere,
nisi per eundem influxum in entitatem positiuam, & in priuationem;
etiam Deus eodem modo causabit entitatem, & priuationem, siue simul
deficiat per illam, siue non.

Addo, Quòd qui negant præcisiones obiectiuas, sicuti nos, tamquam
destruentes omnem bonam philosophiam, facillimè impugnant alios
modernos asserentes, Deum concurrere ad alias formalitates identifi-
catas cum formalitate peccati, non verò ad ipsam formalitatem peccati;
Non enim potest concipi, quòd eadem actio physica, & realis Dei tan-
gat

gat vnam formalitatem eius actus, & non tangat aliam cum ea identificatam; cum physicè non sit vnum, & aliud; cum non minùs implicet idem cognosci, & non cognosci, quàm concurrere, & non concurrere; ergo si per hoc, quòd formalitates sunt identificatæ, non potest cognosci vna formalitas, quin cognoscatur alia: aliter idem cognosceretur, & non cognosceretur; nec etiam poterit propter eandem rationem concurrere vna causa ad vnam formalitatem, quin etiam concurrat ad aliam, & aliter concurreret, & non concurreret.

Nos igitur, qui suslinemus, Malitiam peccati consistere in positivo, esse Deus physicè concurrat, & immediatè ad totam entitatem peccati, & ad ipsam etiam malitiam indistinctam ab ipsa entitate peccati; dicitur tantum causa permissiua actionis peccaminosæ, eam non impediendo, ad quod ex nullo capite tenetur; quinimò, quantum est ex se, operatur, ne illud peccatum fiat. *Hanc conclusionem clarissimè docet Magnum Ecclesiæ lumen, S.P.N. August. in Enchir. cap. 96. & cap. 97. in principio, ubi ait. Non ergo fit aliquid, nisi omnipotens fieri velit; vel sinendo, ut fiat, vel ipse faciendo. Neque dubitandum est Deum facere bene etiam sinendo fieri, quæcumque male fiunt. & Angelicus Doctor in 1. d. dist. 47. quæst. unica, artic. 2. ad finem corporis hæc habet. Multa fiunt, quæ Deus non operatur, sed permissio pertinet ad causam: ex quo clarè constat S. Doctorem asserere, quòd peccata, quæ Deus non operatur, pertinent ad permissionem; & consequenter Deus non dicitur illorum auctor.*

Probo nunc ratione, Quomodo Deus concurrente ad entitatem peccati, quæ est identificata cum malitia, non dicitur causa, & auctor peccati; Nam peccatum per D. Tho: non tribuitur causæ efficienti, sed deficienti; sicut ut idem asserit 1. 2. quæst. 79. art. 1. in corpore, claudicatio non tribuitur virtuti loco motiæ, sed tibie debilitati; sed causa deficiens est sola voluntas, seu liberum arbitrium; ut fatetur S.P.N. August. lib. 12. de Ciuit. Dei cap. 7. in principio, dicens: *Nemo ergo quærat efficientem causam male voluntatis; non enim est efficiens, sed deficiens.* Et ostenditur ratione; Nam illa est causa deficiens, seu ponens fundamentum malitiæ, & cui possit tribui ipsa malitia, quæ liberè ponit actionem materialem peccaminosam; sed causa, quæ liberè ponit actionem materialem peccaminosam, est sola voluntas, non verò Deus; nam Deus non concurrat per modum causæ moralis, seu principij immediatè liberi ad talem actionem peccaminosam, sed per modum causæ naturalis; ergo solum liberum arbitrium, seu voluntas est causa peccati, & ipsi est imputanda malitia, non verò Deo; quamuis concurrat ad entitatem identificatam cum malitia iuxta dicta in tract. de phys. Prædeter.

Ex hoc non valet inferre; ergo Deus eodem modo concurrat ad actum inhonestum, ac honestum. Nam ad actum inhonestum concurrat solum, ut causa permissiua; in actionem autem honestam influit præstando auxilia ex se efficacia, ad illam conducentia: Vel dic, quòd vult actum

honestum voluntate intentiua, & efficaci; actum verò inhonestum voluntate tantum permissiua. *Neque* valet dicere ex eo, quia Deus non impedit peccatum medijs auxilijs efficacibus, ne fiat, Quòd Deus sit causa illius; *Quia* effectus sequutus ex permissione, imputatur tantum illi, qui tenebatur impedire talem effectum; Deus autem non tenetur impedire peccatum.

Quia pœnæ peccato respondent, tamquam effectus ipsius; nam pœna, vt pœna, dicit essentialem ordinem ad culpam; idè hinc inquirimus. Quenam sit prima pœna, quæ peccato responderet, tamquam effectus, vel quid simile? *Respond.* quòd Prima est, & dicitur reatus, quo quis sit dignus pœna ob culpam, quam commisit; hæc autem dignitas est quædam habitualis persuerantia peccati præcedentis, non dum condonati, aut sufficienter retractati; Ex hoc colligitur; quòd pœna non est reatus, sed id, quod per reatum promeretur. Secundus effectus peccati, seu pœna, est macula moralis animæ, qua per illam redditur homo malus moraliter, contrarius rationi, & Deo inimicus; hæc autem macula, quæ propriè dicitur de peccato habituali, est duplex; vna positiuè defedans hominem, alia priuatiua consistens in priuatione gratiæ. Tertius effectus, per peccatum, siuè originale, siuè actuale mortale infirmatur & debilitatur inclinatio in bonum honestum. Quartus effectus peccati est ignorantia veri; nam per peccatum, quæ reuerà falsa sunt, & diuinæ legi aduersa; vera, vel probabilia multis apparent: *Assignantur* etiam alij effectus; vt videre est apud authores, qui de peccatis agunt, quæ cum non sint magni momenti, relinquo.

De peccato Habituali, & Originali.

PRO complemento huius tractatus remanent solum hic exagitanda nonnulla, quæ spectant ad peccatum habituale, & originale. Diximus supra, quòd peccatum habituale, est actio præterita, moraliter durans in quadam permanentia morali, seu in quadam voluntario moraliter permanente in obligatione satisfaciendi Deo pro iniuria illata; Vnde peccatum habituale est omnino indiuisibiliter idem, ac actuale peccatum; quia est actio præterita, & obligatio satisfaciendi iniuriæ transactæ.

Colliges I. Quòd eo ipso, quòd ponitur condigna satisfactio, siue propria, siue aliena, acceptata loco propriæ; iam peccatum non permanet habitualiter. II. Impossibilitas satisfaciendi pro lethali, quæ est in puero homine, non tollit obligationem radicalem, seu ex parte subiecti; ita, vt homo excusetur ab illa obligatione adimplenda in ordine ad nouam culpam contrahendam. III. Obligatio satisfaciendi, importat supra præteritam actionem duplicem carentiam, seu negationem æqualis satisfactionis, & condonationis Dei. IV, Qui constituunt peccatum habituale

bituale in priuatione gratiæ; vt est Caietanus, & alij, semper includunt actum præteritum; Nam per actum præteritum dicitur homo gratiæ priuari: quia non potest nudè constitui peccatum habituale in priuatione gratiæ: vt omni modo excludatur præteritum peccatum; aut respectus ad illud: Primò, quia commissio secundo mortali permanet nouum peccatum habituale; & tamen non datur noua priuatio gratiæ. Secundò, si daretur homo, qui ante annum peccauit; si vellet Deus per suam potentiam infundere in homine isto gratiam sine remissione illius peccati; iam coniungeretur peccatum cum gratia; & consequenter esset peccatum habituale absque priuatione gratiæ. Tertiò, cum in omnibus peccatoribus sit æqualis priuatio gratiæ; cum quilibet sit priuatus omni gratia; non essent plura peccata habitualia in vno, quàm in altero.

Virum peccatum Originale contrahatur ab omnibus, & in quo consistat?

Cum sit reuelatum, omnem posterum Adami contrahere originale peccatum in primo suæ conceptionis instanti, excipere aliquem à tali generali regula, præter B. Virginem Mariam; non solum erit temerarium, & erroneum, sed apertè contra Fidem, & hæreticum. Testimonia sacræ Scripturæ faciunt hanc rem omninò certam; & primò Iob 70. *Nemo mundus à sorde, neque infans, cuius est vnius diei vita super terram.* Item Psal. 50. *Ecce enim in iniquitatibus conceptus sum, & in peccatis concepit me mater mea; & plura alia testimonia.* Fuit etiam hæc veritas definita à pluribus Concilijs, Mileuitano, Auroscano, Toletano, Florentino, & nouissimè in Concilio Tridentino, in quo etiam, fuit definitum sess. 5. can. 5. Peccatum originale, non solum nomine, sed re, & quidditate propriissimè peccatum esse; asserens Concilium, quòd per baptismum tollitur id, quod *veram, & propriam rationem peccati habet.* Est igitur constans, & de Fide, posteros Adæ per naturalem generationem verè, & propriè contrahere peccatum originale.

Licet peccatum originale habeat naturam suam oppositionem cum gratia, & necessariò habeat sibi naturaliter adiunctam, vt effectum, priuationem gratiæ sanctificantis; *Existimo* probabilem sententiam illorum, qui dicunt, Essentiam peccati originalis non esse constituendam in priuatione gratiæ sanctificantis, seu iustitiæ originalis, prout iustitia dicit gratiam. I. Quia, vt supra diximus, priuatio gratiæ est pœna peccati; & sic priuatio gratiæ sanctificantis est pœna peccati originalis; sed pœna adæquatè præsupponit culpam, in qua fundatur, & à qua dimanat; ergo priuatio gratiæ sanctificantis est post essentiam peccati originalis; & consequenter non potest esse eius constitutiuum. II. Ponamus, quòd Adam peccasset, postquam habuisset Filium adultum, qui sit solum iustifi-

ustificatus gratia recepta ex Adamo; tum sic, Adamo peccante iste homo haberet priuationem gratiæ receptæ ex Adamo, quæ posteris erat debita; & tamen non haberet peccatum; ergo non constituitur peccatum originale per priuationem gratiæ sanctificantis.

Sentio, peccatum originale, vt à nobis commissum, non esse physicè loquendo, nisi ipsum peccatum Adæ, quod posteris in Adamo, & cum Adamo moraliter commiserit, & in ipsis per modum habitus moraliter perseverat: Nam paruuli eandem actionem cū Adamo moraliter exercuerunt; cum voluntates nostræ fuerint transfusæ in voluntatem Adam; & consequenter peccatum illius reputatur nostrum, & nos dicimur in illo peccare; ergo peccatum originale est idemmet actuale peccatum Adæ, contractum per modum habitus ad posteros, & in ipsis intrinsicè inherens.

Colliges I. Malè aliquos recurrere ad priuationem gratiæ; ad hoc, vt explicent, & satisfiant Concilio Tridentino asserenti, Peccatum originale inesse cuilibet, & esse ei proprium; Nam peccatum veniale verè inheret, & est proprium hominis; & tamen nullam realem priuationem gratiæ dicit (loquor de veniali non dum remisso, & de illo, qui habitualiter permanet;) ergo si potest peccatum non esse proprium, absque vlla prorsus priuatione physica intrinseca; non est necessè ad istam recurrere; sed explicatur benè, quòd sit proprium per moralem inhaesionem; nam cum peccatum omne sit in genere moris, non potest in illo quaeri alia inhaesio, & ratio intrinseca, quàm intra genus moris. Colliges II. Neque benè explicare conceptum peccati originalis (per hoc, quòd Concilium dixerit, peccatum originale esse mortem animæ) Per priuationem gratiæ: Quia si homo, qui modo viuit per habitum gratiæ, priuaretur à Deo illo habitu, constitueretur non viuens; & tamen non diceretur mortuus, ac diceretur alius, qui peccatum contraxisset: hoc eueniret, si Deus in puero iam baptizato auferret diuinitus, vt potest, gratiam; ille puer non esset mortuus spiritualiter; nam non haberetur odio à Deo. Dico ergo, quòd peccatum originale est, & dicitur propriè mors animæ; sicut, & quodlibet peccatum mortale; quia per se primò constituit animam Deo odibilem, redditque hominem inimicum Deo, & indignum gratia, & gloria; non quia consistit in priuatione gratiæ, quæ est vita animæ; quia hæc est effectus secundarius.

Neque dicant Aduersarij, D. Thome hæc pro illis; Nam numquam D. Thomas expressè dixit, originale peccatum esse priuationem gratiæ sanctificantis, sed priuationem subiectionis humanæ mentis ad Deum; sed subiectio dicit primariò obseruationem præceptorum, ex qua sequitur gratia; ergo si per D. Tho: peccatum originale est priuatio subiectionis; erit consequenter habitualis transgressio præcepti, ex qua transgressione postea sequitur priuatio gratiæ: ita explicat hanc carentiam in quæst. 82.

Explicatur quomodo peccatum Originale contrahatur, & sit nobis voluntarium?

Q Væritur hic I. Quomodo peccatum originale, seu peccatum Adæ à nobis contrahatur, & fuerit nobis voluntarium? Hæc difficultas vexavit olim ingenium præclarissimi Ecclesiæ luminis S. P. N. Augustini, & verè gravissimæ; nam videtur in terminis repugnare; cum ex vna parte nullum peccatum stet line ratione voluntarij, & liberi, ex alia, si creatura est non existens, quomodo dicitur liberè agere, & velle? quomodo enim libera erit circa id, quod non potest efficere? Respondet igitur D. Tho: & cum eo multi Thomistæ, & alij extra nostram scholam à quibus citatur idem S. P. N. August. lib: 16. de Civit. Dei cap. 27. Quòd hæc difficultas non potest melius explicari, nisi per transfusionem voluntatum nostrarum, seu omnium posterorum (excepto Christo, & Beatissima Virgine) moraliter in voluntatem Adami, in ordine præcisè ad observationem eius præcepti non edendi de ligno scientiæ: & sic per transgressionem præcepti factum fuit; vt posteri omnes moraliter elicerent eandem peccaminosam actionem, quam Adamus physicè elicit; & vt in ipso omnes peccasse verè diceretur. Neque melius hæc omnia facta fuisse intelligi non possunt, quàm asserendo, quod dicit citatus S. P. N. August. Nos omnes vnum hominem factum fuisse cum Adamo, & nostras voluntates fuisse vnam cum voluntate Adami, ex vi cuius vnitatis, seu identitatis moralis, processit moraliter à nostris voluntatibus, quod physicè ab Adami voluntate fuit elicatum.

Hæc translatio voluntatum in voluntatem Adami (loquor etiam de voluntate cuiuslibet adulti) fuit facta à Deo, qui cum sit supremus omnium Dominus, potest in ordine ad quemcumque effectum cuiusvis voluntatem alligare voluntati alterius; ita vt, quòd ille, cuius voluntas est alteri alligata, censeatur velle, quod alter vult, & moraliter elicitur eos actus, quos ille physicè elicit: sicuti quando aliquis constituit alium suum Procuratorem, aut legatum, transfundit in illum suam voluntatem; ita vt, quæ alter vult physicè, censeatur delegans velle moraliter: eodem modo Respublica potest transferre voluntatem pupilli in Tutoris voluntatem, & quod hic physicè vult, censeatur etiam moraliter velle ipse pupillus.

Nota I. Quòd hæc voluntatum translatio in voluntatem Adami non fuit in ordine ad omnes actiones, & volitiones, v.g. ad meritum, pœnitentiam, &c. sed solum in ordine ad transgressionem præcepti. II. Idem peccatum, quod nobis est originale, Adamo fuit actuale: vnde si ante pœnitentiam mortuus fuisset, incurrisset pœnam æternam sensus; ratio est, Quia Adam physicè, nos verò solum moraliter commisimus illud peccatum; est autem maius voluntarium physicum, quàm morale. Di-

cunt autem nonnulli, quod peccatum Adæ dicitur originans, & peccata posterorum originalia.

¶ *Petes, An si Eva tantum peccasset, non verò Adam, Filij contraherent peccatum originale? Respond. D. Tho: 1. 2. quest. 81. art. 5. ad 2. negativè, aliter nos potius in Eva, quàm in Adamo peccavisse diceremur, cõtra illud Apostoli ad Romanos 5. dicentis, In quo omnes peccaverunt. In casu autem quòd aliquis miraculosè, ex semine v.g. Abraham, aut ex alia materia formaretur à Deo, vult communis Theologorum sensus contra nonnullos, non contrahere peccatum originale; Quia non procederet ab Adamo seminali ratione, & communi lege. Contraheret autem peccatum originale, si aliquis generaretur opera dæmonis incubi; quia seminaliter procederet ex vi seminis ipsius; Nam illud, quo vreretur dæmon, esset semen ab homine arreptum.*

Soluntur dubia circa effectum, & pœnam peccati Originalis.

Dubitarur I. Quinam sint effectus, & pœnæ peccati originalis? *Respond. per peccatum introductas esse egritudines, innumerabiles tumbras, mortem, & plura vulnera; nempe infirmitatis, in ordine ad tentationes vincendas: ignorantix, in ordine ad ea, quæ ad salutem animæ conducunt: malitiæ, in ordine ad amplectendum peccatum, & id, quod malum est: & concupiscentiæ, quæ est propensio appetitus ad objecta delectabilia.*

Dubitarur II. Quænam pœna reservatur in altera vita decedentibus cum solo originali peccato? *Respond. Esse certum inter Catholicos eos, qui cum solo originali decesserint, in æternum visione beata esse priuatos; excepta autem miseria peccati: de cætero multa naturalia bona habebunt infantes; quoniam D. Tho: tribuit infantibus multum de naturali cognitione Dei: amore, & gaudio illius: & sic eos priuat S. Doct. solum felicitate supernaturali: vnde multi inferunt ex hoc, & benè, eos non detinendos esse in loco obscuro, & in tenebris perpetuis; Nam hæc esset pœna sensibilis, & malum gravissimum, quòd non videtur dicendum; cum ipsos Deus sola pœna damni puniat in communi sententia. Placet hic referre id, quod sensit D. Bonaventura dist. 33. art. 3. quest. 2. ubi ait, Infantes decedentes cum originali constitutos esse à Deo medios inter Beatos, & damnatos; & ex vna parte beatitudine carerent, sicut damnati; ex altera nullum haberent dolorem, sicut Beati. Afferit etiam Salmeron ad Roman. 5. disp. 48. Quòd post diem iudicii infantes multum proficiant in cognitione naturali Dei, & visionibus Angelorum recreandos esse, & hanc terram habitaturos. quæ suo ornatu non priuabitur.*

Pro complemento denique huius tractatus, placet hic referre aliquas sententias, quasi omnibus Theologis communes, quæ maximè ad confirmanda supradicta conducunt. Prima est, Quòd præter originale pec-

catum nullum aliud peccatum contrahitur in aliena voluntate; Quia voluntatum translatio, ut supra diximus, fuit solum in ordine ad preceptum circa esum ligni vitæ. Secunda, Si Adam sola voluntate, & non opere externo peccasset; ita ut re ipsa non comedisset, peccatum originale non contraxissemus, in probabili sententia; Nam preceptum Dei videtur fuisse illatum circa comestionem; non verò ob solam volitionem illius; dicit enim, *In quacumque die comederis; non verò volueris comedere.* Tertia, Est etiam communis; & defenditur à D. Tho: *quest. 8. art. 2.* Quòd, si Adam in statu innocentie permansisset, etiam si filij ipsius peccassent non contraxissent peccatum originale; Nam quòd transeat peccatum originale ad posteros, non provenit, nisi ex speciali pacto Dei; & cum Deus illud pactum, non cum posteris, sed cum solo Adamo statuerit; fit, quòd si Adamus non peccasset, non infecisset prolem. Ex hac etiam ratione, quòd peccatum originale contrahitur per propagationem ex Adamo; fit, quòd si Adamus genuisset filium in innocentia, & primò peccasset post filium genitum in innocentia; talis filius, siue adultus, siue infans, non contraxisset originale peccatum.



TRACTATUS V.

De Iustitia, & Iure in genere.

Quid, & quotuplex sit Iustitia?

Quamvis nomen, *Iustitia*, possit accipi pro eo, quòd est conforme regulæ, & legi divinæ, dicente D. Anselmo *dialog. de veritate cap. 13.* *Iustitia est relictio voluntatis servata propter se ipsam.* & D. Ioann. Chrysost. *12. in Matth. ait: Iustitia nihil aliud est, quàm omnium mandatorum plena custodia.* Nihilominus accipitur propriè iustitia pro virtute particulari, qua voluntas inclinatur ad reddendum cuique ius suum ad æqualitatem; vnde definitur à D. P. N. August. *lib. 19. de Civit. cap. 21.* *Iustitia est virtus, que sua cuique distribuit.* & à D. Tho: *Iustitia est habitus secundum quem aliquis constanti, & perpetua voluntate ius suum unicuique tribuit.*

Colliges I. ex his, iustitiam esse virtutem; Nam reddere cuique, quòd suum est, est per se honestum, & rectæ rationi consonum. II. Hanc virtutem esse in voluntate, quam inclinatur, ut velit cuique reddere, quòd debet. III. Voluntatem hanc debere esse perpetuam, & firmam; non esset enim verus iustus, qui non vellet semper, & in omni euentu cui-

que ius suum reddere : ideo D. Thomas ait: *In definitione Iustitiæ primò ponitur voluntas, ad ostendendum, quòd actus iustitiæ debet esse voluntarius: additur autem de constantia, & perpetuitate, ad designandum actus firmitatem.* IV. Debet reddi ad æqualitatem; aliter non perfectè redditur, nec consequenter erit perfectæ iustitiæ. V. Versatur primariò iustitiæ circa solas actiones ritè ad alterum disponendas; nam inclinatur, ut velis, & præstes, quod alteri debes.

Solet distingui iustitiæ, iuxta varias habitudines, quas Respublica dicitur; videlicet, vel partis ad partem, idest ciuis ad ciuem, vel totius ad partem, vel partium ad totum. Virtus, quæ dirigit partem ad partem, dicitur, iustitiæ commutatiua, & per hanc non spectatur conditio personarum, sed operum: & sic quando militi, vel operariis publicis datur stipendium à Republica pro cuiusque merito, datur per iustitiæ commutatiuam. Virtus autem, quæ dirigit totum ad partem, dicitur iustitiæ distributiua: hæc enim propriè, & principaliter residet vel in Principe, vel Magistratu, qui diriguntur per hanc virtutem, in distribuendis per ciues rebus communibus, officiis, vel oneribus, iuxta proportionem inter ipsos reperiendam: unde hæc virtus dirigit distributiones, & respicit conditionem personæ: an videlicet, sit diues, vel pauper, nobilis, an ignobilis, doctus, an indoctus, idoneus ad officium, an ineptus? Finis huius virtutis est, ut si v.g. aliquod est distribuendum secundum dignitatem pers. rum; si aliquis cuius dignitas est v. g. duo, accipiat tres aureos, ille cuius dignitas est ut quatuor, accipiat sex.

Nota hic, Quòd, interdum iustitiæ distributiua commutatiuam includit; ut est quādo sit distributio rerum, quæ stricto iure debentur, iuxta personarum conditionem. Virtus, quæ disponit partes ad totum, dicitur iustitiæ legalis; hæc enim se extendit ad omnia, quæ lege sunt statuta propter bonum commune: unde per D. Thomam, proprium iustitiæ legalis est procurare bonum commune Reipublicæ; hæc autem dicitur iustitiæ vniuersalis, & est specialis virtus secundum essentiam distincta ab alijs; respicit enim specialem rationem obiecti, cum respiciat, ut visum est per D. Thomam, commune bonum, ut proprium obiectum: & sic est species iustitiæ simpliciter distincta à iustitiæ commutatiua, & distributiua; nam tum iustitiæ commutatiua, tum distributiua ordinatur hominem ad ea, quæ sunt ad alteram singularem personam; iustitiæ vero legalis ad bonum commune: insuper violatio iustitiæ commutatiuæ obligat ad restitutionem; violatio verò iustitiæ legalis nequaquam; nisi violationi iustitiæ legalis adiungatur violatio iustitiæ commutatiuæ.

Petes I. Vtrum medium iustitiæ sit medium rei, aut medium rationis? Respond. medium iustitiæ esse medium rei non autem rationis. Nam medium iustitiæ consistit in rerum æqualitate, puta pretij rei venditæ, & huiusmodi, & rerum, aut onerum communium, quæ distribuuntur. Ne-

ra Quod medium rei, per Caietanum, est quod in æqualitate consistit; mediū autem rationis consistit in adæquatione conditionū rectæ ratione determinabilem: unde mediū temperantiæ v. g. erit mediū rationis; quia mediū ipsius non est comedere vnam panis librā, sed aliquando mediū est sumere librā, aliquando sex uncias, aliquando tres; pro loci, temporis, laboris, complexionis robore, &c. varietate.

Petes II. Vtrum iudicium sit actus iustitiæ? *Respond.* cum D. Thomas hic *quæst. 63. art. 4. Iudicium est actus Iustitiæ.* Nam per iudicium, confert iudex unicuique, quod suum est; ergo iudicium erit actus iustitiæ, vel ab ea imperatus, vel elicitus; ad hoc autem, ut iudicium sit licitum, & actus iustitiæ, tres conditiones requirit D. Thomas, I. Quod procedat ex inclinatione iustitiæ; id est ut non iudicet contra iustitiā; aliter iudicium esset peruersum, & iniustum, ac peccatum mortale ex suo genere; neque ex aliqua affectione privata, ira, odio, avaricia, aut alia passione. II. Quod procedat ex autoritate præsentis; aliter iudicium dicitur usurpatum. III. Quod proferatur secundum rectam rationem, prudentiæ; aliter esset suspiciosum, vel temerarium.

Nota hic, Quod iudex existens in peccato mortali publico, peccat mortaliter alios iudicando; ut esset si v. g. iudex sit publicus concubiniarius, & profert sententiam contra alium concubinariū, præberet enim scandalum actuum, quod per D. Thomam semper est peccatum in eo, qui scandalizat, & dat occasionem ruinæ; contemnendi scilicet, & irridendi sententiam iustam, quam profert. Si autem non simpliciter scandalizat, sed solum aliquammodo, ut si publicus concubiniarius condemnet latronem ad patibulum, solum peccaret venialiter.

Quid, & quomplex sit Ius?

Cum tota iustitiæ ratio ex iure dependeat, oportet videre, quid sit Ius: Et relictijs varijs explicationibus, quibus potest Ius accipi: Sentio, Quod Ius acceptum pro legitima potestate, sicut solent Doctores communiter explicare, siue pro aliqua re iusta, dicente D. Thomas hic ad 1. *Hoc nomen Ius primò impositum est ad significandum ipsam rem iustam: potest sic breuiter definiri. Ius est potestas legitima ad rem aliquam obtinendam, vel ad aliquam functionem, vel quasi functionem, cuius potestatis violatio sit iniuria.* Dicitur primò, *Potestas*, id est autoritas, vel potentia in rem, vel personam; nam Ius dicit vel dominium, vel usufructum, vsum, possessionem &c. quæ omnia sunt species iuris realis. Dicitur secundò, *Legitima*, id est à lege concessa, siue sit diuina positua, siue naturalis, siue humana. Dicitur tertio, *Ad rem aliquam obtinendam*, siue per successionem hæreditariam, siue per testamentum, siue per donationem, siue per contractum, & similia. Additur quartò, *Ad functionem*, quod significat, vel liberum vsum membrorum, vel rerum suarum;

& extenditur etiam ad possessionem civilem, vel naturalem, vel ad retinendum dominium, statum, & conditionem in qua est; ideo adduntur illæ particulae, *Quasi functionem*: ultimo loco dicitur, *Cuius potestatis violatio fit iniuria*; vt significet, quòd tunc ius violatur, quando ipso iure manente, contra illud agitur; & consequenter, tunc fit iniuria; quæ aliud non est nisi alieni iuris violatio.

Diximus supra, Quòd, species iuris realis sunt Dominium, Vusufructus, Vsus, Possessio &c. videndum nunc est per singula, quid scilicet sit Dominium, Vusufructus &c. & incipiendo à primo: solet Dominium à Iurisperitis definiri: *Dominium est ius perfectè disponendi de re, nisi lege prohibeatur*, vel, vt alij volunt: *Dominium est ius in re, extendens se ad omnem eius usum, seu dispositionem nisi lege prohibeatur*. vnde ius, quod habet Deus in vniuersam creaturam tamquam rem suam, quo potest de illa disponere quid voluerit, quando voluerit, & quomocumque voluerit, est dominium perfectissimum.

Dominium, aliud dicitur proprietatis, aliud iurisdictionis; Dominiū proprietatis est ius, quod habet persona, siue sit priuata, siue publica, siue communitas disponendi de re aliqua in suum commodum, tamquā sua. Dominium proprietatis dicitur perfectum, si continet proprietatem rei cum eius emolumentis; imperfectum autem, si habet proprietatem, sine emolumentis, vel emolumenta absque proprietate rei. Quando autem Dominium proprietatis imperfectum continet solā rei proprietatem, sine emolumentis, & vtilitate; sicut est Dominium, quod habet Princeps in feudis, dicitur Dominium directum; quando autem continet solā rei vtilitatem, sicut est Dominium, quod habet usufructuarius, feudatarius, emphyteuta, dicitur Dominium vtile. Dominium Iurisdictionis est potestas gubernandi suos subditos, quale est dominium, quod habet Rex in regnum, & omnis Superior in subditos.

Petes, Quid requiritur ad dominiij acquisitionem? Respond. Quòd iure communi Cæsareo communiter requiruntur duo, nempe titulus, & traditio; ita docet Couar. lib. 2. var. cap. 19. Habetur etiam apertè *L. traditionibus C. de passis. Traditionibus dominia rerum, non nudis passibus transferuntur*. Nomine, tituli, venit ius quod habet aliquis ad rem; non autem in re: vt esset quando v.g. Petrus emeret aliquam domum à Paulo, ante traditionem haberet Petrus titulum, & ius ad rem, non autem in re. Vnde si ante traditionem venderet eam domum alteri, & traderet, secundus emptor haberet eius dominium, & ius in re; Petrus autem, qui est emptor primus, haberet solam actionem personalem.

Nota, Quòd quando Dominium ab vno ad aliud transfertur, non semper est necessaria traditio ad acquisitionem Dominiij; vt videre est in beneficijs, in quibus per solam collationem, & acceptationem acquiritur ius in re; patet etiam in hæreditate legati, in quibus sufficit, vt habeatur acceptatio verbo, vel facto: colligitur ex *L. A. Titul. de furtis*, vbi dicitur

tur: *Res legata reſta via ab eo, qui legavit, ad eum cui legata eſt tranſcat.*

Vſusfructus, vt habetur *Inſtit. de uſufructu* in principio: *Eſt ius velus alienis vtendi, fruendi, ſalua rerum ſubſtantia.* Ex hac definitione colliges I. Quòd vſufructuarius non habet ſolum, & nudum ius vtendi re aliqua; ſed etiam habet ius ad eius fructus percipiendos; ſalua tamen ſemper eius ſubſtantia; quia fructuarius debet rem integram proprietario reſeruare. Colliges II. Quòd quando res in qua conſtituitur vſufructus, vt eſt v.g. grex, filua, vinea, domus &c. perit abſque culpa fructuarij, perit proprietario. *Acquirunt vſufructus, vel legis ordinatione, vel priuata diſpoſitione;* vt ſtipulationibus, paſſionibus, teſtamento &c. Perit autem I. vſufructus, ſi tanto tempore non vtitur vſufructuarius iure ſuo: hoc tempus inter præſentes eſt decem annorum, & 20. inter abſentes. II. Perit vſufructus, vel perente ipſa re, vel pereunte vſufructuario, vel ſimilibus,

Differt vſufructus ab vſu; hic enim eſt ius vtendi ſolùm re aliena ſalua eius ſubſtantia. Vſufructuarius poteſt rem alteri locare, vel gratis concedere, quod non poteſt facere, qui ſolus habet vſum. Vſusfructus, & vſus differunt à dominio; nam dominium eſt facultas in ſubſtantiam rei; vſus verò, aut vſufructus, non niſi in eius qualitates, & accidentia: & ſic per dominium habetur facultas non ſolum vtendi, & fruendi re, verum, & ipſam diſtrahendi, donandi, vendendi, negligendi &c. & ſic eam quocumque vſu vſurpandi.

Poſſeſſio accepta pro aëu, vel iure poſſidendi, ſicut communiter ſolet accipi, alia dicitur poſſeſſio facti, alia iuris, alia eſt civilis, alia naturalis: Poſſeſſio facti definitur à Sylu. *verbo Dominium q. 2. ex Hoſtienſi. Eſt detentio rei, corporis, & animi, & iuris adminiculo.* Dicitur, *detentio rei*, in genere, ad intelligendum, quòd non ſolùm dicuntur poſſideri res corporeæ, ſed etiam incorporeæ; vt ſunt cenſus, beneficium, ſeruitus, & ſimilia. Dicitur. II. *Adminiculo corporis, animi, & iuris*; nam non ſolùm ad hoc, vt res dicatur poſſideri debet corporaliter apprehendi v.g. manibus, pedibus &c. ſed etiam animo poſſidendi, & iure; ad excludendam poſſeſſionem, quam fur habet circa rem furatam, vel quid ſimile. Poſſeſſio iuris definitur à Bartolo *L. 1. de acquir. vel amit. poſſ. Eſt ius inſiſtendi alicui rei tamquam ſuo, non prohibita poſſideri.* id eſt per poſſeſſionem iuris, qui eſt poſſeſſor, iuxta iuris diſpoſitionem, poteſt rem ita pacificè tenere; vt poſſit etiam armis tueri aduerſus perturbantes; & ideò dicitur ius inſiſtendi alicui rei non prohibere poſſideri. Additur, *tamquam ſua*, quia debet detinere rem non nomine alterius, vt eſt Tutor reſpectu pupilli; ſed debet detinere, ſi ſua; quando autem aliquis habet animum rem detinendi pro me, tunc dicor poſſidere per alium.

Poſſeſſio civilis eſt, quæ ſolo animo retinetur; hoc enim modo poſſidet is, qui abeſt à rebus ſuis; Poſſeſſio autem naturalis eſt, quæ corpore ſimul, & animo retinetur, quæ poſſeſſio eſt ſimiſſima. Poteſt poſſeſſor

feffor non solum possessionem suam naturalem, sed etiam ciuilem armis tueri; sicut possessor expulsus potest armis suam possessionem repetere; hoc autem debet quamprimum commodè fieri potest, spectata rei difficultate, & cæteris circumstantijs, & cum moderamine inculpatae tutelæ. Si adhibita diligenti inquisitione manet adhuc dubium circa rei dominium, an vtrius sit melior est conditio possidentis: sicut possessio, quæ est bonæ fidei parit præscriptionem; & sic elapso certo tēpore fit aliquis dominus rei nō suæ, & fructus percepti. Præscriptio est idē ac vsurpatio; solet autem definiri, Est acquisitio dominij per continuationem temporis lege definiti. Requiritur ex communi sententia quatuor conditiones ad præscriptionem. I. Est, quod possessio debet esse ciuilis non vtilis tantum: vnde cū non possint loca sacra ciuilitè possideri, neque possunt præscribi. II. Requiritur titulus probabiliter præsumptus; idest, qui probabiliter putetur validus; etiam si reuera sit inualidus, III. Requiritur bona fides; idest credulitas, qua quis sibi prudenter persuadet rem esse suam, vel saltem nescit esse alienam. Vnde aduerfas, quod non habetur bona fides, si illa per suasio provenit, vel ex ignorantia crassa, vel cupiditate inordinata. IV. Denique requiritur continuata possessio per certum tempus à lege præscriptum, quod variatur secundum varietatem rerum præscribendarum.

Colliges I. Hominem naturale dominium habere rerum exteriorum, ac proinde naturalē esse i. si possessionem. II. Pueros, & amentes capaces esse dominij; ad dominium enim sufficit natura rationalis cū suis potentijs; intellectu scilicet, & voluntate, quæ sunt dominij subiectum; sed hanc habent pueri; ergo &c. Insuper cum in amentibus sit potentia naturalis, quamuis impedita ex redundantia humorum quo ad vsum, potest in illis res dari tēpore in iurē; taliter vt possint verè denominari domini; quamuis illud dominium sit ligatū, & impeditum. III. Peccatores, & Infideles habere rerum suarum dominium. Circa peccatores, est res certa secundum Fidem, vt habetur in Concilio Constans. *Sess. 8. artic. 8. & 15.* vbi damnatus est error Vuicleffi assertentis. *Nullus est dominus ciuilis &c. dum est in peccato mortali.* Facit etiam *Epist. D. Petri 2. & 18.* in qua habetur. *Serui subditi estote dominis; non tantum bonis, & modestis, sed etiam discolis.* Circa infideles est etiam verum; nam oppositum aliqui plusquam temerarium, & erroneum esse affirmant. Ultra testimonium Saceræ Scripturæ in qua infideles vocantur Reges, & Domini; in *Matth. enim 12. & 21.* dixit Christus. *Reddite ergo, quæ sunt Caesaris Caesari.* Facit etiam illud quod docet S. Raymundus de Pennafort *lib. 2. sue summæ, & de furtis §. 11.* Non licere scilicet Christianis aliquid à Sarracenis, aut alijs infidelibus furari, nisi fortè inditum esset bellum contra eos.

Colliges IV. Filios familias, & vxores habere plenum, & perfectum dominium quorundam bonorum; & sic in pectinio Castrensi, & quasi Castrensi Pater nihil iuris habet: vnde filius potest ad libitum de eis dis-

ponere, peculium autē Castrense est id, quod ipse filius in militia acquirit; peculium autem quasi Castrense dictum est id, quod acquiritur ab aduocatis, medicis, magistris studiorum, & alijs, qui ex publico officio stipendia, & salaria recipiunt. In peculio verō Profectio, quod proficiscitur ex substantia, vel rebus Patris sui, filius nihil iuris habet. In Aduentio autem, quod acquiritur ex industria, vel labore; idest scilicet ab exercitio rei domesticæ, vel ex euentu, vel fortuna; filius habet proprietatem; pater verō in vita usufructum.

Circa vxores, inuito rationabiliter marito, puto non posse vxorem de bonis familiæ, quorum non habet plenum dominium aliquid accipere, etiam ad faciendas eleemosynas: vult autem magister Bannez, & Ledesma, & alij, nullum esse scrupulum affirmare, quod mulier diuitis dispenset nesciente viro vigesimam partem lucri annualis; nam talis dispensatio debet esse interpretatiue volita à bono viro.

Religiosis autem paupertatis voto adstrictis, dominium cuiusvis rei temporalis prohibetur; vt colligitur ex Concilio Tridentino *sess. 26. cap. 2* quod ex titulo dicti capituli, qui est *De paupertatis voto integerrimè seruando*, intendit tollere à religiosis dominium, & proprietatem. Est solum licitum religiosis habere pecunias in communi depositas ad vsus sibi à Prælato concessos, aut concedendos.

De Legibus.

Quid, & quosuplex sit Lex?

Solet Lex iuxta varias nominis etymologias appellari regula, & mensura recta, & honesta: vnde à D. Thoma describitur *p. 2. quest. 90. Lex est quedam regula, & mensura secundum quam inducitur aliquis ad agendum, vel ab agendo retrahitur.* Et hoc modo accepta, non solum, habet locum in creaturis rationalibus; verum etiam in reliquis. Dicitur etiam Lex à legendo, prout significat legere, eligere, seu seligere: vel à ligando; quia proprius effectus legis est ligare, seu obligare homines ad sui obseruantiam. Generalis definitio legis, quæ à D. Tho: *quest. 91. artic. 2.* traditur, est hæc. *Lex est distamen rationis practica in principe, qui gubernat aliquam communitatem perfectam.* Tradit etiam idem Angelicus Præceptor aliam legis definitionem, quæ frequentius recipitur. *Lex est ordinatio rationis ad bonum commune ab eo, qui curam communitatis habet promulgata.* Vnde breuius potest fortasse sic definiri. *Lex est commune præceptum, iustum, ac stabile sufficienter promulgatum.*

Lex, alia est Diuina, alia humana; lex Diuina siue sit lex veteris, siue noui testamenti, idest Mosaica, vel Euangelica, diuiditur in æternam, naturalem, & positiuam; prout scilicet, est, vel ab æterno concepta, vel impressa cuilibet hominis intellectui, vel publica promulgatione manifestata.

ponere, peculium autē Castrense est id, quod ipse filius in militia acquirit; peculium autem quasi Castrense dictum est id, quod acquiritur ab advocatis, medicis, magistris studiorum, & alijs, qui ex publico officio stipendia, & salaria recipiunt. In peculio verò Profectio, quod proficiscitur ex substantia, vel rebus Patris sui, filius nihil iuris habet. In Adventio autem, quod acquiritur ex industria, vel labore; idest seorsim ad exercitio rei domesticæ, vel ex euentu, vel fortuna; filius habet proprietatem; pater verò in vita usufructum.

Circa vxores, inuito rationabiliter marito, puto non posse vxorem de bonis familiæ, quorum non habet plenum dominium aliquid accipere, etiam ad faciendas eleëmofynas: vult autem magister Bannez, & Ledesma, & alij, nullum esse scrupulum affirmare, quod mulier diutius dispense non scienti viro vigesimam partem lucris annualis; nam talis dispensatio debet esse interpretatiue volita à bono viro.

Religiosis autem paupertatis voto adstrictis, dominium cuiusvis rei temporalis prohibetur; vt colligitur ex Concilio Tridentino *sess. 26. cap. 2* quod ex titulo dicti capituli, qui est *De paupertatis voto integerrimè seruando*, intendit tollere à religiosis dominium, & proprietatem. Est solum licitum religiosis habere pecunias in communi depositas ad vsus sibi à Prælato concessos, aut concedendos.

De Legibus.

Quid, & quosuplex sit Lex?

Solet Lex iuxta varias nominis etymologias appellari regula, & mensura recta, & honesta: vnde à D. Thoma describitur *p. 2. quest. 90. Lex est quedam regula, & mensura secundum quam inducitur aliquis ad agendum, vel ab agendo retrahitur*. Et hoc modo accepta, non solum habet locum in creaturis rationalibus; verum etiam in reliquis. Dicitur etiam Lex à legendo, prout significat legere, eligere, seu seligere: vel à ligando; quia proprius effectus legis est ligare, seu obligare homines ad sui obseruantiam. Generalis definitio legis, quæ à D. Thoma *quest. 91. artic. 2.* traditur, est hæc. *Lex est distamen rationis practice in principe, qui gubernat aliquam communitatem perfectam*. Tradit etiam idem Angelicus Præceptor aliam legis definitionem, quæ frequentius recipitur. *Lex est ordinatio rationis ad bonum commune ab eo, qui curam communitatis habet promulgata*. Vnde breuius potest fortasse sic definiri. *Lex est commune præceptum, iustum, ac stabile sufficienter promulgatum*.

Lex, alia est Diuina, alia humana; lex Diuina siue sit lex veteris, siue noui testamenti, idest Mosaica, vel Euangelica, diuiditur in æternam, naturalem, & positiuam; prout scilicet, et, vel ab æterno concepta, vel impressa cuilibet hominis intellectui, vel publica promulgatione manifestata.

festata: Vnde D. Tho: loquens de lege æterna, ait, esse rationem diuinæ sapientie, secundum quam dirigit omnium creaturarum motus, & actiones in suos fines. Lex humana est, quæ fertur immediate humana auctoritate: hæc autem diuiditur in Ecclesiasticā, & Ciuilem; Ecclesiastica fertur auctoritate Ecclesiastica; vt Pape, Conciliorum, & appellatur Ius canonicum; Ciuilis autem potestate seculari; vt Regum, & Imperatorum; & dicitur Ius ciuile: Ius Canonicum diuiditur in Decretum, & Decretales; Decretorum collector fuit Gratianus Monachus S. Benedicti. Decretales sunt Epistolæ Summorum Pontificum missæ ad petentium præces; dicuntur autem, propter excellentiam, *Gregorians*, & fuerunt collectæ per S. Raymundum de Pennafort Ordinis Prædicatorum, auctoritate Gregorij IX. Summi Pontificis, qui continent quinque libros, quibus additus fuit sextus à Bonifacio VIII. Sunt etiam aliæ Decretales, quæ appellantur *Clementine*, quorum author fuit Clemens V. & continent quinque libros, quibus adiunctæ fuerunt constitutiones vigintiquinque à Ioanne XXII. quæ *Extraneantes* appellantur.

Diuiditur etiam lex in affirmatiuam, & negatiuam; lex quæ præcipit esse aliquid faciendum, dicitur affirmatiua; ad differentiam legis, quæ negationem infert alicuius operis; vt de non occidendo, non furando, & hæc dicitur negatiua. Lex insuper alia est fauorabilis, alia odiosa; sumitur hæc distinctio à materia, quæ ex se respicitur à lege. Lex, quæ fauorem, & gratiam continet, dicitur fauorabilis; odiosa, quæ aliquod grauamen imponit. In dubijs autem, vtrum lex sit fauorabilis, an odiosa? potius est censenda fauorabilis. Datur denique alia lex, quæ dicitur, Ius gentium, ad quod spectant ea, quæ in ciuili societate communi populorum consensu sunt constituta; vt diuisiones bonorum, dominia, contractus, bella, captiuitates, legationes, seruitutes. &c.

Petes I. Vtrum lex consistat in actu intellectus, an verò voluntatis? Resp. legem consistere in actu intellectus, & solū præsuppositiue importare actum voluntatis. Ita D. Tho. *quest. 90. artic. 1.* quem sequuntur omnes Thomistæ. Patet ex ipsa definitione legis, quæ est, *Ordinatio rationis* &c. Est *regula, & dictamen* &c. sed ordinare spectat ad intellectum, non autem ad voluntatem; neque voluntas est regula, quinimo ipsa est ratione regulanda; ergo lex in ratione consistit.

Petes II. Vtrum sit de ratione legis, quod feratur pro aliqua communitate, & ad bonum commune ordinetur? Resp. Esse de ratione legis; vt non solū communitati, seu hominum multitudini imponatur; sed etiam vt pro communi bono feratur, & ad ipsum commune bonum ordinetur. Vtraque est sententia D. Tho: Antequam autem prima pars huius assertionis ostendatur, oportet prænotare cum Glossa de *excessibus Prælatorum*: Ad communitatem non sufficere hominum multitudinem, nisi inter se aliquo federe in ordine ad aliquem finem, & sub aliquo capite copulentur. Insuper sermo est de communitate perfecta, quæ perfectum regi-

regimen, & moralem vñionem habet; siue sit communitas realis, seu localis; vt est Ciuitas, quæ est capax publicæ gubernationis, vel Regnum; siue sit communitas personalis; vt est Religio, vel Confraternitas &c. Non autē loquimur de cōmunitate imperfecta, vt est quilibet priuata domus, cui patris familias præest, quæ regitur sola potestate dominatiua, non iurisdictionis.

Probatur igitur hæc prima pars; Cum enim lex debeat esse perpetua, vt infra videbitur; & cum sola communitas sit perpetua, saltem per successionem, & non persona; sequitur quod lex respectu communitatis, & non personæ habeat locum. Ex hoc inferes, Præceptum diuinum impositum in statu innocentiae Adq̃ habuisse propriam rationem legis; nam fuit impositum illi, vt capiti totius naturæ: vnde, & duraturum semper fuisset in illo statu, & omnes obligaturum. Secunda pars, quæ est communis inter omnes Iuris ciuilibus interpretes, dicentes, legem debere esse commune præceptum; idest pro communi utilitate statutum. Probatur, Nam sicut de ratione legis est, quod pro communitate constituatur; ita propter bonum communitatis præcipuè ferri debet; & consequenter illius bonum per se primò procurare debet; alioquin esset inordinata.

Nota I. Quod si priuilegia concessa, ita sunt aliquorum propria, vt in bonum commune redundant, non excluduntur priuilegia à propria ratione legis. II. In legibus tributorum tuendi vitam propriam, & alienam, eleēmosynæ, vestigalium &c. licet videantur cedere in commodum priuatae personæ; habent tamen veram rationem legis; nam respiciunt bonum commune, quod inest his rebus. Nota III. Quod differt præceptum à lege; Primò, quia lex semper communitatem personarum necessariò respicit, vt visum est supra, præceptum autem potest imponi personæ particulari. Secundò, Non omne præceptum est lex, licet omnis lex sit præceptum, quod impositum est ab eo, qui vim habet cogendi. Tertio, Cum lex sit perpetua non inspirat morte legislatoris; præceptum autem morte, vel amotione imponentis expirat; etiam si præceptum absque termino temporis importatur.

Nota IV. De ratione legis esse, vt publica potestate feratur: ita D. Thos in d. artic. 3. hæc autem potestas debet esse iurisdictionis; vt docent communiter Canonistæ in cap. Cum accessisset, & cap. Cum in Ecclesia S. Martini. Et debet esse principalis, & primaria potestas in illo ordine; vt bene aduertit Bartolus in lib. omnes populi ff de Instit. & iur. in 1. quest. princ. cap. Hæc autem potestas primariò, & per essentiam est in Deo; communicatur autem Regibus per quamdam participationem; Non enim est potestas nisi à Deo; vt dicitur ad Romanos 13. Residet de iure naturæ potestas legislatiua immediatè in communitate; in Rege verò, & in quolibet alio habente huiusmodi potestatem, solum mediare iure humano. Potestas insuper condendi Canones, & leges Ecclesiasticas residet in

Summis Pontificibus, & in Concilijs legitimè congregatis: sicut potestas in regno temporali residet in Rege; & in republica, quæ aristocraticè gubernatur, idest per se ipsam, residet in tota republica. Residet etiam potestas legislatiua in Episcopis, & in habentibus iurisdictionem Episcopalem, vel quasi Episcopalem, vt in Patriarchis, Primatibus, Abbatibus, Legatis, & Nuntijs Apostolicis, & in Capitulis generalibus Religionum; Prælati autem religionum habent quidem ius præcipiendi, sed non leges condendi.

De Aliquibus conditionibus ad rationem legis requisitis.

Quamuis multæ sint conditiones veluti intrinsecæ, & actui in quem legis præceptum potest cadere, & ipsi actioni ferendi legem; vt videre est apud Isidorum *lib. 5. etymol. cap. 21. & lib. 2. cap. 10.* præcipue tamen sunt, vt lex sit iusta, tum respectu actus exercendi à subdito ex vi talis legis; vt scilicet possit ab eo iuste fieri; tum respectu ipsius legis, vt scilicet lex iusta præcipiat; nam sicut lex æterna solum iuxta præcipit; cum sit ipsa iustitia per essentiam; ita lex humana, cum sit eius participatio, debet iusta præcipere: ideo D. P. Augult. *lib. 1. de liber. arbit. cap. 5.* dixit: *Mihi lex esse non videtur, quæ iusta non fuerit.* Debet igitur lex esse rationi conformis; idest consentanea rationi, quod non potest esse, nisi sit vndique iusta. Vult etiam Isidorus legem humanam debere esse religioni conformem, quod est esse honestam; idest quod non præcipiat, quod lex Diuina prohibet; nec prohibeat, quæ illa præcipit: Addit etiam D. Tho: Quod debet esse proportionata legi naturæ; idest quod non deuiet à præceptis, & præscriptis legis naturæ: *Insuper* requiritur, quod lex sit possibilis secundum naturam; idest considerata fragilitate, & conditione naturæ. Et Isidorus etiam addit, *secundum consuetudinem patrie;* cum consuetudo sit altera natura. *Et sit* denique tempori, & loco conueniens; cum non in omni loco, neque in omni tempore eadem actiones conueniant. Describuntur qualitates, & conditiones legis à Gratiano *dist. 4.* his verbis. *Erit lex humana iusta, possibilis secundum naturam, secundum consuetudinem patrie, loco, & tempori conueniens, necessaria, utilis, manifesta quoque; nec aliquid per obscuritatem contineat, nullo privato commodo; sed pro communi ciuium utilitate conscripta.*

Quæres I. Vtrum sit de essentia legis, quod sit in scriptis mandata? **Respond.** Solum requiritur ad melius esse, & ad sui consistentiam, quod sit in scriptis mandata; cum enim ex natura sua sit stabilis; immutabilis, & perpetua petit naturaliter illum modum. De reliquo non est de essentia ipsius, vt in scriptis mandetur; cum nec lex Decalogi, quæ præcepta naturalia continet, vno excepto de custodiendo sabbato, fuerit scriptis mandata; idest in duabus tabulis lapideis; nisi post duorum annorum nullia, Et de lege Euangelica asserat Apostolus *ad Hebræos 8. cap.*

10. *Hanc esse prerogativam noni testamenti; ut non atramento; sed spiritu in cordibus hominum scribatur.* Convincitur igitur scripturam materiali mō, & externam non esse de essentia legis; Est communis sententia iūris interpretum in *Rubr. de constitut.* Nam potest sufficienter intimari verbo præceptum superioris, quamvis loquendo de lege humana regulariter, & ordinariè non fiat sine scriptura.

Quæres II. Vtrum promulgatio, & acceptatio populi pertineat ad essentiam legis? Respond. Quod simpliciter, & absolute loquendo, est necessaria aliqua promulgatio legis; idest aliqua propositio externa, & sensibilis facta ita publice, & cum tanta temporis latitudine; ut moraliter possit ad notitiam totius communitatis devenire: unde licet non sit de essentia ipsius legis promulgatio; erit tamen conditio necessariò requisita, ut actualiter obliget sibi subditos; ut bene ait D. Tho: hic artic. 4. *Promulgationem esse applicationem legis ad illos, qui per illam obligantur.* Et Gratianus in *S. leges*, ait, *Tunc leges institui, quando promulantur; firmari autem quando moribus recipiuntur.* Quando autem Doctores asserunt, promulgationem legis esse ita necessariam; ut nec Deus ipse possit lege positiva ab eo data aliquem obligare sine legis promulgatione; Loquuntur de publicatione, ut dicit notitiam legis proportionatam obligationi; non autem de promulgatione publica, externa, & sensibili; hæc enim, ut ait Suarius, non est ita necessaria in legibus de potentia absoluta; quin possit ipse tanquam supremus dominus obligare omnes per priuatam notitiā, etiam merè interiorem.

Quæ autem promulgatio, & quanta sit necessaria, ut lex habeat vim obligandi, attento iure civili: Puto leges Imperiales non obligare Provincias nisi in earum Metropoli promulgentur; nec sufficit vna publicatio facta in Curia Principis, quia ita statutum est in iure Imperiali, iuvante etiam consuetudine Imperij: Neque obligare in Provincia, nisi post duos menses à promulgatione sollemni ibi facta: ita statuitur expressè in *Author. ut factæ novæ constitutiones.* In Regibus autem, qui legibus Imperij non subduntur, ut Rex Hispaniarum, Galliarum &c. non solum, potest potestate absoluta Regis vna publicatione pro omnibus Regnis in regia curia publicari, nisi sit contra specialem alicuius regni constitutionem, & forum, verum etiam potest subditos obligare, absque eo quod transeant duo menses; dummodo percurrat tempus moraliter necessarium: ut in notitiam subditorum humano modo venire possit: Sicut etiam stando iure positivo, ad sufficientem promulgationem legum Pontificarum, non requiritur alia promulgatio, quàm quæ fit Romæ, nec spatium duorum mensium; nisi aliter in bulla Pontificia habeatur; quia Pontifex legibus civilibus non arctatur, nec tenetur servare modum publicationis iuris civilis.

Quoad secundum punctum quæsitum, breuiter dico, Quod si lex humana non sit iniusta, nec nimium dura, vel gravis, ut non excedat pote-

statem; obligat subditos etiam dissentientes, & repugnantes: unde non est expectandus consensus, & acceptatio populi, vt vim habeat obligandi. Hoc autem est intelligendum, non solum de lege ciuili, sed etiam Ecclesiastica. Constat ex vi verborum legis, quæ sunt simpliciter præceptiua; sed præceptum obligat absque eo quod expectetur consensus eius cui imponitur; ergo, & lex. Quod si instante tempore obseruandi legem maior pars reipublicæ illam non seruat, & eius obseruantia perturbationem generat in republica cum periculo seditionis, vel scandali; poterunt particulares personæ sine peccato legem non obseruare, quinimò tenebitur Princeps tunc legem tollere, saltem propter maiora mala vitanda. Princeps autem sciens, vel videns subditos legem suam non seruare, & non punit, vel repræhendit cum possit tacite obligationem legis auferre videtur: volunt nonnulli sufficere ad hoc duos, aut tres actus factos contra legem, sciente, & non puniente Principe cum possit.

Traduntur aliqua ad legem humanam spectantia.

NOta hic I. Teneri in conscientia Principem, seu legislatorem, tam ciuilem, quam Ecclesiasticum ad seruandas suas leges habentes rationem, & materiam de se vniuersalem, & communem ipsi Principi, & alijs; vt esset lex v.g. taxans prætia rerum, & similes; ita D. Thomas ex illo Matth. 23. *Alligant onera, & digito suo nolunt ea mouere.* Vbi reprehenduntur à Christo Prælati, qui multa iubent, & non faciunt. Si verò ratio legis non sit communis; vt esset lex de non ferendis v. g. armis noctu, vel ne quis sericis vestibus vteretur; clarum est non comprehendere Principem; quia nec decet, nec accommodatur eius statui, & imponitur communitati, vt distinctæ à Principe: Hæc autem sunt intelligenda quoad vim directiuam; non autem de vi coactiua legis communis, in qua nec Princeps potest seipsum cogere per suam legem, tamquam præcepto directe sibi imposito, nec cogi potest à subditis:

Nota II. Quod, quando Princeps ipse scienter facit actum sine sollempnitatibus iuris censetur secum dispensare, & actum facere validum. III. Peccaret Princeps si rem venderet ultra pretium taxatum à lege. IV. Non tenentur Clerici directe legibus ciuilibus: unde secluso scandalo mortaliter non peccant Clerici leges ciuiles non obseruando; cum Princeps laicus iurisdictionem in clericos non habeat: Tenentur solum Clerici legibus, tantum ex vi directiua, sed non ex vi legis, sed propter conformitatem cum personis secularibus eiusdem reipublicæ: leges autem repugnantes libertati Ecclesiasticæ, neque Clericos, neque Religiosos obligant; sicut neque Religiosi obseruare tenentur leges synodales Episcoporum, vt probabitur iudicio: unde secluso scandalo, nec leges Episcoporum, nec ieiunia ab illis imposita Religiosos ligant: Excipe festorum obseruationes, interdicta, & alias censuras, cū sit iure communi ita

cautum. Si autem Religiosi vsu, & consuetudine leges synodales acceptauerint, & suo iuri cesserint, obligantur ex vi consuetudinis illas seruare. V. Peregrinos, & aduenas non teneri legibus loci per quem transeunt; nisi eadem leges, & consuetudines vigeant in loco proprii domicilij. Vago autem, qui nullibi domicilium habent adstringi legibus oppidi quâ transeunt: insuper posse aduenas, & peregrinos sequi leges fauorabiles loci per quem transeunt est certum: & siq; discedens ex proprio domicilio in quo ieiunium obligat, & perueniens ad locum ubi ieiunium non obligat, potest nocte cænare, & carnes comedere; cum non teneatur discedens seruare leges sui domicilij.

Est etiam certum, Quod leges Pontificiæ Christianos omnes adultos vbique terrarum degentes obligant, nisi ab ipso Pontifice limitentur; cum vniuersalis potestas sit propria Pontifici supra totam Ecclesiam. Habent etiam hanc vim Canones Conciliorum generalium à Summis Pontificibus approbati; non semper autem lex Ecclesiastica absolutè lata obligat in conscientia, & sub mortali, sed interdum sub veniali. Hoc idem est dicendum de legē ciuili: vt autem lex positua obliget sub mortali sunt attendendæ tres conditiones. I. Grauitas materiæ circa quam lex versatur; censetur autem materia grauis, non solum illa, quæ per se, & absolutè spectata semper est talis in omni euentu; sed etiam illa, quæ est talis ratione circumstantiarum, loci, temporis, &c. licet secundum se considerata sit leuis; nam fieri potest, quod materia, quæ secundum se spectata sit leuis; in ordine autem ad nudam iurisdictionem, & communem Ecclesiæ gubernationem, vt subest tali voto, & in ordine ad finem talis status, sit grauis. II. Sunt consideranda verba, seu signa præceptiuæ; verba enim indicantia obligationem grauem, quæ sunt propria legum Ecclesiasticarum, sunt quæ expressè, vel implicite addunt comminationem pœnæ æternæ huiusmodi sunt: *Sub interminatione mortis æternæ; vel, Qui hoc fecerit Diuinam maledictionem incurrat; aut Indignationem SS. Petri, & Pauli*; ceterum est maximè attendenda, & obseruanda consuetudo Religionis, & regionis in modo loquendi; vnde nostræ constitutiones PP. Discal. S. Augusti. & præcepta Superiorum obligant sub mortali Religiosos, quoties aliquid disunctiuè præcipiunt, vel in virtute Spiritus sancti, vel sanctæ obedientiæ, vel sub formali præcepto; iuxta declarationem factam in Definitorio annuali Anno 1684. Mense Maij; per facultatem habitam à Sacra Congregatione Episcoporum, & Regularium. Non nego autem interdum leges latas per verbum imperatiuū obligare ad eulj am, quando in volumine iuris continentur. III. Denique est consideranda intentio præcipientis.

Nota autem hic; Quod excommunicatio minor non est de se sufficiens signum obligationis sub mortali; cum frequenter talis excommunicatio incurratur propter veniale peccatum; sed s; autem est discurrendum de excommunicatione maiori ipso iure infligenda, vel statim infligenda sine

alia monitione, quæ dicitur latæ sententiæ, quatenus fert lex ipsa sententiam. *Quando* autem absolute fertur lex sub pœna excommunicationis, tunc lex obligat sub mortali, in probabili sententia; excommunicationis enim vox absolute prolata, sumitur pro maiori; ut constat ex iure. *Puto* etiam esse eodem modo philosophandum de suspensione, interdicto, de irregularitate pœnali, ac de excommunicatione.

Dubitabis hic I. Vtrum lex humana possit prohibere actus internos? *Respond.* Esse communem Theologorum sententiam, quod si actus internus est necessarius ad aliquod esse morale actus externi, quod sæpe potest esse materia legis humanæ, potest talis actus internus præcipi à lege; etiam si non possit infallibiliter innotescere ex vi actus externi: Ut patet in præcepto recitandi horas Canonicas; cum intentio orandi, secundum omnes doctores, sit necessaria ex vi talis præcepti, quidquid sit de attentione. *Transgreditur* etiam præceptum annuæ confessionis ille, qui ita in quadragesima confiteretur exterius, ut sacramentum pœnitentiæ non percipiat ex solo defectu interiori. *Quando* autem actus internus coniungitur solum per accidens cum actu exteriori, & non est per se necessarius ad actum externum physicum, neque moralem efficiendum, non est materia legis humanæ: unde Ecclesia nunquam præcipit actum internum per accidens coniunctum cum externo; & sic qui audit sacrum ob vanam gloriam, adimplet præceptum audiendi sacrum.

Dubitabis II. Vtrum Epykia vel interpretatio siue à Deo, siue ab homine facta habeat locum in lege naturali? *Est* notandum pro responsione, quod est discrimen inter epykiam, & interpretationem; nam epykia est emendatio legis, seu iusti legalis, ut vult Aristoteles 5. *Ethic. cap. 10.* Quia epykia interpretatur legem non esse seruandam, in casu quo esset error practicus, & contra iustitiam, vel æquitatem naturalem, illam seruare; Interpretatio verò est illa per quam nullam legis emendationem facimus, sed verum sensum eius inquirimus: unde solum est ad explicandum sensum in his, quæ habent ambiguitatem. *Respond.* igitur quod præcepta naturalia secundum se, & ut naturalia sunt, propriè epykiam non admittunt; cum enim epykia sit emendatio legis; lex autem naturalis emendari non potest; cum posita sit in recta ratione, quæ emendari non potest: & sic quod homicidium v.g. non comprehendat occisionem in defensionem necessariam, non erit epykia, sed simpliciter interpretatio veri sensus illius præcepti: potest solum lex naturalis, ut per legem positivam constituta admittere epykiam. Ita Caietanus, & alij; nam leges humanæ simpliciter præcipiunt actum v.g. reddere depositum, vel solucie promissum &c. in quibus legibus sic propositis potest habere locum epykia. *Doctores*, qui asserunt præcepta naturalia admittere epykiam; Loquuntur de epykia large sumpta, & impropria, quæ est interpretatio legis: unde declarationem materiæ, & veri sensus legis vocant epykiam, & exceptionem à lege.

Nota I. Quòd quando in lege excipiuntur aliqui casus: intelliguntur etiam, qui aliàs iure excipiuntur; & si materia est favorabilis etiam omnes similes, & quos excipi equitas postulat. II. Lex vetans aliquid non comprehendit facientes bona fide. III. Per ius novum non receditur ab antiquo nisi exprimatur. IV. Lex Ecclesiastica, & civilis tollitur consuetudine decem annorum: quamvis aliqui dicant hoc esse verum in leges non autem in Canone, qui non abrogatur nisi consuetudine quadraginta annorum. V. Standum est verbis legis secundum interpretationem iuris; etiam si legislator extra legem dicat se aliter intellexisse. VI. Standum est menti legis, etiam aperte contra verba; intelligitur autem mens legis ex ratione expressa. VII. Verba precipientia dubia sunt potius intelligenda de veniali, quàm de mortali; cum leges in dubio sint interpretandæ de minori pœna potius, quàm de maiori.



TRACTATUS VI.

De Gratia eiusque necessitate.

MATERIAM in præsentì de Gratia aggredimur ad cuius inscrutabilia arcana penetranda, eiusque omnipotentissimam potestatem, sine qua nihil prorsus boni facere, & qua confortante, & opitulante, omnia possumus; oportet prænotare I. Quòd Gratia in significatione larga, & impropria significat quodcumque beneficium à Deo nobis gratis, & sine præuijs meritis collatum, siue illud beneficiũ sit naturale, gratuita Dei voluntate donatum, siue supernaturale: in significatione autem magis propria se extendit dumtaxat ad dona aliqua naturalia, omninò indebita, in creatione gratis a Deo concessa, vel in statu naturæ integræ, vel lapsæ: in acceptione autem maximè propria, & Theologica significat solùm dona, & beneficia supra naturam, seu supra naturæ debitum, nobis per Christum exhibita in ordine ad nostram salutem.

Notandum II. Quòd status naturæ integræ est ille, in quo homo tali pace, & concordia appetitus superioris cum inferiori gauderet: nulli alterationi, nulli etiam corporali corruptioni subditus esset; quinimò scientijs naturalibus, & virtutibus moralibus per accidens infusis esset ornatus: vno verbo, integram naturæ perfectionem haberet. Status naturæ lapsæ est status peccati, in quod primus parens incidit, & quo totam eius propaginem maculavit: & licet peccatum originale per baptismum, & actuale per penitentiam deleantur; manet tamen post sinitam in baptismo gratiam, semper infectio, & fomes peccati, qui est

est à peccato, & ad peccatum inclinac. His prænotatis videndum est primò

Virum homo absque gratia aliquod verum cognoscere possit?

Q Via post vniuersalem peccati originalis stragem, erroris tenebris diffusis; ita ratio nostra caligat: vt approbet falsa pro veris, & voluntas torpet concupiscentiæ illecebris illecta; vt eligat mala pro bonis: examinanda est necessitas gratiæ, primò circa cognitionem veri: & quia veritas alia est naturalis, quæ ex primis principijs per euidentem consequentiam potest deduci, & ex sensibilibus cognosci; alia est supernaturalis, quæ nullam habet cum principijs naturalibus connexionem, transcendens omnia sensibilia, & naturalia: vt sunt mysteria nostræ Fidei, & veritates à Deo reuelatæ: Examinandum nunc primò est, verum homo solo lumine naturæ, & cum concursu Dei generali possit cognoscere aliquas veritates sine auxilio speciali Dei? sit ergo

Prima conclusio; Potest homo sine auxilio speciali solo lumine naturæ cum concursu Dei generali, veritates naturales cognoscere. Loquor primò de cognitione speculatiua, quæ attenditur penes proportionem potentiæ, & obiecti, ac mediocum, quibus talis cognitio comparari potest: loquendo postea de speculatiua, quæ attenditur penes acquisitionem ipsarum veritatum, vel plurium, vel paucarum. Probatur conclusio; Quia vnaquæque potentia habet efficaciam naturalem in actum, & obiectum sibi proportionatum, sed implicat obiectum esse proportionatum potentiæ naturali, & non posse intelligi per vim naturalem; ergo per eam intelligi potest: sicut potest qualibet creatura cum solo generali Dei concursu actus sibi connaturales, & proportionatos elicere, vt sol illuminare, ignis calefacere, &c. ergo similiter intellectus. Vnde dixit D. Tho: hic quæst. 109. art. 1. *Ad cognitionem cuiuscunque veri homo indiget auxilio diuino; vt intellectus à Deo moneatur ad suum actum; non autem indiget ad cognoscendam veritatem in omnibus, nona illustratione, superaddita naturali illustrationi; sed in quibusdam, quæ excedunt naturalem cognitionem.*

Nec potest dici, Quòd D. Tho: loquatur de speciali Dei auxilio; non verò de concursu, & auxilio generali; Nam loquitur de auxilio Dei communi intellectui, & cæteris agentibus creatis; cum immediatè antea verba citata, compareret intellectum humanum cum alijs agentibus creatis, quantum ad indigentiam auxilij diuini; sed auxilium Dei commune intellectui, & alijs causis secundis, non est speciale, sed generale, vt constat, ergo, &c.

Secunda conclusio: Omnes veritates naturales collectiue acceptas cognoscere nullo modo potest homo sine auxilio speciali Dei in statu naturæ lapsæ. Quia remansit natura per peccatum vulnerata vulnere igno-

rantia; & sic non potest efficere, quod poterat, dum erat sanus; nec vulnus hoc ignorantia est tantum in intellectu pratico, sed etiam speculatio, dicente D.Tho: *hic art. 2. ad 3. Magis natura humana corrupta est per peccatum, quantum ad appetitum boni, quam quantum ad cognitionem veri.* Nota, quod non valet, Intellectus potest diuisione hanc, & illam veritatem cognoscere; ergo & omnes collectivè; Quia arguitur à sensu diuiso ad collectivum; & licet collectio omnium veritatum naturalium in statu naturæ lapsæ sit proportionata intellectui humano proportionem physica; non tamen morali, propter impedimenta extrinseca.

Tertia conclusio: Neque potest homo in statu naturæ lapsæ omnes veritates practicas vniuersales cognoscere, quales sunt, quæ versantur in materia virtutum, & vitiorum in vniuersali; vt non esse furandum, &c. Circa veritates autem practicas in particulari, quæ consistunt in applicatione vniuersalium ad particularia: dico, Quod potest homo solo lumine naturali, sine auxilio speciali Dei de multis rebus practicis rectè iudicare; vt legitur in *epist. ad Romanos cap. 2. Gentes, quæ legem non habent, naturaliter ea, quæ legis sunt, faciunt.* Prima conclusio remanet probata ex dictis circa veritates speculatiuas. Secunda conclusio facile ostenditur: Nam si homo non posset veritates practicas in particulari solo lumine naturali cognoscere, vel prouenit, quia istæ superant captum hominis, vel ex corruptione naturæ; non primum, quia naturale est homini viuere vitam humanam, qualis est secundum rationem, & iustitiam; sed hæc vita prouenit ex cognitione honesti; ergo naturale est homini habere cognitionem honestatis, & consequenter aliqua veritas practica est homini naturalis: neque secundum; nam illa peruersitas, vel prouenit à peccato originali, vel actuali; non primum; quia peccatum originale non læsit naturalia, sicut est talis cognitio: neque secundum; nam dato, quod etiam peccator sit inueteratus, & deditus vitijs, iam aduertit, aut saltem cogitat posse aduerrere quod malè faciat; alioquin non peccaret; sed hæc cognitio est veritas practica; ergo, &c.

Quando autem Scriptura videtur negare, posse hominem eas veritates cognoscere solo lumine naturali; sicut in 2. ad Corinth. 3. dicitur, *Non sumus sufficientes cogitare aliquid ex nobis: vel ex Concilio Mileuitano can. 4. dicente, Donum Dei est, & scire, quod agere debeamus, & dirigere, vt faciamus:* sermo est de cogitatione in ordine ad bonum supernaturale gratiæ, vel gloriæ, ad quam necessarium est donum Dei speciale; non verò de cogitatione in ordine ad bonum tantum morale.

Vtrum homo possit facere aliquod bonum morale absque auxilio speciali?

Loquimur hic de actu moraliter bono, non quatenus dicit ordinem ad supernaturalia; pro vt scilicet est meritorius gratiæ, vel gloriæ; sed quatenus sistit intra ordinem naturalem: Hic autem potest esse duplex, vnus perfectus ratione perfectionis speciei; vt est dilectio Dei finis naturalis super omnia; de hoc autem non quærimus; nam vtrò concedimus ad illum requiri speciale auxilium in statu naturæ lapsæ, dicente D.P.N. Augustino, *Ad diligendum Deum liberum arbitrium prima peccati granditate perdidimus.* Insuper cum ad dilectionem Dei requiratur obseruatio præceptorum; & hæc non possit haberi sine speciali auxilio; sequitur, quòd nec etiam possit haberi dilectio. *Potest igitur solum in statu naturæ integræ, cum solo concursu Dei vniuersali homo diligere Deum super omnia amore naturali; quia est proprium naturæ sanæ dirigere suum amorem in suum vltimum finem.* *Secundò, actus potest dici moraliter bonus ratione materiæ; vel quia scilicet est præceptum graue, vel difficile ad obseruandum; siuè difficultas oriatur à tentatione dæmonis, siuè ratione perseuerantiæ; vel ratione modi, qualis est actus procedens à perfectâ prudentia; vel à perfectò habitu virtutis moralis; sit ergo*

Conclusio; Potest homo solis naturæ viribus absque speciali auxilio aliquod bonum morale facere: ita S. Tho: hic, & 1. p. quæst. 23. & alibi. *Probatur* 1. principaliter ex Scriptura: Matthæi enim 5. habetur, *Si diligitis eos, qui vos diligunt, nonne, & Ethnici hoc faciunt?* & ad Roman. 2. *Gentes, quæ legem non habent, naturaliter ea, quæ legis sunt faciunt:* ex D. Tho: colligitur manifestè hæc veritas; Nam quæst. 24. de verit. art. 14. quærit, *Vtrum liberum arbitrium possit in bonum sine gratia?* & volens distinguere S. Doctor bonum, quod est supra naturam, à bono naturali, loquens de secundo sic ait, *Illud autem bonum, quod est naturæ humanæ proportionatum, potest homo per liberum arbitrium explere. Nec valet respondere, S. Doctorem non loqui de bono, honesto, & morali, sed de naturali; Quia* subiungit: *Actus iste, qui est dare eleemosynam, est bonum proportionatum viribus humanis, secundum quod ex quadam naturali dilectione, vel benignitate, homo ad hoc monetur: ergo si D. Thomas loquitur de largitione eleemosynæ, loquitur de actu bono, honesto, & morali ordinis naturalis.*

Ostenditur II. hæc eadem veritas ratione; Quia, vt supra notauimus, poterat homo in statu naturæ integræ, cum si lo concursu Dei vniuersali, per sua naturalia omne opus bonum morale facere, suæ naturæ proportionatum; ergo in statu naturæ lapsæ, poterit etiam naturaliter, cum solo concursu Dei vniuersali, aliquem actum honestum moraliter bonum

facere ; aliter, si natura suis viribus relicta, numquam posset facere aliquod bonum morale ; sequeretur, ipsam non solum esse debilitatam, aut vulneratam per peccatum ; sed etiam esse prorsus deletam, & extinctam, vel etiam malam in se, quod est hæresis Manichæorum.

Obijciunt Aduersarij aliqua loca sacræ Scripturæ, in quibus videtur, non posse hominem solis naturæ viribus absque speciali auxilio aliquod opus bonum morale facere. I. ex Ioannis 15. in quo habetur, *Sine me nihil potestis facere.* II. *Prima ad Corinb. 4. Quid habes, quod non accepisti ?* III. *Prima ad Corinth. 3. Non sumus sufficientes cogitare aliquid ex nobis.* IV. *ad Philippenses 2. Deus est, qui operatur in nobis velle, & perficere.* Respond. primam, & secundam autoritatem procedere de actibus bonis ordinatis ad gratiam, & gloriam ; vel de actibus bonis perfectis, qui scilicet sunt circa materiam, & circa præceptum graue ; hoc idem dici potest de alijs autoritatibus. *Vel dic*, omnes illas autoritates procedere, non de auxilio speciali, sed de generali concursu, ad agendum necessario, qui sub nomine gratiæ impropriè sumptæ comprehenditur ; & quia concursus iste gratis à Deo etiam nobis datur, & iustè subtrahi potest ; propterea semper Deum orare debemus, & gratias agere ; quia defacto illum non subtrahit, & quia sine illo quidquam facere non possumus.

Instabis, Fides non potest haberi sine gratia ; sed sine Fide non potest fieri aliquod bonum opus, dicente Apostolo ad Romanos 14. *Quod non est ex Fide, peccatum est.* super quæ verba D. P. August. lib. 4. contra Iulianum cap. 3. docet, Nullum opus sine Fide esse bonum : vnde infert, opera omnia infidelium esse peccata ; ergo si sine Fide non potest fieri aliquod opus, neque sine gratia. Respondeo negando minorem ; autoritas autem illa intelligitur de eo, quod non est ex Fide contrariè, non negatiuè ; scilicet de eo, quod est contra Fidem ; & sensus est, illud, quod non est ex Fide, sed ex infidelitate, peccatum est ; sicut interpretatur D. Tho: ibidem *lectio. 3. in fine* : dicens, *Omne, quod non est ex Fide, peccatum est, sic est intelligendum ; omne, quod est contra Fidem, peccatum est, & si ex genere suo bonum esse videtur.*

Nota hic I. Quod quando Concilium Auroscanum ex D. P. August. dixit, *Nemo habet de suo, nisi mendacium, & peccatum.* ly (de suo) intelligi debet per exclusionem auxilij generalis ; vel vult mendacium, & peccatum, ita esse propria hominis ; vt nullo modo sint Dei, vt auctoris. II. Quando D. P. Augustinus negauit in infidelibus veras virtutes ; nomine, veræ virtutis, intellexit virtutem perfectam, quæ hominem promouet ad vitam æternam, & est ad salutem proficua.

*Utrum homo possit Deum efficaciter diligere super omnia
ex solis naturalibus sine gratia?*

Loquimur hic de dilectione Dei naturali, non autem supernaturali; quia certum est in nullo statu haberi potest dilectio Dei absq; gratia, loquendo de dilectione supernaturali. Loquimur II. de amore amicitiae, quo vult aliquis bonum alteri; non verò de amore concupiscentiae, quo vult quis bonum sibi. III. Loquimur de amore Dei super omnia, secundum acceptionem magis propriam, & visitatam, quæ complectitur obseruantiam omnium mandatorum Dei, & totius legis; quare non significat vnam aliquem actum elicitem à voluntate, sed significat voluntatem continenter præferentem Deum cæteris rebus creatis. IV. Loquimur de amore naturali elicitum, qui est ille, quem homo elicit per actum proprium voluntatis, ac proinde non est inclinatio naturæ, sed est ipsa met operatio; nam loquendo de amore naturali, pro vt contradistinguitur ab elicitum, & est ordo, quem habet natura ad Deum; est certum, hominem diligere Deum super omnia, absque speciali gratia; quia natura humana est ordinata ex se ad Deum; vt illum præferat sibi, & alijs creaturis.

Prima conclusio: In statu naturæ integræ poterat homo sine speciali auxilio, solo concursu Dei vniuersali, ipsum diligere super omnia amore naturali: *Pro statu naturæ integræ*, intelligo hic illum, quo perficiebatur homo quo ad naturalia, abstrahendo ab ordine, quem habuit de facto ad supernaturalia. *Ratio est*, Quia est proprium naturæ integræ dirigere suum amorem in suum vltimum finem: insuper in natura integra appetitus est reclusus; ergo est conformis naturali, seu innato; sed appetitus innatus præfert Deum sibi, & omnibus rebus; ergo & elicited, si est reclusus, sicuti est in natura integra.

Secunda conclusio. Non potest homo in natura lapsa diligere Deum super omnia modo supra explicato sine speciali auxilio. Nam implicat contradictionem, aliquem esse in peccato mortali, & esse tantum auersum à creatura, & conuersum ad Deum; sed si aliquis cum peccato mortali haberet prædictum amorem Dei, esset auersus à creatura, & conuersus ad Deum; ergo &c. *Insuper*, si posset homo suis viribus prædicto modo Deum diligere; posset suis viribus se disponere ad gratiam, & daretur in nobis initium salutis; quod est Pelagianum; nam iuxta illud Ioannis 14. *Qui diligit, diligitur*: & sic tota charitatis dilectio non esset à Deo; nam expectanda solum foret aliqua formalitas à Deo, nempe modus supernaturalitatis. Suffragantur etiam plura testimonia sacrae Scripturæ, I. illud ad Roman. 5. in quo legitur, *Charitas Dei diffusa est in cordibus vestris per Spiritum sanctum*. Ad Galat. 5. *Fructus Spiritus est Charitas*: 1. Ioann. 4. *Charitas ex Deo est*.

Nec

Nec valet dicere, Hæc testimonia esse de dilectione Dei, vt est finis supernaturalis; non autem naturalis. *Quia* non fit distinctio inter vtramque dilectionem: Non potest igitur dilectio Dei efficax etiam, vt auctoris naturæ, haberi sine speciali auxilio; cum enim sit actus omnium perfectissimus, & præstantissimus, totius legis naturæ impletionem virtualiter continet; quinimò, vt ad Romanos 3. habetur, *Omnia præcepta in hoc vno reſtaurantur, diliges proximum tuum.*

Dices I. Potest homo lumine naturali iudicare Deum esse diligendum super omnia; ergo poterit etiam naturali facultate ipsum diligere. *Respond.* negando consequentiam; Quia multum differt cognoscere, quid sit faciendum, & facere: nec est eodem modo facile secundum, ac primum; quia homo per peccatum originale remanet magis vulneratus in intellectu practico, quam in speculativo: vnde est magis impotens ad prosecutionem boni, quam ad cognitionem veri.

Dices II. Potest homo viribus naturæ subire mortem pro patria, & pro amicis; ergo etiam pro Deo; quod esset ipsum naturæ viribus diligere. *Respond.* negando consequentiam; Aliud enim est appetere mortem, etiam pro Deo; aliud pro Deo dilectio super omnia: primo modo potest homo mori, & pro Deo, & pro patria; quia implicite talem id facit pro se ipso, vt vltimo fine; videlicet pro alio bono apprehenso, vt sibi commodo; siue in hoc, siue in alio sæculo. *Secundo* verò modo non potest viribus naturæ; nam cum talis amor Dei purus, & castus sit, necessariò omnes naturæ lapsæ vires exsuperat; Tunc autem amor Dei est, non dum plenè, & purè castus, quando illi terrena aliqua cupiditas permiscetur; vt habetur in prima dilectione.

Vtrum homo sine gratia possit omnia præcepta legis naturalis seruare, & vitare peccata illi contraria?

NOto hic I. Duplicem obseruationem posse dari præceptorum diuinæ legis; vnā quo ad substantiam actus; pro vt scilicet homo fortia, iusta, & alia virtutis opera exercet; aliam quo ad modum; & significat modum agendi; vt si fiant ex charitate, &c. II. Præcepta legis possunt sumi, & collectiue, & diuisiue: vnde quando inquitimus, An homo sine speciali Dei auxiliantis gratia possit omnia præcepta legis collectiue seruare? idem est, ac quærere, An possit vitare omne peccatum mortale, in nullo videlicet præcepto deficiendo? non autem intelligitur, quod simul pro aliquo instanti, vel duratione temporis omnia præcepta implentur; nam quæstio hoc modo esset impossibilis; cum non possint omnia præcepta simul occurrere.

Prima conclusio: Potuit homo in statu naturæ integræ obseruare omnia præcepta legis collectiue quo ad substantiam; non verò quo ad modum sine gratia. Dixi, *quo ad substantiam*, non verò *quo ad modum*; nam

nam ad hoc, vt fiant ex charitate supernaturali, conueniunt omnes Catholici, quodd requiritur speciale auxilium. *Probat*ur conclusio, Quia poterat homo in eo statu omnia peccata mortalia contra legem naturalem vitare; ergo & omnia præcepta legis collectiue seruare; cum nihil aliud sit peccare, quàm transgredi diuina mandata. *Loquimur* autem de peccatis contra legem, & præcepta naturalia; non verò supernaturalia; quia peccare contra præcepta supernaturalia est recedere ab eo, quod est supra naturam.

Secunda conclusio: Non potest homo in statu nature lapsæ obseruare totam legem naturæ; idest omnia mandata naturalia collectiue sine gratia iustificante, seu habituali, neque quo ad substantiam, neque quo ad modum. Quodd non possit quo ad modum, est certum de Fide; cum non possit homo facere actum, per se ordinatum ad vitam æternam, siue tamquam meritum de condigno, siue tamquam certam dispositionem ad gratiam, sine gratia. Quodd neque possit quo ad substantiam, ostenditur clarè; nam primum, & supremum præceptum morale est dilectio Dei super omnia, vt finis est naturalis; sed hoc præceptum sine gratia impleri non potest, vt dictum est: insuper neque continentia, quæ est virtus moralis sine gratia Dei impleri potest; habetur enim *Sapient. 8. Vt sciui, quoniam aliter non possum esse continens, nisi Deus det.* ergo si non potest homo lapsus sine gratia omnia mandata naturalia collectiue quo ad substantiam actus seruare; neque poterit sine gratia per totam vitam non peccare mortaliter; sed infallibile est, quodd aliquando deficiat, & mortaliter peccet.

Aduerto autem hic, Quodd hæc impotentia, seu impossibilitas seruandi omnia mandata collectiue, est quædam impossibilitas, non physica, sed moralis; quia consequitur ex morali infirmitate, & attenditur penès omnes circumstantias morales, quæ homini occurrunt per totam vitam, vel tempore longiori: Vnde dicimus, non posse hominem in hoc statu diu stare sine gratia, quin mortaliter peccet: Quia non contingit hominè esse habitualiter dispositum ad peccandum, quin occurrat sibi repètè aliquod operandum, in quo ex inclinatione mali habitus labitur in consensum peccati mortalis; cum non sit possibile, hominem diu esse vigilem ad hoc, quodd sufficientem adhibeat sollicitudinem ad vitandum peccatum mortale.

Tertia conclusio. Potest homo lapsus adimplere singula præcepta legis naturalis, distributiue accepta sine auxilio gratiæ, exceptis præceptis habentibus in obseruatione sua notabilem difficultatem; ad quæ requiritur, præter speciale auxilium gratiæ, etiam gratia iustificans; huiusmodi est præceptum dilectionis Dei Auctoris naturæ super omnia, ceteri de peccatis, vt sunt offensa Dei auctoris naturæ, præceptum se refræmandi, cum vrget grauis, & vehemens tentatio, & quodcumque singulari præceptum in singulari materia valde difficili. Prima pars est certa, se-

secunda ostenditur clarè. Quia implere difficilia præcepta, & mandata, est aëius liberi arbitrij sani; cum sit actus perfectus, qui est proprius potentia sanæ; sed liberum arbitrium remansit per peccatum infirmum, & viribus attenuatum; ergo nisi arbitrium adiuvetur in infirmitate sua ab auxilio gratiæ, non poterit adimplere præcepta difficilia.

Ob eandem rationem non solum non potest liberum arbitrium per peccatum lapsum, & infirmum omnibus simul collectivè, vel pluribus tentationibus difficilioribus, & diuturnioribus resistere; nec etiam cuilibet in particulari graviore, & difficiliore resistentiam facere; nisi adiuvetur à gratia. Non potest igitur homo in statu naturæ lapsæ diu vitare peccata mortalia, quæ sunt contra legem naturalem viribus suæ naturæ; sed requiritur, tum gratia iustificans, tum auxilians; Nam licet homo per gratiam iustificantem, seu habitualem sanetur; non tamen totaliter, & adæquatè; sanatur quidem quo ad rationem subiectionis ad Deum; non verò, quo ad rebellionem appetitus ad rationem: vnde cum in statu naturæ lapsæ hæc rebellio partis inferioris ad superiorem in homine iustificato perseveret; non potest vitare omnia mortalia collectivè, sed ea dumtaxat, quæ ex prima subiectione trahunt originem.

Dices I. Si homo non posset vitare peccatum sine gratia, nec omnia implere divina mandata; peccatum erit necessarium, non liberum; ergo, &c. *Respond.* distinguendo sequelam; peccatum erit necessarium absolute, & simpliciter, nego; nam hoc modo sumptum peccatum, idem esset, ac dicere, quod peccatum, quod non nisi in particulari, & determinatè committitur, est necessarium: peccatum vagè, seu indeterminatè est homini necessarium, concedo; nam ex suppositione prioris peccati, siue originalis, siue actualis, siue utriusque simul, & ex suppositione carentiæ gratiæ, necesse est, quod vagè, seu in confuso homo peccet: & sic respectu diversorum peccatum est necessarium, & liberum; necessarium ex suppositione totius collectionis præceptorum; liberum comparisonè, cuiuscumque in particulari. *Nota* hic, Quod homo peccans, non servans omnia præcepta naturalia collectivè, peccat solum in illa materia illius præcepti, quod transgreditur; non autem peccat contra aliquod, quod sit præceptum speciale servandi omnia collectivè.

Dices II. Omnia præcepta naturalia collectivè accepta sunt proportionata libero arbitrio; ergo per vires naturæ possunt servari. *Respond.* distinguendo antecedens, sunt proportionata naturæ integræ, concedo, naturæ lapsæ, nego.

Quarta conclusio. Potest quilibet cum gratia Dei, seu cum auxilijs Rati naturæ lapsæ ordinarijs, singula peccata venialia distributivè evitare: & sic nullum in particulari est peccatum veniale, quod homo vitare non possit; & hoc Scriptura præcipit, cum ait, *Vt simus immaculati, & sine crimine.* Ratio est, quia si non posset homo in statu naturæ lapsæ singula peccata venialia distributivè evitare, non peccaret ea committendo;

ergo

ergo cum simus liberi circa quodlibet, potest vnumquodque distributiue acceptum euitari. Totum hoc est certum.

Solum difficultas est, An possit in eodem statu naturæ lapsæ per totam vitam, vel per aliquod longum tempus omnia peccata venialia collectiue vitare? *Dico*, Quod est veritas definita de Fide, & in Concilio Mileuitano *can. 7. & 8. & in Tridentino sess. 6. can. 23.* Non posse hominem, in eo statu omnia peccata venialia collectiue vitare sine speciali priuilegio Dei. *Probat ex Script. 1. Ioann. 1. Si dixerimus, quia peccatum non habemus, ipsi nos seducimus. Ecclesiast. 7. Non est homo iustus, qui faciat bonum, & non peccet. Prouerb. 22. Septies in die cadit iustus.* Et D.P. August. in *traff. 1. in 1. Ioannis* inquit; *Non potest homo quandiu carnem portat, non habere lenia peccata.* Ex ratione etiam Ostenditur, quia nequit homo omnes sensualitatis motus, vnde peccata venialia proficiuntur, reprimere; dum enim ratio occupatur in vno, statim à tergo aliud insurgit; nec ratio propter eius imbecillitatem potest esse peruigil ad omnia; ergo non nisi extincto, aut ligato fomite potest homo iustus diu à peccato veniali abstinere.

Priuilegium autem istud eximium vitandi omnia peccata venialia collectiue, fuit solum Beatissimæ Virginis Mariæ à Deo concessum; vnde sola ipsa fuit ab hac peccandi venialiter necessitate excepta: Quia ob dignitatem Matris nullum in ea fuit peccatum originale, nec consequenter in ea fuit fomes vllus peccati, & consequenter vniquam poruit peccare venialiter: Vnde qui diceret, aliquem esse præseruatum ab omnibus venialibus collectiue, deberet consequenter asserere; aut non contraxisse peccatum originale ex priuilegio; aut in eo fomitem esse ligatum; nam vt inquit D.P. August. *Contra Iulianum cap. 9. Vbi cumque est peccatum originale, ibi etiam est fomes concupiscentie vbi autem est dictus fomes, non potest deesse peccatum veniale.* Et sic, credere, concessum fuisse hoc idem priuilegium alteri Sancto, licet non sit contra Fidem; nihilominus repugnat sensui communi Ecclesiæ, & rationi iam dictæ. *Potest* autem probabiliter, & pie credi, aliquos Sanctos habuisse priuilegium vitandi omnia venialia in aliqua certa, & determinata materia; puta vaniloquij de D. Ioanne Baptista; cum peccata, quæ in loquutione committuntur, repugnent officio Prædicatoris, & Præcursoris: sicut etiam creditu piissimum est B. Iosephum Sponsum Beatissimæ Virginis vitasse omnia peccata venialia, quæ sunt contra virtutem castitatis.

Nota hic I. Quod potest dari aliquod breue tempus, in quo homo iustus vacet omni peccato veniali; Nec ex hoc sequitur, talem hominem pro illo tempore non posse dicere, *Dimitte nobis debita nostra.* Quia cum verè ille antea peccauerit, & nesciat verum sibi remissum sit; sequitur verè posse, & debere orare, &c. II. Quando in scriptura legitur, vt in *Deutoron. 18. Perfectus eris, & absque macula cum Domino Deo tuo. in Matth. 5. Estote perfecti, sicut, & Pater vester cælestis perfectus est.* Loqui-

rur scriptura de perfectione, & iustitia, quæ convenit statui naturæ lapſæ, quæ excludit ſolùm peccatum mortale; non autem de perfectione, & iustitia, quæ excludit etiam peccatum veniale, & quæ est propria ſtatus naturæ integræ.

Verum homo possit se ſolo disponere ad habendum auxilium Gratia?

R Edditur hæc quæſtio celebris ex explicatione illius axiomatis, nempe *Faciendi, quod in se est, Deus non denegat gratiam*; Sentierunt enim aliqui Hæretici, hominem faciendo, quod in se est, ſe ad gratiam poſitiuè diſponere: Tota igitur præſens difficultas conſiſtit in examine illius axiomatis; hoc enim benè intellecto facillimè reſoluitur quæſtio propoſita. Volunt enim plures recentiores Theologi, ſequentes Molinam, quoddam faciendi, quod in se est ex ſolis naturæ viribus, Deus ex certa lege, & pacto inito cum Chriſto ſtatuït ſic conanti gratiæ auxilia. Sed hæc ſententia, & explicatio reiſcitur I. Quia est apertiffimè contra Concilium Tridentinum, & Arauſicanum. Nam volunt hi authores, quoddam ſi quis faciat, quod in se est, v.g. in actu contritionis, quem dicunt, poſſe habere hominem ſolis naturæ viribus quo ad ſubſtantiam; ſtatim ex certa lege dabit illi Deus gratiam iuſtificantem, & ſic inſalubriter iuſtificantem gratiam conſequetur; quia ex ſe ponit actum, ad quem immediatè conſequitur diſpoſitio ad gratiam, & ipſa gratia iuſtificans; ſed per Concilia non datur diuinitus gratia conantibus ex naturæ viribus; ſed per inſuſionem, & inſpirationem Spiritus ſancti conamur, pro vt ad ſalutem oportet; ergo, &c.

Reiſcitur II. Hæc ſententia, quia pluribus in locis impugnatur à SS. P. N. Auguſt. præcipuè in ſerm. 25. de verbis Domini, paulo poſt principium ſic dicente, *Quid eſt pro nihilo ſaluos facies eos? nihil in eis inuenis, unde ſaluas; & tamen ſaluas, gratis das, gratis ſaluas, qui nihil inuenis, unde ſaluas, & multum inuenis, unde damnes*: ergo per D. P. nihil Deus inuenit in homine, unde ſaluat, unde vocet, unde det gratiam; ſed ſi Deus facienti, quod in se est ex ſolis ſuæ naturæ viribus, ex certa lege gratiam tribueret, iam inueniret in homine aliquid, unde vocet, unde ſaluat, unde det gratiam; quia inuenit eum facientem, quod in se est ex ſua ſola facultate naturæ. III. Reiſcitur hæc ſententia, quia S. Fulgentius in pluribus locis, præcipuè lib. de Incarnat. & gratia Domini noſtri Ieſu Chriſti cap. 16. S. Bernardus, S. Proſper, & alij SS. Patres, & Eccleſiæ Doctores condemnant hanc ſententiam, quæ legem firmat de danda gratia facienti homini, quod in se est ex ſolis ſuis viribus. IV. Quia inter iſtas duas propoſitiones, *Deus ſemper incipit initia bonarum voluntatum*: & *Deus non ſemper incipit bonarum voluntatum initia*; non datur medium; ergo ſi vna eſt vera, altera erit falſa; ſed propoſitio affirmatiua eſt vera, & planè catholica; ergo ſecunda negatiua eſt falſa, & erronea; ſed qui aſſerit,

Deum certa lege dare gratiam homini, facienti, quod in se est ex viribus naturę; asserit. Deum non semper incipere initia bonarum voluntatum; quia asserit, Deum semper esse ad osium cordis nostri, pulsantem, & desiderantem ingressum; idest desiderantem, vt conatus nostri ex nobis habeantur, quibus quoties ex nobis habiti fuerint, Deus se inserit, dando certa lege gratiam, & per eam in animam nostram ingrediens; ergo qui asserit, Deum facienti, quod in se est ex viribus naturę certa lege conferre gratiam, asserit aliquid falsum, & erroneum.

Nec iuuat Aduersarijs ad fundandam, & defendendam eorum sententiam confugere ad meritum Christi; dicendo, Christum cum Patre ob meritum suum legem statuisse; vt sic Deus incipientem per suam naturam adiuuet donis gratiæ. Nam si Christus meruit, vt facienti homini, quod in se est ex naturæ operibus, certa lege detur gratia, meruit profecto, vt gratia operibus naturæ sit debita; ergo posset homo ille in superbiam elatus dicere, *Habeo ex me solo aliquid, cui ex merito Christi gratia detur*; ergo posset etiam dicere, *Ratio, quare ego gratiam recepi ex merito Christi, & non alius, qui non fecit, quod in se est; est, quia ipse voluit, & volendo, meritum Christi applicaui, faciendo, quod in se est, vt per illud gratiam ex certa lege reciperem*; Quę omnia, quantum sint absurda, nullus vir Catholicus est, qui non videat.

Dices, D. Paulus reddit causam saltem conditionalem, quare fuerit misericordiam consecutus; quia nempe ex ignorantia peccauit, dicens, *Misericordiam consecutus sum, quia ignorans feci*. Ergo ex parte sua habuit aliquid, quo obtineret misericordiam, nempe commississe peccatum ex ignorantia. Respond. cum D. Tho: verbum, *quia*, non dicere causam, aut rationem, vel conditionem misericordiæ consecutæ; vnde potius esse assertiuum, quàm causale, & sensus illius propositionis est secundum S. Preceptorem, *Misericordiam consecutus sum, quia ignorans feci; idest facilius sum misericordiam consecutus, quia non ex certa scientia; sed per ignorantiam peccavi*.

Nulla igitur modo potest homo per solas naturæ vires se aptare, & disponere ad recipiendum gratiæ auxilium: vnde sensus germanus, & legitimus apud omnes ferè Theologos istius propositionis: *Faciendi, quod in se est, Deus non denegat suam gratiam*; est, de arbitrio faciente, quod in se est ex diuino auxilio, non ex solis naturæ viribus; & sic, Facienti, quod in se est auxilio diuino, Deus non denegat suam gratiam: & ita explicat hoc axioma D. Tho: hlc artic. 6. ad 2. & quolib. ar. 7. refert hanc censuram de opposita sententia, *Ad Pelagianorum errorem pertinet dicere, quod homo possit se ad gratiam preparare absque auxilio diuine gratiæ*. Insuper in 1. 2. quæst. 109. art. 6. ad 2. clarius exponens idem S. Doctor, quid sit hominem facere, quod in se est, vt se disponat ad gratiā; inquit: *Ad secundum. Dicendum illud, quod nihil homo potest facere nisi a Deo moueatur, secundum illud Ioann. 15. sine me nihil potestis facere*: &

ideo

ideo cum dicitur homo facere, quod in se est, dicitur hoc esse in potestate hominis, secundum quod est motus à Deo . Unde Angelicus præceptor est semper constans in hoc, & semper docuit, quod si homo ex divino auxilio fecerit, quod in se est, se præparando ad gratiam iustificantem, Deus ei illam dabit .

Si autem D.Thomas in 1. sententiarum dixit, Quod opus bonum est dispositio quædam ad gratiam; Loquitur de dispositione, scilicet bono opere facto à libero arbitrio, ex priori auxilio gratiæ; Sicuti per hoc, quod D. P.N. Augustinus dixerit, quod Deus dat gratiam non ponentibus obicem; Non sequitur, quod sit lex infallibilis, quod Deus operanti, quod in se est, & non ponenti obicem, det gratiam: nam multiplex est obex, vel solum originale, vel cum illo simul actuale, vel resistentia adhibita diuinis inspirationibus, qui obices non tolluntur; ut patet per hoc, quod homo faciat viribus naturæ, quod in se est, sed auxilio gratiæ .

Dices I. In scriptura videtur promitti certa lege gratia facienti eleemosynam, etiam existenti in peccato; ut tradi videtur Eccles. 3. dicens, Ignem ardentem extinguit aqua, & eleemosyna reficit peccatis; ergo per tale opus bonum peccator certa lege gratiam consequitur. Respond. Quod hoc, & alia testimonia, vel intelligi de homine existente in gratia; id est de eleemosyna facta ab existente in gratia, quæ impedit futurum peccatum, vel pœnas peccatis debitas, vel liberat à peccato præteritis; in quantum disponitur, qui iam in peccatum incidit, ad gratiam recuperandam; quia homo peccator benefaciendo, & dando eleemosynas, inducit pauperem ad orandum pro se, ut à perditione liberetur; quia licet homo in gratia existens, non possit de condigno; potest tamen, de congruo primam gratiam peccatori impetrare: Et sic dicitur, quod eleemosyna à morte liberat, & quod extinguit peccatum; sicut aqua extinguit ignem.

Dices II. Per D.Thomam omne, quod eleuatur ad aliquod supernaturale, scilicet excedens naturam, oportet, ut disponatur dispositione aliqua; ergo ad hoc, ut homo recipiat gratiam auxiliantem supernaturalem, indiget aliqua dispositione; sed hæc dispositio non potest esse supernaturalis; aliter indigeret alia dispositione; ergo debet esse naturalis; ergo potest homo ex viribus naturæ ad primum gratiæ auxilium se disponere. Respond. Quod hoc argumentum soluitur ab eodem S.Doctore, qui dicit, si id, ad quod eleuetur, se habet, ut terminus generationis, & ut forma, in suo ordine completa, subiectum indiget dispositione; si autem id, ad quod eleuatur, est via ad terminum, non indiget: Et quia gratia auxilians non se habet, ut terminus; sed ut via ad terminum, non requiritur ad illam dispositio præuia; requiritur autem ad gratiam habituales, quæ habet rationem naturæ terminantis generationem in ordine supernaturali.

Dices III. Cum Ludouico Molina, In Ioan. 1. leguntur hæc verba, Dedit illis potestatem Filios Dei fieri. & 1. ad Timoth. 2. Deus vult omnes

homines saluos fieri; Sed hæc non possunt verificari, nisi dicamus; quod detur in Deo lex illa conferendi auxilia gratiæ facienti, quantum in se est ex viribus naturæ; ergo &c. *Respond.* ad primum testimonium, quod potestas illa, quam Deus dedit hominibus, ut se facerent Filios Dei, non est sine illustratione Fidei, quæ habetur necessariò per gratiam: Explicans enim D. Ioannes, quibus hæc potestas confertur, addit in eodem loco hæc verba. *His, qui credunt in nomine eius*: Vnde semper requiritur infallibilis diuinæ gratiæ assistentia. *Ad secundum testimonium*, dico, ex eo nihil aliud colligi; nisi quod Deus sua bonitate auxilium suæ gratiæ omnibus hominibus offert, & cupit nolentibus subuenire; & desiderat etiam misereri voluntate sua antecedenti, & inefficaci. Voluntate autem consequenti, attentis omnibus in particulari, hic & nunc plaribus peccatoribus, licet faciant ex naturæ viribus, quod in se est; iusto iudicio gratiam subtrahit, ipsos propter alia præcedentia peccata puniendo.

Remanent solum hic soluenda duo alia argumenta, deducta ex testimonijs SS. Ioannis Chrysostomi, & Thomæ, in quibus Aduersarij maxime confidunt, ad suam sententiam stabiliendam; posse scilicet hominem se præparare ad gratiam recipiendam; dicentes, quod facienti, quod in se est ex viribus naturæ, Deus non denegat suam gratiam. *Habentur enim ex D. Ioanne Chrysostomo tomo 2. homil. 32. in 19. cap. Matib.* hæc verba. *Quoniam autem volentibus, gratia non denegatur, in Euangelio Dominus dicit, petite, & dabitur vobis, querite, & inuenietis, pulsate, & aperietur vobis: omnis enim, qui petit, accipit, & qui querit, inuenit, & pulsanti aperietur. Debet autem voluntas præcedere, & sic sequitur gratia. Respondetur hoc testimonium procedere de petente, pulsante, & quærente, non quomodolibet; sed prout ad salutem oportet; quæ proinde petitio, pulsatio, & quæsitio fieri nequit sine aliquo priori auxilio gratiæ: sicut etiam vltima verba debent intelligi de voluntate, præuenta priori auxilio diuino.*

Secundum testimonium D. Tho: est desumptum ex 3. contra gentes cap. 159. vbi aperte docet, quod potest homo ex se non ponere impedimentum gratiæ, & ex consequenti, quod infallibiliter gratiam recipiet. *Respond.* Quod S. Doctor in cap. 160. immediatè sequenti se explicat, Quomodo possit homo gratiam non impedire, dicens, *Quod autem dictum est in potestate liberi arbitrij esse, ne impedimentum gratiæ præstet, competit his, in quibus naturalis potentia integra fuerit; si autem per inordinationem præcedentem declinauerit ad malum; non erit omnino in potestate eius nullum impedimentum gratiæ præstare: ergo per S. Præceptorem errat aliquis, si putat, posse hominem in natura lapsa sine aliquo auxilio gratiæ impedire receptionem gratiæ, vel ei apponere impedimentum; ita ut infallibiliter ei gratia detur,*

Virum, & quæ Gratia sit necessaria ad perseverantiam finalem ?

DVplicitè sumi potest perseverantia: vel enim significat diuturnitatem temporis, quo quis conservat gratiam acceptam, & permanet in ea diuturno aliquo tempore: secundò magis strictè, pro continuatione perdurante vsque ad finem vitæ inclusivè; seu pro coniunctione gratiæ cum morte; siue diù permanserit antea in gratia, siue modicum. Circa perseverantiam primo modo sumptam, videtur certum, ut colligitur ex supra dictis, hominem iustum indigere auxilio speciali, præter gratiam habitualement, ut diù abstineat à peccatis mortalibus, & perseveret in bonis operibus: Loquimur igitur de perseverantia secundo modo accepta, nempe de illa, quæ perdurat vsque ad mortem: unde

Dico, ad perseverantiam finalem, seu ad illam, quæ perdurat vsque ad mortem, necessariam esse gratiam efficacem, & non sufficere gratiam, seu auxilium sufficiens: Hæc sententia expressè desumitur ex Concilio Arausicano, & Tridentino, quod *sess. 6. can. 6.* appellat perseverantiam finalem, *Magnum Dei donum*. Hæc idem asserit D. P. August. de bono perseverantia: cap. 2. ubi ait, *Ipsam perseverantiam magnum Dei esse donum, quo cetera eius dona conservantur. Ostenditur eadem veritas hac ratione, Quia auxilium, seu gratia sufficiens non affert secum infallibilem eventum, & effectum; sed datur, ut homo possit perseverare, quamvis actu non perseverabit; ergo cum defacto aliquis perseverat vsque ad mortem, iam eius gratia, & auxilium habet infallibilem effectum; ergo non est sufficiens, sed efficax; ergo hæc perseverantia, quæ vocatur donum perseverantia, est donum speciale, distinctum à gratia sufficiens.*

Dices cum Molina, Perseverantiam non esse donum à gratia, & auxilijs ex parte Dei distinctum; sed provenire ab auxilijs sufficientibus, quæ omnibus dantur, quibus possint vsque ad mortem perseverare; & quia aliqui benè utuntur, aliqui verò malè; ideo illi perseverant, isti verò minime. *Sed contra,* Quia ex hoc sequeretur, quod discretio perseverantis à non perseverante refunderetur in liberum arbitrium, in illiusque bonum usum; quod est contra illud 1. ad Corinth. 4. *Quis enim te discernit? Insuper Deus daret dumtaxat potestatem perseverandi, ipsum autem perseverare esset à libero arbitrio; contra illud, quod ibidem subditur, Quid habes, quod non accepisti? si autem accepisti, quid gloriaris, quasi non acceperis?* Ergo dicendum est ad actu perseverandum in bono, ultra auxilium sufficiens, sine quo non potest aliquis perseverare, adhuc requiri aliud auxilium efficax, quo infallibiliter Sancti, & electi sint perseverantes: Unde Sancti perseverantia donum sine intermissione à Deo postulant: Item Ecclesia quotidie orat, ut fideles perseverent, & det perseverantem in sua voluntate famulatum: si igitur, & nos hanc finalem perseverantia gratiam continuis orationibus sine intermissione flagitare debemus.

Petes I. Vtrum ad opera supernaturalia requiratur adiutorium gratiæ? *Respond.* necessariò requiri; vt constat ex dictis: eo ipso, quòd requiritur ad opera moraliter bona, ad tentationes superandas, ad obseruanda legis naturalis mandata; & fortiori erit necessaria ad opera supernaturalia elicienda.

Solùm potest hic occurrere grauis difficultas, quam breuiter exagito; An scilicet actus v.g. Fidei, Spei, & similes sint secundum substantiam, suam, & intrinsecè naturales, & eiusdem speciei; siuè fiant per gratiam, & cum gratia, siuè per solas vires naturæ; & solùm dicantur supernaturales quo ad modum; quia sunt facta per gratiam; an verò sint intrinsecè supernaturales, idest quo ad entitatem, & speciem suam? *Respond.* Hos actus esse etiam secundum substantiam supernaturales: colligitur ex D. Tho; hic *artic. 3.* & ex 2.2. *quest. 6. artic. 1.* & *quest. 23. artic. 2.* Probat, Actus visionis beatificæ est supernaturalis secundum substantiam, & propterea exigit in intellectu habitum, seu lumen supernaturale; vt actus fiat illi proportionatus; ergo actus amoris in Patria erit etiam supernaturalis secundum substantiam; quia obiectum, quod dat speciem intellectui; eo mediante dat speciem voluntati; cum ergo obiectum formale supernaturale faciat actum intellectus supernaturalem, facit etiam, & actum voluntatis supernaturalem; ergo pari ratione, cum hic in via obiectum formale Fidei sit supernaturale, faciet actum intellectus secundum substantiam supernaturalem, similiter, & actum voluntatis per habitus supernaturales.

Nota, quòd si S. Thomas 2.2. dixit, Quòd solùm, quo ad actus supernaturales quo ad modum requiritur donum habituale gratiæ. *Per*, modum, non intellexit circumstantiam accidentalem, sed ipsam speciem actus, quæ species vocari potest modus; quia modus significat variationem, tam ex parte potentix, & subiecti, quàm ex alio capite: & sic nomine actuum supernaturalium quo ad modum, intellexit eos, qui sunt supernaturales quo ad speciem; non autem quo ad genus; cuiusmodi sunt diligere, & similes, qui dicuntur operationes naturales homini ratione generica; quia naturale est homini diligere: sicut per actus supernaturales quo ad substantiam, intellexit eos, qui nec secundum genus, nec secundum speciem sunt operationes connaturales homini, quibus non debet dari habitus gratiæ.

Petes II. Vtrum gratia ponat aliquid in anima, & an illud sit aliqua qualitas? *Loquimur* autem hic; de gratia inhærente per modum habitus, non verò per modum actus. *Suppono* autem hic tanquam de Fide, gratiam Dei esse aliquod creatum nobis inhærens. *Respondeo* igitur, gratiam Dei, homini inhærentem esse verè qualitatem: Nam in prima Ioannis 3.4. & 14. dicitur, gratiam permanere: Quod non nisi qualitati conuenit; vnde sequitur gratiam esse qualitatem permanentem, ac proximè esse quid habituale. *Ex hoc* sequitur esse falsum, gratiam esse ipsam Dei

Dei sanctitatem, & iustitiam nobis ineffabili modo unitam, vel esse ipsam iustitiam Christi infusam, & nobis imputatam. *Vtrum* verò gratia distinguatur realiter à charitate: & an sit in essentia animæ? respondet ad utrumque D. Thomas affirmatiuè.

De Diuisionibus Gratia.

Diuiditur I. gratia, in gratis datam, & gratum facientem; gratia supernaturalis gratis data est illa, quæ facit hominè habilem, ad procurandam alienam salutem; idest per eam vnus saluti alterius cooperatur: gratia gratum faciens est illa, quæ perficit hominè in ordine ad propriam salutem, reddens personam Deo acceptam, & amicam. Gratia gratis data dicitur talis, quia non est necessaria ad salutem, quinimò interdum impijs, & reprobis conceditur; de quibus nonnulli sunt in iudicio dicturi. *Domine Domine non ne in nomine tuo prophetauimus, & in nomine tuo dæmonia eiecimus, & in nomine tuo virtutes multas fecimus?* Gratia gratis data, quæ alienæ saluti cooperatur, diuiditur in nouem species, quas recenset Apostolus 1. ad Cor. 12. *Alijs datur per Spiritum sermo sapientiæ; alijs autem sermo scientiæ secundum eundem spiritum, alteri Fides in eodem spiritu, alijs gratia sanitatum in vno spiritu, alijs operatio virtutum, alijs prophetia, alijs discretio spirituum, alijs genera linguarum, alijs interpretatio sermonum.* Tot enim gratiæ desiderari possunt ad adiuuandos alios, vt saluentur.

Diuiditur II. gratia, in Habitualem, & Actualem. Habitualis est, quæ permanet in homine per modum habitus, quo ipse iustificatur, sanctificatur, & redditur amicus Dei. Actualis est aliquis motus in nobis diuinitus excitatus ad bonè operandum.

Subdiuiditur gratia Actualis, in Operantem, & Cooperantem. Gratia operans est illa, quæ applicat voluntatem ad agendum, & per illam voluntas est mota, & non mouens, recipiendo solum diuinam motionem, per quam ad agendum applicatur. Cooperans verò est illa, quæ cum voluntate sic applicata producit eandem actionem, & effectum: & sic voluntas nostra per eam mouet, & mouetur; nam consensum voluntatis non solum Deus, sed etiam ipsa voluntas efficit. Vnde in 1. ad Corinth. 15. legitur, *Non ego, sed gratia Dei mecum.* Gratia operans dicitur etiam præueniens, quæ est illa, qua nos Deus præuenit, vt bonum velimus, iuxta illud *Psal. 58. Misericordia eius præueniet me.* Gratia verò cooperans dicitur subsequens, & est illa, quæ comitatur, & subsequitur, vt bonum perficiamus: vnde D. Fulgentius lib. 1. ad Monimum cap. 11. dixit. *Præuenit Deus impium, vt fiat iustus; subsequitur iustum, ne fiat impius; præuenit elisum, vt surgat, subsequitur eleuatum, nec cadat.* Rursus eadem gratia operans nominatur Excitans; Cooperans verò dicitur Adiuuans. Gratia excitans est illa, quæ peccatorem, vel iustum à bono opere

re cessantem, excitat ad bonum, vel extrinsecè suadendo, inuitando, &c. vel intrinsecè intellectum illuminando, & mouendo voluntatem, mira suauitate ipsum ad se alliciens. Adiuuans verò est illa, qua nos Deus adiuuat ad id, ad quod excitari sumus. *Nota*, Quòd quamuis hæ diuisiones gratiæ propriè conueniāt gratiæ actuali; possunt tamen aliquo modo accommodari gratiæ habituali; vt docet D. Tho: hic *quest. 111. artic. 2.*

Diuiditur denique gratia Actualis in Sufficientem, & Efficacem. Sufficiens est illa, quæ dat posse operari, vel vt aliqui volunt, Est auxilium, per quod homo potest, si vult, ad finē supernaturalē ad quē fuit ordinatus à Deo, peruenire. Efficax verò est, quæ sæpè coniungitur cū operatione, quam infallibiliter infert; seu est illa, à qua homo, tamquam à causa proxima mouetur, & applicatur ad opus: Vnde gratia sufficiens est necessaria ad potentiam antecedentem, & ad dandum posse; efficax verò est necessaria ad potentiam consequentem, scilicet ad applicationem.

Nota hic, Quòd auxilium sufficiens non est tale, quod se solo sufficit, & præter quod nihil ultra requiritur ad agendum; hoc enim importat, *sufficiens*, grammaticalitèr sumptum; sed quia sufficiens non sumitur grammaticalitèr, sed Theologicè; ideo explicatur, sicut explicant Theologi, sequentes D. P. August. & Angelicum Præceptorem, Quòd gratia dicitur sufficiens, quia sufficienter excitat voluntatem ad agendum; & quia dat illi totum complementum, & totam virtutem, seu sufficientiam, quæ requiritur ex parte actus primi; ad differentiam gratiæ efficacis; quæ dat applicationem, actualitatem, seu complementum, se tenens ex parte actus secundi.

Quòd autem rectè diuidatur auxilium gratiæ, in Efficax, & Sufficiens, ostenditur ex varijs Sacræ Scripturæ testimonijs; & circa auxilium sufficiens ostenditur ex *Prouerb. cap. 1. Sapientia foris predicat, in plateis dat vocem suam. II. ostenditur ex cap. 5. Isaie: Quid ultra debui facere vinea meæ, & non feci? Apocalip. 3. Ecce ego sto ad osium, & pulso. Clarius ostendit illud Act. 7. Vos semper Spiritui sancto resistitis: & Prouerb. 1. Quia vocaui, & renuistis, extendi manum meam, & non fuit, qui aspiceret me, despexistis omne consilium meum.*

Circa gratiam efficacem extat primò testimonium, desumptum ex *cap. 36. Ezech. in quo legitur, Faciam, vt in præceptis meis ambuletis. Quo testimonio sèpius vtitur D. P. August. ad probandam efficaciam diuinæ gratiæ. II. Illud Christi Domini Ioannis cap. 6. Omnis, qui audit à Patre, & didicit, venit ad me. Hester 13. Non est, qui tua possit resistere voluntati, si decreueris saluare Israel. Isaia 26. Omnia opera nostra operatus es in nobis Domine. Hierem. 18. Sicut lutum in manu figuli, sic vos in manu mea dicit Dominus. D. Pauli ad Philipp. 2. Deus est, qui operatur in nobis velle, & perficere. ad Romanos 9. Non est volentis, neque currentis, sed misentis Dei. Prouerb. 21. Cor regis in manu Domini, ubicumque*

voluerit, vertis illud. Ester 14. Conuertit Dominus Spiritum regis in mansuetudinem. Lucæ 14. Exi in vias, & sapes, & compelle intrare in domum meam. Ioann 6. Nemo venit ad me, nisi Pater traxerit illum. Ioannis 10. Non rapiet illas quisquam de manu mea, & non peribant in aeternum. Quæ omnia de Gratia efficaci passim à Theologis Doctoribus explicantur.

Virum Gratia Sufficiens detur omnibus ?

Defendunt plures Theologi dari auxilium supernaturale sufficiens omnibus hominibus, nullo excepto, nullaque facta distinctione inter fideles, & infideles : alij verò defendunt, quòd defectò non omnibus confertur tale auxilium; sed aliquibus, siuè istis, siuè illis defectò negatur; & hoc in pœnam, vt aiunt, præcedentis peccati.

Dicendum est ergo I. Quantum est ex parte Dei, gratia sufficiens omnibus proponitur, & offertur; Quia Deus pro omnibus mortuus est, pro omnibus Sacramenta instituit, & vult voluntate antecedenti omnes homines saluos fieri; ergo debet dare media sufficientia, correspondentia huic voluntati antecedenti : Insuper gratia Christi quoad sufficientiam, fuit facta pro omnibus; ergo gratia Christi sufficiens omnibus proponitur.

Dicendum II. Quòd regulariter loquendo de fidelibus, auxilium sufficiens tempore, quo instat præceptum, datur omnibus; Quia Deus impossibilia non iubet; ergo quando vrget, & instat præceptum, dat Deus auxilium sufficiens ad hoc, vt possit homo illud adimplere.

Dicendum III. Auxilium sufficiens, quamuis ex parte Dei omnibus offeratur; non tamen omnibus in particulari applicatur, & ab omnibus recipitur, quo ad salutem, & conuersionem adipiscendam; ideò addidi suprà illam particulam, *regulariter loquendo*. Infidelibus igitur, quibus nò proponuntur mysteria credenda, non datur gratia sufficiens supernaturalis ad credendum, sed eis denegatur, vel in pœnam peccatorum, vel saltem in pœnam peccati originalis. Nam est certum, vt ait D. Thomas 2. 2. *quest. 10. artic. 1.* multos esse infideles negatiuè; eos scilicet tali loco existentes, vbi propter incuriam hominum antenatorum, non peruenit Christi notitia; in quo casu excusantur ab infidelitate; idest peccatum infidelitatis eis non imputatur, quod est esse infideles negatiuè; ergo isti non habuerunt auxilium sufficiens ad credendum; aliter eorum infidelitas non esset negatiua, & innoxia, sed efficerentur resistendo infideles priuatiuè, & contrariè: & sic merito peccatum infidelitatis incurrerent; propter quod iuste damnarentur; ergo si D. Tho: docet dari aliquos infideles negatiuè, intelligit illos tales nihil prorsus de Fide supernaturali, etiam implicite Christi audire, nec aliquod auxilium sufficiens habere respectu illius.

Constat etiam ex D.P.N. August. non habere infideles omnes auxilium supernaturale intrinsecum sufficiens, etiam ad Deo obediendum, in obseruatione præceptorum naturalium; sed quòd quibus datur, ex misericordia datur; quibus autem negatur ex iusto iudicio negatur, in pœnam saltem peccati originalis: vnde est valde obseruandum, quòd quando S.P. August. & nos cum illo in hac materia asserimus, Non posse hominem sine auxilio gratiæ vitare peccatum: Non intelligitur ista impotentia esse ex defectu libertatis; ita quòd ad id libertatem non habeat; hoc enim nullo modo sentimus, nec sentire possumus; sed sensus est, quòd non habet sufficientiam solis suis viribus ad id obseruandum; & sic est aliud libertas, aliud sufficientia: habet igitur homo libertatem; non habet autem sufficientiam suis viribus.

Negatum etiam fuit auxilium sufficiens paruulis, qui, vel in vteris maternis, vel qui iam in istam lucem venerunt, & sine baptismo mortui sunt: & sic istis, vt loquitur D.P.N. August. nullum fuit auxilium, sufficiens applicatum, per quod possent saluari; & totum hoc propter peccatum originale, in quo adstricti tenentur.

Negatur etiam auxilium sufficiens aliquibus fidelibus, magnis tamen peccatoribus, vt potè execratis, & obduratis: quod colligitur ex Scriptura, ex illo *Hierem. 51. Curauimus Babylonem, & non est sanata, derelinquamus eam*. Vnde S. Hieronymus asserit, magnis peccatoribus in peccatis obduratis, quibus sæpè medicamento subuentum est, quo poterant sanari; idem medicamentum subtrahi: Loquitur autem hic S. Hieronym. de obsecratis, & obduratis, in quibus dicta obsecratio, & obduratio fit per ablationem auxilij sufficientis; ad differentiam obsecrationis, & obdurationis, quæ fit per denegationem omnis auxilij efficacis; quo denegato homo præceps ruit in maxima, & grauissima peccata: sicut fuerunt ludæi obsecrati, & obdurati, etiam si habuerint auxilium sufficiens, dicente de illis *Isaia, Excaca cor populi huius, & aures eius aggraua*. Vnde peccatores, quibus in fine vitæ etiam negatur auxilium sufficiens ad penitendum, verè peccant peccato finis impenitentiae; quia ad hoc saluandum sufficit, quòd sua culpa eis fuerit tale auxilium sufficiens negatum; nam grauissima, & continuata peccata postulant, vt Deus suam denegat misericordiam, & iustitiam ostendat.

Denegat etiam Deus auxilium sufficiens fidelibus adultis, qui existentes in peccato mortali, incutunt in amentiam incurabilem; & totum hoc etiam in pœnam peccati: vnde manifestè patet, non omnibus Deum auxilia sufficientia actu conferre; iuxta illud S.P.N. August. dictum, *Communis est omnibus natura, non Gratia*.

Nota hic I. Quòd per hoc, quòd Christus Dominus sit omnium Redemptor, non sequitur, quòd detur omnibus per ipsum auxilium sufficiens: Est enim omnium Redemptor, quo ad sufficientiam, & magnitudinem pretij: quatenus merito sanguinis eius omnes à peccatis liberati pos-

possunt; non tamen est omnium Redemptor, quo ad sufficientiam, quatenus omnibus defactò dentur auxilia sufficientia, vel ad credendum, vel ad rectè, pièque viuendum. *Esi notandum II. Quòd si Deus etiam omnibus hominibus in vniuersum auxilium supernaturale sufficiens denegaret, nulla esset in illo iniustitia, aut iniquitas; cum enim omnes homines nascantur filij iræ ob peccatum originale, vt ait Apostolus ad Ephes. 2. nihil aliud ipsis iure deberetur, nisi pœna: vnde D.P. August. docet, quòd semper prima gratia datur inimicis, ac per hoc modis omnibus est indebita: & sic in lib. de dono perseuer. cap. 8. concludit, Non itaque sumus ingrati, quòd tam multos liberat misericors Deus de tam debita perditione; vt si inde neminem liberaret, non esset iniustus.*

III. Non benè prætenditur ab Aduersarijs, D.P. August. sensisse in Commentario ad Psal. 45. ad illa verba, Deus in medio eius non commouebitur, auxilium supernaturale gratiæ omnibus tribui. Intelligit enim, hoc SS. Pater, & Præceptor de naturali prouidentia, qua Deus omnibus adest in medio omnium existens. Sicuti quando docet in expositione Psal. 24. ad illa verba, *Vniuersa via Domini, misericordia, & veritas*: quòd Deus omnibus videtur primum exhibere misericordiam, deinde si ea non benè vianitur, iudicium, de gratia supernaturali omnibus danda. Vel loquitur de misericordia omnibus per naturale lumen rationis exhibita, quo Deum cognoscunt: Vel potest intelligi de misericordia, quæ habetur per legis, & Euangelij prædicationem; quam tamen si omnibus non tribuit, est ob peccata eorum: Vel denique, si loquitur de misericordia Dei supernaturali; intelligitur, quòd hoc auxilium gratiæ, quantum est ex se, omnibus exhibet Deus. IV. Quando imputatur homini id, quod facere non potest; id venit, vt vult S.P. August. ex priori eius mala voluntate, qua abstulit à se tale posse, & propter quod peccatum in pœnam illius est ab eo ablatum tale posse. *Vltimò*, ad loca SS. PP. vbi dicunt, solem iustitiæ omnibus esse ortum: Deum illuminare omnem hominem, venientem in hunc mundum, &c. Dicendum est, vel quòd loquuntur de lumine generali rationis, quod nulli denegatur; vel de lumine supernaturali, quod Deus, quantum est ex se omnibus habet paratum; licet ob debita priora multi illud defactò non recipiant.

Dices contra dictam conclusionem, Potest homo in omni instanti se ad Deum conuertere; sed hoc non verificaretur, si gratia sufficiens non omnibus in vniuersum hominibus daretur; ergo &c. Respond. In omni temporis instanti potest viator se ad Deum conuertere; non tamen secundo omnes pro omni instanti habet sibi datum gratiæ auxilium; sat igitur est, quòd pro omni instanti illud ei dare possit Deus, & ipse illud possit recipere à Deo; vt verificetur, quòd pro omni instanti potest se ad Deum conuertere.

Aduersarij ad probandum Deum auxilia sufficientia supernaturalia dare omnibus in vniuersum hominibus, nemine dempto, congerunt ali-

qua testimonia sacræ Scripturæ. I. illud *Apocal. 3. Ecce ego stō ad ostium, & pulso*. II. illud *Prouerb. 1. Sapientia foris prædicat, in plateis dat vocem suam*. III. illud *Cantic. 5. Vox dilecti mei pulsantis, aperi mihi soror mea, amica mea, columba mea, immaculata mea. & similia. Sed respondetur ad primum testimonium, Ipsi non intelligi de pulsatione Dei supernaturali ad cor omnium nullo excluso; sed de pulsatione, qua Deus pulsatur per lumen rationis, & alias creaturas: Hoc etiam modo intelligendum est secundum testimonium; Quia per lumen rationis, quod signatum est super nos, Deus omnes vocat; ut bonum sequantur, & malum effugiant; licet innumeri renuant ex mala sua voluntate. Ad tertium testimonium dico, Illud intelligi de Ecclesia, vel anima sancta, quæ contemplatione audit Christi vocem illam exhortantis; ut à quiete contemplationis surgat ad opus prædicationis, & per ipsam in mentibus infidelium ianuam cordis Christo aperiat; ut ad illum locum prosequatur latè D. Thomas.*

Urgent rursus Aduersarij afferendo aliud testimonium desumptum ex Concilio Senonensi decreto 15. de libero arbitrio, in quo habetur Deus in omni momento pulsare ad cor cuiuscumque hominis; licet non omnes defectu conuertat; sed plures illi resistant; ait enim, *Nec tamen tanta gratiæ necessitas, libero præiudicat arbitrio; cum illa semper sit in promptu; nec momentum quidem prætereat, in quo Deus non stet ad ostium, & pulset; cui si quis aperuerit ianuam, intrabit ad illum, & cenabit cum illo. Respondeo, Quod autoritas huius Concilij non est tanti facienda; cum non inueniatur hoc Prouinciale Concilium à sancta Sede Apostolica confirmatum; ut in congregatione de auxilijs demonstrauit P. Thomas de Lemos. Secundò, potest responderi, Concilium non loqui de singulis instantibus physicis, sed mathematicis; nam etiam ipsi Aduersarij faterentur, Quod non in omni momento Deus pulsaret ad omnium corda; vnde licet assereret Concilium, nullum esse momentum, &c. non tamen asserit, nullum esse hominem ad cuius cor non stet Deus pulsans. Tertiò, potest intelligi de externis vocationibus, quibus vel per se ipsum, vel per creaturas peccatores excitat Deus.*

Est hic aduertendū I. ad plenam huius quæstionis intelligentiam, & solutionem multarum obiectionum, Quod quando quæritur, An omnibus in vniuersum detur auxilium sufficiens: Est sub distinctione respondendum; *Nempe si dari, accipitur pro eo, quod est recipere, non omnibus auxilium sufficiens datur; si autem dare, accipitur pro eo, quod est offerre, omnibus datur auxilium sufficiens.*

II. Est aduertendum, Quod loquendo de omnibus creaturis in vniuersum siuè de Angelis, siuè de primo Parente, siuè de pueris, qui sine baptismo decedunt, siuè de adultis infidelibus, siuè de fidelibus peccatoribus, siuè de iustificatis; semper verificatur, quod ex defectu eorum est, quod auxilium efficax non habeant; sicut dictum est de auxilio suffici-

ti : & quòd prima causa defectus gratiæ est ex nobis , & illi gratia priuantur, qui gratiæ impedimentum ponunt. *Vnde* distinguunt aliqui hæc instantia rationis. Primò, Deus dat auxilium sufficiens. Secundò, in collatione sufficientis auxilium efficax homini offert. Tertiò, homo sua praua voluntate sufficienti resistit. Quartò, in pœnam ob talem culpam Deus hominem priuat efficaci. *Non* nego autem, quòd impedimenta, quæ ab ipsis opponuntur ; sunt diuersa ; nam impedimentum Angelorum fuit ex nimio affectu ad propriam excellentiam ; & primi Parentis ad uxorem propriam : & sic initiatiuè culpam commiserunt , & deficere ceperunt : completè autem fuit consummatum peccatum , cum Angelus ad se ipsum se, tamquam ad finem conuertit ; & homo de ligno prohibito contra Domini præceptum comedit : Vnde eodem præcepto , quo Angelus tenebatur se in Deum conuertere, & homo de ligno prohibito non comedere, vterque tenebatur omnia impedimenta contraria illi conuersioni, & præcepto cuitare ; & sic tenebatur vterque illum nimium affectum, qui occasio peccati fuit, non habere : vnde initiatiuè culpam, commiserunt, & deficere ceperunt ; ideo eis denegatum fuit auxilium efficax. *Pueris* autem decedentibus sine baptismo negatur in pœnam peccati originalis. *Infidelibus* adultis, in quibus infidelitas est negatiua, in pœnam similiter peccati originalis ; in quibus autem infidelitas est positiua, & contraria, negatur, & propter peccatum originale , & propter alia peccata actualia. *Hoc idem* dicimus de obcæcatis, & obduratis ; in pœnam scilicet peccati originalis, & actualis. *Homines* autem iustificatis, qui habent auxilium sufficiens ad perseuerandum, si fuerint prædestinati , negatur aliquando efficax, vltra rationes assignatas, peccati scilicet originalis, vel actualis ; vt cadentes feruentius resurgant.

Solet hic exagitari illa satis celeberrima quæstio de gratia Sufficiente, & Efficaci an scilicet auxilium sufficiens distinguatur ab efficaci, à consensu voluntatis creatæ ; ita vt auxilium sit efficax in vno, quia voluntas consentit, inefficax in alio, quia non consentit ; an verò distinguatur realiter ante consensum voluntatis creatæ, & cooperationem liberi arbitrii, ita vt gratia sit efficax ex Deo ipso, eiusque omnipotentia, quæ in bonum inflectit hominum voluntates, faciendo eas inuictissimè velle ; & dicatur inefficax, etiam pro vt à Deo, venit ante omnem humanum consensum. Sed hanc celeberrimam quæstionē tanta gloria à Thomistis coram Summis Pontificibus Clemente VIII. & Paulo V. propugnata, silentio prætermittendam censui ; ne contra debitam Christi Vicarij legibus obseruantiam, hanc quæstionem interdicentibus, typis mandari aliquid faciamus : quidquid enim de hac inuictissima Dei gratia à Sanctissimorum Ecclesiæ luminum, Augustini, & Thomæ discipulis sentiendum sit, faciliè colligitur ex ijs, quæ in Tractatu de Voluntate Dei circa decreta efficacia summarie perscrinximus.



TRACTATUS VII.

De Fide, Spe, & Charitate.

Et primò, quid sit Fides.

QVASI immensam infinitę materię amplitudinem breuitati vnicę studentes, intra huius tractatus angustias explicandam aggredimur. Siendum quòd Fides diuina; de hac enim loquimur, est actus, vel habitus intencionalis, quo credimus Deo reuelatas veritates, propter eius autoritatem, & testimonium, seu loquutionem. Fidei descriptionem tradidit Apostolus ad Hebraeos 10. dicens, *Est autem Fides sperandarum substantia rerum, argumentum non apparentium.* Dicitur, *substantia*, idest fundamentum, & basis rerum omnium supernaturalium; dicitur, *Argumentum*, idest probatio, seu coartutio; dicitur vltimò, *Non apparentium*, idest rerum, quę non videntur, neque in se ipsis, neque in suis causis, aut effectibus euidenter cognitis.

Potest breuius definiri Fides, *Assensus intellectus ob testimonium Dei loquentis.* Obiectum assensus intellectus aliud est materiale, aliud formale; materiale est illud verum, cui intellectus assentitur propter aliud: sic obiectum materiale Fidei sunt res credendę. Obiectum formale est illa veritas, quam, vel intellectus approbat ratione sui; vt omne totum est maius sua parte; vel qua cognita, & approbata inducitur ad approbandam alteram: sic obiectum formale Fidei est veritas, & testimonium Dei; quia credere in omnium sententia, non est præcisè assentiri ijs, quę alius dicit; sed quia dicit cum tali præcellentia; vt dignus sit, vt ei præbeamus assensum.

Quodnam sit obiectum formale Fidei?

Controuertitur hic grauissima difficultas, quę torset, ac torquet ingenia Theologorum, in assignando obiectum formale motuum, seu vltimum motuum, quod mouet intellectum ad firmissimè assentiendum Fidei; & difficultas oritur ex eo, quòd licet sit verum euidenter, quòd si aliquid Deus dicit, verum dicit; non est tamen euidenter verum, nec ex terminis notum, quòd illud dixerit. v. g. credis Deum esse vnum in essentia. Trinum in personis; quia Deus verax id reuelauit: sed quæso peto à te, vnde nosti Deum id reuelasse; cum hoc non sit per se notum,

rum, sed obscurum? Si dicis, quia Ecclesia Romana verax in suis dictis hanc reuelationem proponit; adhuc impugnaberis: vnde quæso tibi constet, quòd Ecclesia Romana, seu cætus hominum profitentium veram religionem, sit verax, & quòd neque fallat, neque fallatur in proponenda huiusmodi reuelatione? Assigna igitur motiuum infallibile, cuiusmodi non est humana autoritas, quatenus talis. Si dicis, quòd motiuum hoc infallibile, est, quia Deus verax reuelauit, se assistere Ecclesiæ, ne erret; ecce manifestum circulum vitiosum: quia credis Deum esse Trinum, & vnum, quia Deus verax dixit: credis Deum dixisse; quia dixit Ecclesia verax: tandem credis Ecclesiam esse veracem; quia Deus dixit; ergo à primo ad vltimum, credis Deum dixisse, esse Trinum, & vnum, quia Deus dixit. *Hic igitur est nodus Gordianus*: vnde totus huius disputationis conatus erit in assignando hoc vltimo motiuo, quod mouet intellectum ad infallibiliter assentiendum, Deum esse vnum, & Trinum v.g. vnde scilicet nobis constet, Deum dixisse, se esse vnum, & Trinum, seu quo motiuo affirmamus, Deum reuelasse, se esse vnum, & Trinum? cum id non sit notum euidenter ex terminis, neque experientia, neque euidenter per discursum; alioquin euident esset mysterium credendum Trinitatis; & sic nemo posset mysterio reuelato dissentire.

Sed antequam decidamus, quod nam sit obiectum formale suauum huius assensus; Ad plenam intelligentiam quæstionis, & ad multarum obiectionum solutionem, oportet prænotare. I. Quòd reuelatio est loquutio; qua Deus creaturam alloquitur; & sic in præsentī reuelatio, & loquutio pro eodem sumuntur. Loquutio in abstracto sumpta benè definitur, Est prolatio signorum, per quam proferens donat alteri ius ad veram notitiam obiecti alicuius: loquutio, qua Deus loquitur homini, erit externa, si habetur prolatio signi sensibilis, cuiusmodi sunt sonus, &c. erit autem interna, sed imaginaria, si fit per imagines, & phantasmata materialia in phantasia; erit loquutio intellectualis interna, si habetur productio intellectus, & sanctæ illuminationis manifestatiuæ obiecti, & ordinationis diuinæ. II. Loquutio supernaturalis, de qua loquimur, quæ est prolatio signi ordinata à Deo de dando ius alicuius notitiæ, naturæ creatæ omninò indebitæ, & supra eius exigentiam; alia est immediata, alia mediata: immediata est, qua Deus per se ipsum aliquid dicit, & reuelat; mediata, qua aliquid dicit per aliam personam, Angelum v.g. aut Apostolos: quando Deus loquitur per Internuntium, non est necesse prius propalare suam mentem ipsi Internuntio, sed sufficit, quòd Deus mandet Internuntio rem dicere nomine suo. III. Non est necesse loquutionem proponi immediatè ab ipso Deo; sed satis esse, si fiat mediatè per alium, qui nomine Dei loquatur. Neque requiritur propositio immediata Ecclesiæ, aut Pontificis; sed sufficit, quòd mysteria Fidei per aliquem priuatum instructorem nomine Dei, aut Ecclesiæ proponantur. IV. Ad assentiendum Fidei diuinæ prærequiri, tamquā con-

conditionem necessariò requisitam, quemdam assensum fidei humanæ; quo credimus Prædicatori, aut sacris Scriptoribus proponētib; mysteria, tamquam diuina: legitur enim *Ioannis 4. Multi crediderunt in eum propter verbum mulieris testimonium perhibentis; quia dixit mihi omnia. his prænотatis*

Dico, Obiectum formale motiuum, quod mouet hominem doctum, & eruditum ad assentiendum existere diuinam reuelationem præteritam, est, & resoluitur in humanam authoritatem, & testimonium Ecclesiæ, pro vt est confirmatum extrinsecis signis credibilitatis miraculorum; martyriorum, &c. Obiectum verò formale motiuum puerorum, ac rudium, quod mouet ipsos ad assentiendum Fidei humanæ, resoluitur in authoritatem humanam Parochi, parentis, aut alterius instructoris. *Ratio* discriminis est, quia rudes, & idiotæ reputant Parochum pro viro docto; sicut pueri reputant parentes, quibus scilicet probè cognita sint ea, quæ vt à Deo dicta proponunt: ex alio capite ipsis lumine naturæ constat, quòd ignorantes, quales se esse sciunt, debent in omnibus, & præsertim in rebus obscuris, pertinentibus ad conscientiam, & ad Fidem, stare iudicio, & instructioni doctorum, quos ipsis Deus dedit, vt magistros, ideoque prudentissimè super Parochi, & Parentum authoritatem conualescunt. *Contra* verò eruditi; quia alijs notitijs imbuti habent species, vnde dubitent, nec plurimi faciunt scientiam, & authoritatem Parochi, sicut rudes; & sic docti resoluunt suam fidem humanam, & acquisitam, tã in testimonium, & authoritatem Ecclesiæ, pro vt coniuncta tot signis credibilitatis, quàm in diuinam providentiam, cuius est non permittere, quòd creaturæ rationales sincerè quærentes veram religionem, incidant in errorem prudenter inuitabilem.

Nota tamen I. Quòd fides hæc humana, & acquisita, est conditio formalis, necessariò præuia ad assensum Fidei infusæ; non tamen principium per se illius: sicut motiua credibilitatis humanæ se habent, tamquam conditio obiectiua, ad eandem Fidem acquisitam. *Nota* II. Non est nouum, quòd actus supernaturalis pendeat, tamquam à conditione, & dispositione ab aliquo naturali.

Obiectum verò motiuum formale, in quod ultimò resoluitur assensus Fidei diuinæ, & infusæ, est ipsa existentia reuelationis præteritæ; proposita immediatè per illustrationem suauam spiritus sancti. Quia Deus ex vna parte ad propositionem Parochi v.g. obscurè suauem actum fidei humanæ, potest infundere apprehensionem obscuram; idest obscurè suauem existentiam reuelationis præteritæ, factæ Prophetis, Apostolis, &c. quinimò euidentem, & claram, inductiuam in assensum euidentem; cum omnis apprehensio clara, & euidenter determinet ad affirmationem euidentem: Ex alia verò parte posita apprehensione obscura suauem, &c. potest intellectus erumpere in assensum obscurum talis veritatis immediatè propter ipsam, non attendendo ad aliud motiuum, vnde originem

habuit talis apprehensio; sed in casu nostro Deus supernaturaliter immittit illustrationes supernaturales per modum apprehensionis, quæ habet vim suadendi veram, & realem existentiam revelationis præteritæ, v. g. de Incarnatione Verbi; vna semel, quod hæc revelatio naturaliter innotuit per species naturales, genitas à loquutione Parochi, vel Ecclesiæ, &c. ergo posita tali apprehensione suavis diuinitus infusa, potest intellectus assentiri immediatè existentiz revelationis præteritæ propter ipsam.

Hinc reiicio I. sententiam aliquorum Recentiorum, assentientium, Obiectum formale motiui, & suadens existentiam diuinæ revelationis de mysterijs nostræ Fidei esse summam Dei auctoritatem, & veritatem in dicendo; Quia licet veritas diuina sit mouens ad assensum conditionatum, si existat, nullo tamen modo persuadet absolutam existentiam, talis revelationis, potest enim Deus habere summam necessitatem ad dicendum verum, si aliquid loquitur; & tamen nihil loqui: vnde igitur probas, Deum loquutum fuisse?

Reiicitur II. sententia illorum, qui dicunt, Quod assensus Fidei resoluitur in diuinam revelationem, quæ creditur propter se absq; vilo motiuo: Si enim hoc esset verum, posset vnusquisque pro suo libito opinari, quod vellet, & lætari de quocumque obiecto, quod vellet; etiam si nullum appareat motiuum: & sic sine vilo indicio posset lætari aliquis, habens fratrem in bello, quod esset creatus Generalissimus exercituum: Insuper contradicit experientiz; nam licet conemur; nemo tamen nostrum potest assentiri, quod sidera v. g. sint paria; quia intellectus est potentia rationalis potens reddere rationem de suis assensibus.

Reiicimus III. illos, qui docent, Obiectum formale motiui vltimū esse auctoritatem infallibilem Ecclesiæ, ortam ex assentientia Spiritus sancti, dicentes, Quod ratio, quare credimus Deum dixisse mysteria nostræ Fidei, est, quia Ecclesia, cui assistit Deus, ne fallat, aut fallatur, dicit Deum hæc mysteria reuelasse. Sed queso puto à te, quo motiuo ductus, affirmas, Deum assistere Ecclesiæ suæ, seu Deum reuelasse hanc assentientiam? Si recurris ad aliam reuelationem æquè obscuram, reddit eadem quæstio de hac secunda reuelatione, & sic abibimus in infinitum. II. Angeli, Adamus, Apostoli, &c. crediderunt, & non ex propositione Ecclesiæ; quia tunc non existeret huiusmodi propositio; primi enim crediderunt Deo immediatè reuelanti; secundi verò Christo docenti.

Reiicimus IV. sententiam illorum docentium, Motiui vltimum esse propositionem Ecclesiæ, pro vt est Respublica quadam hominum profitentium veram Fidem, vel pro vt est congregatio hominum profitentium, vel pro vt est munita signis credibilitatis, nempe miraculis, miraculis, &c. Sed contra istos modos soluendi huiusmodi prædictæ testimonia sacratum Scripturarum; habemus enim 1. ad Corinth. Prædicatio mea,

mea, non in persuasibilibus humana sapientia verbis, &c. ut Fides nostra nō sit in sapientia hominum, sed in virtute Dei. Et 2. ad Thessalonicenses: Accipietis illud, non ut verbum hominum, sed ut verē est Verbum Dei. Secundo, Vnde scis, hos homines habere veram Fidem de vero numine? Si respondeas; quia id ipsum dicit ceteris istorum hominum; explicas idē per idem. Tertiō, Omnis multitudo hominum, quantumvis prudentum, & doctorum, nec non heroicę sanctitatis secundum se fallere, & falli potest, præsertim circa res altissimas.

Reijcimus V. sententiam illorum, qui resoluunt Fidem in testimoniū mediātum Dei, quo Deus loquitur unicuique nostrum per testimonium aliorum, & in alia signa credibilitatis. *Et sic dicunt, Credo v.g. Incarnationem; quia Deus reuelauit Apostolis, credo Apostolis reuelasse; quia Deus mihi loquitur per ista, & ista signa, quæ cadunt sub meam euidētem experientiam. Displicet hæc sententia; quia re ipsa Fides resolveretur in auctoritatem humanam, & fallibilem; Nam quod detur hæc propositio Parochi v.g. de Incarnatione Verbi talibus signis, & miraculis communita, non innotescit, nisi ex auctoritate hominum; ergo existere absolūtē loquutionem mediātam Dei, non cōstat aliunde, quam per auctoritatem hominum.*

Nota I. Quod ad hoc, ut Fides alicuius principij, v. g. de Trinitate sit Theologica, sufficit, quod attingat formaliter, ac propter se aliquod increatum; esto simul etiam attingat aliquod creatum, tamquam obiectum formale, ac propter se: quemadmodum ex eo, quod Christus Dominus componatur intrinsecē, & partialiter ex natura creata; non sequitur ipsum non esse personam diuinam. Nota II. Quod est falsum illud, quod dicit quidam recentior, Quod reuelatio se habet, ut conditio, & applicatio; non verō, ut motiū formale; *Quia non se habet, ut putat iste, sicut apprehensio terminorum respectu iudicij quæ non mouet, sed applicat; Ratio est, quia ideo negatur, quod apprehensio sit motiū iudicij, quia ipsa non cognoscitur sed facit, ut quo apparere obiectum motiū iudicandi; at verō reuelatio diuina cognoscitur, licet obscure.*

Nota III. Quod licet per nos resoluatur certitudo nostræ Fidei in illustrationem, & inspirationem diuinam, tamquam in motiū quo, seu rationem qua reuelatio publica moueat intellectum creditur; tamen huius inspirationis habemus aliam regulam externam, nempe sensum Sanctissimæ Ecclesiæ, talibus signis, & notis extrinsecis confirmatum; ut conscientia euidenter dicat esse credendum. Et per hoc aduersatur nostra conclusio hæreticis, qui dicunt, Iudicem controuersiarum à Depositum non esse Ecclesiam, Pontificem, vel Conciliū; sed spiritum internum vniuscuiusque electi, per quem electus proposito aliquo articulo credendo statim dignoscit, an sit à Deo traditum; quidquid in contrarium dicat Ecclesia. *Per nos igitur non potest non esse diuinitus immissa*

illustratio, & inspiratio illa, quæ suadet assensum; tñm propter revelationem propositam ab Ecclesia, tñm propter signa prædicta, tñm propter privatum instinctum, & conscientie dictamen; quinimò omne tollitur errandi periculum. *Nota IV.* Quòd hæc illustratio percipitur, quatenus est quædam interna suasio revelationis diuinæ præterit; licet non percipiatur, vt supernaturalis; sufficit enim, quòd distinguatur talis assensus ab omni alio, quod non est Fidei; cognoscimus enim asseptiri mysterio; sed non discernimus, an fiat per actum supernaturalem; sed de hoc habemus, vel probabilitatem aliquam, vel ad summum moralem, aliquam certitudinem.

Communitè iudicatur ab omnibus Catholicis esse de Fide, contra Priscillianistas, Quòd Deus naturaliter mentiri non potest; imò à multis reputatur, etiam de Fide, quòd nec de potentia absoluta Deus mentiri potest. Præter quamplurima Scripturæ, & PP. testimonia, aperte hoc idem scribit D. Paulus ad Hebræos 6. *Vt per duas res immobiles, quibus impossibile est, mentiri Deum, fortissimum solatium habeamus. Suffragatur ratio; Quia mendacium est intrinsecè malum, & quæ intrinsecè sunt mala, non possunt vlla circumstantia fieri bona; ergo Deus non potest illud admittere. Insuper si Deus posset saltem diuinitus mentiri, vacillaret rota nostra Fides; possemus enim semper dubitare, an defacto vñs fuerit ea potentia mentiendi. Nec etiam Deus per alium mentiri potest Nam moraliter loquendo, idem est dicere aliquid per alium meo nomine loquentem; accidere per me ipsum; in vtroque enim casu ego loquor moraliter. Vnde benè D. P. August. lib. 1. de Symbolo cap. 1. ait, *Mori non potest, falli non potest, mentiri non potest, intellige.* Si legitur in 22. Regum: *Dedit Dominus spiritum mendacij in ore omnium Prophetarum, &c.* hoc fuit permissiuè, non aliter. Sicut etiam, quando Deus defacto dixit se multa facturum; quæ tamen postea non fecit; vt est illud Ioan. 3. *Adhuc quadraginta dies, & Nimue subuertetur.* Semper similes comminationes intelligi conditionaliter, quod genus Prophetiæ non debet impleri, si ille cui fit comminatio, pœnitentiam agit.*

Vtrum Fides possit stare cum euidentiā in attestante?

Potesse stare Fides cum euidentiā in attestante: euidentiā in attestante est certa, & euidens cognitio, Deum esse summæ veritatis in loquendo; sed hoc verificatur in viris doctis, qui cum euidenter sciunt, Deum esse summæ veritatis in loquendo; tamen credunt; quia reuelatio non est euidens; quia supponimus, quòd ipsa obscure cognoscatur; ergo &c. vnde videmus, quòd Fides humana est simpliciter obscura, eo quòd licet loquutio euidenter pateat; tamen est veracitas hominis loquentis. *Potesse etiam stare Fides cum euidentiā reuelationis, & obscuritate in attestante; id est cum autoritate Dei obscure proposita; & hoc de poten-*

ria Dei absoluta; Si enim Deus infunderet rustico notitiam euidentem suæ reuelationis; sed non haberet naturalem euidentiam, Deum esse summæ veritatis in loquendo; in isto casu haberetur Fides cum euidencia reuelationis, & obscuritate in attestante.

Quamuis non possimus habere euidentiam physicam loquutionis humanæ, nisi videamus ipsum hominem loquentem; non sequitur, quod non possimus habere euidentiam diuinæ loquutionis, non viso intuitiue aliquo prædicato diuino. Quia ideo non possimus habere physicam euidentiam vocis Petri v.g. nisi ipsum videamus; quia nos non percipimus euidenter ordinem essentialem, quem loquela Petri dicit ad ipsum Petrum; sed tantum percipimus sonum illum materialem, imitabilem ab alijs: Vnde nisi intueamur Petrum, eiusque motum labiorum, & sonum vocis audiamus, non reddimur physicè certi, quod loquatur ipse Petrus, & non alius, qui eius vocem fingat; at verò in casu nostro homo videret intuitiue ordinem essentialem, quem dicit signum à Deo productum ad eundem Deum loquentem; & consequenter certificaretur de loquutione interna, & actiua Dei per species creatas, & abstractiua illius signi.

Cum euidencia reuelationis, & veracitatis Dei loquentis non potest stare Fides, sed cognito euidenter, quod Deus sit summæ veritatis in dicendo, & quod reuelat v.g. Incarnationem, necessitatur intellectus ex vi huius motui ad affirmandum, quod verè datur Incarnatio Verbi: Quia ad hoc, ut assensus aliquis sit scientificus, sufficit, quod sit euidenter illatus ex præmissis euidentibus; sed ille consensus v. g. de Incarnatione Verbi est illatus ex præmissis euidentibus, nempe de euidencia reuelationis, & veracitatis Dei loquentis; ergo, &c.

Nota I. Loquendo de possibili, aliqui probabiliter sustinent, restare posse in Patria habitum Fidei, non quidem ad eliciendos actus imperfectos, & obscuros, quales sunt nostri, qui communiter concipiuntur à viatoribus, de quibus loquuntur Patres, negantes Fidem Beatis; sed pro alijs actibus perfectis, & clavis in attestante. Nota II. Quod assensus innixus reuelationi, & veracitati Dei clarè visi, malè ab aliquibus vocatur Fides; nam Deus ipse habet euidentiam suæ veracitatis, & suæ reuelationis; & ex eis duabus noscit sequi existentiam mysterij reuelari; & tamèn nemo dicit, Deum adhibere Fidem suis proprijs dictis. III. Quando SS. PP. dicunt, Fidem esse credere, quæ non vides; & Apostolus, *Fides est argumentum non apparentium*: Vel dic illos interpretandos esse de actu communi Fidei, pro vt est nunc; non autèm de possibili: sicut de eadem Fide communi loquuntur PP. & DD. dum asserunt, Assensum Fidei esse liberum, & meritum: vel potest responderi, Quod verificatur cumlatiue, non exclusiue: sicut cum Fides dicitur, substantia, seu basis rerum sperandarum; non negatur, quod sit etiam fundamentum tuncendorum.

Virum repugnet simul esse in eodem intellectu actum Fidei, & Scientiæ, vel Opinionis?

Potest connaturaliter actus Fidei stare simul cum cognitione scientifica demonstratiua eiusdem obiecti: est D. Tho. 2.2. *quest. 5. artic. 1.* cuius argumentum sic in formam redigi potest: Angelus, & homo initio suæ creationis habuerunt actualem scientiam de existentia Dei; quia fuerunt creati in statu perfectio; sed etiam de eadem existentia habuerunt Fidem actualem; ut constat ex verbis Apostoli, *Accedentes ad Deum oportet credere, quia est*; ergo cum illi in prima sui conditione fuerint in statu accedendi ad Deum, & defacto accesserunt, debuerunt habere Fidem de existentia Dei, si non mysterij, saltem principij.

Potest etiam actus Fidei quantum est de se, non solum componi connaturaliter cum cognitione scientifica abstractiua eiusdem obiecti materialis, ut supra; sed etiam potest componi cum notitia euidenti intuitiua eiusdem obiecti materialis; Quia licet actus Scientiæ, & Fidei sint diuersi; nullam tamen contrarietatem, aut oppositionem habent, respectu eiusdem intellectus, & circa idem obiectum materiale; non enim opponuntur ratione obiecti materialis; quia hoc est idem respectu vtriusque; neque ratione obiecti formalis; quia adhuc supponitur obiectum formale obscure cognosci posse, dum intuitiue cognoscitur obiectum materiale; neque opponuntur ratione modi tendendi; quia scilicet alter obscure, alter clare in obiectum feratur; nam actum Fidei esse obscurum, & actum scientiæ clarum, nihil aliud importat, quam dari in eodem intellectu duæ formæ essentialiter diuersæ, quarum vna necessario, & essentialiter habeat aliquod prædicatum, quo caret essentialiter altera; sed potest idem subiectum recipere duas formas, quarum vna essentialiter habeat prædicatum, quo caret essentialiter altera: Frigus enim, & albedo sunt in eadem niue; & tamen frigus est essentialiter exclusiuum formale caloris, quod non habet albedo. *Addo*, Quod est valde probabile B. Virginem intra statum viæ vidisse clare Deum, & hoc accidisse in instanti Incarnationis Verbi; ut colligitur ex D. Bernardo, & Antonino; sed in diuina Essentia nihil aliud videre poterat potius, quam quod ipsa in eodem instanti erat Virgo, & Mater; ergo cum in eodem instanti visionis habuerit Fidem; sequitur, quod Fides cum visione intuitiua, & perfectissima stare possit.

Potest actus Fidei simul componi cum Scientiæ, & Opinione: Vnde idem assensus potest esse Fidei, Scientiæ, & Opinioni circa idem obiectum materiale. Quia potest voluntas vnico actu velle idem obiectum materiale, v.g. eleemosynam, propter diuersa motiua; nempe propter motiuum misericordiz, & propter motiuum charitatis; ergo etiam intellectus poterit assentiri eidem obiecto, per vnicum, & indiuisibilem assensum.

assensum, propter motiuum Scientiæ, Opinioni, & Fidei. Nam si repugnaret, concurrere ista motiua diuersa, nempe Fidei, Scientiæ, & Opinioni ad eundem actum eliciendum; vel esset, quia sunt plura, vel quia sunt totalia, vel quia sunt opposita: Non quia sunt plura; quia videmus, quòd intellectus elicit assensum conclusionis ex duplici obiecto præmissarum, tamquam ex duplici motiuo; Neque quia motiua sunt totalia, & adæquata; quia defacto quando proponuntur simul intellectui aliqua mysteria credenda, quæ pluribus reuelationibus sunt reuelata; intellectus vnico actu assentitur propter omnes; cum non sit maior ratio, cur intellectus assentiatur potius propter vnā, quàm propter aliam reuelationem. Neque repugnat, quia ista motiua sunt opposita; in quantum scilicet motiuum Scientiæ induceret euidētiā, & motiuum Fidei ineuidētiā: ratio est, Quia actus iste qui simul esset Scientiæ, Fidei, & Opinioni, non foret absolutè certus, & incertus, euidens, & ineuidens; sed esset absolutè certus, & euidens; & tantum præcisus, & secundum quid incertus, & ineuidens; nempe ratione luminis fidei, & opinatiui; in hoc enim nullam video repugnantiam; sicut sine vlla contradictione aer nunc est illuminatus simpliciter, & non est illuminatus secundum quid, nempe ab hoc ligno; adhuc enim vt actus absolutè denominatur incertus, & ineuidens, requiritur, quòd nullam habeat certitudinem, & euidētiā ex illo prorsus capite.

Nota I. Quòd nos loquimur de assensu opinatiuo, qui non sit formaliter, vel saltem deliberatè dubitans; quia cum Fide supernaturali non potest stare formalis, & deliberata formido. II. Verum est, quòd Fides debet esse libera, & meritoria, & talis etiam esset cum consortio scientiæ, & euidētiæ; & licet Scientia necessitet intellectum ad assensum, quando motiuum est clarum, & scientificum; non vè o necessitat, quando nititur motiuo obscuro diuinæ reuelationis. Nota II. Quando D. Gregorius super illud Christi Domini, *Quia vidisti me Thoma, credidisti*, &c. dixit, *Aliud vidit, aliud credidit*: scilicet vidit eius humanitatem, & credidit Diuinitatem. Non negat D. Gregorius posse simul stare visionem, & Fidē; dicente Apostolo: *Viderunt, & crediderunt Christum mortuum*: sed solum vult D. Gregorius, quòd illa visio experimentalis non fuit ratio, & motiuum credendi; fuit solum conditio ad credendum; & ex hoc minuitur meritum; cum sit maius meritum credere nulla expectata experientia: vnde benè D. Gregorius homil. 26. in Euang. dixit, *Fides non habet meritum, ubi humana ratio præbet experimentum*.

Nota IV. Quòd tota oppositio visionis beatæ, & Fidei, non est physica, & ex natura rerum intrinseca: ita vt dicant essentialē, & intrinsecam impossibilitatem. sed est solum moralis, & ab extrinseco decreto Dei. Nec visio beata, & Fides se habent, vt putant aliqui, sicut lux, & tenebræ; sed sicut lumen maius, & minus; nempe lumen solis v.g. & lumen candelæ, vel stellæ; ideo appellatur Fides à D. Petro lucerna lucens,

cens, quamvis in loco caliginoso; candela autē, vel stella corā sole producit aliquid luminis in spatio infra suam spheram contento, quamvis à nobis non discernatur. *Neque Fides ad presentiam visionis est superflua; quia per actum Fidei supernaturalem perficitur intellectus, & voluntas moraliter. Neque Fides se habet ad scientiam etiam intuitivam, sicut medium ad finem; sed se habet, sicut amor viuis motui, & amor alterius motui circa idem obiectum materiale; & sic non sequitur, quod non possit intellectus adhibere ad possessionem Dei, Fidem obscuram, admittentem formidinem indeliberatam cum visione.*

Est concedendum illud, quod aliqui, impugnantes nostram conclusionem, dicunt, nempe actum Fidei esse certum, actum verò Opinionis incertum; hoc autem non importat repugnantiam, & impossibilitatem in ordine ad eundem intellectum; sed solum importat actus essentialiter diuersos, quorum vnus excludit à se certitudinem, quam alter in se continet. *Vnde ad evitandam questionem de nomine, Aduerto, conclusionem nostram, asserentem, Fidem posse componi cum Opinione; intelligenda est de actu opinionis, seu opinatio; nam assignatur discrimen inter opinionem, & actum opinatiuum; opinio enim est actus coniunctus cum formidine formali, quæ est impossibilis cum Fide, diuina essentialiter certa, excludente saltem ab extrinseco imperio voluntatis actualem, & formalem formidinem. Actus verò opinatiuus est assensus deductus ex motiuo probabili, non coniunctus cum actuali formidine, sed indifferens; vnde dicimus, quod Fides naturaliter stare potest cum actu opinionis, circa idem obiectum materiale.*

Aduerto hic I. Falsum esse, quod assumitur ab aliquibus, nempe, Quod si actus Fidei certus flaret cū actu opinionis incerto, intellectus esset, & non esset certus de eodem obiecto; *Quia ad denominandum intellectum absolute incertum, siue non certum, requiritur carentia omnis formæ, quæ sit certitudo intellectus idest carentia omnis certitudinis; & non satis est, quod in tali subiecto detur aliqua forma, quæ non habeat in se prædicata certitudinis; opinio enim, licet excludat à se certitudinem, non tamen excludit ab intellectu alium actum, qui sit certitudo; vnde in hoc nulla est oppositio; sicuti nulla est oppositio inter hæc duo, Angelus cognoscit solem sine medio per scientiam naturalem, & illum cognoscit per aliam scientiam supernaturalem visionis beatæ. Aduerto II. Quod verum est, quod omnis actus essentialiter connexus cum formidine sit essentialiter incertus; falsum tamen est, quod omnis actus essentialiter incertus dicat essentialem connexionem cum formidine; Actus enim opinatiuus non dicitur essentialiter incertus, nisi quia excludit à se essentialiter formidinem illam intellectualem, quæ competit actui certo.*

Aduerto III. Quod argumentum illud, quo aliqui probant impossibilitatem Fidei, Scientiæ, & Opinionis ex eo, quia, licet non possit dari per

per potentiam Dei absolutam tertium animal, quod simul sit bos; & equus, à boue, & equo distinctum; ergo neque tertius actus, qui simul sit Fidei, Scientiæ, & Opinioni; *Hoc argumentum* Inquam claudicat; quia, si sermo sit de predicatis, quæ ad inuicem non repugnant; ut sunt animal, viuens, corpus, &c. antecedens est falsum; possunt enim hæc prædicata coniungi in vnum tertium animal; sicut Fides, Scientia, & Opinio in vnum tertium actum; si verò sit sermo de prædicatis essentialiter, vel formaliter oppositis, est verum; sed hoc nihil probat contra nos. Si petunt utrum actus iste sit dicendus naturalis, an verò supernaturalis? Eli-go fore supernaturalem: vnde habitus naturalis scientiæ, & opinionis eleuaretur ab habitu Fidei infuse, vel ab auxilio Dei extrinseco ad influendum in actum supernaturalem, dicentem ordinem ad motuum Fidei: *Concludimus* ergo cum D. Thoma in 3. distin. 31. quest. 2. art. 1. *questiunt*. 1. ad 4. dicente, quodd *Opinio, & Scientia, quamuis sint de eodem, non tamen secundum idem medium, sed secundum diuersa, & ideo possunt esse simul*. Vnde nos asserentes, Fidem posse concipi cum Scientia, coherrentius insistimus principijs D. Thomæ, quàm ceteri homines hoc negantes.

Myseria, quæ independenter ab omni reuelatione possunt probari; vt Deum existere, esse vnum, immortalitas animæ, libertas voluntatis nostræ, &c. possunt dici per se euidenter credibilia; alia verò myseria, quæ sunt supra omnem rationem, vt myserium Trinitatis, Incarnationis, &c. non sunt euidenter in se credibilia, vt à reuelatione præcisa; quia nisi recurrendo ad reuelationem Dei, non possumus talia confirmare vlla ratione; nam credere dicit necessariò assensum erga reuelationem. *Euidencia* credibilitatis sumitur ab effectibus, & signis externis, ex quibus euidenter colligitur Religionem tot, & tantis credibilitatis argumentis stabilitam dignissimam esse, cui credatur. Præcipua credibilitatis signa sunt infra scripta.

De signis credibilitatis nostræ Fidei.

Primum signum, ex quo fit credibilis nostræ Fides, est veritas doctrinæ Catholicæ sine vlla admixtione falsitatis, cum in rebus omnibus, de quibus disse: it numquam à vero aberrauerit, & dil sit, quod Aduersarij vnuquam potuerint convincere mendaci: sicut etiam Sanctitas ipsius; cum nihil sit in ea contra bonos mores, & dictamina nature; quinimò reprobatur, quod turpe est. II. Signum est modus admirabilis, & efficacia doctrinæ Catholicæ per pauperulos Piscatores, & ideos antiquos vt eius iugo colla libentissime subiecerint, Imperatores, Reges, Philosophi, Sapientes, omnesque ferè Nationes orbis. III. Signum est firmitas, & incrementum fidei in persecutionum tempestatibus, & procellis, quæ quanto magis ingrauescebant, tanto magis nouo lumine pollulabat Ecclesia.

clesia, vt extat innumerabilium, & gloriosissimorum Martyrum testimonium, quod contra omnes inferorum portas praeualuit. IV. Signum credibilitatis praebent myracula, & prodigia multitudine innumera à Christo, eiusque discipulis, & alijs sanctis viris editis, quae cum fuerint per omnia saecula, in omnibus nationibus patrata; quinimò quia multa desumebantur ex manifestatione secretorum cordis, vbi nec ars demonis, nec fictio potest latere; manifestè colligitur, ea non ficta, & inania; sed vera, solidaque fuisse. V. Credibilitatis signum desumitur à multitudine testium; vt sunt vaticinia Prophetarum, & oracula Sybillarum, cum illæ Christi, & humanæ Redemptionis præcipua mysteria pronuntiarint, & scripserint; vt videre est apud P. Gonet in tom. 4. disp. 1. de Fide §. 8. num. 255. fol. 242. VI. Credibilitatis signum desumitur ex infelici plerumque hæresiarcharum exitu, qui Fidem Catholicam oppugnaverunt: sicut etiam de omnibus plerisque alijs eius persecutoribus, & Tyrannis. Hæc sunt præcipua credibilitatis nostræ Fidei argumenta: sunt etiam, & alia, quæ clarè, & fusius possunt videri apud Auctores, qui de ipsis scripsere.

Virum præceptum Fidei obliget?

Præceptum negatiuum Fidei, quod est non discredendi obiecta reuelata à Deo, obligat omnes semper, & pro semper, ad assentiendum omnibus, quæ Deus reuelauit, & ab Ecclesia sunt proposita: excusantur autè à peccato, illitterati, negantes ob ignorantiam inuincibilem ea, quæ alioqui de Fide certa sunt. *Præceptum* autem positiuum, quod est habendi actus aliquos Fidei circa Deum ipsum, & mysteria ab ipso reuelata, obligat fideles omnes, ad credendum omnes Articulos in Symbolo Apostolorum contentos: & quamuis articulus ille Communionis Sanctorum, in symbolo contentus, sit captu difficilis rusticis; attamen ipsum credere deprehenduntur; quia quamuis significationem vocis ignorant; sciunt autem rem significatam, & ipsam credunt; dum sæpe petunt intercessionem Sanctorum, & vt alij pro ipsis Deum orent.

Non omnia mysteria, quæ Ecclesia solemniter celebrat necessitate præcepti credenda sunt; solemnitas enim Præsentationis Christi in templo, Epiphaniæ, missio visibilis Spiritus sancti, &c. non obligat, nisi ad audiendum ea die sacrum, & ad non laborandum. *Item* cum omnes fideles teneantur præceptis Decalogi, & Ecclesiæ, omnes tenentur illa addiscere: sicut etiam Sacramenta Baptismi, Pœnitentiæ, & Eucharistiæ; quas videlicet dispositiones exposcant, & quem fructum ferant; Quia tenentur hæc sacramenta recipere: Reliquorum sacramentorum notitiam non esse sub præcepto multi docent; sentio autem sub graui culpa omnes teneri orationem Dominicam scire,

Quomodo Fides sit necessaria ad salutem ?

Est apud omnes Catholicos certum, Fidem esse necessariam simpliciter necessitate medij ad salutem: dicitur aliquod necessarium necessitate medij ad salutem, quod requiritur ad exiundum à peccato, & ad acquirendam primam gratiam, sine qua salus non potest obtineri: Sicut dicitur aliquod necessarium necessitate præcepti, quod requiritur præcisè ad non peccandum de nouo; excusat autem, vel impotentia in aliquo, vel ignorantia inuincibilis: omnia, quæ sunt necessaria necessitate medij ad salutem, sunt etiam necessaria necessitate præcepti; non verò omnia, quæ necessaria sunt necessitate præcepti, sunt necessaria necessitate medij.

In omni statu necessaria est necessitate medij Fides explicita Dei, vt existentis, & vt remuneratoris; idest, qua Deus explicitè, & distinctè, vt talis cognoscatur: Sicut ante primam Euangelij legationem fuit necessaria saltem necessitate medij Fides implicita Trinitatis, Christi Redemptoris: An verò modò post Euangelij promulgationem sit necessaria necessitate medij ad salutem Fides expressa, & explicita Mysteriorum Trinitatis, & Incarnationis, difficilius est definire; cum sententia affirmatiua, quàm negatiua sit innixa autoritatibus plurium Doctorem; & cum pro vtraque Angelici Doctores sententia videatur stare; quæ rem dirimeret: si clarè constaret sensus tanti Doctores, & Præceptoris.

Actus internus Fidei supernaturalis est omnibus adultis simpliciter necessarius necessitate medij ad salutem; taliter, vt sine illo iustificari, & saluari non possint secundum legem ordinariam; vnde sine fundamento ab aliquibus asseritur, Quòd homo, qui solam cognitionem naturalem haberet, in ipso esset Fides supernaturalis in voto, & desiderio; Quia cum Fides sit primum salutis fundamentum, nihil est prorsus, in quo votum, & desiderium Fidei fundari possit. *Nota*, Quòd lex antiqua, & prima, non idè dicebatur naturæ; quia nullum tunc esset præceptum supernaturale; Sed quòd nullum tale exterius scriptum, & determinatum contineret: Vnde benè dicit Soto, præceptum diuinum Fidei, Spei, & Charitatis inspiratum fuisse Adæ, & deinceps per Patres suæ posteritati.

Si aliquo tempore vitæ suæ teneatur homo Fidem suam profiteri (ad quod non est dubium propter Dei revelantis auctoritatem ipsum obligari) illud est tempore baptismi; cum enim tunc fiat membrum visibile visibilis Ecclesiæ, debet in se signum visibile ipsius incorporationis edere, & profiteri: Dantur etiam alij casus, in quibus præceptum affirmatiuum de Fide exterius profitenda obligat fideles. *Non* nego tamen esse licitum fugere, vel se occultare tempore persecutionis; nisi fuga vergat in contumeliam Dei; cuiusmodi fortè fuit Apostolorum fuga Christū deserventiū: Vel si fuga censeatur esse Fidei negatio; cuiusmodi fuit se-

secessio vniua ex quadraginta Martyribus è flagno frigido in calidum.

Quando vestes, & signa, quibus vtuntur Gentiles, non sunt per se primò instituta ad protestationem Religionis, sed tantum lege politica, induc̃ta ad commodiorem conuersationem inter homines; licet rei illis signis, & assumere possunt fideles eorum vestes ad occultandam Fidem; etiam si lege aliqua politica sint destinata ad distinguendos fideles ab infidelibus; excepto, si his, qui hæc induxit, voluerit inducere obligationem, medijs his profitendi Fidem. *Ex hoc* infertur, non peccare Catholicos Angliæ, qui ad se occultandum vescuntur carnibus diebus veneris, & in quadragesima; licet talis esus fuerit introductus in Angliam, ad protestationem libertatis Euangelicæ; quia abstinentia à carnibus his temporibus, est tantum iuris positium, & Ecclesiastici; quod secundum omnes in tam graui periculo non obligat.

Traduntur aliqua circa habitum Fidei.

H Abitus Fidei amittitur ex triplici capite, I. Per peccatum infidelitatis. II. Per aduentum luminis gloriæ. III. Per æternam damnationem: & sic propter primam rationem omittitur ab hæreticis, propter secundam à Beatis, propter tertiam à damnatis. *Vnde* colligimus I. Subiectum adæquatum Fidei non esse, nisi hominem viatorem, & Angelum; quia Angelis secundum se ante beatitudinem potuit esse Fides. Colligimus II. Quòd in damnatis non remanet Fides supernaturalis, quia ab illis Deus aufert omnia dona, & perfectiones supernaturales; remanet solum in illis Fides naturalis de omnibus illis mysterijs, quæ crediderunt in ea, & de hac Fide naturali intelligendus est S. Iacobus, dum dicit, dæmones credere, & contremiscere. *De animabus* Purgatorii conaturalius dicitur in eis durare Fidem, tunc primò cessaturam, cum in statum beatitudinis peruenerint: indigent enim ea ad omnes actus bonos supernaturales, quos tunc efficiunt; quamuis nullum meritum de nouo per illos habent.

Sola Fides sufficit ad constituendam Ecclesiam, quæ est corpus quoddam politicum, seu morale, ex omnibus fidelibus Baptizatis viatoribus compositum: dicitur Catholica, hoc est communis vniuersalis; cum se extendat, licet quæris temporibus, ad totum mundum: Est proprium solius Romanæ Ecclesiæ, quòd sit catholica, nec ullus est hæreticus, qui vocari se audeat huius nomine *Catholico*; dicitur etiam, *Apostolica*; quia est fundata supra doctrinam, & sanctitatem Apostolorum. *Est* de Fide hanc Ecclesiam Romanam esse veram; quia esse veram Ecclesiam, est tradere exterius veram doctrinam; sed est de Fide, hanc esse doctrinam veram; cum reuelatum sit: ergo omnes, qui eam tradunt, componunt veram Ecclesiam.

De Romano Pontifice, eius auctoritate, & infallibilitate.

EST de iure diuino, ac proinde de Fide, Romanum Pontificem esse vnicum caput Monarchicum totius Ecclesiæ. Fuit collata potestas hæc à Christo Domino Petro, & Successoribus eius, ex illo *Ioannis 21. Ego dico tibi pascue oues meas.* dicitur, tibi, quod non intelligitur ratione personæ, sed officij: est igitur Papa successor Petri in regimine vniuersalis Ecclesiæ, verus Christi Vicarius, totius Ecclesiæ caput, & Christianorum omnium Pater. Fuit communicata potestas Romano Pontifici à Christo Domino immediatè, Ecclesia solum eligente; vel potest dici, Deum dedisse hanc potestatem Ecclesiæ præcisè, vt suo nomine integrè illam daret successori Petri.

De Fide tenendum censetur ab omnibus Doëtoribus eum, qui vniuersaliter pro vero Pontifice receptus est ab Ecclesia, esse verum Papan, & Petri successorem; vt est ad præsens Innocentius XI. qui feliciter agnat cum gaudio totius Christianitatis. Est Pontifex iudex controuersiarum in Ecclesia; nam Christus Petro, & successoribus tribuit claves regni, inter quas includuntur claves doctrinæ: suffragatur etiam locus ille *Lucæ 22. Ego rogaui pro te Petre, vt non deficiat fides tua, & tu quando conuersus confirma fratres tuos*; qui explicatur in hunc sensum. Addo, quòd nec Concilia Prouincialia, vel Generalia firmitatem, & infallibilitatem habent, nisi quam accipiunt à Pontifice Romano; & Concilia ante approbationem Pontificis non sunt de Fide. Conciliū Generale, seu Plenarium, siuè Oecumenicum, est Congregatio Episcoporum vniuersæ Ecclesiæ auctoritate Romani Pontificis specialiter conuocatorum, grauioris rei Ecclesiasticæ tractanda causa, eodem Pontifice per se, seu Legatos, presidente. Dicitur, Oecumenicum, ex toto nimirum orbe Oecumeni, enim orbem terrarum significat.

Ad solum Romanum Pontificem pro tempore existentem; non verò Regibus, aut Imperatoribus Christianis competit absolue iuridica, & authoritatiua Conciliorum Generaliū conuocatio: Imperatores autem, ceterique Principes Christiani aliam in cogendis Concilijs partem legitimam nō habent, quàm exhortatiuam, vel ministerialem; sunt enim ipsi executores legum ecclesiasticarum, & iurium ipsius Ecclesiæ, atq; etiam sanctæ Sedis Apostolicæ vindices, & Protectores.

Nota, Ecclesiam non habere plenitudinem potestatis immediatè à Christo, nisi in ipso suo capite, qui est Papa, Christi Vicarius: Vnde Summus Pontifex, non solum est caput, atque adeò superior vniuersalis Ecclesiæ distributiue, verum etiam collectiue; idest in Concilio congregatæ: Nam quando Christus Dominus dixit Petro, & in eo Romanis Pontificibus legitimis eius successoribus, *Pascue oues meas*: intellexit de Ecclesia, & de Episcopis, non solum distributiue sumptis, sed etiā collectiue;

uè; Nam oues Christi non solum sunt Ecclesiæ particulares, aut Episcopi distributiue sumpti, siue per orbem dispersi; sed iidem etiam collectiue, siue conciliariter adunati.

Quanam sint Concilia Generalia approbata?

Concilia generalia approbata numerantur hucusq; decem, & octo. Primum, est Nicænum, celebratum Anno Domini 325. sub Siluestro Papa, & Constantino Imperatore. Fuit in eo definita cōtrouersia de celebratione Paschatis, & de Diuinitate Christi, aduersus Arium Principem hæreseos, post annos decem in latrinis dum alium purgaret sædes defunctum.

Secundum Concilium Generale à sancta Sede Apostolica approbatū, & ab vniuersali Ecclesia receptum, fuit Constantinopolitanū, celeb. Anno 381. sub Damaso Papa. Theodosio Seniore Imper. contra Macedonium, negantem Spiritus sancti diuinitatem.

Tertium, est Ephesium, celebr. Anno 431. sub Cælestino I. Theodosio iuniore Imperat. contra Nestorium Episcopum Constantinopolitanū, qui Christum in duas personas diuidebat; idest ponebat in Christo duas personas, humanam scilicet, & diuinam.

Quartum, est Chalcedonense, celeb. Ann. 451. sub Leone I. Marciano, & Valentiniano Imper. contra hæresim Eutychetis Archimandritæ, qui vnā tantum in Christo naturam asserbat post Incarnationem.

Quintum, est Constantinopolitanum II. celeb. Ann. 553. sub Vigilio. Iustiniano seniore Imper. Damatus est Origenes, Dydimus, & Euagrius, eius sectatores.

Sextum, est Constantinopolitanum III. celebr. Ann. 681. conuocatum sub Dono Pontif. celebratum sub Agathone, & finitum sub Leone II. Pōtif. Constantino Pogonato Imper. contra hæreticos Monothelitas, qui vnā tantum in Christo voluntatem esse volebant.

Septimum, est Nicænum II. celebr. Ann. 787. sub Adriano I. Constantino IV. & Irene eius matre, & etiam Carolo Magno Imper. contra Iconomachos sic vocatos; quia sacras Christi, & Sanctorum imagines omni honore spoliabant.

Octauum, Constantinopolitanū IV. celeb. Ann. 869. sub Adriano II. Basilio Imper. contra Photium, & Ignatium pro Patriarchatu Constantinopolitano: hæc sunt Concilia, quæ fuerunt celebrata in Oriente. Nunc addemus breuiter Occidentalia.

Nonum, Lateranense I. celebr. Anno 1122. sub Calisto II. Henrico V. Imper. Pro pace in causa inuestiturarum inter Ecclesiam, & Imperium ineunda, & contra Saracenos pro recuperanda Terra sancta.

Decimum, Lateranense II. celeb. Anno 1139. sub Innocentio II. Conrado Imper. contra Petrum de Bruijs, & Antipapas.

Vndecimum, Lateranense III. celeb. Anno 1179. sub Alexandro III. Fiderico I. Imper. Pro reformanda Ecclesia in Fide, & moribus; contra hæreses Catharorum, (quos Vualdenses, & Albigenfes alij appellant) & schismaticos ab Antipapis ordinatos.

Duodecimum, Lateranense IV. celeb. Ann. 1215. sub Innocentio III. Fiderico II. Imper. contra Albigenfes, & errores Abbatis Ioachimi: Pro Ecclesia reformanda, & Terra sancta recuperanda.

Tertium decimum, Lugdunense I. celeb. Ann. 1245. sub Innocen. IV. Fiderico II. Imper. Papa in hoc Concilio deposuit authoritate propria Imperatorem ab Imperiali culmine, regnoque Siciliæ priuauit, & hanc depositionem per totam Ecclesiam promulgauit; præcipiens sub interminatione excommunicationis, vt nullus eum Imperatorem, nec Regem de cætero nominaret. Tunc Henricus Langrauius cognomento Raspe, multis euictus præcibus imperium accepit; vt refert Albertus Stradensis.

Decimumquartum, Lugdunense II. celeb. Ann. 1274. sub Gregorio X. Rodulpho Imperat. contra errores Græcorum, ac pro recuperatione Terræ sanctæ.

Decimum quintum, Viennense, celeb. Ann. 1311. sub Clemente V. Henrico VII. Imper. Fuit extirpatas Ordo Templariorum ad instantiam Philippi Regis Francorum; Condemnantur hæreses Petri Ioannis Begardorum, & Beguinarum, & pro recuperanda Terra sancta; extant ex hoc Concilio decreta, quæ dicuntur Clementinæ.

Decimum sextum, Florentinum, celeb. Ann. 1439. sub Eugenio IV. in præsentia Ioannis Paleologi Imper. Constantinop. contra errores Græcorum; & in sententia Bellarmini temp. Alberti Imperat. fuit hoc concilium celebratum. Hoc Concilium Generale fuit inchoatum Ferrariæ, & ratione pestis absolutum Florentiæ.

Decimum septimum, Lateranense V. celeb. Ann. 1512. sub Iulio II. & Leone X. Imper. Maximiliano. contra schismata, & ad vnionem, & concordiam recuperandam in statu Ecclesiastico.

Decimum octauum, Tridentinum, inchoatum Ann. 1545. finitum tandem (cum fuisset aliquandiu interruptum) Ann. 1563. ceptum sub Paulo III. continuatum sub Iulio III. finitum sub Pio IV. Carolo V. & Ferdinando I. Imper. contra Lutheri, & aliorum hæreticorum errores, nec non pro pace inter Principes, ac reformatione Ecclesiæ.

Ex his Concilijs nullum est, quod non sit à Pontifice probatum, & à Catholicis recipiatur; at Græci tantum recipiunt prima septem Concilia; Lutherani autem tantum recipiunt prima sex: Eutychiani, qui adhuc inueniuntur in Asia, tantum recipiunt prima tria: Nestoriani, qui etiam in Oriente reliqui sunt, tantum recipiunt prima duo: Trinitarii, qui in Hungaria, & Polonia nunc versantur, nullum recipiunt.

Concilia Generalia reprobata.

Concilia Generalia reprobata numerantur septem. Primum est Antiochenum, celeb. Ann. 345. sub Iulio I. Summo Pontif. Constantio Imper. in quo damnatus est S. Athanasius, & via patefacta ad cersionem Concilij Niceni primi.

Secundum, Mediolanense, celeb. Ann. 354. sub Liberio. Eodem Constantio Imper. in quo etiā obliquē Fides catholica damnata est, & habita fuit coniuratio Arianorum contra eundem Athanasium.

Tertium, Arminense, celeb. Ann. 373. vel Anno 363. secundum Belarminum sub Felice II Eodem Constantio Imper. in quo sublatum est de Symbolo nomen *homousios*.

Quartum, Ephesinum II. celeb. Anno 449. sub Leone I. Theodosio iuniore Imperat. in quo factione Dioscori occisus est Sanctus Flavianus Episcop. Constantinopolit. & Legati Romani Pontificis fugati: ac demum hæresis Eutychiana confirmata.

Quintum, Constantinopolitanū, celeb. Ann. 730. sub Gregorio II. Leone Isauro Imper. contra sacras imagines, renitente S. Germano, qui propere a sua sede Constantinopolitana deiectus est.

Sextum, aliud Constantinopolitanum, celeb. Ann. 755. sub Stephano II. Constantino Copronymo Imper. Definitum est in Concilio, abolendas esse Christi, & Sanctorum imagines.

Septimum, Pisāum, celeb. Ann. 1511. sub Iulio II. Congregatum ab Imperat. & Rege Galliar, contra Iulium II. & reprobatur paulo post in Concilio Lateranensi V. sub eodem Iulio II. *sess.* 2. & 3. Aliqui addunt octavum Concilium Vuittembergense, quod Lutherani generale vocant, celeb. Anno 1536. vide Cochleum in actus Lutheri.

Concilia Generalia partim approbata, partim reprobata.

Concilium Generale partim approbatum, partim reprobatur, Primum, est Sardicense, celeb. Ann. 351. sub Iulio I. Constantio Imperat. in hoc 300. Episc. Occidentales Fidem Catholicam confirmarunt, reliqui 76. Episcopi Orientales fidem Arianam scripserunt.

Secundum, Syrmienſe, celeb. Ann. 356. sub Liberio. Constantio Imperat. in hoc fuerunt editæ duæ formulæ Fidei dissentientes, quarum unam, ut Catholicam explicat S. Hilarius; alteram, ut hæreticam reprehendit.

Tertium, est Concilium Quinſextum, sic dictum, non quia sit quintum, vel sextum; sed quia canones addidit V. & VI. synodo. Fuit celeb. Ann. 688. sub Sergio. Iustiniano iuniore Imper. Canones huius concilij dicuntur partim reprobat, quia non interfuit Summus Pontifex, dum sic-

fierent; nec per se, nec Legatos; partim verò approbati; quia & si Cano-
nes nullam ex se vim haberent; tamen aliqui postea probati sunt à Pon-
tificè, qualis est Canon 82. de pingendis imaginibus, receptus ab Adria-
no Papa; & VII. Synodo; ut patet ex eius actibus 2. & 4.

Quareum, Francofordiense, celeb. Ann. 794. sub Adriano I. & Carolo
Magno Rege Francorum; quod Concilium ab Adriano confirmatum,
fuit quantum ad eam partem, in qua definitur, Christum non esse Fi-
lium Dei adoptivum; & ab eodem reprobatur, quantum ad alteram
partem, in qua ex errore damnatur septima Synodus pro cultu sancta-
rum Imaginum.

Quintum, est Concilium Constantiense, celeb. Constantiæ Ann. 1414.
inchoatum sub Ioanne XXIII. finitum sub Martino V. Imper. Sigismū-
do: hoc Concilium duravit quadriennio. Cardinalium discordia per
quadraginta fere annos, quibus duravit schisma, plures personas in
Romanos Pontifices elegerat; tres enim dicebantur Papæ à diuersis; &
alius Romæ, alius Auenione fuit creatus à Cardinalibus: Ut auferretur
igitur hoc scandalum ab Ecclesia Cardinales indixerunt Pisani Con-
cilium; ut inter Benedictum XIII. & Gregoriū XII. discerneretur, vter
eorum esset verus, & legitimus Petri successor; utroque autem contu-
maciter absente, creatus est ab eis Alexander V. qui intra annum de-
functo, electus fuit Bononiæ Ioannes XXIII. Pro eo igitur tollendo schis-
mate Sigismundus Romanorum, & Vngariæ Rex obtinuit à Ioanne
XXIII. ut Concilium indiceret Constantiæ celebrandum, in quo postea
effecit, ut reiectis omnibus tribus, qui Papæ autoritatem sibi arroga-
bant, vnus legitimè in Concilio crearetur Papa Otho Cardinalis de Co-
lumna, dictus Martinus V. Refert Cochleus *lib. 2. histor. Hussitarum* Præ-
latos, & Principes aduentasse in tanta frequentia ad hoc Conciliū cele-
brandum, ut aliquando triginta millia equorum vno, eodemque tem-
pore Constantiæ fuisse tradantur. Refertur etiam adfuisse Patriarchas
quinque, Cardinales 33. Archiepisc. 47. Episcop. 228. 217. Sacre Theo-
logiz, & 331. Iuris vtriusque Doctores: & cum his Abbatum, Priorum,
Præpositorum, & omnis generis Clericorum ingentem numerum: Sæ-
cularium quoque Principum, Comitum, Baronum, Nobilium ingentem
multitudinem. In quo nam Concilium hoc fuerit approbatum, & con-
firmatum, & in quo reprobatur videndum infra, vbi ad hominem im-
pugnabimus quatuor Propositiones nouissimè editas nomine Cleri Gal-
licani Parisijs congregati.

Sextum, est Concilium Basiliense, inchoatum Ann. 1431. & conti-
nuatum Basileæ, ac deinde Lausannæ vsque ad Annum 1449. sub Euge-
nio IV. Sigismundo Imper. Hoc Concilium fuit ex parte reprobatur auctoritate legitima, ut constat ex sessione 11. Concilij Lateranensis, sub
Leone X. celeb. vbi Conciliabulum schismaticum, seditiosum, & nullius
prorsus autoritatis appellatur. *Dixi*, hoc Concilium fuisse ex parte
tan-

tantum reprobatum ; nam Nicolaus V. pacis gratia approbavit constitutiones , quæ de beneficijs Ecclesiasticis editæ , ac promulgatæ fuerunt. In hoc Concilio fuit Pontifex excommunicatus , & Eugenius IV. à Pontificatu depositus , Amædeum Ducem Sabaudia sub Felici nomine V. substituendo : ex quo liquidò constat , inquit Duallius , Basiliensem hanc congregationem , non concilium , sed exercitum , non consensum , sed contentionem , non Ecclesiæ subsidium , sed exitium extitisse ; nisi Deus solita providentia succurrisset. De hoc Felici V. Sabaudia Duce plura inveniuntur apud scriptores rerum Ecclesiasticarum , quæ partim sunt vera , partim sunt mendacijs contexta : refert enim de Amædeo strenuissimo Sabaudia duce *Rup. Volater. lib. 3. Georg.* Quòd dum in solitudine Ripallæ , totius Christianæ religionis exemplo religiosissimè viveret , ab omni terrenarum rerum cura , & sollicitudine spoliatus , rogatus ab Oratoribus quibusdam , ut si quos haberet canes venaticos eis ostenderet ; ostendit sequenti die ingentem mendicorum multitudinem vna discumbentium , hoc ipsis admirantibus iniungendo ; hi sunt canes mei , quos alo quotidie : unde videtur incredibile illud , quod ab aliquibus refertur , quantum ipsum esset pecuniosum , fuisse adeò parcum ; ut etiam ex Pontificatu augetur diuitias , & in eo avaritia superaret ambitionem ; ut vacantium beneficiorum fructus sibi reservaret. *Hoc autem* verum est , Concilium hoc Basiliense misisse ad eum anno 1440. Ludovicum Cardinalem S. Cæcilie , prædictæ Synodis Legatum , cum Ioanne Comite in Thierstein pro Pontificatu suscipiendo , & magnis præcibus ad consentiendum , & acceptandum eum induxerunt. Verum Amædeus pacis , & humilitatis amator existens , mortuo Eugenio Pontifice ; statim sine præcibus Nicolao Pontifici , eius legitimo successori humiliter cessit , & in loco pristinae humilitatis rediit : ex quibus motus Nicolaus , & cæteri Patres (confirmatis omnibus ab ipso patrat) in patria sua eum Delegatum ex latere crearunt . Deficiens demum in senectute bona , post obitum etiam miraculis clarus effulsit . Hæc breuiter de hoc Christianissimo , & religiosissimo Duce Sabaudia.

Remanet solum hic videndum circa Concilium Constantiense , in quo nam fuerit approbatum ; & circa quæ reprobatur censetur , quod occasione quatuor propositionum , quæ nomine Cleri Gallicani circa Ecclesiasticam potestatem nuper Parisijs prodierunt , tenoris sequentis , hoc loco examinandum commodius putavi.



Propositiones editæ à Clero Gallicano 1682.
examinantur, & reprobantur.

Incipiunt dictæ Propositiones hac forma videlicet: *Ecclesia Gallicana decreta, & libertates à Maioribus nostris tanto studio propugnatas, earumque fundamenta sacris Canonibus, & Patrum traditione nixa, multi diruere moliuntur; nec desunt, qui earum obtentu Primatū B. Petri, eiusque successorum Romanorum Pontificum à Christo institutum, usque debitam ab omnibus Christianis obedientiam, Sedique Apostolicæ, in qua Fides predicatur, & vritas seruetur Ecclesiæ rēuerendam omnibus gentibus maiestatem imminuere non vereantur: Hæretici quoque nihil prætermittunt, quo eam potestatem, qua pax Ecclesiæ continetur inuidiosam, & grauem Regibus, & Populis ostendant, usque fraudibus simplices animas ab Ecclesiæ Matris, Christi que adeò communionē dissociēt. Quæ ut incommoda propulsemus, Nos Archiepiscopi, Episcopi, Parisiis mandato Regis congregati, Ecclesiam Gallicanam repræsentantes, una cum cæteris Ecclesiasticis viris nobiscum deputatis, diligenti tractatione habita, hæc scienda, & declaranda esse duximus.*

Primum, B. Petro eiusque successoribus Christi Vicariis, ipsique Ecclesiæ rerum spiritualium, & ad æternam salutem pertinentium; non autem civilium, ac temporalium, à Deo traditam potestatem, dicente Domino; Regnum meum non est de hoc mundo: & iterum, Reddite ergo, quæ sunt Cæsaris Cæsari, & quæ sunt Dei Deo; ac pro inde stare Apostolicum illud: omnis anima potestatibus sublimioribus subdita sit: Non est enim potestas nisi à Deo, quæ autem sunt à Deo, ordinata sunt, itaque qui potestati resistit, Dei ordinationi resistit. Reges ergo, & Principes in temporalibus nulli Ecclesiæ Dei ordinatione subyci, neque auctoritate clauum Ecclesiæ directè, vel indirectè deponi, aut illorum subditos eximi à fide, atque obedientia, ac præstito fidelitatis Sacramento solui posse, eamque sententiam publicæ tranquillitati necessariam, nec minus Ecclesiæ, quàm imperio utilem, ut verbo Dei, Patrum traditioni, & Sanctorum exemplis consonam omnino retinendam.

Secundò: sic autem inesse Apostolicæ Sedi, ac Petri Successoribus Christi Vicariis, rerum spiritualium plenam potestatem, ut simul valeant, atque immota consistant sanctæ Oecumenicæ Synodi Constantiensis, à Sede Apostolica comprobata, ipsoque Romanorum Pontificum, ac totius Ecclesiæ usu confirmata, atque ab Ecclesiæ Gallicana perpetua Religione custodita Decreta de auctoritate Conciliorum Generalium, quæ sess. 4. & 5. continentur, nec probari à Gallicana Ecclesiâ, qui eorum Decretorum, quasi dubie sint auctoritatis, ac minus approbata robur infringant, aut ad solum schismatis tempus Concilia dicta detorqueant.

Tertio: Hinc Apostolicæ potestatis usum moderandum per Canones spiri-
tu

in Dei conditos, & totius mundi reuerentia consecratos; valere etiam regulas, mores, & instituta à Regno, & Ecclesia Gallicana recepta, Patrumque terminos manere inconcussos, atque id pertinere ad amplitudinem Apostolica Sedis; ut statuta, & consuetudines sanctæ Sedis, & Ecclesiarum consensione firmate, propriam stabilitatem obtineant.

Quartò: In Fidei quoque questionibus præcipuas Summi Pontificis esse partes, eiusque Decreta ad omnes, & singulas Ecclesias pertinere, nec tamen irreformabile esse iudicium, nisi Ecclesia consensus ecefferit.

Quintò: Quæ accepta à Patribus ad omnes Ecclesias Gallicanas, atque Episcopos, usque Spiritus sancti autoritate Præsidentes mittenda decreuimus, ut id ipsum dicamus omnes, simulque in eodem sensu, & in eadem sententia. Subscripserunt octo Archiepiscopi, viginti sex Episcopi, triginta sex Doctores, die 23. Martij 1682.

Sed quantum sint huiusmodi propositiones potestatis, & infallibilitatis Pontificiæ, nec non vnitatis Ecclesiæ læsiuræ, breuiter, & compendiosè ostendam (cum non sit meum institutum de hac re, nisi incidenter, agere) singulis quid sentiendum sit demonstrando; quantumuis perpetua SS. Patrum traditione, Oecumenicorum Conciliorum decretis, & apertis ipsius Diuini Verbi testimonijs, satis constat remanere.

Ante quam autem ostendam, Pontifices autoritate clauium habere potestatem saltem indirectè; ut cum necessitas, & animarum salus id exigat possint deponere Reges, & eorum subditos, à fide, & illorum obedientia eximere. Suppono I. tamquam certum de Fide, Quemcumque Regem supremum, vel Imperatorem auctoritatem non habere circa regimen Ecclesiæ. Est enim hæresis Anglicana, quæ omnes vires intendens, ut supremam Pontificis potestatem impugnaret, per hoc quòd omnes Christiani iubeantur subijci Principibus secularibus, existimat vnumquemque Principem, temporalem, & spiritualem potestatem habere, vtramque recepisse immediatè à Deo, non à populo: & sic volunt, Quòd regia potestas sicut à Deo immediatè dimanat; ita soli Deo immediatè subest non Papæ. Apertè hæreticum hoc signum, ostendit D. Ambrosius scribens ad Imperatorem Valentinianum *Epist.* 32. ubi secundum scripturas demonstrat, Episcopos debere de Imperatoribus iudicare in causis Fidei, non è contra. Idem ostendit in *Epist.* 33. *Noli (inquit) te grauare &c.* Extat etiam, vltra alia testimonia, celebre illud dictum Ioannis Papæ *cap. si Imper. distin.* 96. *Si Imperator catholicus est, filius est, non Præsul Ecclesiæ, quo ad religionem competit, discere ei conuenit non docere. Vnde Ozia volens adolere incensum, dixit summis Sacerdos 2. Paralip.* 26. *Non est tui officij Ozia, ut adoleas incensum Domino, sed Sacerdoti. Est igitur hæc veritas indubitata apud omnes Catholicos, sed Imperatorem scilicet, vel Regem quempiam auctoritatem non habere circa regimen Ecclesiæ. Suppono II. Non accepisse Reges temporales immediatè institutionem à Deo, sed mediante populo, seu Republica.*

Hoc ipso enim quod homines voluerunt politicè viuere habuerunt quoque ius constituendi caput politicum, quo eos gubernaret: vnde si Apostolus iussit subijci Regibus, & ipsis obedire; non fuit in spiritualibus, sed temporalibus.

Dubium igitur, quod ad præsens inter catholicos controuertitur est, Vtrum præter spirituales potestatem, habeant etiam Pontifices potestatem temporalem supra Reges, & Principes &c. loquimur autem hic, de potestate indirecta, & mediata, quidquid sit, & sentiant Theologi, de potestate directa, & immediata. Vnde dicendum puto, contra Primam propositionem, Habere Pontifices autoritate clauium, potestatem saltem indirectè, vt cum necessitas, & bonum Ecclesiæ id exigit, possint deponere Reges, & eorum subditos à fide, & illorum obedientia extirpare. Talis enim potestas fuit à Christo Domino Petro, eiusque successoribus tradita: quod *Probatnr*, Nam Christus Dominus reuersurus ex militanti ad triumphantem Ecclesiam, volens Petrum vniuersæ Ecclesiæ Pastorem præficere, qui vices suas in terris visibiliter sustineret, constituit illum clauicularium Regni cælestis, & pastorem vniuersalem, & supremum totius Ecclesiæ; vt habetur *Ioan. 21. Pæce oues meas. Matth. 16. Tu es Petrus, & super banc petram ædificabo Ecclesiam meam: & Tibi dabo claues regni cælorum. & quodcumque ligaueris super terram, &c.* Quæ potestas in tribus consistere apparet; vt scilicet sit Pastor supremus totius Ecclesiæ, clauiger regni, & soluens, ac vinciens delinquentes; ergo dedit illi omnia necessaria ad dicta officia ritè exercenda; aliter frustra dedisset claues, & officium pastoris; sed ad ritè exercendum officium clauicularij regni, requiritur, vt possit clauicularius ad libitum fores claudere, vel aperire, prohibendo indignis viam, tollendo impedimenta retardantia ingressum, vel exitum: sicut ad ritè exercendum officium Pastoris, requiritur, vt possit arcere lupos, recludere arietes, ne gregi noceant, & singulis ouibus tribuere conuenientia pabula; ergo habet Pontifex potestatem saltem indirectè in Principes, & omnes alios Reges &c. hæc enim important potestatem saltem indirectè: quomodo enim diceretur, & esset Pontifex Pastor totius Ecclesiæ, si videndo quod Princeps fieret v.g. ex catholico hæreticus, non possit eum arcere per excommunicationem, & priuationem à dominio temporali, & præcipere gregi, vt ab eo fugiat eximendo populos à fide, & illorum obedientia? ergo posito, quod Pontifex acceperit omnia necessaria ad officium clauicularij, & pastoris habet iure diuino potestatem temporalem saltem indirectè; non pro libidine regna dandi cui voluerit, aut auferendi; sed iustis in causis, videlicet ob communem pacem, salutem, & vtilitatem Ecclesiæ, & Reipublicæ Christianæ bonum; nam cuius est Christianum populum ad salutem æternam dirigere, eius est remedia adhibere, & cauere, ne id bonum impediatur; ac vt offensiones Christianorum, & peccatorum pericula, & ipsa peccata præciantur, & de-

uitentur. *Et licet verum sit Reges supremum ius, & potestatem habere. Hoc intelligitur quatenus non habent alium profanum, & civilem Principem, in cuius potestate sint: non tollitur autem, quin habeant Christum Dominum, & summum eius Vicarium, quibus sunt ipso iure diuino subiecti.*

Ostenditur II. eadem veritas; Quia quando ius diuinum, & humanum ad inuicem pugnant, debet relicto humano seruari ius diuinum; sed de iure diuino est, seruare veram Fidem, & Religionem; sicut de iure humano est, quod sequatur hic, vel ille Princeps; vt visum est in secunda suppositione; ergo quandocumque est euident periculum Fidei, & Religionis, nequeunt Christiani salutare Regem hæreticum, vel infidelem; sed recurrere ad superiorem, qui habeat potestatem spiritualem iudicandi; an sit euident periculum Fidei; sed talis potestas est in Pontifice, cui soli commissæ est cura Fidei, & Religionis; vt etiam visum est contra hæreticos in prima suppositione; ergo &c. *Tertio*, Cum omnis potestas temporalis sit subdita spirituali, non è contra, si temporalis administratio impedit, lædit, aut minuit spirituale bonum; tenentur Principes sæculares prouidere, ne damna indies augeantur; & ad hoc cogi spiritualibus armis ab eo, qui supremam potestatem habet in terris, eos etiam deponendo, eximendo etiam subditos ab illorum obedientia:

Quarto, Quia vetus testamentum fuit figura noui; ita Aaron eiusque successores, tum Christi Summi Sacerdotis, tum eorum, qui Vicarium ab eo ministerium acceperunt figuram detulisse dicendus est, & Monarchico suo regimine, etiam similitudinem instituendi in noua lege regiminis expressisse. Vnde in veteri lege sancitum erat, vt de lepra Sacerdos iudicaret, & Regem etiam ea infectum solio suo priuaret; vt legitur *lib. 2. Paralip. cap. 26.* insuper *lib. 4. Regum cap. 11.* & in eodem libro *Paralip.* habetur de Athalia, qui cum tyrannicè occupasset Regnū, & foueret cultum Baal, Ioiada Pontifex iussit conuocari Centuriones & milites, & Athalias interfici, quod & fecerunt; ac pro eo Ioas creauerunt in Regem; ergo quod habeant etiam Pontifices noui testamenti potestatem temporalem, saltem indirectam, eamque summam cum necessitas, & animarum salus id postulant, negari non potest; *Et defactō* virtute huius potestatis lex Pontificia, quæ habetur *cap. finali de prescriptione.* abrogauit legem Imperatoriam, quæ habetur *in cap. de prescriptione 30. vel 40. annorum*, quæ seruari non poterat sine peccato mortali. & Gregorius II. vetuit solui vestigalia ab Italis Leoni Iconomacho à se excommunicato, eumque multauit parte Imperij.

Confirmatur alijs exemplis eadem veritas: Zacharias enim Pontifex, vt habetur *in cap. Alius 15. quest. 6.* cum videret quod Childerici socordia, exitium Regno, & Religioni immineret, Regno deposuit, & Pipinum

num Caroli Magni patrem, in eius locum substituit, omnesque Francigenas à iuramento fidelitatis absoluit. Gregorius VII. Henricum IV. Imperatorem deposuit, aliumque eius loco eligi iussit. Idem, Boleslaum Regem Poloniæ eius nomine secundum, eo quòd Stanislaum Cracouiensem Episcopum occidisset, anathemate percussit, totam Poloniam sacris interdixit; & Regnum ipsi Boleslao solemniter abrogauit. *Cromer. lib. 4. de rebus gestis Polonorum.* Innocentius III. Ioannem Angliæ Regem à totius Regni administratione submouit. *Polydor. lib. 13. Histor. Anglic.* Idem Innocentius Othonem IV. deposuit. Insuper Innocentius hoc nomine IV. priuauit autoritate propria in Concilio Lugduni I. Fidericum II. ab Imperio, Regnoque Siciliæ, præcipiens omnibus subditis sub excommunicationis pœna, vt nullus eum Imperatorem, nec Regem amplius nominaret; vt supra narrauimus agendo de Concilijs. Hic Fidericus iacet tumulatus in Cathedrali Ciuitatis Panormi, quæ propter deliciarum omnium opulentiam, ædificiorum maiestatem, & populi multitudinem fuit sedes, & domicilium Regum, & Imperatorum, & ad præsens est Caput, & Metropolis totius Regni Siciliæ; cum in ipsa Proreges, à Catholicis Hispaniarum Monarchis missi, cum omnibus Principibus, Proceribusque Regni resideant. Ab eodem Innocentio IV. fuit datus Regi Lusitanæ coadiutor in regni administratione, ne Religio, & Regnum ob Regis incuriam in discrimine versaretur. Clemens VI. Deposuit Ludouicum IV. Imperatorem. Eugenius inuestituram vtriusque Siciliæ Alfonso I. tradidit. Leo III. translatum antea occidentale Imperium in Orientem, reuocauit in Occidentem, primumque Imperatorem constituit, & vnxit Carolum Magnum Regem. Bonifacius VIII. Philippum Pulcrum Francorum Regem, regno priuatum declarauit: *Aemil. in vita Philippi Pulchri.* Iulius II. regnum abstulit Regi Vascorum hoc est Nauarræ, quæ est in Hispania, ac Ferdinando Castellæ, & Aragoniæ Regi concessit. Et B. Pius V. Elisabetham Angliæ Reginam, vt hæreticam, Regno per sententiam priuauit, & Philippum Hispaniarum Regi eius nomine II. ius liberum concessit, quo posset ei Regnum ereptum sibi vendicare.

Quòd autem Pontifices habuerint ius, & potestatem abrogandi Regibus, & Imperatoribus regna, & imperia, probat multis testimonijs, & rationibus Gregorius VII. *lib. 8. Registri epist. 2.* Idem probat Innocentius IV. in Concilio Lugdunensi, vt habetur in *cap. Ad Apostolicæ de sentent. & re iudica. in sexto.* Clemens V. in Concilio Viennensi, vt legitur in *Clement. Romani de iure iurand.* Innocentius quoque III. in *cap. solita de maiori parte, & obedient.* & in *cap. Venerabilem de elect.* Bonifacius VIII. in Constitutione, quæ incipit: *vnam sanctam, inter Extravagantes communes de maiori parte, & obedient.* Et Denique Gregorius Magnus ad finem Priuilegij, quod concessit Monasterio S. Medardi in Augustodunensi urbe à Syagrio, & Brunichilda constructo; vt habetur *lib. 1. 1. Registri Indult.* 6. *epist.*

6. epist. 11. vbi sic ait: *Si quis verò regum, sacerdotum, iudicum, ac personarum secularium, hanc constitutionis nostræ paginam agnoscens, contra eam venire tentauerit, potestatis, honorisque sui dignitate careat, reumque se divino iudicio castrere de perpetrata iniquitate cognoscat.* Ex his manifestè apparet, Pontifices, etiam in temporalibus causis, plenam habere potestatem ad finem supernaturalem assequendum, non solum in attingentibus vassallos; sed etiam contra proprias ipsorum Regum, & Principum personas; Quod bene etiam probat Petrus Barbosa *Nomen* (Regius Magisteratus) *En los discursos de la iuridica y verdadera razon de estado. par. 1. artic. 2. præsupp. 6.*

Vbi aduertendum est; Quòd quando Imperatores, & Principes iure sunt permisi ab Ecclesia aliquid agere circa ordinationem Pontificum; se habuerunt, non vt eligentes, sed vt consentientes, & defendentes electum à Schismaticis, & inimicis; vt dicit Gratianus in *cap. Cum longe, & cap. vota ciuium 63. distinct.* Sicuti si aliquando requirebatur assensus Imperatorum in electione Pontificis, hoc obtinuerunt aliqui Imperatores, ex concessione Ecclesiæ; vt videre est ex eo, quòd Adrianus III. & postea Gregorius VII. hæc Imperatorum priuilegia abrogarunt; & sic approbatio, & assensus Imperatorum pro electione Pontificum abrogatus est.

Quintò, Potestatem Romani Pontificis non leuiter auctum. ant honor, & reuerentia erga ipsos ab Imperatoribus, & Regibus exhibita. Ludouicus enim Imperator pedibus Pontificis humiliter aduolutus se vt obedientem filium, & ouem, tamquam, vt Patri Patrum, & pastori exhibuit. Constantinus Papa Nicomediam profectus Iustinianum II. Imperatorem Constantinopolitanum pedibus suis aduolutum, corona Imperiali insigniuit. Iustinus I. Imperator Ioannem I. adorauit pronus in terram, & ab eodem coronatus est Imperator. Fidericus I. cognomento Enobarbus Venetijs in Basilica S. Marci coram Cardinalibus, & Episcopis Alexandri III. pedibus conculcandum se prostrauit, partim censuris Ecclesiasticis, partim prælijs aduersis fatigatus, & fractus. Et multi alij hoc honoris, & reuerentiæ symbolum exhibuerunt Summis Pontificibus, profitentes unitam esse cum eorum maiestate potentiam.

Accedit authoritas B. Ioannis de Capistrano ordinis Minorum, in libro, quem scripsit de potestate Papæ, & Concilij, qui hæc habet: *authoritas Papæ protenditur ad omne bonum, & ad nullum malum; est enim quasi Deus in terris, maior homine, & minor Deo, plenitudinem obtinens potestatis; sed si non haberet huiusmodi potestatem, saltem indirectè, non bene diceretur, quòd eius authoritas protenditur ad omne bonum, nec habere plenitudinem potestatis; ergo &c.* Hoc idem videtur asserere, & hanc veritati se subscribere Ludouicus Galliz Rex in Epist. missa Pio, sub hoc nomine II. Pontif. Max. data Turonis die 27. Mensis Nouembris. Anno 1461. & regni eius primo, vbi inter alia hæc habet: *Te Vicarium Dei videntis, & veneratione prosequimur; vt sacra præsertim in Ecclesiasticis rebus*

rebus tua mèrita, veluti vocem pastoris audire, illisque parere prompta mente velimus. vbi ex illa particula, præsertim, videtur prænotare vltra potestatem spiritualem, quæ est præcipua, inesse illi etiam temporalem, saltem indirectam.

Possẽm hic adducere plures alias rationes, & Doctorum authoritates, quas breuitati consulens relinquo, remittendo lectorem ad ea, quæ de hac materia scripsit Cardinalis Bellarminus *lib. 5. de Rom. Pontif. d. cap. 6. usque ad caput 8. Solũ* hic refero testimonium Petri Becruandi Episcopi Eduensis, qui postea fuit Cardinalis, in libello aduersus Petrum de Lugnerijs, pro Ecclesiastica libertate, nec non in *tract. de origine, & vso iurisdiction. siue de spirituali, & tempor. potest. Pontif. quest. 4.* qui inter alia hæc habet: *Respondeo, & dico, Quod potestas spiritualis debet dominari omni humane creature, per rationes, quas Hostiensis induxit in summa, qui filij sint legitimi. s. qualiter, & a quo. Item quia Iesus Christus Filius Dei, dum fuit in hoc mundo, & etiam ab æterno naturalis Dominus fuit, & de iure naturali in Imperatores, & quoscumque alios depositionis sententias ferre potuisset, & damnationis, & quascumque alias; utpote in personas, quas creauerat, & donis naturalibus, & gratuitis dotauerat, & etiam conseruabat; & eadem ratione, etiam eius Vicarius potest. Nam non videtur discretus Dominus fuisse (ut cum reuerentia illius loquar) nisi unicum post se talem Vicarium reliquisset, qui hæc omnia posset. Fuit autem iste Vicarius eius Petrus, apud Mattheum: & idẽ dicendum est de successoribus Petri; cum eadem absurditas sequeretur, si post mortem Petri humanam naturam à se creatam, siue regimine vnius Personæ reliquisset. Vbi videtur, quantum rectæ rationi aduersetur, malisque quam plurimis intestinis pabulum, & fomentum præbeat, dicere, Quod Reges, & Principes nulli Ecclesiasticæ potestati, Dei ordinatione subijci, neque autoritate clauium, directè, vel indirectè deponi, aut illorum subditos eximi à fide, atque obedientia, ac præstito fidelitatis sacramento solui posse; Benè ergo concludit Baldus Vbaldus celeberrimus Iureconsultus in proœmio Decretalium num. 6. *Papa est seruus seruorum Dei ob humilitatem; nam quantum ad potestatem est Dominus Dominorum, & quacumque potestas est sub cælo, est in Summo Pontifice.**

Imperatores igitur, & Reges veritatem hanc de Romani Pontificis autoritate, & potestate saltem indirecta præ oculis habeant; sic enim, felici, iustoque progressu Regna, & Imperia summo incremento florebunt; dicente Sancto Gregorio *lib. 1. epist. 42. Tunc status membrorum integer perseruat, si caput Fidei nulla pulset iniuria.*

Dicendum II. Contra secundam Propositionem, Summum Pontificem simpliciter, & absolutè esse supra totam Ecclesiam, & Concilium Generale; ita ut nullum in terris, supra se iudicium agnoscat: loquimur autem de Romano Pontifice legitimo, vero, & certo, nec manifestè, vel notoriè hæretico. *Hæc sententia est ferè communis inter omnes Canonicas,*

nistas, & contra eos, qui asserunt, Generale Concilium habere proximè iurisdictionem, & potestatem à Christo, non à Romano Pontifice. Expressè tuentur nostram Conclusionem *Glossa in verbo Concil. in cap. ubi pericul. de elect. lib. 6. S. Anton. p. 3. titul. 22. cap. 10. §. 4. sua hist. Caiet. in tract. de compar. Papa, & Concil. cap. 6. Pelagius de planct. Eccles. lib. 1. ar. 6. Iacob. de Concil. lib. 10. q. 7. fol. 660. cum multis seqq. Roman. conf. 345. nu. 8. Turrecrem. in sum. de Eccles. lib. 2. cap. 94. & 104. & lib. 3. cap. 64. in fine. Couar. de Spons. par. 2. c. 6 §. 9. nu. 6. Sayr. in clau. reg. lib. 3. cap. 10. 2. 6. Card. Bellarm. lib. 2. de Concil. c. 14. in fine, & cap. 17. Cardinal. Tusch. pract. Concil. tom. 2. lit. c. concl. 552. Insuper est decretis Conciliorum, Romanorum Pontificum, & magis Euangelio, & iuri Diuino conueniens.*

Probat igitur nostra conclusio I. Quia Leo Papa in cap. ita dominus dist. 19. sic ait: *Huius muneris sacramentum, ita dominus ad omnium Apostolorum officium pertinere voluit; ut in beatissimo Petro, omnium Apostolorum summo, principaliter collocaret; ut ab ipso quasi quodam capite dona sua, veluti in corpus quoddam diffunderet, & exortem se ministrum intelligere esse Diuini, qui ausus fuisset à Petri soliditate recedere.* II. Quia in Concilio Florentino sub Eugenio IV. & Lateranensi sub Leone X. decretum fuit: *Definimus Sanctam Apostolicam Sedem, & Romanum Pontificem in vniuersum orbem tenere primatum, & ipsum Pontificem Romanum successorem esse B. Petri Principis Apostolorum, & verum Christi Vicarium, totius Ecclesie caput, & omnium Christianorum Patrem, ac doctorem existere, & in B. Petro pascendi, regendi, & gubernandi vniuersalem Ecclesiam à Domino nostro Iesu Christo, plenam potestatem traditam esse.* Ex quibus testimonijs, sic efformari potest argumentum: Romanus Pontifex est caput totius Ecclesie, quinimo pascendi, regendi, & gubernandi vniuersalem Ecclesiam, proximè à Christo Domino potestatem accepit, & per ipsum, tamquam per caput, Christus sua dona in omne corpus Ecclesie diffundit; sed generale Concilium representat vniuersalem Ecclesiam; ergo debet generale Concilium, tamquam corpus accipere, & habere suam iurisdictionem, & potestatem, proximè à Romano Pontifice, tamquam à suo capite.

Confirmatur hæc ratio I. Ex ipsamet Ecclesia perpetuò agnoscentem vniuersalem Primatum Romani Episcopi, super omnem Ecclesiam; Quia scilicet ad ipsum appellatur ab omni Ecclesia, & ab omni Episcopo, & in maioribus, & difficillioribus causis totius Ecclesie consultitur Romana Sedes. II. Ex potestate coercendi, & puniendi quæcumque membra Ecclesie, etiam supremos Principes; ut visum est impugnando primam propositionem. III. Ex iurisdictione in totam Ecclesiam, quatenus leges Episcopi Romani ad omnem Ecclesiam extenduntur. IV. Ex ordinatione Episcoporum, aut depositione etiam Patriarcharum; Nicolaus enim I. Epistola ad Michaellem Imperatorem octo Patriarchas Constantinopolitanos numerat fuisse depositos à Romanis Pontificibus.

V. Ex confirmatione synodorum, etiam Generalium: vnde D. Thomas in tract. contra impugnantes Religionem, ait: *Sancti Patres in Concilio Generali nihil statuerere potuissent, nisi auctoritate Romani Pontificis interveniente, sine qua etiam Concilium congregari non potest.*

Vnde est hic notandum I. Esse inaniter dictum, Primatum Romani Pontificis incepisse, vel à tempore Concilij Nicæni, aut alterius, vel ab Imperat. Constantino, vel Phoca: cum constet Romanum Pontificem, semper habuisse primatum ab ipsis temporibus Apostolorum; per traditiones Ecclesiæ, & Patrum, & definitiones Conciliorum, etiam Nicæni. Et Nicolaus I. Epist. citata ad Michaellem Imperatorem, dixit, Privilegia huius Sanctæ Ecclesiæ, à Christo sunt donata; à Synodis autem celebrata, & honorata, non donata: sicut numquam intelligitur Primatus iste ab aliquo Imperatore concessus, tamquam ab instituyente, sed ut à promulgante, vel defendente, vel à consentiente. II. Falso nituntur fundamento, qui ad probandum Romanum Pontificem non habere supremam auctoritatem, afferunt id, quod habetur in cap. prim. sedis distinct. 99. ubi ex Concilio Africano præcipitur, ut Primæ Sedis Episcopus, non appelletur *Princeps Sacerdotum*, vel *Summus Sacerdos*; sed tantum *Primæ sedis Episcopus*: Nam Africani Concilij Canon, non loquebatur de Episc. Romano; cum legem præscribere non poterat; sed de Episcopo Cartaginensi, qui erat Primas inter Africanos. III. Temere aliquos afferere, Licite posse aliquem appellare à Romano Pontifice ad Generale Concilium; Quia Pius. II. constitutionem edidit, quæ aperte dicit, A sententia Papæ appellare ad Concilium futurum nulli licere. Huius Constitutionis meminit Alexander in Rub. de Appellat. quam Constitutionem renouavit postea Iulius II. & meminit ad verbum Cardinal. Iacobatius de Concil. lib. 10. art. 1. vnde Aegidius in cons. 99. quest. 18. 4. par. citat multos pro hac sententia: & tandem dicit, *Caveant sibi, qui dicunt posse à Papa appellari ad Generale Concilium; quia videtur in Ecclesia Dei ponere duo capita: & in eodem Concilio quest. 20. ait, Tales dogmatizantes sunt habendi in Fide suspecti; quia determinatum est ab Ecclesia, quod credere omnem creaturam subesse Romano Pontifici in spiritualibus, est de necessitate salutis; ut in extraneaganti, quæ incipit, Vnam sanctam, habetur. Solum licite potest aliquis appellare à Concilio Generali, in quo Papa solum præsidet per Legatos suos, ad Romanum Pontificem.* Ex Gelasio enim sic habetur, *Cuncta per mundum novit Ecclesia, quod sacrosancta Romana Ecclesia, de omnibus fas habet iudicandi, nec cuiquam, de eius liceat indicare iudicium.* & cap. si quis 2. quest. 6. habetur, *Quisque pulsatus aliqua adversitate licenter potest appellare ad Apostolicam Sedem, & ad eam quasi ad caput refugium habet. Si qua sunt argumenta in contrarium hanc ultimam partem impugnantia, solum probant à Concilio Generali auctoritate Romani Pontificis confirmato, appellari non posse.*

Est notandum IV. Malè aliquos inferre, auctoritatem Romani Pontificis,

tificis, non esse supremam, ex eo quòd iudicari potest ab Ecclesia, seu Concilio; cum in casu hæresis deponatur: sicut asserunt, depositum fuisse Eugenium IV. à Concilio Basiliensi, Honorium I. fuisse excommunicatum à septima synodo Generali actione vltima, quasi hæreticum Monothelitam, & Liberium ab Acacio, & in eius locum subrogatum fuisse Felicem Diaconum. Nam in casu hæresis postquam Pontifex declaratus est, vt hæreticus, definit ipso facto esse caput Ecclesiæ, & consequenter definit habere supremam authoritatem; vt melius alio loco notatur. *Ad illud*, quod dicitur de Honorio: Affero, damnationem illam fuisse supposititiam, non à Concilio factam; Nam satis fundatum videtur, quod tradit Cardin. Baronius anno Christi 645. Honorium, scilicet numquam fuisse hæreticum Monothelitam; cum numquam negauerit duas voluntates in Christo, alteram Diuinam, alteram humanam; sed solam duas voluntates in ipsa humanitate, sibi contrarias, & repugnantes; carnis scilicet, & spiritus, quales nos habemus, propter somitem peccati. *Ad illud*, quod vltimo loco additur de Liberio: Dico, ipsum fuisse iniustissimè depositum, & in exilium deportatum, quando hæreticis noluit consentire; vt testatur Hilarius in lib. *aduersus Constantium*, Athanasius *Epist. ad solitariam vitam agentes*, & alij Authores historię illius temporis. Quando autem Liberius consensit in damnationem Athanasij, & cum hæreticis communicauit, abrogata à Clero Romano eius dignitate, electus est Felix. *Eugenius* denique iniuste fuit depositus à Concilio Basiliensi cum non fuerit depositio illa facta cum approbatione, & consensu legatorum Pontificis, nec à toto Concilio: vnde, & tunc desijt esse Concilium legitimum, & cassatum est ab ipso Eugenio; & sic sessiones illæ, quæ habitæ sunt post illam depositionem in dicto Concilio Basiliensi, habitæ sunt ab Ecclesia, vt illegitimæ.

Colliges ex his, falsum supponere, & asserere Gallos hosce modernos, Concilij scilicet Constantiensis decreta, circa authoritatem Pontificiam fuisse à Sancta Sede Apostolica comprobata, Romanorum Pontificum, & totius Ecclesiæ vsu confirmata. Nam vel Aduersarij intelligunt decretum illud loqui de absoluta, & omnimoda Conciliorum authoritate supra Papam, vel solum in casibus dumtaxat, de quibus tunc agebatur in Concilio Constantiensi? Si secundum; cum hæc sit legitima illius Concilij interpretatio, libenter illam admittimus; sicut ab omnibus etiam ferè Doctoribus æquè sustinetur; nempe dictum Concilium super tres illos, de quibus tunc agebatur, seu qui de Pontificatu contendebant, nempe Ioannem XXIII. Gregorium XII. & Benedictum XIII. iurisdictionem exercere potuisse; cum nimium incertum esset, quis eorum existeret verus Pontifex: ac proinde itè Concilium authoritatem habuit, vel vnum confirmandi, vel precipiendi Collegio Cardinalium alterius electionem: Et hanc fuisse mentem Concilij Constantiensis, patet ex verbis ipsius decreti editi in eodem Concilio, quæ sunt sequentia. *Hac san-*

Ha synodus Constantiensis generale Concilium faciens, pro extirpatione praesentis schismatis, & unione, ac reformatione Ecclesiae in capite, & in membris facienda declarat, quod ipsa in Spiritu sancto legitime congregata, Generale Concilium faciens, & Ecclesiam Catholicam militantem representans, potestatem à Christo habet immediate: ubi manifestè apparet decretum illud non loqui vniuersaliter, sed specificè, & singulariter pro illo tempore schismatis, in quo in Ecclesia non erat Pastor indubitatus.

Si verò, his non obstantibus, contendunt Aduersarij, decretum illud Concilij Constantiensis loqui de absoluta, & omnimoda authoritate Conciliorum supra Papam. *Impugnantur I. rationibus supra adductis, Pontificem scilicet Romanum habere supremam authoritatem supra omne Concilium; cum sit absolute supra totam Ecclesiam, & Concilium Generale; cum Concilia Generalia sine authoritate Sedis Apostolicæ Congregata legitima non sint: ut constat ex Concilio Chalcedonensi artic. 10. in fine. & in lib. 4. hyst. tripartitæ cap. 9. habetur, Regula Ecclesiastica inbet non oportere prater sententiam Romani Pontificis Concilia celebrari. & legi potest Epist. 1. & 2. S. Marcelli Papæ: idem asserit Iulius Papa epist. 2. cap. 1. Damascus epist. 3. cap. 2. & epist. 5. S. Athanasius, & alij in Epist. ad Felicem II. vltra multas alias authoritates, quas congerit Antonius Augustinus lib. 1. de Pontifice Maximo tit. 6. in 1. pag. Jur. Epitomes. Vnde videtur manifestè supremam Romani Pontificis authoritatem, & potestatem à Concilijs, non dependere: ideò Concilium Nicænum in cau. 6. prout iste Canon relatus est in artic. 16. Concilij Chalcedonensis inquit, Quod Ecclesia Romana semper primatum tenuit. Et S. Thomas opus. 1. §. similis autem citat Canonem Concilij, quod non nominat; videtur autem fuisse Concilium Chalcedonense; ut notat Surius in fine lect. 15. eiusdem Concilij, ubi sic dicitur. Veneremur secundum scripturas, & canonum definitionem sanctissimum antiqua Roma Episcopum primum esse, & maximum Episcoporum omnium. & in Concilio Lateranensi sub Innocentio III. cap. 5. habetur: Romana Ecclesia disponente Domino super omnes alias ordinaria potestatis obtinet Principatum; ut pote mater omnium Christi fidelium, & magistra.*

His addo, Concilium istud Constantiense in principio non fuisse, nec potuisse dici Generale, cui tantum aderat tertia pars Ecclesiae; id est illi dumtaxat Prælati, qui obediabant Ioanni XXIII. qui etiam dubius erat Papa, repugnantibus alijs, qui obediabant Gregorio XII. & Benedicto XIII. ac proinde pro illo tempore sub Ioanne XXIII. nec prædictum Concilium fuit Oecumenicum, & generale; nec decreta sub eius obedientia condita vim decreti Concilij Oecumenici habere potuerunt: & cum hoc decretum de quo loquimur fuerit emanatum sub Ioanne XXIII. sequitur nullius esse valoris.

Constat insuper, Quod non solum in hoc decreto, non habetur vniuersalis Ecclesiae approbatio, ut dictum est; sed nec etiam tota illa pars

integra, quæ obediebat Ioanni XXIII. illud approbavit, nec assensum, villo modo præbuit: Quinimo ipse Ioannes malo animo tulit, & conquæstus est acriter cum Oratoribus Regis Christianissimi, fuisse per æmulos suos, post suum recessum decretata, & conclusa falsa quædam, & erronea aduersus authoritatem Romani Pontificis. *Nec etiam ipse Martinus V. qui fuit antea dictus Cardinalis Odo de Columna concorditer in Romanum Pontificem, in hoc Concilio electus ipso die S. Martini, qui propterea Martinus Papa V. nominari voluit; nec ipse, inquam, Martinus V. hoc decretum approbavit; quinimo illud cum eodem Concilio, quod tunc fuit generale perfectum suoque capiti vnitum illud reprobavit: Sicut & Eugenius IV. in Florentino, necnō Leo X. in Lateranensi. Fuerunt solum à Martino V. confirmata ea decreta de Fide, quæ facta erant conciliariter, idest more aliorum Conciliorum, re diligenter examinata; vt accidit in damnatione hæresum Vuicleſi, & Ioannis Husi, qui asserabant, Quod Petrus, nec est, nec fuit caput Ecclesiæ sanctæ Catholice.*

Impugnantur II. Quia si Patres illius Concilij existimassent, Concilium potestatem habere supra Romanum Pontificem, nullo modo Concilium ipsum petiisset humiliter confirmationem, & approbationem à Martino V. eorum, quæ in dicto Concilio gesta erant: vt patet in *sess. 36. eiusdem Concilij*, in qua habentur sequentia. *Sacrosancta synodus Constantiensis statuit, & decreuit, quod futurus Romanus Pontifex per Dei gratiam de proximo assumendus cum hoc Sacro Concilio, vel deputandus per singulas nationes, debeat reformare Ecclesiam in capite Romane Curie: Quinimo edidisset decreta de reformatione Pontificis; ergo signum est, quod cognoscebant potestatem Concilij esse subditam, & subiectam potestati Summi Pontificis, & illum pro suo superiore venerabantur.*

Ex quibus infero, Quod intellecto præfato decreto Concilij Constantiensis absolutè, nempe, Quod Concilium in omni casu, tum scilicet schismatis, tum cuiusque alterius causæ, siue adsit, siue non adsit schisma habere potestatem supra Pontificem, debere recenseri inter Concilia Generalia partim confirmata, partim reprobata; cum constantissimè hæc veritas ab omnibus tueatur; Romanum scilicet Pontificem, simpliciter, & absolutè esse supra totam Ecclesiam, & Concilium Generale.

Hinc notandum est I. Ex potestate, quam habet Ecclesia eligendi Pontificem, non benè inferitur, Ecclesiam esse supra Papam; vt aliqui hæretici voluerunt inferre; Nam Ecclesia non eligit conferendo potestatem, Papæ; sed solum designando Personam, vt ei à Christo Domino conferatur potestas, quæ consequenter, nec subijcitur, nec originatur ab Ecclesia: Et sicut potestas Imperialis, & in aliquibus Prouincijs Regia, quamuis originetur ab Electoribus, vel à Populo; eis tamen non subijcitur,

citur, multò magis potestas Pontificis, quæ nec ab Ecclesia originatur debet ei subijci, & esse Ecclesiæ potestatem supra illam Pontificis. II. Nec acceptatio illius designationis factæ ab Ecclesia probat Aduersarium intentum; Nam omnis Pontifex ritè electus acceptatur à Deo, ex vi illius primæ voluntatis, qua voluit potestatem vniuersalem pascendi oues suas committi Petro, & legitimis eius successoribus: acceptatio igitur Ecclesiæ, facit vt constet, quòd hic in particulari sit legitimè electus, & illi applicetur illa acceptatio, & collatio Christi Domini: vnde Ecclesia acceptat istum in particulari, tamquam Pontificem indubitatum, & legitimè electum. III. Nec obstat, Quòd Zozimus Papa *text. in corp. contra stat. 25. quest. 1.* ait: Nihil posse Romanum Pontificem contra Patrum testimonia definire; Quia hoc dictum intelligitur quatenus illa statuta ius naturale, vel diuinum referunt; vt tenent Conc. de spons. par. 2. cap. 6. §. 9. Azorius *instit. moral. par. 2. lib. 5. cap. 14. vers. si obijcias*: Vnde possumus dicere Papam ita omnia posse; vt nihil sit exclusum ab eius potestate, nisi quæ contra fidem Catholicam facit; ita Cardin. Tusc. d. litter. P. concl. 49. n. 54.

Tanta igitur est Summi Pontificis potestas, vt nec Concilium Generale, nec vllum alium in terris superiorem habeat; ita Carolus Marant. *tom. 1. respons. 25. nu. 53.* Duard. *in Comment. ad Bull. cær. lib. 1. cap. 4. quest. 2. num. 23.* & alij, cum quibus Solarzan. *de iure Indiar. tom. 1. lib. 2. cap. 23. num. 74.* ait, Quòd Papa supremum obtinet principatum, & Monarchiam inter omnes mundi Principes, & est maior omnibus hominibus, & vnus omnium Princeps constitutus super Reges, & regna, causa causarum, & Dominus dominantium, vertex omnium dignitatum, omnia, & super omnia: quia eius potestas super ceteras potestates, non ex hominibus, sed ex Deo est. Addo, quòd adeò debetur Papæ obedientia, vt neque cuiquam Apostolo resurgenti parendum esse contra, affirmant Panormit. & Doct. *in cap. quòd translationem de off. de leg.* Et ideò licèt totus mundus sentiret contra Papam, standum erit eius sententiæ, & declarationi. Philip. Prob. *ad Monarch. in cap. super eo, num. 29. de heret.* vbi dicit, Papæ sententiam præualere sententiæ omnium Episcoporum. Et Valenz. *in monit. contra Venet. p. 6. ex n. 91. & p. 7. ex n. 122.* cum Solarza supra citato asserunt, Quòd illud quod Papa approbat, vel reprobat omnes approbare, vel reprobare debent; Nam Summi Pontificis, & Christi vnum dicitur esse tribunal, & consistorium: & ideò hæresim sentire videtur, qui à sententia Papæ ad Christum appellat; quasi credat Papam Christi non esse Vicarium, nec cum eo idem tribunal habere. ita Alexandrin. *in cap. perceptis col. 2. dist. 12.* Palat. *de iusta obtent. Regni Navarra p. 2. §. 4. in Princip. Troil. Maluct. de Canoniz. sanct. dub. 2. num. 10.* Selu. *de benef. par. 3. quest. 8. n. 26.* Castr. *cons. 414. sub n. 1. vers. bis præsuppositis.* Aluarz Pelagius *de planct. Eccl. lib. 1. cap. 29.* Nauar. *in repetit. canonit. de iudic. notab. 3. n. 11.* Coned. *d. collect. 47. in fine*; & alij ad quos breuitatis causa lectorem remitto.

Colligitur ex his, contra tertiam Propositionem, Canones, & Decreta, quibus Apostolicæ potestatis usus absolutè, & non in casu solius schismatis moderatur, non esse Spiritu Dei conditos, & totius mundi reuerentia consecratos, quinimo reprobatos à Summis Pontificibus, nempe ab ipso Ioanne XXIII. quo tempore fuerunt conditi, & à Martino V. vero, legitimoque Pontifice, & communi sensu reiectos; cum fuerint tempore schismatis talia Decreta emanata, vt supra visum est. Vnde falsò, & temerè Galli isti moderni hanc propositionem enunciant; *Vsum, scilicet, Apostolicæ potestatis moderandum esse per Canones, & Decreta Spiritu Dei conditos, & totius mundi reuerentia consecratos.* Quomodo enim potuit Spiritus Dei illos condere, & totius mundi reuerentia consecrare, si communi sensu totius Ecclesiæ fuerunt prædicta Decreta reiecta, & à Summis Pontificibus, & Concilijs reprobata?

Videant ergo quæso Doctores isti, ne blanda hac pietatis, & deuotionis specie incautos fidelium animos pestiferum virus instillent de Pontificia, & Apostolica autoritate non benè sentiendo. Quomodo enim benè sentiunt de Romani Pontificis autoritate huius nouæ doctrinæ buccinatores, & contra Pontificiam dignitatem, quam semper magni fecerunt maximi Principes, & SS. PP. tam Græci, quàm Latini; forsitan secretas animi passiones sequentes linguas, & calamos acunt, asserendo usum Apostolicæ potestatis absolutè moderandum esse per Canones? Solùm ergo inter innumeras ferè SS. Patrum sententias de Romani Pontificis autoritate, illam D. Bernardi ante eorum oculos posui, vt videant quanti facienda sit dignitas Pontificia, & reuerentia, qui *lib. de considerat.* scribens ad Eugenium Papam, hæc habet: *Indagemus diligentius quis sis, quam geras videlicet pro tempore personam in Ecclesia Dei? Quis es? Sacerdos magnus, Summus Pontifex, tu Princeps Episcoporum, tu hæres Apostolorum, tu primatu Abel, gubernatu Noe, Patriarchatu Abraham, ordine Melchisedech, dignitate Aaron, autoritate Moyses, iudicatu Samuel, potestate Petrus, unctione Christus, tu es cui clauis traacta, cui oues credite sunt.*

Dicendum III. contra Quartam Propositionem, iudicium Summi Pontificis in Fidei quæstionibus; idest definiendo aliquid ad Fidem, vel ad mores pertinens, etiam absque Concilio Generali, seu Ecclesiæ consensu, esse certum, & infallibile; ac proinde Pontificem, vt Pontificem errare non posse in doctrina Fidei. Docent hanc sententiam D. Th. Caietan. Cardin. Turrecrem. & ferè omnes Doctores catholici, vt videre est apud Cardin. Bellarm. *lib. 4. de Roman. Pontif. à cap. 2. vsque ad 15.* Hoc apertè demonstrant illa verba Christi Domini *Lucæ 22. Simon ego rogaui pro te, ut non deficiat fides tua, & tu aliquando conuersus confirma fratres tuos.* quem locum sic intellexit Lucius Papa I. in *Epist. ad Episc. Gallie, & Hispania tom. 1. Concil.* Quod scilicet Romanus Pontifex non possit errare, nec aliquis vnquam errauit in definiendis rebus Fidei. Simi-

militet Agartho Papa in Epist. scripta ad Imperatorem, & approbata in sexta Synodo Generali; vt habetur tom.2. Concil. Felix I. in Epist. ad Benignum. Nicolaus I. Epist. ad Michaelcm. Innocentius III. cap. maiores de Baptismo, & eius affectu. Bernardus Epist. 190. S. Hieronym. aduersus Rufinum. Cyprianus Epist. ad Cornelium Papam, & alij multi. Accedit etiam authoritas D. Tho: 4. contra gentes cap. 76. & in additione quæst. 40. act. 6. Vnde manifestè constat, Quod Christus in Ecclesia Petrum suum Vicarium, & Successores eius instituit: vnde cum dixit Petro, *Pasce oues meas*: præmisit interrogationem, *Simon Ioannis diligis me plus his?* vt ostenderet, se authoritatem Petro dare, vt distincto ab alijs discipulis; propter quod exponens Chrysostomus prædicta verba, ait: *Præteriens alios Petro loquitur, Præpositus loco mei esto, & caput fratrum tuorum.* soli ergo Petro ea constantia promittitur; quia ille solus, & eius Successores futuri erant veritatis infallibiles iudices; impossibile enim est, vt per illa verba *Tibi dabo. Tu es Petrus. Tu confirma fratres tuos. Simon Ioannis pasce oues meas*, designet Petrum in persona aliorum Apostolorum; cum loquatur cum Petro discernendo ipsum à cæteris; ergo loquitur personatè, & indiuidualiter cum Petro; ergo si Petrus omnibus est Prælatus sine vlla distinctione, nullus fuit illi æqualis in potestate illa, qua vnus est; scilicet vt ordinarius pastor Ecclesiæ: quam veritatem Apostolos intellexisse, testatur D. Hieronym. super cap. 18. Matth. dum inquit. *Quod quia viderant pro Petro; & Domino idem tributum redditum, ex æqualitate pretij, arbitrati sunt, Petrum cæteris Apostolis esse Prælatum, & idè interrogant, qui maior sit in regnum celorum.*

Probatur, & confirmatur eadem veritas ex authoritate Ecclesiæ à temporibus Apostolorum, per dicta Pontificum, Conciliorum, & Patrum: In primis enim S. Dionysius loquens de Ecclesia, quæ suo tempore gubernabatur ab Apostolis, tribuit Petro supremam authoritatem inter omnes etiam Apostolos; dum inquit cap. 3. de diuin. nomin. *Aderat autem, & Petrus suprema, & antiquissima Theologorum summitas.* S. Dionysius Papa epist. 2. quæ habetur tom. 1. Concil. *Habemus*, inquit, *authoritatem vniuersali Ecclesia subuenire, & quidquid nocivum est authoritate Apostolica corrigere, & emendare.* Et infra subdit: *Vnumquodque tunc salubriter completur officium, cum fuerit vnus, ad quem possit recurrere, Præpositus.* S. Cyrillus Alexandr. lib. 2. Thesauri. quem etiam sequitur D. Tho: opusc. 1. contra errores Græcor. *Vt membra, inquit, maneamus in capite nostro Apostolico throno &c. Ipsum venerantes, ipsum rogantes præ omnibus, quoniam ipsius solius est reprehendere, & corrigere, statuere, soluere, disponere, & loco illius ligare, qui ipsum edificauit. & infra: Christus nulli alij, quod suum est, sed ipsi soli dedit, cui omnes iure diuino caput inclinent.* D. Bernardus lib. 2. de considerat. ad Eugenium, ait, *Fortè presentes ceteri condiscipuli erant, cum committens vni oues, unitatem omnibus commendauit in vno grege, & in vno pastore, & infra: Alij in partem sollicitudinis, tu in pleni-*

tudinem potestatis vocatus es, aliorum potestas arctatur limitibus, tua extenditur, & in ipsos qui potestatem super alios acceperunt. Denique D. P. Augustin. in lib. quest. noni, & veter. testam. quest. 75. ait, Sicut in Salvatore, erant omnes causa magisterij; ita & post Salvatorem in Petro omnes continentur; ipsum enim constituit caput eorum. Vnde bene infert Ferrariensis, Vanam esse, & Fide Christiana alienam opinionem dicentium, Concilium, & Ecclesiam esse supra Papam, & ipsum Papam ab Ecclesia auctoritatē habere tamquam ab ipsa institutum; sed dicendum cū Augustino Triumpho Ordinis Erem. S. P. August. illud quod scripsit in summa de potestate Ecclesiæ. Ex mandato ergo Papæ, qui est caput Ecclesiæ ea, quæ sunt Fidei roborantur, & terminantur. & infra, Quæ sunt Fidei Christianæ Papæ est propriè determinare.

Suffragatur auctoritas Paschasini Episcopi Civitatis Lilybei, nunc Marsaliæ dictæ, Vrbs antiquissima inclyti Regni Siciliæ; constitutus enim Paschasinus Legatus à Leone Pontifice ad generale Concilium Chalcedonense, auctoritate eiusdem Pontificis coactum, ipsum omnes Patres Concilij audiunt, tamquam ipsum per Leonem, & D. Petrus per Leonem loquutum, omnes ita, ne vno quidem excepto clamantes, *Petrus per Leonem, ita loquutus est, Apostoli, ita docuerunt*; Quod non esset benè dictum, si intelligerent Pontificem expectare infallibilitatem ab Ecclesiæ consensu. *Plenam ergo, & perfectam potestatem definiendi, quæ ad Fidem pertinent, habet solus Petri Successor, qui ob hoc Papa dicitur, quasi Pater Patrum; ut ait Paludanus Patriarcha Hierosolymitanus; Quia Christus cum Petri Successoribus adest per suam gratiam, eos dirigens, & confirmans in Fide; ut eorum doctrina, & regimine perseveret Sedes Apostolica, & Romana Ecclesia, sine macula hæreticæ prauitatis: Vel quia, ut ait S. Catharina Senensis tract. 3. cap. 115. Clavem huius prætorij sanguinis Apostolo Petro reliquit, ceterisque successoribus eius præteritis, & qui succedunt in futurum, usque ad ultimum iudicii diem.*

Definitivam rerum Fidei sententiam, indeficiensque iudicium spectare ad Summum Pontificem Romanum, ultra multorum Pontificum auctoritates, nempe Martini Papæ V. Leonis X. in Concilio Oecumenico Lateranenſi. Nicolai V. Pij II. Sixti IV. Clementis VIII. in Bulla indictionis vſitationis omnium Ecclesiarum. Pauli V. in Bulla Canonizationis S. Franciscæ Romane, & S. Caroli Borromæi. Gregorij XV. Urbani VIII. Innocentij X. Alexandri VII. & Clementis X. in Bullis Canonizationū. Suffragatur etiam auctoritas Concilij Florentini, & Lateranenſis in quibus Patres omnes Romanum Pontificem, verum Christi Vicarium vocant, totius Ecclesiæ caput, & omnium Christianorum Patrem, & Doctorem, nec non pascendi, regendi, & gubernandi vniuersalem Ecclesiam, à Christo Domino plenam potestatem ei traditam esse: Quod non esset verum, si supremum, & infallibile iudicium in rebus

Fidei exercere non valeret ; cum hoc sit præcipua plenæ authoritatis Ecclesiæ pars.

Nec desunt rationes ; quibus suprema , & infallibilis in rebus Fidei authoritas Sedis Apostolicæ , potest confirmari. I. Quia in illo ponenda est authoritas , & suprema potestas infallibiliter determinandi res Fidei , in quo est potestas ad congregandum ; in quo enim est potestas ad congregandum ; est etiam ad cognoscendum , de illa re , ad quam congregat ; & consequenter ad infallibiliter determinandum ea , quæ trahant ; cum potestas congregandi fundetur in potestate pascendi , & confirmandi cæteros ; ergo ad quem pertinet congregare Ecclesiam ; pertinet etiam confirmare , & determinare res Fidei ; sed in solo Romano Pontifice est suprema authoritas congregandi Concilium , ut supra visum est ; ergo in ipso est etiam suprema authoritas , & potestas ad infallibiliter determinandum res Fidei ; ergo supremum , & infallibile iudicium in rebus Fidei est in solo Romano Pontifice , independentè à Concilio. II. Quia Papa habet plenitudinem potestatis , ut inquit Anacletus Papa II. *quest. 6. canon. decret. de usu pallij* ; ergo alij etiam simul congregati illi subijciuntur , & non ipse eis ; ergo falsum est , ut dicunt isti Galli Doctores , iudicium Summi Pontificis , in Fidei quæstionibus , non esse irreformabile , nisi Ecclesiæ consensus accesserit . III. Quia Concilium est Papæ subordinatum ; quia omne quod recipit potestatem ab alio est illi subordinatum ; sed Concilia recipiunt potestatem à Papa , non Papa à Concilijs ; ergo Concilium est illi subordinatum ; sed non esset illi subordinatum , si Pontifex expectaret Ecclesiæ , seu Concilij consensum ; quinimo Pontifex subordinaretur Concilio , seu Ecclesiæ ; ergo &c. IV. Quia Pontificem nullus hominum , nec Concilium ipsum iudicare potest sine eius authoritate , in *Can. Nunc autè 21. distin.* & in *Can. huic etiam 17. distin.* quinimo ipse omnes iudicat ; quia Papa Catholicus caput est Ecclesiæ ; ergo Pontifex est supra Concilium ; & consequenter non debet expectare Ecclesiæ consensum in rebus Fidei , ad formandum infallibilitatis iudicium.

Potest alijs argumentis veritas hæc infallibilitatis Pontificiæ in rebus Fidei , & religionis , quando ex Cathedra Pontifices loquuntur confirmari ; quæ quantumvis seorsim sumpta , tantæ forsan efficacix non sint , collectivè tamen rem clarè demonstrant. I. Quia ipsi semper tulerunt leges , & præcepta , quæ ad totius Ecclesiæ gubernationem spectarent , eamque obligarent , potestate etiam coercitiva , impellendo fideles ad illis obediendum . II. Occurrentibus dubijs de rebus ad Fidem , vel ad mores Ecclesiæ pertinentibus , ad eos undique , tamquam ad supremos Iudices , recursus semper habitus est ; atque eorum sententia , & definitio expectata ; ut fateri debent Doct. Galli , qui tempore Innocentij . X. sel. record. Summi Pontificis , instanter ab eo petierunt , condemnationem quinque
pro.

propositionum Cornelij Iansenij, vt damnarentur, vt Hæreticæ. III. A sententia Episcoporum, & Conciliorum semper appellatum fuit ad Romanos Pontifices, quas vbi iustæ firmabant, vbi iniquæ rescindebant: Ad eos etiam semper spectauit solemniter Sanctos Canonizare, Concilia Generalia congregare, regere, confirmare: & vbi etiam opus fuit abrogare. IV. Denique facit autoritas desumpta ex *Deuter. 17.* vbi Deus difficile, & ambiguum iudicium iubet deferri ad Sacerdotes Leuitici generis, & iudicē qui fuerit illo tempore, & addit: *Qui indicabunt tibi iudicij veritatem.* quibus Summi Pontificis veritatem depingi explicat Innocentius III. in *cap. per venerabilem versationibus*, qui *fil. sint legit.* Iunctis multis alijs traditis à Pigh. & Can. Ex quibus sequitur Romani Pontificis, qui nunc est, & erit in futurum infallibile esse iudicium: & hanc resolutionem tenendam esse tamquam Apostolicam traditionem definitum est à Leone X. in *Bulla condemnat. Lueri art. 18.*

Neque dicas, Pontificem in dicendis causis Fidei, alijsque arduis debere consilium Cardinalium petere; ergo dicendum est Papam errare posse in ijs, quæ sine Concilio vniuersali decernit. *Nam respond.* Quòd iura illa, & similia, petendi scilicet consilium Cardinalium, procedunt de honestate; non verò de necessitate; ita Barbosa *cap. 4. de dignis. & privilegi. Cardin.*

Hinc notandum est, Quòd si solam personam Papæ per se consideremus, vt homo est, potest in vitia incidere, & peccare; cum sit tamquam homo humanis infirmitatibus subiectus; non autem potest errare in Decretis, quæ tamquam Pontifex edit; *Quia* scilicet pro hoc orauit Christus, non ita pro illis: vnde si ponimus diuinam prouidentiam, & Christi promissionem, secundum quam Ecclesia, & eius supremus Princeps Spiritus sancti assistentia dirigitur in decretis, statum Ecclesiæ respicientibus, errare minimè potest; legatur Albertin. *de assertion. cathol. q. 9. nu. 12.* Cardin. Bellarm. *d. lib. 4. cap. 7. vers. vltima ratio.*

Non nego tamen, Supposito, quòd Pontifex possit deficere à Fide, cum incidit in hæresi, quòd possit deponi ab Ecclesia; *Quia* Pontifex per hæresim desinit esse verum membrum Ecclesiæ, & per consequens esse caput; hinc desinit à Papatu, & fit omnibus fidelibus minor. Ex hoc autem non sequitur Ecclesiam habere iurisdictionem supra Papam, nec esse superiorem ipsos; *Quia* Pontifex est absolute caput in terris: Ecclesia igitur tunc non se habet, nisi vt declarans crimen; Christus verò immediate aufert illi Pontifici iurisdictionem: sicut è contrario in electione Ecclesia se habet, vt designans personam; Christus verò, solum vt dans iurisdictionem. Adde quòd ad iuridicam declarationem criminis (vt bene notat Arriaga) non est necessaria iurdictio in reum, & potest è contrario probari iuridicè; potest enim facinus aliquod gloriosum, exerceri sine iurisdictione in facinoris autorem; vt videtur in iuridica informatione circa vitæ sanctitatem, pro Canonizatione alicuius San-

eti; etiam si non habeat Pontifex ullam iurisdictionem in Sanctos.

Nota I. Quòd quamvis Ecclesia sit omnium fidelium, atque adeò Summi Pontificis mater; non sequitur, quòd sicut mater est superior filio, ita quoque Ecclesia Summo Pontifici. *Quia* sicut non repugnat filium matre sua naturali, & legitima superiorem esse, propter munus, quod in Republica gerit; ita nihil obstat, quominus Summus Pontifex Christi Vicarius ratione dignitatis Pontificiæ, diuinitus illi collatæ; non autem ab Ecclesia, sit eius caput; atque adeò sub illo respectu, & superior. II. Quando SS. Patres tribuunt Ecclesiæ aliquos actus hierarchicos, diciturue ligare, soluere, iudicare, definire &c. hoc intelligitur per Prælatos, præcipuè per supremum: sicut etiam communitas dicitur agere solo capite operante, & viuens dicitur viuere, operationesque vitales exercere per animam, tamquam per principaliorē partem, & formam à qua vitam haurit.

Constans ergo, & firma manet vndequaque veritas huius nostræ conclusionis, Quòd verus, & indubitatus Summus Pontifex simpliciter, & absolute, ita sit supra quodcumque Concilium Generale, & talem infallibilitatem habeat, dum ex cathedra docet, quæ ad Fidem pertinent; ut inreformabile sit eius iudicium; etiam quòd Ecclesiæ consensus non accesserit. Ex quibus fortasse rationibus motus Illustrissimus, & Reuerendiss. Dominus Georgius Szelepcherus Archiepiscopus Strigoniensis, acerrimus infallibilitatis Pontificiæ defensor, per litteras quasdam declaratorias in libera, regiaque Ciuitate Tyrnauensi, typis Academiæ Archiepiscopalis editas, die 24. Octobris, anno 1682. Has omnes quatuor Propositiones, tamquam detestabiles proscripsit, his verbis. *Dei nomine inuocato, & prahabito, ac meliori forma, qua per temporis, & loci difficultatem licuit, diligenti examine, & deliberatione matra, cum Venerabilibus Patribus Coepiscopis nostris, Abbatibus, Praepositis, Capitulis, alijsque quampluribus Theologiæ Professoribus, & sacrorum Canonum scientia præstantibus viris, prefatas quatuor propositiones configimus, & proscribimus, & vniuersis istius Regni Christi fidelibus interdiciamus, ac prohibemus, ne eas legere, vel tenere, multo minus docere audeant; donec super eis prodierit infallibile Apostolicæ Sedis oraculum, ad quam solam diuino immutabili privilegio spectat de controuersijs Fidei iudicare.* Vnde Christianissimam, Catholicamque solertiam in defendenda Summi Pontificis infallibilitate, & Ecclesiæ vnitatem, huius Illustrissimi Præfatis, non minus animo, & corde, sed etiam opere S.R. Ecclesiæ filij admiro, quæ forsitan fecit, ut clementissimus Deus bonorum omnium largitor, ipsi Archiepiscopalem cathedram Ciuitatis Strigoniensis, à Barbaris Ottomanicis, per 130. circiter annos occupatam, restituerit, fugatis ab eadem Ciuitate iisdem Barbaris, mense Octobris, anno 1683. ab exercitu Cæsareo, & Polonico, sub Inuictissimo Ioanne III. Poloniæ Rege, & Serenissimo Carolo V. Duce Lotheringiæ Generalissimo armorum Cæs-

saræ Maiestatis Leopoldi Primi. Post habitam celeberrimam illam, omnibusque sæculis memorandam victoriam sub menibus Viennæ, quibus Barbaricus exercitus ad tria fere centena millia virorum ascendens, profligatus dispersit à fulgore ensium prædictorum Christianæ Reipublicæ Achillium die 12. Septembris. 1683. Huius autem victoriæ, & memorabilis triumphus causam, post Deum O. M. meritis, orationibus, iugibusque nummorum subsidij SS. Domini Nostri Papæ INNOCENTII XI. qui nunc Ecclesiæ feliciter præest, orbis Christianus adscribit.

Petes, quando nam Pontifex loquitur ex Cathedra? *Respond.* Tunc Pontifex loquitur ex Cathedra, seu infallibiliter ob specialem Spiritus sancti, tunc eum dirigentis assistentiam; quando orta aliqua Fidei controversia, præmissis consentaneis diligentij ad eius discussionem, eam expressè definit, vniuersalique Ecclesiæ credendum absolute proponit, intra præfixum in formali definitionis decreto, tempus, eo ante illud, nec refixo, nec retractato: vt igitur responsio Summi Pontificis infallibilis habeatur, censeaturque, non vt priuatum Doctorem, sed vt Pontificem definisse; non tantum opus est, eam propositam Fidei quæstionem discutere, disensuque absolute respondere; sed etiam requiritur, vt responsionem suam toti Ecclesiæ credendam proponat.

Assignantur species Propositionum damnabilium.

Petes hic, Quoniam sint species propositionū damnabilium? *Respond.* Octo esse species talium propositionum; vt videre est apud D. Thom. *quæst.* 11. *art.* 2. Cardinalem Tu. recrematam *lib.* 4. *summæ de Eccles. par.* 2. *cap.* 11. & alios. *Prima*, est propositio hæretica, quæ aduersatur euidenter Scripturæ sacræ, aut propositioni, quæ tamquam de Fide definita est per Ecclesiam. *Secunda*, est propositio erronea, quæ ex communi Theologorum sensu, est illa, quæ est contra conclusionem Theologicam, quæ legitimè, & manifestè insertur ex duabus præmissis, quarum vna est de Fide, & altera est euidens; veluti in hoc syllogismo, *Omnis homo est risibilis, Christus est homo; ergo Christus est risibilis.* in quo maior est euidens, minor de Fide, & conclusio legitima: vnde propositio, quæ negaret, Christum esse risibilem, est erronea; seu error in Fide; licet non sit hæresis; quia immediatè definitum non est, Christum esse risibilem: quantumvis in foro externo, qui negaret hanc propositionem hæreticus præsumeretur. *Alij* explicant propositionem erroneam, dicentes, eam esse, quæ negat doctrinam, ita receptam communi sensu Ecclesiæ; vt nemo pius, aut verè doctus de ea dubitare audeat; vt qui negaret B. V. Mariam resurrexisse, & in corpore fuisse assumptam, quod expressè non inuenitur reuelatum, aut definitum; pertinet tamen ad doctrinam Catholicam. *Tertia* propositio, est sapiens hæresim; & est, quæ licet aliquando possit habere bonum

sensum; tamen ex quibusdam circumstantiis, vel ex parte asserentis, vel ex temporum calamitate; cum non sit satis modificata, saporem quemdam habet hæresis iudicio prudentum, & sapientum; vt si legeretur in lib. Ariani, Pater maior me est. *Quarta*, est propositio temeraria; & est, quando aliquis asserit quidpiam contra communem opinionem Ecclesiæ, aut Theologorum in materia graui sine magna autoritate; ita vt præsumi possit, quod si in eam quæstionem incidissent, vel de ea fuissent interrogati PP. & Theologi, negatiuè responderent. *Quinta*, est propositio scandalosa, quæ affert causam scandali circa aliquam doctrinam, & veritatem Fidei, & est causa ruinæ spiritualis alterius, vel inclinando homines ad peccatum, vel ipsos remouendo ab exercitio virtutum. v. g. cum plures frequentant locum aliquem causa venerandi reliquias alicuius Sancti; Si quis diceret, Quis scit, an hæ reliquæ veræ sint, nec ne? *Sexta*, est propositio iniuriosa, quæ detrahit statui alicui fidelium, aut notabili personæ. *Septima*, est propositio seditiosa, quæ apta est parere seditionem in populo, vel importat tumultus inter diuersas Respublicas, & Principes; vt si quis diceret, *Malo Præfato, aut Principi non esse obediendum*. *Octaua*, est propositio malè sonans, aut piarum aurium offensua, quæ aliquid profert indecens, aut iniquum, in materia pietatis, ac religionis; vt qui de partibus secretioribus alicuius Sancti verbis impudicis, & obscenis loqueretur. *Aliqui* his propositionibus addunt propositionem Blasphemix, & est, Quando aliquod conuiuium in Deum, vel in Sanctos profertur; si est contra Deum, habebit malitiam contra Religionem, & supremum cultum, & honorem, ei debitum; si contra Sanctos, habebit malitiam contra dulciam, virtutem religione inferiorem, qua reuerentia, & cultus Sanctorum præcipitur.

De Spe.

Quid sit Spes, & quodnam eius obiectum?

Spes in communi est actus ille, quo bonum absens desideramus cum aliqua probabilitate, quod finis illud obtenturi. Hoc modo Spes differt à desiderio in communi; quia desiderium potest versari circa rem ex se impossibilem; vt cum quis optat non peccasse, vel esse tam Sanctus, quam Deus, &c. Sumitur autem Spes proprius, & pressius pro habitu speciali, quo fideles sperant dona supernaturalia, beatitudinem, & ea, quæ ad beatitudinem pertinent, & pro actu ab hoc habitu procedenti; *Docet* communis Theologorum schola, Spem ad voluntatem pertinere; hoc etiam tenet D. Tho; 1. 2. *quest.* 18. *art.* 1. & 2. 2. *quest.* 40. *art.* 2. Colligitur etiam ex D. P. N. August. *tom.* 3. in *Ench.* ubi dicit, Spem esse de bonis, bona autem ad voluntatem pertinent; sicuti

vera ad intellectum. Vnde colligitur, quòd Spes nò potest pertinere ad actum intellectus, quo aliquis iudicat, se esse saluandum; quia actus iste, seclusa Dei reuelatione, certitudinem habere non potest. Neque in actu intellectus, quo iudicat se esse saluandum, attenda promissione diuina, non deficiura; quia hoc iudicium attinet ad Fidem. Fide enim credimus, Deum esse veracem, & fidelem: Hinc est, quòd certitudo Spei, sicut etiam, & desperatio, in actu voluntatis, non intellectus consistit.

Obiectum materiale primarium Spei Theologicæ est beatitudo æterna, qua possidemus ipsum Deum: Hoc est citra quæstionem inter Theologos, quæ solùm vertitur in hoc. An tantum beatitudo formalis, seu ipsa visio beata, an beatitudo obiectiua, seu ipse Deus possessus, vel vtraque simul sit obiectum materiale Spei? Et dico cum communi Scholasticorum sententia, quòd beatitudo obiectiua est finis, *qui*, beatitudo verò formalis est finis *quo*: ex vtraque autem conflatur finis *cuius*: & sic in nostro casu finis, *qui*, est ipse Deus, finis, *quo*, est ipsa visio beata, seu possessio Dei: vtrumque autem speramus per virtutem Spei; Quia obiectum materiale est ipsa res sperata; sed res sperata est beatitudo, non minùs formalis, quàm obiectiua; ergo &c.

Obiectum formale Spei est bonitas intrinseca rei speratæ, seu Dei, pro vt Deus est bonus nobis. *Ratio* est, Quia sicut obiectum materiale Spei Theologicæ est res sperata, vt paulo ante diximus; ita obiectum formale est ratio formalis, propter quam res illa speratur, & amatur nobis, vt omnes fatentur; sed ratio formalis, propter quam res sperata speratur, & amatur, est bonitas Dei; quia ipsa habet bonitatem nobis congruentem; & quia bonum est nobis illam habere, vt ex se patet; ergo, &c. *Hinc* est, quòd omnipotentia Dei, & alia auxilia, quibus speramus beatitudinem, non ingrediuntur in ratione obiecti formalis: sed sunt principia, & media necessaria: & sic beatitudinem amamus propter se ipsam, vt bonam nobis; & omnipotentiam, & alia auxilia, vt principia, & media necessaria, ac vnice proportionata ad beatitudinem obtinendam. *Neque*, arduitas pertinet ad obiectum formale Spei; arduum enim, quod est idè, ac altum, & accessu difficile; vel vt alij, est idem, ac difficile; id est, quòd licet sit in sua potestate, illud tamen consequi non potest, sine magnis sumptibus, studiosa industria, peruigili cura, ingenti labore, aut appetitus sensibilis reluctancia: Hoc inquam arduum se habet, tamquam conditio ad obiectum formale Spei; quia arduitas non est formaliter bona, sed tantum occasionaliter; ideò non attrahit voluntatem, sed potius retrahit.

Nota I. Quòd nos non possumus sperare Spe Theologica bonum, aliquod, quod saltem extrinsecè in vitam æternam non ordinetur: vnde est falsum, quod dicit Mæratius *disp. 51. sect. 2.* Quòd obiectum speratù à Susanna iniussè ad mortem damnata; fuerit quid purè naturale: sicut etià sperata victoria Iudith, fuerit de obiecto purè naturali; Nam est certum san-

sanctissimas illas feminas obiecta illa naturalia ad vitam æternam ordinasse: de Susanna colligitur ex verbis ipsius dicentis, *Melius est mihi absque opere incidere in manus vestras, quàm peccare in conspectu Domini*; de Iudith autem colligitur ex pietatis operibus, quibus, ut narrat Scriptura, se exercuit, antequam negotium adeò arduumsumeret. *Nota II.* Quòd licet interroganti, cur talem rem sperat, non respondet, quia est bona; sed quia habet hæc auxilia, & hanc industriam ad illam obtinendam; *Non sequitur ex hoc, quòd hæc auxilia v.g. & non bonitas rei speratæ, sit ratio formalis, quæ, moueat ad sperandum.* Ratio est, quia actus ille Spei non resoluitur in suum formale motuum; sed in principia efficientia, quæ à sperante respiciuntur, tamquam media respectu rei speratæ; hinc est, quòd cum auxilia, industria, &c. sint media respectu rei speratæ; fit, ut actus ille Spei resoluator in auxilia, industriam, &c. *III.* Quando D. Tho: dixit, Quòd auxilium est obiectum formale Spei; Loquutus est de obiecto formali extrinseco, & improprio; in ordine ad quod ex eadē ratione res sperata obiectum materiale dicitur: Sicut etiam comparatio facta à D. Tho: inter primam veritatem, & auxilium diuinum respectu obiecti crediti, & sperati, non currit in omnibus; sed solum in hoc, quòd sicut actus Fidei dependet à prima veritate; ita, & actus Spei ab auxilio diuino; cum hoc tamen discrimine, quòd actus Spei dependet ab auxilio diuino, tamquam ab obiecto formali extrinseco; & actus Fidei à prima veritate tamquam obiecto intrinseco. *IV.* Nota, nos posse actum Spei Theologicæ alienam beatitudinem personæ à nobis distincte sperare; hoc etiam docet D. Tho: art. 3. dicens, *Et sicut est eadem virtus Charitatis, qua quis diligit Deum, se ipsum, & proximum; ita etiam est eadem virtus Spei, qua quis sperat sibi ipsi, & alteri.* Est Spes virtus Theologica à Fide, & Charitate distincta; distinguitur enim à Fide; quia hæc pertinet ad intellectum, & Spes ad voluntatem; distinguitur etiam à Charitate ex obiecto formali illius; quia Spes respicit Deum, ut bonum nobis actu concupiscentiæ; Charitas verò respicit diuinam bonitatem, ut bonam, seu consonam ipsi Deo actu amicitiae.

De subiecto Spei.

IN Beatis non potest esse actus Spei, nec circa possessionem, nec circa durationem beatitudinis: quo ad primum conclusio est certa; quo ad secundum ostenditur; Quia ad hanc durationem tantum requiritur ex parte Dei concursus vniuersalis causæ primæ; sed ex munere causæ primæ tenetur conseruare visionem, ex sua natura permanentem, cui nulla forma, aut agens contrarium resistit; ergo, &c. *Non nego tamen, quòd Beati eliciunt ante resurrectionē proprium actum Spei circa gloriam corporis ætuturam post resurrectionem; Quia hoc obiectum est bonum, & dependet à Deo; non solum ut causa prima, sed miraculose resurrectionem*

nem corporum efficiente; habet proinde sufficientem arduitate, ut sit obiectum Spei. *Quidquid* in contrarium docent PRæintelligendi sunt de beatitudine iam obtenta, circa quam non datur Spes: Unde circa hunc actum existimo, probabiliter manere in Beatis, etiam habitum; Nam, qui negat omnem habitum Spei in Beatis, sunt, qui nullum Spei actum in ipsis agnoscunt; cum nihil per ipsos sit in Beatis arduum; ergo cum in nostra sententia Beati possint elicere actum Spei circa gloriam corporis futuram post resurrectionem, & hoc sit aliquod arduum, consequenter perseverabit, etiam sine implicancia talis habitus.

Non valet, in Beatis non potest remanere habitus Fidei; ergo neque etiam Spei; Quia in ipsis loco habitus Fidei succedit alius habitus longè perfectior, videlicet lumen gloriæ.

Animæ in Purgatorio degentes suam salutem sperare, & habitum Spei retinere, est sententia D. Tho. & omnium Scholasticorum; Quia beatitudo respectu illarum est bona, est possibilis obtineri à Deo, & est ardua; ut potè assequenda per magnos cruciatus, & tolerantiam acerbissimarum penarum: Ex hoc inferitur, posse Spem esse de rebus; quæ certò cognoscuntur futuræ.

In damnatis non remanere, neque actum, neque habitum Spei; est etiam omnium Theologorum sententia; Sunt enim ipsi certi de sua perpetua damnatione: *Insuper* actus Spei sine auxilio diuinæ gratiæ fieri non potest; & cum etiam in illo miserrimo statu damnati exuti sint omni dono supernaturali; hinc est, quòd in ipsis, neque habitus Spei inueniri possit.

In viatoribus, & si peccatores sint, ac etiam spoliati alijs donis, & virtutibus infusis, dummodo de salute non desperent, remanet Spes; Quia Catholicus peccator potest apprehendere beatitudinem futuram, ut bonum sibi possibile; ergo nisi peccet peccato desperationis, in ipso remanebit Spes; cum maneat obiectum Spei. *Perit* etiam Spes in hæreticis; Quia per peccatum hæresis destruitur Fidei habitus, quæ cum sit basis, & fundamentum Spei, destructio per infidelitatem Spei fundamento, necesse est, ut corruat etiam Spes.

Christus Dominus non habuit propriè Spem Theologicam circa suam beatitudinem; Quia Christus Dominus semper habuit visionem; ergo non potuit eam sperare; neque etiam habuit Spem propriam circa gloriam sui corporis; quia eam videbat; licet eam expectauerit, ut accederet tēpus.

Præceptum negatiuum non desperandi, certum est, quòd obligat semper, & ad semper omnes fideles: circa præceptum autem positium eliciendi actum Spei; Dico, Nos teneri elicere actum Spei, quando hic necessarius est ad vincendam aliquam tentationem, vel ad recipiendum Sacramentum, quod sine Spei actu recipi non possit; ut est Sacramentum penitentiæ. Quidquid sit de obligatione per se, & ex vi istius virtutis.

Verum supposita reuelatione sua damnationis possit, & teneatur reprobus sperare beatitudinem?

Nota hic, Quod de potentia ordinaria est impossibilis, quod Deus reuelet, & manifestet alicui reprobo futuram suam damnationem ob peccata commissa; Quia repugnat suauis modo gubernationis Dei, qui vult omnes homines, dum mortalem vitam agunt, ad omne exercitium virtutum prouocare spe præmi: vnde si alicui fuerit facta talis reuelatio à Deo, non erit absoluta, sed comminatoria, quæ virtualiter conditionem imbibit; idest, si pœnitentiam non egeris.

De potentia autem absoluta, & supernaturaliter est possibilis talis reuelatio; Quia damnatio futura hominis reprobis est obiectum seibile à Deo; & sic non repugnat ex parte Dei, quin possit reprobo manifestari; Neque ex parte ipsius reprobis; Quia nulla potest assignari in intellectu creato repugnantia ad assensum eliciendum circa hoc obiectum reuelatum; potest ergo Deus ordinare eam reuelationem, vel ad aliorum terrorem, vel ad eius reprobis humiliationem: *Utrum* autem homo ille, cui facta esset reuelatio hoc modo dicta, idest absolute, suæ damnationis, adhuc possit, & teneretur sperare beatitudinem? est maxima controuersia inter Doctores Theologos; ego autem

Puto probabiliter, Quod supposita reuelatione damnationis, in tali casu reprobis potest, & teneretur sperare, & desperando peccaret: vnde nec licet peccare, nec licet omittere opus bonum Spei præceptum. Quia talis reuelatio illo modo tollit illi homini potentiam ad non peccandum; nam sicut ipsa scientia Dei de meo peccato, aut bono opere futuro, non tollit mihi libertatem ad contradictorium; ita nec potest eandem libertatem illo modo tollere talis reuelatio facta: vnde procul dubio non minus tenebitur vitare ea omnia, ad quæ antea tenebatur, quam si nullam omnino ea de re reuelationem habuisset: *Hoc totum* confirmatur in Christo Domino, qui posito præcepto Patris remansit liber ad moriendum; quamuis mortem imperatam refugere non posset; ita à pari talis reuelatio damnationis, nec tollit potestatem consequendi, nec sperandi beatitudinem.

Nota I. Quod motiuum reprobis sperandi beatitudinem ante reuelationem, non est ignorantia suæ reprobationis; sed est bonitas ipsius beatitudinis obiectiue: vnde non sequitur, quod ablata tali ignorantia per reuelationem extrinsecam, non remaneat adhuc motiuum sperandi. II. Non bene, nec conformiter loquuntur, qui dicunt, beatitudinem post reuelationem non esse amplius obiectum Spei; quia non esset amplius futura: *Ratio* est, Quia eodem planè modo remanet beatitudo futura reprobo post reuelationem, quo erat ante reuelationem; non est tamen futura certitudine absoluta, quæ numquam fuit respectu reprobis, nec

ante, nec post reuelationem, sed certitudine conditionata, fundata in diuina misericordia, auxilia largiente, & in libertate humana illis benè vtente; talis autem reuelatio, nec auxilia sufficientia remouet, nec potestatem illis benè vtendi aufert. III. Nota, Quòd dum intellectus iudicat, facta tali reuelatione, damnationem suam esse futuram absolute, & per auxilia sibi collata, & oblata iudicat salutem suam esse conditionate futuram; non est, inquam, in hoc pugna aliqua iudiciorum; non enim repugnat aliquid esse futurum, præsertim conditionare, sub vna ratione, & sub alia ratione non esse futurum: sicut non est in diuina voluntate, & in iudicio diuino discordia, quòd Deus velit voluntate antecedenti reprobum saluare, & voluntate consequenti ipsum non saluare.

Licet in inferno damnati non possint sperare beatitudinem, nec peccent desperando; non sequitur, quòd nec eriam peccaret desperando homo, cui fieret reuelatio futuræ damnationis. Quia ait D.Tho: *Damnati non sunt in statu sperandi propter impossibilitatem reditus ad beatitudinem; & ideo, quòd non sperant, non imputatur eis ad culpam; sed est pars damnationis ipsorum.* Quando verò homo est in statu viæ, est illi possibilis beatitudo; & est illi bonum, quod homo debet adipisci. Concludimus ergo, quòd euident attestatio, & reuelatio futuræ damnationis non tollit Spem; quia non destruit intrinsecam boni possibilitatem, & futuritionem conditionatam.

De Charitate.

Quid sit, & an detur Charitas?

Charitas in propria sui nominis significatione definitur à D.P.N. August. *lib. de moribus Ecclesie cap. 11. Charitas est virtus; coniungens nos Deo, qua ipsum diligimus: id est, Charitas est virtus; qua Deum propter ipsum amamus, & digni efficimur illius amore; ac proinde est amicitia inter Deum, & hominem.* Ea autem sola est vera amicitia, quæ bono honesto innititur, & qua bonum amico propter ipsum amamus: hinc est, quòd amicitia, de qua hic agimus, & quam nomine Charitatis Theologi accipiunt, ea est, qua Deo aliquod bonum desideramus, propter illius bonitatem infinitam, & increatam; & hic est actus Theologicus; quia respicit ex parte motiui formalis bonitatem increatam. Creatura etiam rationalis, homo scilicet, & Angelus, amatur etiam actu charitatis propter ipsam bonitatem increatam Dei, ex qua bonitas propria intrinseca, & finita participatur.

Est omnino certum, hanc amicitiam inter Deum, & hominem reperiri; Legitur enim in Psal. 138. *Nimis honorati sunt amici tui Deus.* & cap. 15. *Joann.* Christus Apostolis dicit, *Vos amici mei estis, si feceritis, quæ ego præcipio vobis.* & ver. 15. *Vos autem dixi amicos.* Charitas ista, qua nos

Deū diligimus, est donum creatum à Deo, in nobis productum. Est contra Magistrum Sentent. 1. dist. 17. qui putat, Charitatem, qua Deum diligimus, esse aliquod increatum, seu ipsum Spiritum sanctum, in iustis manentem. Constat hæc veritas ex Tridentino sess. 6. can. 11. dicente, *Si quis, dixerit hominem iustificari, vel sola peccatorum remissione, exclusa gratia, & Charitate, qua in cordibus eorum per Spiritum sanctum diffundatur, atque illis inhæreat, anathema sit*: Sed non potest dici, quòd Spiritus sanctus diffundatur, & inhæreat ratione sui formaliter, & immediate; sed tantum ratione alicuius creati, ab illo procedentis; ergo iuxta Tridentinum, Charitas est forma creata nobis intrinsecè inhærens.

Apud omnes Theologos est firmum, Quòd habitus charitatis est eiusdem speciei, & idem numero in via, & in Patria. Circa verò actum charitatis, probabiliter existimo, esse eiusdem speciei, & perfectionis entitativæ actum charitatis Patriæ, & viæ; quinimò probabilissimum est, Beatissimam Virginem Mariam eundem actum charitatis, quem in via elicit, in Patria retinuisse, quamvis in Patria necessariò. Ratio conclusionis est, Quia actus voluntatis desumunt speciem, & perfectionem entitativam solum ex principio activo, & ex obiecto; sed obiectum formale, & principium actuum charitatis est idem in Patria, & in via; cum intellectio ad volitionem actiue non concurrat; ergo, &c. Et quamvis visio, qua dirigitur actus charitatis in Patria, sit perfectior Fide, qua dirigitur charitas viæ: non sequitur, quòd actus charitatis Patriæ specie differat à charitate viæ; quia ex maiori perfectione cognitionis, non desumitur specificatio, & perfectio entitativa volitionis; nam cognitio tantum est conditio.

Charitas recipit augmentum intensuum; & hoc est extra controuersiam apud omnes Catholicos: constat enim ex Trident. sess. 6. Canon. 24. Iustus per bona opera crescere iustitia, & sanctitate: Vtrum verò hoc augmentum fiat per additionem gradus ad gradum, vel per maiore radicationem? est magna controuersia inter Theologos: Accerrimè enim defendunt Thomistæ, Charitatem non augeri per additionem, seu aduentum noui gradus; sed per maiore radicationem eiusdem charitatis simplicis, & expensis totius compositionis; sed in hoc videtur non esse immorandum: cum ad dandas alias necessarias noticias solum finis intenti.

De Obiecto Charitatis.

Obiectum materiale primum charitatis est Deus; Quia illud est obiectum materiale primum, quod magis coniungitur cum formali, & in quo formale refulget, vt docet D. Tho. 2. 2. quæst. 23. art. 1. Sed bonitas diuina, quæ est formale obiectum charitatis, vt dicemus, afficit intrinsecè Deum, & cum ipso identificatur; ergo Deus est obiectum

ctum materiale primum charitatis. Omnis etiam creatura rationalis, nempe homo, & Angelus est obiectum materiale charitatis; quia Angelus, & homo est capax beatitudinis; & ex hoc capite æquè coniungitur cum Deo.

Obiectum formale charitatis est bonitas increata, & infinita Dei, ut est in se, ac ipsi Deo bona: hoc est apud omnes certum. Subtilis autem questio, quæ inter recentiores Theologos assurgit, est, Quænam bonitas Dei sit formale obiectum charitatis? est ne bonitas ipsius Dei integrè sumpti, ut nostro rudi modo concipiendi loquar; idest bonitas diuina, prout involuit essentiam, attributa, & perfectiones relatiuas; an verò bonitas essentia, seu naturæ condistincta, nostro modo concipiendi, à reliquis proprietatibus, & attributis? vel saltem bonitas vnius attributi, seu proprietatis relatiuæ? Dico breuiter, Quod natura diuina, prout est in se; idest ut distincta ab attributis, seu perfectionibus relatiuis, est formale obiectum charitatis; Quia natura diuina per se sumpta dicit bonitatem, quæ est formale obiectum amoris; quia dicit omnem perfectionem pertinentem ad constitutum naturæ; siue conceptus naturæ sit ens à se; siue sit intellectio in actu primo, siue in actu secundo. Vnde, ut notat P. Gotet, si per impossibile natura diuina maneret sine vlla alia perfectione attributali, Deus posset ratione illius diligere super omnia; ergo natura diuina ratione sui, & ut distincta ab attributis, seu perfectionibus relatiuis, est sufficiens dilectionis, & charitatis motiuum. Vnde qui amat vnum attributum in Deo, v.g. iustitiam, illam amat, quia est bonum amici; hoc est, in quantum in Deo est bonitas essentia, ob quam Deum amat.

Non nego tamen, Quod omnia attributa, & quodlibet illorum seorsim sumptum, est sufficiens, etiam motiuum charitatis; Nam quodlibet attributum, & omnia simul, ut ratione distincta ab Essentia, sunt quid diuinum, & increatum; ergo ut sic sunt obiectum virtutis Theologicæ; non Fidei, ut certum est, & patet ex dictis, agendo de Fide; neque Spei; quia Spes respicit bonitatem increatam, ut utilem, & commodam nobis; Charitas verò, ut bona ipsi Deo; ergo sunt obiectum Charitatis; cum non detur aliqua alia virtus Theologica.

Vltra quam quod, experimur, frequentius nos Deum amare, modo ubi hoc, modo ob illud attributum, & non semper ob præcisum illum conceptum essentia ipsum diligimus; & licet qui amat iustitiam v.g. in Deo, illam amat, quia in Deo est bonitas essentia, ut supra notauimus; non repugnat, quod intellectus possit habere pro motiuo amandi Deum ipsam iustitiam; et sic Deus amari, qua iustus, qua misericors, &c.

Notandum tamen maximè est I. Quod quamuis natura diuina sit per se amabilis, & non possit habere per aliquid superadditum eandem amabilitatem, quam per se habet; potest tamen rectè participare aliam distinctam amabilitatem ab ea, quam per se habet, per aliquod superadditum

ditum formaliter . II. Quamvis verum sit, vt docui in tract. de Trinitate, quòd attributa relatiua non addant, neque perfectionem, neque bonitatem, ad essentiam; Non sequitur aliquid contra hanc conclusionem; Nam in presenti supponitur virtus præcisua ex parte voluntatis, quæ mediante actus charitatis, & amicitie Dei fertur circa obiectum sic præcisum . Vel dic, quòd quamvis attributa relatiua non dicant perfectionem, & bonitatem secundum conceptum, Ad; benè tamen secundum *In*. III. Non repugnat, quòd ab vno habitu supernaturali oriantur actus specie diuersi; vt essent actus, quibus aliquis Deum amaret propter Iustitiam, Misericordiam, &c. qui sunt actus specie diuersi; ab eodem tamen habitu procedentes . IV. Quamvis proprietates absolutæ, & respectiue non sint potentes redamare, non benè inferunt Aduersarij; ergo non possunt esse obiectum amicitie; Nam ratio formalis motiua actus charitatis, seu amicitie, non debet esse potens redamare formaliter sumpta; datur enim amicitia erga hominem propter illius sapientiam, & pulchritudinem; & tamen secundum has rationes formales non redamat. V. Non sequitur ex hac doctrina, Quòd debeant dari tot obiecta formalia charitatis, quot dantur prædicata diuina specie distincta: et sicut obiecta specie differunt, ita etiam, et habitus. Ratio est, Quia quamvis possem concedere, quòd sequatur multitudo illa obiectorum, quod est valde dubium; non tamen sequitur multitudo habituum; quia potest vnus habitus, vt supra dixi, ad plura obiecta formalia terminari. Congruum vnde fuit, vnum habitum pro omnibus actibus produci; quia obiecta formalia omnium actuum differunt, non Theologicè, sed tantum physicè, adhuc secundum nostrum modum concipiendi; & per hoc, quamvis actus charitatis specie differant, physicè loquendo; Theologicè tamen sunt eiusdem speciei .

Inter obiecta purè creata, seu supposita creata in bonis salutis spiritualis amor nostri est præferendus amor aliorum; quia in lege diuina proprius amor supponitur, tamquam regula, et mensura charitatis proximi: vnde habetur, *Diliges proximum tuum, sicut te ipsum*: Ergo potior debet esse amor circa ipsum amantem, quàm circa proximum . Est tamen in hoc amore præferendus Christus Dominus, à quo omnia bona nostra spiritualia procedunt: vnde recta ratio postulat, plurius à nobis æstimandum esse bonum illius, quàm omnium nostrum . Propter singularissimam excellentiam Beatissimæ Virginis supra omnes creaturas, et intimam coniunctionem cum Christo Domino, piè etiam dicitur, in hoc amore esse nobis præferendam .

Quomodo, & quando præceptum Charitatis obliget .

Non potest assignari tempus certum, & determinatum, quo obliget præceptum affirmatiuum Charitatis, puto tamen, quod si quis viuere

ueret diu omnino oblitus amoris Dei, censeretur transgressor huius præcepti. *Putant* etiam multi, præceptum hoc diuigendi Deum super omnia obligare instante morte, quia tenemur tunc lege charitatis proprię ad vitandum omnia pericula æternę damnationis, quod sit per actum dilectionis Dei super omnia.

De tempore verò, quo obligat dilectio proximi, est certum in primis apud omnes Authores, quando proximus extremè indiget ope nostra, ad salutem consequendam, seu ad æternam damnationem vitandam; nos teneti illi opem ferre, etiam cum vitę dispendio. Probatur ex 1. *Joann. 3. Sicut Christus animam suam posuit pro nobis; ita & nos debemus pro fratribus animam ponere*: Et D. P. August. *lib. de mendacio cap. 6. idem præceptum colligit dicendò, Temporalem vitam suam pro æterna vita proximi non dubitabit Christianus amittere*. Procedit tamèn conclusio in casu, quo dispendio vitę corporis non sit annexum aliud damnum spirituale proprium, vel communis. Censetur extrema necessitas spiritualis proximi, quando hic est in proximo periculo finalis impenitentię, seu damnationis.

Obligat insuper Charitas, auxilium proximo præstare, cum maiori, vel minori dispendio bonorum temporalium, quatenus necessitas est maior, vel minor: hoc autem vrget, quando aliquis grauem, aut extremam necessitatem proximi occurrere deprehendat; nam non tenemur sollicitè inquirere de talibus necessitatibus, nisi sint Prælati, & quibus ex officio conuenit in necessitate constitutis auxilium conferre.

Circa Parentes, quando sunt in extrema necessitate, Pater est præferendus Filio non emancipato; idest existente sub cura Patris; nam extra casum necessitatis filij non emancipati sunt parentibus præferendi in ijs, quę ad eorum vtilitatem pertinent. Inter parentes Pater præferendus est Matri, & in extrema necessitate parentes vxori, extra verò hunc casum, vxor est præferenda parentibus. Probabile item est in casu extremę necessitatis vxorem filijs præferendam esse. Facta comparatione coniunctionis carnalis, & spiritualis, docet communior, & vera sententia, coniunctionem carnalem spirituali præferendam esse.

Est etiam extra controuersiam nos omnes teneri præcepto charitatis inimicos diligere; tenemur etiam his benefacere; idest præstare ea beneficia, & auxilia, quę eidem homini seclusa inimicitia deberemus impendere. *Nota*, quòd quando inimicus est ex illis, qui inimicitia seclusa iuste posset conueniri, quòd alloquutiones, & salutationes ei non præstiterit proximus, non possunt licitè omitti, inimicitię causa, huiusmodi salutationes, & alloquutiones ab inimico; secus autem si poterant sine querela omitti. Tenemur etiam inimico remittere illaram iniuriam; idest tenemur, numquam erga illum habere odiũ; possumus autem a ludice petere satisfactionem; exhibita autem tenemur cessare ab ulteriori petitione.



EX TERTIA PARTE TRACTATVS I.

De Incarnatione.

De Possibilitate, existentia, & convenientia Incarnationis.



VGCVSTISSIMVM, & profundissimum Incarnationis mysterium, in quo Deus Omnipotentis, Misericordis; & infiniti amoris erga homines thesauros exhibuit, potest sic breuiter describi. Est coniunctum resultans ex humana natura, priuata sua propria subsistentia, & ex personalitate Verbi diuini media vnione substantiali. Possibilitas, & existentia Incarnationis seclusa omni reuelatione à nullo intellectu creato humano, vel Angelico potest, neque euidenter, neque probabiliter attingi; hoc enim mysterium supponit Trinitatem personarum sub eadem natura; & cum Trinitas, naturaliter loquendo, à nobis cognosci non possit; sequitur, quod nec etiam hoc mysterium sit naturaliter cognoscibile.

In mysterio Incarnationis, nullum inuenitur argumentum, innitens principio naturali, quod non possit à nobis facile solui; Quia verum non opponitur vero; ergo nullum argumentum contra veritatem huius mysterij potest verè concludere; sed omne argumentum non verè concludens potest naturaliter solui; ergo, &c. *Præcipuum* argumentum, quod contra hanc veritatem potest proponi facile soluitur; Nempè ex duobus entibus in actu completo; seu ex duabus naturis completis; humana scilicet, & diuina non potest fieri vnum per se; *Soluitur*, inquam; Quia humanitas, seclusa subsistentia, non est quid completum; non enim repugnat ex vna re completa, sicut est natura diuina, & altera incompleta, sicut est humanitas, fieri vnum per se.

Dæmones solum coniecturaliter cognoscebant hoc mysterium, præcipue vsque ad tempus tentationis Christi: ita D. Hieronymus *cap. 1. in Matth.* citans S. Ignatium Martyrem, qui ait, ideò B. Virginem fuisse
de-

desponsatam , vt partus eius celaretur diabolo ; idest vnio Verbi diuini cum humanitate ; Nam phycus partus sine dubio non fuit illi occultus : licet hæc ratio non conuincat omninò ; nã tota ratio dubitandi in diabolo oriebatur , non ex desponsatione ; cum benè cognouisset B. Virginem desponsatam esse ; sed ex conceptu prolis sine viro ; quia sciebat ipsam non cognitam fuisse à sponso , & adhuc virginem peperisse .

Nomen , *Messias* , significat hominẽ natione , & origine Iudæum ; à Prophetis prædictum , & à Deo mortalibus promissum , veluti Redemptorem , & mediatorem eorumdem . *Messias* esse debuit Rex , Sacerdos , Legislator , verus Deus , & verus homo . Est de Fide , vt omnes Catholici fatentur , *Messiam* aduenisse ; quamuis negatur veritas hæc à Paganis , & Iudæis ; extat tamen contra Iudæos testimonium Sacræ scripturæ , vbi legitur in *cap. 49. Genesis* . *Non auferetur sceptrum de Iuda , & dux de femore eius , donec veniat , qui mittendus est , & ipse erit expectatio gentium* . Ex quo colligitur , quòd *Messias* tunc temporis debuit venire , quando nullus esset ex stirpe Iudæorum , qui Rempublicam Iudaicam administrauerit , vel tamquam rex , vel tamquam dux , vel tamquam gubernator legitimus ; sed annis circiter 30. ante Christum natum , potestas hæc transiit ad externos ; nam Herodes constitutus fuit rex Iudæorum autoritate Senatus Romani ; vt narrat Iosephus *lib. 14. suarum antiquitatum , olimpiade 114.* ergo cum hæc facta fuerint circa annum trigesimum ante Christi natiuitatem , debuit *Messias* venisse ; aliter falsa fuisset propheta Iacob , quod Iudæi numquam facti sunt .

Cum ergo D. Tho: doceat , hoc mysterium , re ipsa factum , vt Fides ipsa prædicat ; à fortiori docet esse possibile ; quinimo fuisse conueniens , Deum Incarnati , in quantum Incarnatio est res valde digna Deo : Ostenditur ergo hæc conuenientia moralis ; Quia conueniens est bonitati , se ipsam communicare ; quia bonum est diffusinum sui ; sed Deus est summa bonitas ; ergo conueniens est ei summa communicatio , qualis est per Incarnationem . In ordine igitur ad redimendum genus humanum conuenienter fuit hic , & nunc vnio in natura humana ; vt sicut ista corruerat in vno homine , ita per vnum hominem etiam repararetur .

Licet hæc propositio , *bonum est diffusinum sui* , non habeat locum in Angelo , qui est maius bonum , quàm homo ; non tamen magis communicatiuus , quàm hic ; Non sequitur , quòd nec etiam debeat habere locum in isto casu . Ratio est , quia cum Angelus sit creatura , idèdque finita , potest carere ea perfectione maioris communicabilitatis ; in Deo autem cum nulla in ipso sit imperfectio , rectè à ratione summi boni concluditur .



Utrum fuerit necessarium Deum Incarnari?

PRæsciendū à diuino decreto, & omni fine particulari, nullo modo fuit necessarium Deum Incarnari; Quia Incarnatio est opus ad extra à Deo creatum; ergo supponit liberam voluntatem, qua Deus liberè voluit potius eius existentiam, quàm non existentiam.

Posito etiam diuino decreto homines redimendi, neque etiam fuit simpliciter necessaria Incarnatio: ita PP. & DD. & D. P. N. August. qui lib. de agone Christiano cap. 11. hæc habet. *Sunt autem stulti, qui dicunt, Non poterat aliter Sapientia Dei hominem liberare; nisi susceperet hominem*: Non enim deerant Deo multa alia remedia possibilia, vel exigendo ab hominibus satisfactionem imperfectam, & inæqualem; vt actum doloris, vel similem; vel condonando liberaliter peccatum Adamo, &c. cum enim ipse sit supremus Dominus, & Iudex, non faceret contra ius alterius, remittendo poenam hominibus.

Nec etiam fuit simpliciter necessaria Incarnatio, posito decreto de reparando homine etiam ad æqualitatem, & satisfactione condignam; Quia in eo euentu sufficeret vnio hypostatica cum natura Angelica, seu Inangelatio; & licet in isto casu Deus Angelus non posset mori; posset tamen per actus internos spirituales perfectè satisfacere. Quando verò Patres asserunt, necessariam fuisse Incarnationem ad satisfactionem æqualem, & condignam; Loquuntur ex suppositione, quod Deus decreuit condignam satisfactionem ab homine præstandam.

Fuit solum vnio hypostatica necessaria simpliciter, supposito decreto diuino de reparando hominem ad æqualitatem; & cum defectu nullæ alia vnio hypostatica facta sit, nisi cum natura humana; nullus consequenter nisi homo Deus, idest solus Christus, potuit hominem per æqualem satisfactionem redimere; Quia ad æqualem, & condignam satisfactionem pro Dei offensa duo requiruntur, nempe subiectio personæ satisfaciæntis ad ipsum Deum, & valor infinitus; ergo nec purus Deus, nec pura creatura potuit exhibere æqualem satisfactionem; non Deus purus; quia est omnino incapax subiectionis; non pura creatura; quia infinitus valor petit oriri à persona infinitæ dignitatis, ad quam non potest asurgere persona quævis creata; ergo fuit necessaria vnio hypostatica personæ diuinæ cum natura creatæ; vt ex parte huius daretur subiectio, ex parte personæ diuinæ daretur infinitus valor, requisitus ad æqualem satisfactionem.

Remanet firmum, Quod nullus homo purus, quantumuis in gratia constitutus possit satisfacere Deo ad æqualitatem pro peccatis generis humani: ratio communis, & clara omnium Theologorum est; Quia ad hoc, vt satisfactio sit æqualis iniuriæ, necesse est, vt dignitas personæ satisfaciæntis, sit æqualis dignitati personæ offensæ; quia iniuria crescit

ex dignitate persone offensæ; satisfactio verò ex dignitate personæ satisfaciens; sed hæc æqualitas nequit reperiri in puro homine, quantumvis grato, & sancto; nam Deus natura sua est infinitus; homo autem satisfaciens semper est finitus ex se; ergo nullus purus homo potest satisfacere ad æqualitatem.

Utrum peccatum sit infinitum?

QUAMVIS ceteris paribus peccatum tantò sit grauius, quantò persona offensa est dignior, & persona offendens est vilior; non sequitur tamen, malitiam peccati, qua Deus offenditur, esse absolutè, & simpliciter infinitam, sed tantum esse infinitam secundum quid; Nam peccatum non est infinitum in ratione entitatis, ut est certum; neque in ratione priuationis, & reſtitutionis debite; quia licet homo per peccatum priuetur bono infinito; non tamen priuatur, nisi eo modo, quo potest ab homine acquiri; sed non potest acquiri, nisi finito modo; ergo, &c. Insuper sequeretur ex hoc, quòd opera bona essent infinita; quia merentur bonum infinitum. Neque est infinitum, quia meretur pœnam in infinitum duraturam; aliter sequeretur, quòd opera bona essent infinita; quia merentur præmium in infinitum duraturum. Neque est infinitum, quia meretur pœnam sensus infinitè intensam; Aliter eandem pœnam mereretur homo per peccatum grauiſſimum, quàm per peccatum infime grauitatis. Neque vltimò est infinitum, ex eo quòd offenditur obiectum infinitum, ratio est; quia obiectum non communicat actui totam bonitatem, vel malitiam, quam potest; sed iuxta modum, quo tendit potentia in obiectum per actum; quia obiectum tantum media cognitione influit in actum voluntatis; & sic adhuc ut crescat grauitas offensæ, seruata proportionem ad perfectionem obiecti, debet cum eadem proportionem cognitio crescere; cum verò cognitio personæ offendentis non sit infinita, quamuis ipsa persona offensa sit infinita, non potest infinitam grauitatem, in offensam refundere.

Quando D. Tho: solut. ad 2. ait, tantò grauiorem esse offensam, quantò maior est persona, cui fit; Non est intelligenda comparatio secundum æqualitatem, sed secundum proportionem, quæ in eo consistit; quòd sicut Deus est altioris ordinis; ita iniuria Deo illata sit etià superioris rationis.

Nora I. Quòd per peccatum mortale non infertur Deo aliquod malum in se ipso, nec damnum in bonis intrinsecis; infertur solum damnum in bonis extrinsecis; ut sunt honor, &c. Nam reuera auferitur ei debitus honor, qui consistit in cultu ei exhibito ab omnibus creaturis; ac proinde quando creatura Deum lethaler offendit, auferitur à Deo honor ei debitus; & sic minus habet tunc Deus de honore sibi debito; cum postponatur Deus creaturis: Vnde D. P. Aug. lib. 83. quæstion. quæst. 31. ait: Qui de Deo præuē sentit, verè ladit illum in honore; quia reſta existimatio de

illo est ei debita. Nota II. Quòd offensa purè realis, quæ dicitur iniuriæ, non crescit ex dignitate personæ, cui fit iniuria; sed ex quantitate, vel qualitate rei ablatæ; quia constituit inæqualitatem in bonis externis; offensa verò personalis, quæ consistit in contemptu, & irreuerentia personæ, crescit ex dignitate personæ. *III.* Probabilius iudicatur à multis, peccata mortalia non mereri directè æternitatem pœnarum; sed ideo æternum puniri; quia æternum durat ipsum peccatum. *IV.* Persona offendens non est infinita in inferioritate positiuè, & intrinsecè, sed tantum negatiuè, & extrinsecè, per comparisonem, & respectum ad infinitam maiestatem offensam.

Non valet hoc argumentum, Merita Christi habent infinitum valorem ex personalitate diuina infinita; ergo etiam peccatum infinitam malitiam ab obiecto infinito, nempe Deo: *Ratio est*, Quia grauitas offense sumitur à Deo, tamquam ab obiecto extrinsecò, contra quod fit offensa; dignitas autem meriti sumitur à Persona diuina, tamquam à principio dignificante talia opera. *Sicuti* etiam non bene aliquis inferret infinitam malitiam peccati, ex hoc, quòd assereret, peccatum esse destructiuum Dei; *Nam* in primis est falsum hoc, Quia reuera peccatum non habet vim destruendi Deum; & etiamsi peccator expressè veller Deum destruere, si posset; nihilominus illius actus infinitam malitiam non haberet: sicuti non habet infinitam bonitatem actus charitatis, quo quis veller dare Deo totum, quod Deus habet, si posset; vt fuit actus amoris D. P. N. Augustini.

Ex eo, quòd peccatum sit maius malum, quàm quæcumque pœna sensus, etiam infinita, non inferitur, peccatum habere infinitatem ex se; Quia bene stare tantum inferitur, magis fugiendum esse malum culpæ finitum, quàm malum pœnæ infinitum; quia malum culpæ est macula; malum verò pœnæ minimè. *Neque* bene inferitur, peccatum continere malitiam infinitam, ex eo, quòd homo non possit satisfacere ad æqualitatem pro eo; *Quia* illa improportio, quæ est inter diuinam maiestatem offensam, & personam offendentis, & grauitas iniuriæ, quæ ex illa nascitur; est altioris ordinis, nec vinci vîquam potest quacumque multitudine, vel perfectione actuum personæ creatæ, quæ semper infinitè distat à dignitate personæ offensæ.

Ex infinitate igitur personæ offensæ non sumit peccatum infinitatem simpliciter, sed tantum secundum quid; scilicet obiectiuam; quæ consistit in hoc, quòd sit malum quoddam, & iniuria altioris speciei, & ordinis, quàm sit omnis iniuria contra personam creatam, & finitam: vnde D. Thomas hic *art. 2.* dixit, *Peccatum habere quandam infinitatem, ex infinitate diuinæ Maiestatis.*



Verum satisfactio Christi Domini fuit perfecta, & ex rigore iustitiæ?

Non obstante, quòd peccatum non fuerit simpliciter infinitum, sed solum secundum quid, non potuit satisfacere, vt diximus, pura creatura, sed Deus homo, nempe Christus, cuius satisfactio ex sua natura, & independenter à Dei acceptatione fuit æqualis, & superabundans: Suadetur hæc vltima pars ex Clemente VI. *Extrauag. Vnigenitus despicientia, & remissione.* vbi Pontifex ait, Vnam guttam sanguinis Christi, propter vnionem ad Verbum, fuisse sufficiens ad redimendum genus humanum; vnde clarè patet, quòd ea sufficientia non tribuitur à Pontifice soli voluntati, ac promissioni diuinæ, vt sentit Scotus; sed vnioni, & dignitati prouenienti ab ea vnione: *Vltra*, quam quòd non fuisset necessaria Christi satisfactio; *Quia* si absque condignitate Deus potuit acceptare opera Christi; potuit etiam, & alia cuiuslibet creaturæ; nam absolutè semel posita acceptatione, iam fuissent condigna illa opera pro peccato.

Habuit insuper satisfactio Christi Domini ex natura rei valorem simpliciter infinitum; talis autem valor non potest desumi ab ipsis actionibus Christi; quia sunt aliquod finitum; neque ab humanitate, quæ se habet, vt principium quo: sed sumitur ex infinita dignitate, sanctitate, & diuinitate Verbi; quia ex vna parte Verbum est ipsamet sanctitas infinita; ex alia parte opera Christi Domini sunt moraliter vnita huic infinitæ sanctitatis; quia procedunt à Persona diuina; ergo ab ea infinitè sanctificantur; nam sanctitas vnita subiecto capaci, id sanctificat. *Et licet* voluntas Christi sit causa finita; non sequitur, non posse producere infinitum effectum; *Quia* eum voluntati Christi iungatur infinita Verbi sanctitas communicans illum valorem, benè poterat dare illum infinitum; nam quando cum causa finita concurret alia infinita, benè poterunt producere effectum infinitum.

Per hoc, quòd Christus paulò ante mortem orauit Patrem, vt dignaretur eius passionem acceptare; non fuit, quia extaret aliquis defectus in ea, qui supplendus esset à Deo: sed quia vnum ex medijs ordinatis ad redemptionem generis humani extitit oratio Christi.

In operibus satisfactorijs Christi Domini non solum fuit seruata iustitia, verum etiam interfuerunt omnes conditiones rigorosæ iustitiæ; & sic eius satisfactio fuit exacta, & perfecta ratione iustitiæ. *Probat* ex Script. *ad Romanos* 3. vbi Paulus loquens de Christo ait, *Quem proposuit Deus ad ostensionem suæ Iustitiæ.* & D. P. August. in *Enchiridion* ait cap. 29. *Vt diabolus veritate iustitiæ, non violentia potestatis oppressus, & victus esset.* Quòd fuerint obseruatæ omnes conditiones rigorosæ iustitiæ, probatur per singulas. Primò, quia satisfactio fuit facta ad alterum; Nam sub vna Christi persona sunt diuersæ naturæ: sicut etiam, & voluntates: vnde idem
sup.

suppositum Christi, ut subsistens in natura humana, erat diuersum virtualiter à se ipso, ut subsistens in natura diuina; & sic ut subsistens in natura humana satisfecit sibi, ut subsistens in natura diuina. In Christo igitur fuit quædam moralis distinctio personarum; & sic vna persona moraliter est ipsum Verbum, ut terminat naturam diuinam; alia persona moraliter reputatur ipsum Verbum; pro ut terminat naturam humanam. *Et ob hanc rationem verè dicitur, Christum Dominum meruisse apud Deum, obdiuissse Deo, adorasse, & orasse Deum; Cum obedientia, adoratio, &c. requirant esse ad alterum; ergo sicuti verè dicitur, Christus obediuit rigorosè alteri, humiliatus est alteri; ita etiam benè dicitur, Christus satisfecit de rigore iustitiæ ad alterum.*

Illud vulgatum axioma, *Actiones sunt suppositorum*; Non facit contra hanc conclusionem; ut malè putant aliqui; Quia si intelligeretur, ut ipsi intelligunt, repugnaret Christum, seu personam diuinam, seu Deum obediisse Deo, esse humiliatum coram Deo, &c. *Nec poterit dici propriè, quòd Christus sit mortuus; Quia suppositum diuinum non est mortuum.* Quando ergo dicitur, *Actiones sunt suppositorum*, nihil aliud intelligitur, nisi, quòd supposita denominantur operantia; idest operari, & agere tribuitur simpliciter denominatiuè supposito; in quantum operatur per naturam, ut per principium quo. *Ad hoc igitur, ut valor tribuatur operationibus Christi, non requiritur physica efficientia ex parte personalitatis diuinæ; sed sufficit, quòd personalitas Verbi terminet naturam humanam, quæ est principium talium operationum.*

Secunda conditio rigorosæ iustitiæ est, Quòd satisfactio debeat esse ex ijs bonis, quæ non sunt creditoris; & ex hoc aliqui inferunt, Quòd satisfactio Christi non fuit perfecta; quia opera Christi satisfactoria sunt sub dominio Dei; nam omnia erant res creatæ; *Sed hæc ratio non vrget; Quia ad satisfactionem perfectam ex rigore iustitiæ non officit, quòd eius dominium sit penès creditorem; sed sufficit, ut satisfaciens habeat in operationem illud genus dominij, quod habet suppositum supra suas operationes liberas; & hoc competit Christo, ut habebat rationem satisfaciens. Hoc totum probat exemplum de merito; Nam ad verum meritum sufficit, quòd operans habeat verum dominium suorum actus, quos exercet, in honorando illum, apud quem meretur; etiam si aliàs actus ille meritorius cadat sub dominio eiusdem.*

Tertia conditio est, Quòd id, quod redditur, non sit alio titulo debitum; idest, quòd fiat ex alijs debitis; *Sed hæc coincidit cum secunda; Nam ideò videtur, non posse fieri satisfactionem ex alijs debitis; quia aliàs debita iam sunt quodammodo ipsius creditoris; quatenus ipse creditor habet ius ad illa; sed iam ostendi, quomodo ex iustitia possit satisfieri per opera, quæ sunt sub dominio Dei creditoris.*

Quarta conditio est, ut satisfactio fiat ab ipsa persona offendente, & ad hanc reducitur alia conditio, Quòd creditor teneatur acceptare satisf-

satisfactionē. *Neque* istæ conditiones defuerunt in satisfactione Christi Domini; Nam circa primam, quantumvis offensus habeat ius; vt non possit cogi ad acceptandam satisfactionem, quantumvis æqualem, nisi ab ipso offendente ea offeratur; per hoc autem non impeditur, quò minus possit, si velit, esse contentus; vt alius loco offendentis satisfaciatur: eo ipso igitur, quòd Deus fuerit contentus admittere Christum ad satisfactionem loco ipsius hominis; illius satisfactio erit ex toto rigore iustitiæ; cum illius opera non solum fuerint pretium æquale, sed superexcedens pro peccato: *Nec* fuit contra rationem satisfactionis adæquatæ, & perfectæ, debuisse Deum liberaliter inclinari ad remittendum ius, quod habebat, petendi ab ipso homine satisfactionem; *Quia* deinde ad æqualitatem est ei satisfactum; & sic remanet probata quo ad vtramque partem conclusio.

Verum si homo non peccasset, Verbum Diuinum incarnatum fuisset?

AD redimendum genus humanum, ita ex vi præsentis decreti Clementissimus Deus fuit vnice motus; vt Adamo nõ peccante Verbum Diuinum minimè incarnatum fuisset. Defenditur hæc conclusio à D. Tho: D. Bonauent. & est communior inter Theologos; vnde illam existimo probabiliorē. *Præcipuum* fundamentum est; Quia si homo non peccasset sublatum fuisset motiū, saltem principale Incarnationis, quo sublato proculdubio non fuisset præsens decretum de Incarnatione; quia, vt rectè discurret D. Tho: in corpore huius atticuli, de ijs, quæ pendent à voluntate diuina, non possumus diuinando loqui; sed asserere, quæ diuina Scriptura tradit, & docent SS. PP. & Concilia; sed Scriptura, Patres, & Concilia docent, Incarnationem esse factam propter redemptionem generis humani; legitur enim *cap. 19. Lucæ: Venit Filius hominis querere, & saluum facere, quod perierat.* Extant etiam testimonia Conciliorum Nicæni, Constantinopolitani, Ephesini, Chalcedonenfis I. Tolerani VI. & XI. in confessione Fidei. Accedit testimonium S. Irenæi *aduersus hæreses cap. 14. Si non haberet caro saluari, nequaquam Verbum Dei caro factum esset.* D. P. August. *ser. 8. de verbis Apostoli. Si homo non perisset, Filius hominis non venisset.* & clarius *ser. 9. Nulla causa veniendi fuit, nisi peccatores saluos facere.* S. Leonis *ser. 3. in Pentecoste. Si homo ad imaginem, & similitudinem Dei factus in honore sua natura mansisset, Creator mundi creatura non fieret.* Vnde colligo esse meo iudicio improbabilem solutionem illorum, qui dicunt, SS. PP. intelligendos esse de aduentu Christi in carne passibili; non autem impassibili: Nam Patres absolute dicunt, Incarnationem Verbi non esse futuram Adamo non peccante.

Qui dicunt, quòd Christus sit initium viarum Domini, ex illo Proverb.

verb. 8. Dominus creavit me initium viarum suarum : non rectè concludunt, quòd Deus habuit decretum Incarnationis prius nostro modo intelligendi, quàm decretum producendi cæteras creaturas, Nam dicitur Christus initium viarum Domini, non ordine causalitatis, sed dignitatis, & præstantiæ. *Sicut* etiam idem Christus dicitur, Primogenitus omnis creaturæ; primatu dignitatis, non prioritate voluntatis: & sic decretum prædestinationis Christi est ratione posterius voluntate creandi mundū, & saluandi homines. Christus enim dicitur, finis omnium Prædestinatorum; idest Christus, non vt incarnandus, sed vt glorificandus; in quantum ordinauit Deus nostram salutem prius volitam, in gloriam Christi exaltandi: vnde quantumuis redemptio nostra fuerit causa principalis aduentus Christi; hoc non impedit, quo minus iustificatio nostra in alio signo posteriori ordinata fuerit ad gloriam eiusdem Christi.

Aliqui plurimi faciunt hoc argumentum, sed meo iudicio facilè soluitur: dicunt enim, Quòd voluntas antecedens, qua Deus vult omnes homines saluos fieri, est prior in Deo, quàm voluntas permittendi peccatum, in qua voluntate præsupponitur decretum Incarnationis; sed in illa voluntate antecedenti decreuit Deus dare omnibus auxilium sufficiens, vt saluentur, & omnia auxilia, quæ dantur ad salutem, dantur ex meritis Christi; ergo decretum Incarnationis præsupponitur præuisioni peccati. Nam quidquid sit de maiori, ad minorem dico, Quòd quamuis auxilia, quæ dantur post naturam lapsam, dantur ex meritis Christi; auxilia tamen, & iusticia, quæ fuit data ante lapsum primo parenti, non fuit ex meritis Christi. Vnde colligitur, quòd gratia, quam habuit Adam in statu Innocentiæ, nō fuit effectus prædestinationis Adami; nec gratiæ Adami in statu innocentiae correspondet aliquis gradus gloriæ; nec merita Adam reuiuiscunt per penitentiam, sicut & nostra; quia principium influens in meritum Adami non est Christus, sed solum gratia, (loquor ante lapsum;) vnde destructo tali principio radicali, meritum non solum mortificatum, sed omninò mortuum remansit.

Ad soluenda plurima argumenta, quæ contra hanc conclusionem solent fieri, disponenda sunt signa decretorum Dei, per ordinem ad notum modum concipiendi: & sic in I. signo, & instanti rationis cognouit Deus suam essentiam, atque ad manifestandam suam gloriam, videndo in eadem diuina essentia infinitas perfectiones, quas potuit creaturis communicare, elegit hunc mundum ex infinitis possibilibus. In II. signo decreuit Deus creare hominē sanctum, & rectum, & ipsum adornare donis gratiarum. In III. signo videns Deus lapsum Adami per peccatum, voluit mederi. In IV. signo ad tale remedium præstandum constituit Filium suum vnigenitū carnem assumere; vt de rigore iustitiæ satisfaceret. In V. signo ex omnibus hominibus constitutis in massa perditionis elegit aliquos efficaciter ad gloriam, dando illis gratiam efficacem, dependentem à meritis Christi; alijs verò in eadem massa perditionis relictis,

Hęc signorū diuersitas debet ab omnibus admitti, Quia à Deo prius debent præuideri ea, quæ pertinent ad ordinem naturæ, quàm ea, quæ pertinent ad ordinem gratiæ, seu vnionis hypostaticæ: vnde decretum, de existentia naturali creaturæ intellectuæ supponi debet ordini gratiæ, & gloriæ; aliter Deus prius voluisset homines esse beatos, quàm illos esse absolutè in rerum natura; sed peccatum pertinet ad ordinem naturæ; ergo prius fuit à Deo præuifum peccatum, quàm vnio hypostatica. Hoc idem etiam fatetur ipse Scotus 1. dist. 41. quæst. unica §. Potest aliter dici, dum dicit, quòd *In primo instanti Petrus, & Iudas aequales in naturalibus, voliti à Deo in esse existentia offeruntur Deo; & tunc Deus ita vult gloriam Petro, vt nihil velit Iudæ*; quibus verbis demonstrat prædestinationem supponere volitionem hominis in esse existentie.

In priori igitur signo fuit præuifum originale peccatum, & in alio signo Christus fuit decretatus, vt Redemptor: vnde remedium peccati, seu redemptio generis humani est finis principalis, primarius, & adequatus Incarnationis; exaltatio verò, & gloria Christi est finis secundarius: Incarnatio se habet, vt medium conducent ad vtrumque, nempe ad redemptionem, tamquam ad finem principalem; ad gloriam Christi, ad finem secundarium, & remotū. Nec per hoc, quòd genus humanum redimendum sit finis, & motiuum Incarnationis, sequitur, Christum fuisse minus dilectum, quàm genus humanum; I. Quia Deus contulit plura, & maiora bona Christo, quàm alijs omnibus hominibus simul sumptis. II. Quia salutem nostram ordinauit in honorem ipsius. III. Quamuis finis necessitatis magis ametur, quàm medium illi subordinatum; non tamen finis pietatis, & amoris.

Ad illud argumentum, in quo dicitur, Quòd quando voluntas vult ali-quod propter duo motiua, quorum singula per se sumpta sufficiunt ad eandem volitionem, cessante vno non sequitur, quòd voluntas sit cessatura ab eo obiecto volendo; sed decretum Incarnationis habuit pro motiuo remedium peccati, & gloriam Christi; ergo quāuis cessaret peccatū, & illud motiuum; Christus veniret propter aliud. Respond. Quòd maior est vera, quando motiua sunt ambo principalia; non verò, quando vnum est principale, & aliud minus: sicut in casu nostro, in quo remedium peccati est finis principalis, & proximus; gloria verò Christi secundarius, & remotus.

Aduerte hic I. Quòd Incarnatio est medium propinquius gloriæ Dei, non præcisè sumpta, sed vt redemptiua. II. Quando dicitur, quòd Incarnatio est bonum occasionatum; Sumitur ly, *occasionatum*, in quantum pendet ex aliqua occasione; licet sit aliundè intentum à Deo; non autem sumitur ly, *occasionatum*, in quantum est præter intentionem agentis, & à casu. III. Non solum peccatum hominum, sed etiam Angelorum, fuit præuifum ante decretum Incarnationis; Quia Deus non poterat præuideri peccatum primorum parentum; nisi etiam præuideret malitiam

demonum, qui ex superbia, & inuidia tale peccatum ipsis persuaferunt. IV. Quando Concilium Trident. *sess. 6. cap. 6.* dixit, *Causam finalem nostræ iustificationis esse gloriam Dei, & Christi;* non intellexit, nec asseruit, aduentum Christi esse causam finalem nostræ iustificationis, sed iustificationem nostram referri ad gloriam Christi, quatenus resultat à redemptione. V. Quando dicitur, *Quòd omnis gratia est per Christum;* Inteligitur omnis gratia sanans, & reparans; non autem gratia antecedens lapsum, ut fuit in Adam; quia hæc fuit habita per providentiam generalem: sicut etiam dicunt Theologi, quòd gratia iustificans, quam habuerunt Angeli in primo instanti suæ creationis, non fuit illis concessa dependenter à meritis Christi, sed à sola Dei gratuita liberalitate. Sicut etiam per hoc, quòd Adam in statu innocentiae habuerit fidem Christi venturi; Non sequitur, quòd illa fides fuerit ex meritis ipsius Christi; Nam non potuit primus parens habere aliquid ex meritis Christi, cum non dum Christus fuisset præuisus. Habuit ergo Adam fidem in Christo; quia fuit illi à Deo reuelatus aduentus Christi, ut esse caput ipsius, & totius posteritatis; & fuit illi occultata circumstantia Incarnationis, quæ præsupponebat ipsius peccatum: & hoc fuit sufficiens, ut ab illo tolleretur anxietas; nihil enim prohibet, ut alicui reueletur effectus, & non causa: Vnde primò Deus decreuit permittere peccatum Adæ, postea decreuit mittere mediatorem in remedium peccati: denique decreuit reuelare mediatorem primo parenti, antequam peccaret; non verò sub ratione mediatoris, sed in consumationem gloriæ.

Beatissima Virgo propriè, & verè fuit, & dicitur redempta à peccato originali, & eius proximo debito; in quantum in primo instanti suæ conceptionis accepit gratiam redemptiuam per Christum, præseruatiuè ab originali; quæ quidem gratia potentissimè perfecit, ut Beatissima, & Immaculatissima Virgo non incurreret proximum peccandi debitum; cum posset incurrere, & hæc est nobilissima redemptio,

De Vnione Verbi diuini cum natura humana.

Fuit error Nestorij, qui ore blasphemò negauit Beatissimam Virginem fuisse Dei Matrem, sed solius hominis; asserendo, Deum non esse verè, & propriè hominem; negando omnem veram, & physicam, yunionem inter Verbum diuinum, & naturam humanam. Neque in Christo natura diuina conuersa est in humanam, neque natura humana Christi conuersa est in diuinam; ut impiè dixerunt aliqui hæretici. Est igitur Christus Dominus verus Deus, & verus homo; ita ut habeat integram naturam, tam diuinam, quàm humanam. De diuina natura nullus superest dubitandi locus; dicitur enim *Ioann. 1. Et Verbum caro factum est. Matth. 16. Tu es Christus Filius Dei viui.* In Symbolo S. Athanasij legitur, *Perfectus Deus;* idem constat de humanitate ex eodem Symbolo,

Per-

Perfectus homo ex anima rationali, & humana carne subsistens. & Ioann. 9. Hominem, qui vera dicit, vultus lapidare. &c. Dicitur Verbum caro factum, seu homo; non quia desierit esse Verbum; sed quia manens integrum in ratione Verbi, per vnionem cum humanitate, iam est, & dicitur homo. Manserunt igitur in Christo post Incarnationem duæ naturæ integræ, & inconfusæ, diuina scilicet, & humana: Unde colligitur, vnionē Verbi incarnati non fuisse factam in natura: hoc est de Fide certum, & definitum in Concilijs generalibus.

Vnio Incarnationis facta est in supposito, aut persona Verbi; id est humana natura in Incarnatione vnita fuit personæ diuinæ, taliter vt humana natura in Christo subsistat subsistentia solius Verbi diuini. Hæc veritas est etiam definita de Fide in Concilijs; expressè etiam habetur in Symbolo S. Athanasij, *Perfectus Deus, perfectus homo, ex anima rationali, & humana carne subsistens.* Suffragatur etiam ratio naturalis; Quia est de Fide, quòd natura diuina, & humana sunt vnitæ aliqua ratione per Incarnationem; sed hæc vnio non est facta in natura; vt est etiam de Fide, sancitum; ergo fatendum est, factam esse in persona, aut supposito. In Christo igitur remanserunt duæ naturæ; humana scilicet, & Diuina, & vnica persona, nempe Verbi incarnati. Nec persona Verbi remansit composita, veluti entitatiuè, ex partibus, scilicet natura diuina, & humana; sed tantum potest dici composita ex parte officij; in quantum subsistit substantialiter in natura diuina, & humana. Vices autem suppositi humani supplebat suppositum diuinum.

Per Incarnationem ita humanitas remansit vnita Verbo diuino secundum subsistentiam; vt eadem persona Verbi sit simul persona naturæ diuinæ, & humanæ: terminus autem totalis, & adæquatus huius actionis vnitivæ est Deus homo, seu Christus. Terminus formalis Incarnationis est humanitas vnita Verbo; Quia terminus formalis est, qui formaliter constituit terminum adæquatum; sed humanitas vnita Verbo est forma, quæ terminum adæquatum Incarnationis, nempe Christum, formaliter constituit hominem; ergo humanitas est terminus formalis actionis Incarnationis, & consequenter etiam terminus specificans; quia per illam sortitur esse specificum hominis.

Vtrum Vnio hypostatica sit modus substantialis distinctus ab humanitate, & Verbo?

S Olet hic exagitari celebris illa controuersia inter Theologos; vtrum vnio hypostatica sit modus substantialis, distinctus ab humanitate, & Verbo. Affirmat communissima sententia omnium ferè Scholasticorum: plures etiam recentiores Thomistæ diligentissimi veritatis indagatores, pretiosissimam hanc vnionis distinctæ margaritam in profundis disputationum pelago inuenerunt, inter quos numerantur tres Illu-

striffimi, & eruditiffimi Præfules Herrera, Araujo, & Godois: Collegium etiam Complutense valdè probabiliter hunc modum substantialium distinctum inter materiam, & formam constituit. In hac communi sententia omnino fuisse D. Tho: ostendunt Ianuerus, & Vrtadus; quinimò idem P. Ioannes Baptista Genet, alioquin acerrimus huius vnionis distinctæ osor, & impugnator, falsus est in tom. 4. tract. de Incarnat. disp. 6. artic. 3. pag. 458. *Nullus in rei veritate habetur locus, in quo formaliter S. Thomas excludat unionem à natura humana, & Verbo unitis distincta: vnde probabilius existimo, quòd*

Vnio hypostatica est modus substantialis distinctus ab humanitate, & Verbo, quod sic breuiter ostendo. Per vnionem hypostaticam eodem modo fit vnus Christus ex humanitate, & Verbo, ac fiat per vnionē vnus homo ex anima rationali, & carne, nam cæteris paribus, sicut nescit vnio hypostatica humanitatem cum Verbo, ita vnio nescit materiam cum anima rationali; sed vnio inter materiam, & animam rationalem hominis est modus substantialis distinctus; ergo etiam vnio hypostatica erit modus substantialis distinctus ab humanitate, & Verbo: minor, quæ remanet probanda, sic ostenditur; nam maior est certa; possunt existere hæc materia, & hæc forma, quin inter se vniantur; sicut existit nunc materia D. Petri, existit etiam anima eius in cælo, & non habetur vnio; sicut etiam existeret entitas increata Verbi; cum ea fuerit ab æterno, similiter, & humanitas prius saltem natura producta erat, quam vniretur Verbo, ut vult D. Tho: ergo si existunt materia, & forma, quin vniantur, existunt Verbum, & humanitas modo dicto, quin vniantur, signum est, res esse vnitas importare aliquid aliud, nempe entitatem aliquam positiuam, substantialem modalem, realiter distinctam ab omnibus partibus; nam quæ realiter sunt separabilia, realiter distinguuntur; sed hæc realitas vnionis, siuè naturalis, siuè hypostaticæ, realiter separatur ab extremis; ergo realiter ab ipsis distinguitur.

Non valet dicere cum P. Gonet, & alijs Thomistis, Quòd eo ipso quòd habeatur actuale exercitium Verbi diuini terminandi naturam humanam; nempe actio vnitiua Dei, per quam personalitas Verbi diuini communicatur naturæ humanæ; habetur conceptus vnionis hypostaticæ; eodem modo, quo si ponitur actuale exercitium informandi, habetur vnio inter materiam, & formam. Non valet, inquam, hoc dicere; Nam vel hoc actuale exercitium terminandi Verbi diuini, in quo consistit vnio hypostatica, & hoc actuale exercitium informandi, in quo consistit conceptus vnionis inter materiam, & formam, & omne aliud quodcumque excitabile per totam æternitatem, vel importat ex parte obiecti entitatem aliquam distinctam à materia, & forma, & ab humanitate, & Verbo vel non? Si primum, habeo intentum; secundum non potest dici; nam potest haberi materia, & forma, & non haberi actuale exercitium informandi, in quo consistit vnio per vos: sicut potuit haberi existentia Verbi

bi, & intelligi humanitas saltem prius natura producta, quam habeatur hoc actuale exercitium Verbi vniendi; nempe actio vnitiva Dei, per quam personalitas Verbi communicetur naturæ humanæ, in quo consistit vnio hypostatica per vos; ergo neque vnio inter materiam, & formam consistit in actuali exercitio informandi, neque vnio hypostatica in actuali exercitio terminandi naturam humanam; remanet ergo firmum, quod sicut vnio inter materiam, & formam, est modus substantialis distinctus à materia, & forma; ita vnio hypostatica erit modus substantialis, distinctus ab humanitate, & Verbo; cum hoc discrimine, quod vnio inter materiam, & formam erit modus substantialis naturalis; vnio verò hypostatica, modus substantialis supernaturalis.

Sicut in probabilissima sententia non admittitur inter materiam, & formam, nisi tantum vnica vnio; ita inter humanitatem, & Verbum, non datur, nisi tantum vnica vnio hypostatica; quia non potest percipi, vnum esse alteri vnitum, quin, & illud alterum ipsi intelligatur vnitum; sed per vnionem hypostaticam intelligitur humanitas unita Verbo; ergo etiam, & Verbum humanitati. *Hinc est*, quod quantumvis vnio hypostatica, seu modus iste substantialis distinctus, sit aliquod creatum; non implicat, ut putat P. Gonet, & alij, quin vniat humanitatem cum Verbo; cum eo ipso intelligatur Verbum vnitum humanitati. *Neque obstat*, Quod talis vnio hypostatica non sustentetur à Verbo; Nam sustentare importat capacitatem perfectionis; & cum Verbum diuinum non sit capax perfectionis; cum sit infinite perfectum; hinc est, quod vnio hypostatica non potest sustentari à Verbo: Subiectum igitur talis vnionis est humanitas; quia humanitas perficitur, & intrinsecè mutatur.

Nota I. Quod quamvis P. Gonet putet, malè eos argumentari, qui probant, dari vnionem distinctam inter humanitatem, & Verbum; quia datur inter materiam, & formam; *Non* contradicit hoc nostræ probationi; Quia nos non probamus præcisè hanc vnionem distinctam solo exemplo materiæ, & formæ; sed etiam vtimur exemplo humanitatis cum Verbo, tamquam medio; quamvis de reliquo meo iudicio, qui probaret, vnionem hypostaticam distinctam, solo exemplo materiæ, & formæ, benè probaret; nam disparitas assignata ab eodem autore nullius est efficaciz; cum non minus per vnionem hypostaticam fiat ex humanitate, & Verbo homo Deus, & ex Verbo, & humanitate Deus homo; quàm per vnionem naturalem ex anima rationali, & carne vnus homo. *Nota II.* Quod vnio hypostatica, sicut etiam, & quælibet alia vnio vnitur per se ipsam; nõ verò humanitas, quæ est indifferens, ad hoc, ut vnatur, adeoque indiget determinatiuo; hoc autem determinatiuum est ipsa vnio hypostatica: & sic non indiget humanitas alia vnione, ut determinetur; vt obijciunt al. qui Thomistæ; at verò vnio non habet talem indifferentiam; cum sit actuale exercitium vniendi; & sic vnitur per se ipsam.

Quamvis aliqui putent, humanitatem Christi existere per existentiam Ver-

Verbi; id est humanitas ipsa vnione hypostatica, & producitur, & fit existens existentia Verbi; Verius existimò cum communi sententia, Quòd distincta actione reali anima Christi creatur, & vnitur hypostaticè Verbo; & sic non producitur humanitas ipsa actione, qua vnitur ad Verbum; vnde sequitur, existere per existentiam distinctam ab existentia Verbi. Est sententia D. Tho; *quæst. 4. art. 2.* dicentis, *Quòd id, quod assumitur, debet præintelligi assumptioni: sicut id, quod mouetur localiter, præintelligitur motui. & in 3. disc. 5. quæst. 3. art. 1. ad 2. ait, Quod assumitur præexistere assumptioni, non tempore, sed natura. Probatur ratione, Quia si actio, qua humanitas fuit vnita Verbo, non fuisset distincta ab actione productiua humanitatis; si Verbum dimitteret humanitatem, necessariò humanitas desineret in rerum natura; quia periret vnio ipsius cum Verbo: insuper productio humanitatis Christi pertinet ad ordinem nature: quia est secundum suam speciem naturalis; affectio vnionis pertinet ad ordinem supernaturalem; quia intrinsecè respicit Verbum; ergo non sunt vna, sed distinctæ actiones realiter diuersæ.*

Per hoc, quòd humanitas fuerit prior, quàm vnio cum Verbo; non sequitur, quòd Deus non sit conceptus ex Virgine, sed sola humanitas; Nam quamuis conceptio humanitatis ordinè naturæ sit prior, quàm vnio cum Verbo; tamen fuit simul tempore; quia in eodem instanti, in quo humanitas concepta fuit ex Virgine; fuit etiam vnita Verbo; quod sufficit, vt Deus dicatur conceptus ex Virgine.

De Causa meritoria Incarnationis,

Opera Christi Domini facta in eodem instanti Incarnationis, prius tamen natura, quàm esset vnio, potuerunt per potentiam Dei absolutam mereri Incarnationem; Nam qui docent contrarium, fundantur in hoc, quòd subsistentia sit aliquòd infallibiliter requisitum ad operandum; & cum nulla in casu posito præsupponatur subsistentia, nulla erit operatio, nec consequenter meritum. Sed meo iudicio nullum, nec leue est fundamentum ad asserendum, adeò esse essentialiter prærequisitam subsistentiam ad operandum; vt nec diuinitus eius defectus possit suppleri. Illud vulgatù axioma *Actiones sunt suppositorum;* in præsentì non obstat; nam Aristoteles nihil aliud intellexit, nisi, quòd vulgariter actiones tribuuntur toti homini; de reliquo Aristoteles de subsistentia distincta nihil nouit. De factò verò existimò probabilius, Non potuisse mereri talem vnionem; cum nullam habeamus necessitatem ponendi illud miraculum; cum ea præcedentia meritorum prius natura sit planè miraculosa.

Christus per opera, & actus subsequentes vnionē, nec de potentia Dei absoluta, potuit promereri suam Incarnationem; Quia meritum est causa influens in præmium; ergo si mereretur vnionem hypostaticam, meretur

retur causam suæ existentia; & consequenter mereretur se ipsum, & interueniret mutua causalitas.

Circa meritum congruum, certissimum est Beatissimâ Virg. meruisse dignitatem Matris Dei. Meritum de congruo est fundatum in amicitia, & gratia Amici, secundum quam est congruum, vt Amicus Amicum exaudiat, quando petit, quæ iusta sunt; sed Beatissima Virgo insignibus gratiæ auxilijs ornata, se disposuit per actus supernaturales, & amorem Dei, vt Filium Dei conciperet in utero suo; ergo B. Virgo congruè saltèm meruit dignitatem Matris Dei. Circa meritum de condigno existimo probabiliter non meruisse B. Virginem, esse Matrem Dei; Non nego tamen, quòd sunt, qui sustineant, non solum de possibili, verum, etiam de factò B. Virginem meruisse de condigno maternitatem Dei: inter alios Cabrera, qui *art. 1. disput. 6.* hoc iudicat probabile, & pium: & Suarez ait, Non esse dignum vlla nota, nec alienum à modo loquendi SS. Patrum, qui hoc assererent.

Sancti Patres non potuerunt habere meritum condignum Incarnationis; Nam tunc habetur meritum de condigno alicuius præmij; quando meritum est æqualis valoris, & dignitatis cum ipso; sed quodlibet opus puræ creaturæ, licet sit infinitè intensum, & infinita gratia habituali dignificatū, non habet æqualitatem cum vnione hypostatica, cum semper opera creaturæ sint in inferiori ordine; & per vnionem hypostaticam acquiratur, quasi in radice ius ad omnia præmia possibilis; ergo, &c. Potest tamen dici, SS. Patres meruisse de congruo Incarnationem, & quantum ad substantiam, & quantum ad circumstantias; nempe accelerationem, vt carnem assumeret ex semine eorum, &c. Ratio est, Quia vnio hypostatica, & si connectat Deum cum humanitate; ipsa tamen in se est nexus finitus, & limitatus; ideòque non videtur excedere quo ad congruitatem vires actus supernaturalis in formati gratiæ.

De Natura assumptibili, & assumpta.

Possunt omnes tres Personæ diuinæ assumere vnā, & eandem numero naturam humanam; quia manet semper eadem potentia in Deo, & eadem potentia obediēcialis in humanitate; ergo si fuit humanitas in potentia obediēciali, vt assumeretur à Verbo diuino; est etiam in potentia obediēciali, vt assumatur à Patre, & Spiritu sancto; quia in hoc mysterio tota ratio facti, est voluntas facientis, & potentia. In isto casu quælibet Persona erit terminus adæquatus intensiue; non verò extensiue; & natura humana remanet per quamlibet Personam expleta, & contenta, intensiue; non verò extensiue. Sicut etiam in hoc casu darentur tres vniones diuersæ, quarum vnaquæque à suo termino penderet: vnde natura humana assumpta esset vna; effectus autem assumptionis, qui inde oritur, esset multiplex; nempe tres vniones distinctæ; &

per

per hoc non sequitur, quòd idem numero effectus penderet à multiplici causa totali; quia essent diuersi effectus.

Potest etiã quælibet Persona diuina terminare plures humanitates, sibi assumere plures naturas humanas; Est cõmunis inter Doctores; Quia non euacuatur virtus infinita Dei per vnã naturam assumptam: insuper terminando naturam infinitam, eminenter terminat omnem naturam in ipso contentã. *Nec valet*, personalitas diuina terminat naturam infinitã; ergo non potest vltcrius terminare; Quia naturam diuinam terminat intrinsecè, & ad intrã; naturam verò humanam extrinsecè, & ad extrã.

Facta suppositione, Quòd tres Personæ diuinæ assumerent vnã, eandemque naturam humanam, vel quòd quælibet Persona assumeret plures naturas humanas; semper esset vnus homo, non plures; Quia ad multiplicationem nominis substantiui non sufficit multiplicatio suppositorũ; sed etiã vltcrius requiritur multiplicatio formarum; in primo casu erunt multiplicata supposita, non verò formæ; & sic diceretur vnus homo subsistens in tribus personis; in secundo verò casu multiplicarentur formæ, non verò supposita; & sic esset vnus homo subsistens, & habens tres humanitates. Propter eandem rationem diximus in mysterio Trinitatis multiplicantur personalitates; non verò multiplicatur Deus.

Quamuis aliqui probabiliter existiment, non implicare personam creatam virtute diuina terminare alienam naturam sibi hypostaticè vnitam; puto tamen cum D.Tho: Nec diuinitus posse personam creatam terminare alienam naturã; Quia subsistentia creata accipit limitationem, & specificationem essentialẽ à natura, quam terminat; ergo nequit accipere limitationem ab alia; & sic non potest terminare alienam: Vnde est erroneum asserere, Antichristum futurum diabolum incarnatum; quia secundum Fidem Catholicam futurus est purus homo; dicitur diabolus ratione extremæ malitiæ, quæ dabitur in illo. Quando Angeli apparuerunt hominibus in corporibus assumptis, non fuerunt cum illis vniti hypostaticè; Nam vel illa corpora erant apparentia; vel si erant vera, erat illis vnitus Angelus accidentalitèr; sicut intelligentia vnitur Cælo.

Potuit Verbum diuinum quacumque naturam substantialem irrationalem assumere; etiã quod hæc natura nullum dicat ordinem ad naturam rationalem. Traditur hæc conclusio à PP. maximè verò à Tereuliano lib. de carne Christi cap. 4. & D. Gregorius Nissenus oratione catechistica ait, Ille idem præst omnibus rebus, (scilicet Deus) quamobrem si terrestrem naturam existimas indignam, quæ cum Deo connectatur, nulla inuenietur digna.



Virum Verbum defactò assumpserit omnes partes naturæ humanæ?

Est communis Theologorū sensus, ita ut contrarium sit temerarium, Corpus Christi in primo conceptionis instanti fuisse perfectè organizatum; licèt postea in utero Virginis creuerit: in eodem igitur instanti temporis sine ullo ordine prioris, & posterioris fuit simul anima creata, & infusa corpori; & tam anima, quàm corpus simul vnita Verbo; solùm ordine intentionis humanitas prius natura fuit assumpta à Verbo, quàm partes; quia primaria intentio assumptionis fuit ad humanitatem.

Non potest negari, quòd Verbum diuinum vnierit sibi proximè, & immediatè sanguinem; siuè de reliquo sanguis sit animatus, siuè non; Nam pro ijs, qui suslinent sanguinem esse animatum, nullum est dubium asserendi, fuisse hypostaticè vnitum Verbo; quia non minus debuit immediatè assumi, quàm ipsa caro, & anima; qui verò in sanguinis animatione dissentiant; debent hoc idem asserere; quia sanguis adhuc est pars hominis, non per modum nutrimenti, sed per modum partis integran- tis hominì; cum in resurrectione etià recipiatur; quod non esset necessarium, si solùm esset pars per modum nutrimenti; ergo si est pars, debuit vniri hypostaticè Verbo, non minus, quàm corpus ipsum, & anima ipsa; cum Verbum assumpserit humanitatem integram.

Quamuis aliqui teneant, quòd D. Tho: senserit sanguinem non animari; Video, quòd S. Doctor docuit contrarium; Nam in *quest. 4. in argumento sed contra*: Supponit, ut omninò certum, Quòd quidquid est in homine de veritate naturæ, est perfectum anima rationali; ergo cum ibi dicat, sanguinem esse de perfectione humanæ naturæ, sensit illum animari. Quando verò S. Doctor negat, sanguinem esse partem hominis; Loquitur de partibus vltimis, & perfectis, ut sunt caro, ossa, &c. & ad has solùm dicit, sanguinem esse in potentia. Si aliqua pars sanguinis Christi in ara Crucis effusi mansit in terris, quod potest probabiliter sustineri; Non sequitur, quòd per hoc, quòd fuerit derelicta à Verbo, non fuerit ab eodem assumpta; ex illo Damasceni, *Quod semel assumpsit, nunquam dimisit*. Nam axioma illud intelligendum est de partibus præcipuis naturæ humanæ Christi; non autem de omni eo, quod assumptum fuit aliquando à Verbo. Nota Quòd sanguis iste effusus esset adorandus adoratione latticæ, non quòd vnietur Verbo defactò hypostaticè; sed quia vnitus fuit Verbo; at hæc dicitur lattia relatiua, non absoluta.

Assumpsit etià Verbum sibi hypostaticè tres alios humores, nempe pituitam, bilem flauam, & atram; idest choleram, & melancholiam; item spiritus vitales, & animales; Quia hæc omnia pertinent ad integritatem humanæ naturæ: ungues, & dentes fuerunt etià immediatè assumpti à Verbo; quia hæc etià pertinent ad integritatem humanæ nat-

turæ, dempta illa parte vnguini, quæ eminet, & carni non cohzret, & refecari solet de capillis est valde dubium, an Verbum illos assumpserit? Existimo autem quod sine hypostaticè vniti; quia erunt in corporibus gloriosis.

Fuit Corpus Christi, non opere virili, sed sola virtute, & operatione Spiritus sancti conceptum, & formatum in utero Virginis; non quod Virgini fuerit Spiritus sanctus loco seminis, aut materis, ex qua formaretur Christi caro; neque, quod sementium materiam de nihilo creatam Virgineo utero infuderit; hæc enim est indignissima, & absurdissima cogitatio; sed quod virtus Spiritus sancti ex purissimis B. Virginis sanguinibus in conceptione, & formatione Corporis Christi, longè perfectius, & vberius præstiterit, quod virtus seminis præstat in consueta hominum generatione. Unde Spiritus sanctus non potest dici Pater Christi; quia non communicauit illi substantiam diuinam; quia Spiritus sanctus procedit à Filio, non Filius à Spiritu sancto; neque communicauit substantiam humanam, quia non est eius particeps Spiritus sanctus.

De Gratia substantiali, & accidentali Christi.

V Nio hypostatica, quæ per nos est modus substantialis distinctus, non est sanctitas increata, sed solum via, seu determinatio ad sanctitatem increatam; vnde humanitas Christi Domini formaliter fuit sanctificata per ipsam Personam Verbi, cum qua fuit coniuncta hypostaticè humanitas. Loquor enim de sanctitate substantiali; Personalitas enim Verbi, vt virtualiter distincta ab essentia est per se infinita sanctitas; & vt coniuncta diuinæ naturæ, constituit Verbum Filium Dei naturalem; ergo debet esse formaliter sanctificans; ergo sanctificat substantialiter Christi humanitatem. Gratia verò habitualis Christi Domini, ultra alios effectus, quos præstat humanitati, inseruit ad reddendam ipsam humanitatem sanctam, & gratam accidentaliter: & sic anima Christi informata gratia habituali, & sanctitate substantiali, & per essentiam, est perfectior extensiuè, quàm effecta sola sanctitate substantiali. Hinc quantumuis à nobis concedatur, posse Deum assumere naturam v.g. Leonis; non per hoc cogimur dicere, illum fore sanctum, vel Filium naturalem, vel adoptiuum Dei; Quia talis natura Leonis v.g. non est capax sanctitatis, neque est capax amoris amicitie, quæ dat ius ad hæreditatem, quo mediante dicitur aliquis Filius naturalis; neq; haberet ius ad visionem, in quo fundatur adoptiuus filiatio. Neque vrget illa ratio, Natura irrationalis non est capax sanctitatis, amoris amicitie, &c. ergo neque vnionis hypostaticæ. Nam capacitas ad sanctitatem, ad amorem Dei, &c. non est aliquod essentialiter prærequisitum ad vnionem cum Verbo; nam subsistentia est propria perfectio substantiæ; & cum natura irrationalis sit substantia, sequitur, quod quælibet possit assumi, vt supra diximus.

Gra-

Gratia habitualis Christi fuit finita secundum entitatem, & gradum intentionis; Nam secundum potentiam Dei absolutam potuit augeri; quia hoc non implicat ex parte formæ; quia forma, seu gratia est aliquid creatum; neque ex parte subiecti; quia subiectum gratiæ, scilicet natura intellectualis ad sui conservationem non perit certum, & determinatum, gradum gratiæ. Illa plenitudo gratiæ, qua fuit salutata ab Angelo Beatissima Virgo, & quæ B. Stephano tribuitur illis verbis *Act. 6. Stephanus autem plenus gratia, & fortitudine*: significat abundantiam gratiæ. Defectò tamen gratia habitualis Christi non fuit aucta intensius: vnde Christus dicitur plenus gratia in proprio, & rigoroso sensu, idest plenus tali gratia, vt ea crescere amplius non possit; & hoc ratione gratiæ vniõnis. Et si *Lucæ 2.* dicitur, *Iesus proficiebat sapientia, & gratia*: hoc intelligendum est de augmento gratiæ, quo ad manifestationem; quia quotidie magis, ac magis gratiam, & sapientiam manifestabat.

Utrum in Christo fuerit Fides, & Spes?

IN Christo Domino non fuit Fides, vt vult D. Tho: & communiter omnes eius interpretes, Quia in primo instanti suæ conceptionis fuit beatus: vnde exercuit actum planè clarum, & euidentem; hoc idem asserendum puto de habitu: & si de Christo legitur *Isaia 11. Erat fides cinclorum renum eius*: nomine, *Fidei*, significatur Fidelitas, & veracitas. Nota, Quòd quamuis in tract. de Fide docuerim, restare defectò in Patria, in sententia multorum, habitum Fidei; Non sequitur aliquid contra hanc conclusionem; Nam cum de Christo sit specialis ratio de Fide, cum in ipso vlla relinquatur obscuritas, nec in reuelatione, nec in mysterio, aut motiuis credibilitatis, erit etiam specialis ratio de habitu; ergo sicut non datur Fides in Christo, neque etiam habitus. *Spes* Theologica non fuit propriè in Christo: vt diximus in tract. de Spe. *Fuerant* etiam in Christo septem dona Spiritus sancti, de qua re nullus est, qui dubitet. *Nec illi defuit donum timoris*, quatenus peccata, & mala alijs imminencia horrebat, & quatenus timebat, ne alij peccarent. *Vltimò fuerunt in Christo omnia genera virtutum*, tum ordinis naturalis, tum ordinis supernaturalis, exceptis, quæ cum statu beatifico, & cum visione hypostatice repugnant: vnde ex moralibus non fuit in Christo penitentia.

De Scientia creata, & increata animæ Christi Domini, eiusque potentia.

ESt de Fide, & expressa omnium PP. sententia, Christum Dominum habuisse intellectum creatum, & consequenter eius anima habuit actum scientiæ creatæ: clarè hoc demonstrat D. P. Augult. in *Enchiridiao ad Laurentium ad hæc verba Hebraeorum 5. Didicist ex his, qua passus est obe-*

scientiam. Fuit consequenter in Christo volitio etiam creata; quia sine voluntate creata Christus nihil meruisset; sed meruit, ut haberetur in Scripturis præcipuè *Hebraeorum* 5. *Offerens cum clamore valido, & lacrymis exauditus est pro sua reuerentia*. Cum igitur sit certum esse in anima Christi scientiam creatam; cum in eius anima intellectiua sit intellectus; rationabiliter S. Thom. & alij Scholastici trifariam hanc scientiã creatã diuidunt: Vna est cognitio beata, consistens in Dei visione, sine interuentu vllius speciei creatæ, gerentis munus obiecti, efficienter concurrentis; Nam quamuis docuerim in tract. de visione beata, de possibili non repugnare speciem impressam creatam in Dei visione; defac̃o tamen non est admittenda. Alia est scientia rerum congenita, seu infusa, qua cognouit Christus ab initio res in se ipsis per species intelligibiles, impressas sibi in ipsa coniunctione Verbi. Hæc scientia, & prima fuit ab instanti conceptionis Christo concessa; & iuxta hanc scientiam intelligitur præcipuè illud, quod est ad Col. 2. in Christo fuisse omnes Thesaurorum sapientiæ, & scientiæ reconditos. Tertia est experimentalis, quam ipsemet Christus vlu suorum sensuum acquisiuit. Vnde illa loca Scripturæ, quæ Christo admirationem tribuunt; denotant hanc scientiam experimentalem: sicut etiam, quando legitur; Quod Christus proficiebat sapientia; Intelligitur de hac scientia, & notitia, a sensibus accepta; idest illud, quod antea nouerat, nouo cognoscendi modo; idest experiendo per ætatis accessum discebat.

Est sententia D. Tho: quam verissimam puto, Animam Christi non videre in Verbo omnia possibilia; non quia videndo omnia possibilia, videret omne cognoscibile, & consequenter Deū comprehenderet. Nam est magna difficultas, vtrum sit possibilis cognitio omnium possibilium sine Dei comprehensione, & sufficienter notaui in tract. de Visione, in quo consistat conceptus comprehensionis. Sed quia, ut vult quidam Doctor, cognitio possibilium non pertinet ad statum Christi; nihil enim videtur referre ad statum animæ Christi, quod cognoscat infinita, quæ Deus potest facere, numquã tamen est facturus. *Cognouit* tamen Anima Christi per scientiam infusam oculos cordium cogitationes, & futura contingentia, per species à Deo infusas immediate repræsentantes; hæc enim cognitio erat Christo necessaria; ut esset perfectissimus Prophetæ, Doctor, & Prædicator Fidei: sicut etiam pertinuit ad maiorem eius perfectionem omnia dona supernaturalia, ut sunt gratia, charitas, &c. cognoscere. *Insuper* cum anima Christi Domini iuxta ab ipso instanti conceptionis beata, ut diximus, perfectissima Dei visione; potuit fieri, ut cum hac summa delectatione, dolor, vel tristitia, vel timor, locum haberet; Nam hæc summa delectatio singulari quadam dispensatione sic retenta fuit in mente, ut in partes inferiores animæ, tam sensitiuas, quàm alias non deriuaretur: vnde fieri potuit, ut summa delectatio non excluderet summam tristitiam, & dolorem sensibilem, & quamcumque aliam affectionem poenalem.

Nota I. Quod Anima Christi Domini non potuit intelligere per scientiam increatam Dei; Quia intellectio est actio vitalis, & in Deo est ipsa met vita substantialis ipsius Dei; sed hæc non potest esse substantialis vita animæ Christi; ergo, &c. *Nota II.* Quod quamuis Anima Christi ignorauerit possibilia; non fuit tamen in ipso, neque ignorantia positiva, neque priuatiua; sed solum negatiua; idest negatio scientiæ circa ea, quæ ad statum ipsius non pertinent.

Fuit in humanitate Christi Domini, vt vnita diuinæ personæ, virtus, & potentia supernaturalis, ad effectus supernaturales, & miraculosos: vnde humanitas Christi fuit diuinitus assumpta, vt causa instrumentalis physica immediata, ad producenda ea opera miraculosa; Nam humanæ Christi naturæ est adscribendus modus perfectissimus operandi propter vnionem hypostaticā; nisi sequatur repugnantia; sed modus perfectissimus operandi causæ efficientis est operari per veram causalitatem; ergo hic est adscribendus humanitati; ergo humanitas erit causa instrumentalis physica; non verò moralis; vt putat Scotus, & alij, cuiuslibet operis miraculosi.

Nota I. Quod ad causalitatem physicam efficientiæ non semper requiritur immediatus contactus suppositi; sed sufficit contactus virtutis: vnde quamuis humanitas Christi non habuerit contactum immediatum, suppositi in re, qua miraculum aliquod de nouo producitur; habet tamen semper contactum virtutis. *Nota II.* Quod ante Incarnationem, humanitas Christi fuit solum causa moralis gratiæ collatæ antiquis Patribus; in quantum humanitas Christi fuit causa meritoria.

Conciliatur libertas Christi Domini cum eius impeccabilitate.

Christus naturaliter peccare non potuit, nec mortaliter, nec venialiter; est scilicet communis omnium sententia; Nam gratia vnionis, vt potè proueniens formaliter à sanctitate diuina, continet eminenter omnes perfectiones omnium sanctitatum creabilium; ergo etiam continebit repugnantiam cum peccato veniali.

Etiā de potentia Dei absoluta humanitas Christi peccare non potuit ex vi vnionis hypostaticæ; vnde nec potest vnio hypostatica per peccatum amitti, nec cum peccato componi: ita cōmuniter DD. S. Tho: & omnes eius interpretes. *Difficultas* autem in hac controuersia consistit, in ostendendo, à quo nam proueniat hæc impossibilitas peccandi in natura humana Christi, vnita Verbo: Ego omnis omnibus alijs rationibus probabiliter existimo, hoc ptonenire ex summa sanctitate, quæ communicatur humanitati Christi, per vnionem naturæ diuinæ, & Verbi; quæ sanctitas summa, cum habeat essentialē oppositionem in se, cum peccato, eo ipso, quod communicat humanitati suum effectum formalem, debet etiam communicare eam oppositionem: Hunc est, quod hu-

humanitas Christi in sententia aliquorum, redditur proprie ab intrinseco impeccabilis; quia sanctitas, quæ peccatū excludit, est intrinseca. *Per hoc autē*, quod absolute negetur humanitati Christi Domini potentia ad peccandū; non sequitur, Quod Christus Dominus non fuerit liber; Quia potentia peccandi non est pars, neque complementum libertatis; sed defectus illius: unde ut bene notat quidam Recentior, arbitrium Christi erat quidem determinatum ad bonum; sed non ad hoc, vel illud bonum, in particulari: sed melius hoc examinabitur in sequenti.

Stante hac Christi impeccabilitate oritur hic grauissima, & difficillima questio, quomodo possit cum hac impeccabilitate conciliari libertas voluntatis illius, circa præceptum mortis ei à Patre impositum; nā ex vna parte impeccabilitas Christi videtur destruere eius libertatem; nam si fuit impeccabilis, non habuit consequenter facultatem, violandi præceptū Patris, & consequenter non fuit liber; ex alia verò parte actus, quo Christus mortem subiit pro redemptione generis humani; fuit liber; quia habuit indifferentiam ad ponendū oppositum actui præcepto, & consequenter ad ponendā violationem præcepti; ergo ad posse peccare; & sic impeccabilitas Christi ex hoc capite destruitur. Unde libertas Christi videtur repugnare cum eius impeccabilitate; impeccabilitas verò cum eius libertate. Omissis autem, breuitatis causa, responsionibus diuersorum, quæ solent adhiberi ad hanc difficultatem soluendam. Conciliatur meo iudicio clarissime, & facillime libertas Christi cum eius impeccabilitate circa præceptum mortis ei à Patre impositū, si dicatur, iuxta cōmuniſſimam Thomistarū sententiam, Quod Christus stans, præcepto Patris habuit libertatem indifferentiæ, & potuit non agere negatiuè, seu potuit non ponere actum cadentē sub præcepto in sensu diuiso; quod idem est, ac velle negationē mortis, ut abstractam à præcepto; non autem potuit non agere priuatiuè, & in sensu composito, componendo negationē actus cum præcepto. Sed de hac libertate fusè, & clarius agitur in physica prædeterminatione.

De Merito, Seruitute Christi, & eius Sacerdotio.

EST de Fide definitum, Quod Christus verè, & propriè meruit, & fuit causa meritorea nostræ iustificationis; cepit autē mereri à primo instanti suæ conceptionis, & toto vitæ tempore; Quia in primo instanti habuit perfectissimum vsum rationis; & cum fuerit præditus virtutibus naturalibus, & supernaturalibus; potuit consequenter actus illarum virtutum exercere, cum in primo instanti suæ conceptionis, cum toto tempore ejus vitæ; desijt autem mereri ab instanti suæ mortis; quia in Cruce consummata sunt merita, quibus Christus nostram redemptionem obtinuit: ideo dixit, *Consummatum est.*

Christus pro ut supponitur pro Personā diuinā non est, nec potest dici vilo

vilo modo seruus Dei; Christus autem, vt homo; idest ratione humani-
tatis potest dici seruus Dei, si per vocem. *Servus*, significatur natura,
quæ est sub potestate alterius, & possit vt pro suo libitu tali natura;
Nam potest Deus naturam humanam Christi Domini destruere, & anni-
hilare, & pro suo libitu ea vt. Si verò per vocem, *Servus*, venit id, quod
ita subicitur dominio alterius, vt non communicet in bonis illius; Chri-
stus non potest dici seruus Dei. *Est* non modo verum, sed etiã de Fide
sancitum, Christum in hac vita mortali orasse; Quia oratio est maximè
conueniens Christo secundum humanitatem, in qua decet maximè Deū
colere, & honorare. *Fuit* etiã verè, & propriè Sacerdos; Fuit enim
constitutus à Deo, qui supremam habet auctoritatem; & obtulit sacri-
ficium, alterum cruentum in ara Crucis, & aliud inuictum, & Eu-
charisticum in vltima nocte cenæ. *Habuit* insuper Christus potestatem
spiritualem, Regiam, & Monarchicam supra totam Ecclesiam, & ius re-
gium, directum, seu temporale, & potestatem in totum vniuersum.

*Utum Christus, vt homo sit Filius adoptiuus, vel na-
turalis Dei?*

Humanitas Christi, quæ est distincta à Verbo & ex libertate Dei
illi vnita, nullo modo potest dici filia adoptiua Dei; Nam vox
illa, *Filius adoptiuus*, dicit esse filium extraneum à filio naturali; sed hu-
manitas non est extranea diuinitati, aut filiationi naturali: quia est vnita
realiter ei filiationi; ergo non potest esse Filius adoptiuus Christus, etiã
ratione humanitatis. *Est* igitur Christus, vt homo Filius naturalis Dei;
quia habet ius ad hereditatē, & est vnitus, seu coniunctus physicè Deo:
dicitur etiã Verbum modo propiissimum, Filius naturalis Dei; Quia
vi generationis accipit similitudinem in natura: vnde quauis Spiritus
sanctus habeat ius in hereditatē; quia tamen non accipit vi generationis
similitudinem in natura, villo modo potest vocari Filius; aliter con-
funderentur productiones æternæ Personarum; quod non euenit, nec
est periculum, si dicitur, quod Christus, vt homo est Filius natura-
lis Dei.

Nota hic I. Quod quando dicimus, quod Christus, vt homo est Filius
naturalis Dei, ly, *vt homo*, non sumitur reduplicatiuè, sed tantum spe-
cificatiuè; pro vt scilicet humanitas est coniuncta Verbo diuino. II. Fi-
liatio ista naturalis habet pro fundamento vnionem hypostaticam, seu
diuinum Verbum subsistens in humana natura: & sic Christus per dup-
plicem generationem est Filius Dei naturalis, vnā æternam, qua sub-
sistit in essentia diuina; alterā temporalem, qua est Filius Dei in humana
natura: Et propter hanc rationem aliqui dicunt, quod Spiritus sanctus,
quāuis habeat ius ad hereditatem, non est dicendus Filius Dei naturalis;
Quia implicat, aliquod habere rationē Filij naturalis, nisi habeat in se
filia-

filiationem diuinā; & cum Spiritus sanctus careat filiatione increata, & diuina, vt diximus supra, quæ est propriissima filiatio, non potest dici Filius Dei naturalis.

De Prædestinatione, & Adoratione Christi.

Christus verè dici potest, quòd fuerit prædestinatus ad gloriam, & ad alia dona; Quia cum passim absolute dicamus, Christum habuisse visionem creatam; videtur etiam posse dici ad illam prædestinatus. Adde quòd etiam humanitas Christi Domini potest dici prædestinata ad vnionem hypostaticam, ad gratiam habitualet, & ad gloriam: Circa vnionem hypostaticam est certum; Nam prædestinatio significat prædestinationem ad aliquid distinctum in re prædestinata; & cum vnio hypostatica sit separabilis ab ipsa humanitate, merito dicitur prædestinata: Circa visionem etiā patet; Nam de Anima Christi, verè dicitur, quòd videt in Verbo hæc, & illa; ergo benè potest dici humanitas illa prædestinata ad visionem, &c.


Prædestinatio Christi est causa nostræ prædestinationis in genere causæ exemplaris, quæ dicitur formalis extrinseca; de hac loquitur D. Paulus ad Romanos 8. *Quos præsciuit, & prædestinavit conformes fieri imagini Filij sui.* Docet insuper D. Tho: Quòd prædestinatio Christi sumpta ex parte actus Dei prædestinantis, non est causa nostræ prædestinationis; benè tamen, si sumatur ex parte termini, & effectus producti in tempore per prædestinationem nostram.

Ad intelligenda ea, quæ de adoratione Christi tradi solent, prænoto, Quòd adoratio in eòmuni est reuerentia, & honor alicui exhibitus in profectione nostræ subiectionis, & excellentiæ illius: Prima, & præcipua species est adoratio respectu Dei; hæc autem adoratio vocatur per excellentiā, *Latria*, quod idem est, ac cultus soli Deo exhibitus. Secunda species est *Dulia*, qua coluntur Sancti. Tertia, *Hyperdulia*, quæ mediat inter vtramque speciem, & tribuitur ob excellentem gradū Sanctitatis Beatissimæ Virgini. Est de Fide, Quòd solus Deus est adorandus adoratione latriæ, & hoc est præceptum diuinum, naturale, & positiuum; quia est secundū rationem, creaturam intellectualem obligari ad adorandum suū Deum; & præcipitur à Deo ex *Exod. 20. Non habebis Deos alienos.* Humanitas Christi, vt vnita Verbo diuino; seu Christus, vt subsistens in humana, & diuina natura, est adorandus perfectissima adoratione latriæ, vt definitur in Concilio Ephesino *cap. 8.* & in Tridentin. *sess. 13. can. 6.* ita vt quando adoratur totus Christus, adoratur eadem adoratione, qua diuinitas eiusdem; licet diuinitas adoratur primò latria, concomitanter autem tantum humanitas; sicut in Sacramento Eucharistiæ concomitanter adoratur species Eucharisticæ. Imago autem Christi per se sola, seu quando adoratur Christus, solum per imaginem repræ-

sentatus; illa erit adoratio latriæ respectiua, non absoluta; quia illa imago non continet deitatem Christi verè, & realiter; sed representatiuè tantum.

Crux, in qua Christus passus est, potest duobus titulis adorari, & quia repræsentat Christum Crucifixum, & propter contactum ad Corpus Christi: quando Crux adoratur, pro vt repræsentat Christum crucifixum, potest adorari eadem adoratione, qua adorantur imagines Christi; si verò adoretur ratione contactus, debet adorari adoratione latriæ, sed participatæ.

Est notandum I. Circa modum loquendi de hoc mysterio Incarnationis, Quod prædicata, quæ conueniunt vni ex duabus naturis Christi, non posse de altera affirmari, si hæc accipiat in abstracto: & sic non potest dici de natura diuina Christi, quod sit producta; quia sola humana natura illius fuit producta; nec quod humana sit increata, quia sola diuina est increata. II. *Dens factus est homo*, est propositio vera: *Homo factus est Deus*, non videtur in rigore, quod sit propositio vera: quia videtur, hominem antea existentem factum Deum. Hæc autem propositio, *Cibus, in quantum homo, est Deus*, est manifestè falsa; quia cum illæ duæ formæ realiter distinctæ communicent diuersum effectum, malè desumitur denominatio vnius effectus ab alia forma. Et hæc satis de hoc Incarnationis tractatu.



TRACTATUS II.

De Sacramentis in Genere.

Et Primò De quidditate, seu essentia Sacramenti in Genere.

POST Dominicæ Incarnationis tractatum conuenienter cū D.Th. illum de Sacramentis aggredimur; cum illorum efficacia à meritis Saluatoris nostri proficiscatur, & potissimum ab eius salutifera, sacratissimaque passione, quæ fuit consummatum meritum ipsius complementum. Relictis varijs huius nominis, *Sacramenti*, significationibus; in Ecclesia fuit hoc nomen vsurpatum ad significandam ceremoniam quandam sensibilem, aliquam sanctitatem conferentem. Sacramentum in sua lata acceptione est signum sensibile rei sacræ: & hoc modo acceptum comprehendit Sacramenta legis naturalis, Mosajcæ, & gratiæ; Nam hæc sunt omnia signa rei sacræ. In multa definitionum varietate,

quibus Sacramenta nouæ legis definiri solent, puto, clariorem esse hanc, nempe, *Sacramentum nouæ legis est signum sensibile, vel sacra, sanctificantis nos, constans verbis, et rebus*. Differunt Sacramenta nouæ legis à Sacramentis legis antiquæ; quia hæc erant tantum signa, & figuræ; Sacramenta autem nouæ legis sunt verè causa; gratiæ, non tantum signa. Dicitur: signum, non naturale, sed ad placitum Dei, repræsentans aliquid super naturale; habita ramen proportionem cum re significata; ablutio, enim Baptismi ex natura sua nihil significat. Debet etiam esse signum sensibile; quia est ritus sacer, quo humana respublica Deum colit, de cuius ratione est; ut sit ille ritus exterior, & sensibilis. Insuper debet esse signum practicum rei sacræ perfectè sanctificantis nos; ita ut in actuali exercitio illius Sacramenti conferatur nobis res sacra, nos sanctificans; vepotè gratia; siue hæc conferatur virtute Sacramenti; ut sit in Sacramento nouæ legis; siue conferatur à solo Deo, ad præsentiam Sacramenti; ut in Sacramentis veteribus.

Adidi vltimo loco definitionis, *constans verbis, & rebus*. Nam in omnibus Sacramentis nouæ legis est inuenire verba, tamquam formam, & res, tamquam materiam; & licet ad matrimonium non requirantur verba simpliciter, id est ore prolata; cum illud à mutis validè contrahi possit; requiritur tamen aliquid, quod vices verborum gerat; ut sunt nutus, vel scripta; res verò huius Sacramenti sunt ipsi contrahentes: validè Sacramentum non conficitur, si essentialis verbi mutatio contingit, quæ tunc accidit, quando naturalis eorum sensus peruertitur, & integer non perseverat: Neque etiam conficitur Sacramentum, si minister addendo, vel tollendo intendit introducere nouum ritum, non toleratum in Ecclesia; nisi ponas veram materiam, & formam, cum intentione faciendi, quod facit Ecclesia; nam in hoc casu, & si intendas introducere nouum ritum, non toleratum in Ecclesia, vetum conficitur Sacramentum; qui verò intendit introducere nouum ritum, peccat mortaliter; & si mutatur forma, ex qua tollatur sensus, Sacramentum est nullum.

Nota I. Quod non est de essentia Sacramenti, ut sic, quod componatur ex rebus, & verbis, tamquam ex materia, & forma; sed solù quod sit signum rei sacræ, &c. est solùm de essentia Sacramenti nouæ legis, quod consistit ex rebus, & verbis. Patet ex Concilio Florentino, vbi definitur, *Sacramentum ex tribus constare (videlicet) rebus, tamquam materia, verbis, tamquam forma, & persona Ministri cum intentione faciendi, quod facit Ecclesia*. In omnibus igitur Sacramentis, quæ consistunt in actu quodam, & quasi motu successiuo, siue operatione transeunte; ut sunt omnia Sacramenta, excepta Eucharistia; materia, & forma sunt partes intrinsecæ constitutionis illorum in facto esse; nam in his verba, & operatio, aut simul coexistunt, vel in breui intervallo sibi succedunt; ideoque vnum quoddam Sacramentum intrinsecè constituunt; nec est: necesse ad hoc, ut Sacramentum intrinsecè componant, ut semper sint utraq; simul, nisi

nisi solum moraliter; idest secundum moralem prudentiæ estimationem, verba rebus applicari censentur, *Solum* potest esse difficultas circa Sacramentum Eucharistiæ, quod non in actione transeunte, sed in re permanente est situm; eo quod multo tempore post formam illius (scilicet post verba consecrationis) manet materia, nempe species panis consecrata, & retinet permanentem rationem Sacramenti. Vnde assero, Quod in hoc Sacramento materia, & forma sunt partes illius in fieri; quia in facto esse, dum gratia infunditur, & Sacramentum Eucharistiæ percipitur, verba dudum transferuntur.

Nota II. Quod in vnoquoque Sacramento ita res, & verba sunt determinata à Christo; vt si vel alia res, vel alia forma verborum adhibeatur, Sacramentum non conficitur, vt supra diximus. Aduerte autem, quod res in nullo Sacramentorum est à Christo determinata secundum rationem individui; neque secundum hæc, vel illa accidentia intra eandem speciem; & sic nihil interest in baptismo v. g. an adhibeatur hæc, vel illa aqua, huius, vel illius qualitatis, modo sit vera aqua; Neque etiam res est determinata secundum naturam specificam specialissimam, & ultimam; sed tantum in aliquibus, vt in Baptismo aqua elementaris, & in Extrema unctione oleum oliuarum; in alijs autem solum secundum speciem; vt in Eucharistia panis triticeus, & vinum.

In Sacramento Matrimonij, materia, seu res tantum est à Christo determinata determinatione quadam morali vt scilicet sit contractus naturalis, initus à personis ijs circumstantijs, quibus expedit iudicio Ecclesiæ pro ratione temporis, &c. Verba, quæ sunt forma Sacramentorum, neque etiam sunt determinata à Christo materialiter; idest, vt sint huius, vel illius idiomatis, vel consent his, vel illis litteris, & syllabis; sed solum formaliter; idest debent omnino significare eandem sententiam, quam Christus significauit per verba, per quæ instituit Sacramenta; & sic licet in forma Baptismatis, Penitentiae, & Ordinationis in Ecclesia Latina, & Græca sit aliqua diuersitas; cum eadem verba in conficiendo hæc Sacramenta, non adhibeant; habent tamen unitatem formalem, quæ nimirum ordinatur ad eundem effectum significandum, & causandum; & sic talis mutatio non destruit significationem sacramentalem, à Christo institutam: vnde in vtroque idiomate verum conficitur Sacramentum.

De Necessitate, & existentia Sacramentorum.

IN nullo penitus statu possunt dici Sacramenta absolute necessaria ad salutem; sed solum ex hypotesi, idest considerata diuina institutione, & ad melius consequentiam salutem. Si status innocentiae perseverasset, nulla futura essent in eo Sacramenta, quod probabilius videtur in nostra sententia, quæ supponit Christum non venturum, si status ille

durasset; Nam cum omne Sacramentum, à Deo hæcenus institutum, pendeat à Christi passione futura, vel præterita; & cum perseverante, eo statu Christus non fuisset incarnandus; sequitur, quòd nec Sacramenta essent futura. *Pro his* autem, qui oppositum tenent, nèpè quòd Christus fuisset incarnandus; Nulla ratio suffragatur pro necessitate, & existentia Sacramentorum; pro eo statu innocentie; Nam talis ratio non potest esse humiliatio, & quæcumque alia, supponens peccatū, ut est certum; neque requireretur in eo statu Sacramenta, ad significanda per signa obscurissima mytheria supernaturalia; nam in eo perfectissimo statu natura humana habebat notitiam de mysterijs supernaturalibus; insuper in illa perfectissimi status felicitate, pacifica conspiratione, & ratio Deo subdebatur, rationi appetitus, & appetitui caro; vnde non erat periculum in eo statu declinandi in supersticiosos, & varios ritus exteriores.

In lege naturæ ante circumcisionem; idest post peccatū Adami vsque ad Abraham fuerunt Sacramenta, & incepit illorū vsus statim post peccatum primi parentis: ita D.P.N. August. in *serm. de circumcis.* ubi ait, *Sacri originale peccatum, quod à primis parentibus in totam humani generis successionem defluxit, aliquibus remedijs omni tempore oportuit expiari.* quæ remedia eo loco sæpius Sacramenta appellat. Verum autem Sacramenta fuerint in hoc statu pro remissione originalis peccati, aut etiam aliorū, *Sacra historia tacet*, inquit idem S.P. August. *Insuper* ab Abrahæ temporibus vsque ad Moysen fuit etiā institutum Sacramentum circumcisionis pro eius familia, & semine. *Fuerunt* etiam tempore legis Mosaicæ plurima Sacramenta instituta pro illo populo; quamvis non omnes sacre cærimonie illius legis fuerunt Sacramenta; sed illæ dumtaxat, quæ exercebantur, ut hominibus illis utentibus conferrent aliquam sanctitatem. In lege autem Evangelica esse vera Sacramenta à Christo instituta, est certum de Fide; Quòd constat ex Tridentino, & Florentino; & ex innumeris alijs. Vnde colligitur, quòd post peccatum sunt homini lapsò necessaria Sacramenta; Quia homo peccando à diuinis, & spiritualibus abscedens, rebus corporalibus per affectum subdidit: vnde fuit conueniens, ut rerum corporalium vsu rediret ad Deum, à quo nefanda peruersitate recesserat.

A quo nam Sacramenta fuerint instituta?

Insituere Sacramenta, & eligere, seu destinare, aut constituere hæc, vel illa signa, ut per alterius virtutem, & autoritatem valeant ad conciliandam hominibus gratiam, solus Deus hoc potest facere: vnde solus Deus est auctor Sacramentorum, & causa principalis ipsorum, & Christus, ut Deus, Est veritas definita in Concilio Trident. *sess. 7. can. 1.* his verbis, *Si quis dixerit omnia, & singula Sacramenta noua legis non fuisse*

fuisse à Domino nostro Iesu Christo instituta, anathema sit. Ratio est, quia, nullus præter Deum potest ex se, & intrinsecè, & connaturali potentia, producere gratiam, neque determinare divinam voluntatem, ut illam, producat medio aliquo signo, vel ad eius præsentiam; nam est sine controuersia, nullam creaturam per potentiam Dei absolutam posse esse causam principalem gratiæ; ergo nullus præter Deum potest instituere Sacramenta potestate intrinsecà, & connaturali; & sic Christus ipse, in quantum homo, neque potuit hoc modo instituere Sacramenta. Instituit autem Christus in quantum homo, Sacramenta, ut causa instrumentalis, nempe ex commissione diuina, & potestate quadam præexcellenti: & sic est causa gratiæ non modo merendo, & satisfaciendo, sed etiam instrumentaliter efficiendo, ut hæc docet D. Tho: artic. 3.

Colligitur, malè ab aliquibus putari, Sacramentū Extremæ vnctionis institutum fuisse à D. Iacobo, & Confirmationem à Concilio Meldensi; Nam sequeretur, quòd possent hæc duo Sacramenta auctoritate Ecclesiæ irritari, & annihilari, quod in omnium sententia est falsum. Fuit solum D. Iacobus promulgator Sacramenti Extremæ vnctionis, ut habetur ex Concilio Trident. sess. 14. Vnde statuitur omnia nostra Sacramenta immediatè fuisse à Christo instituta, & non ab aliquo puro homine, ex eius potestate, & delegatione. Potuit tamen Christus potestatem hanc, quam habuit, ut Deus, instituendi Sacramenta, ministro communicare: Nam potest purus homo ex potestate sibi delegata à Deo, eligere aliqua signa, ad quorum præsentiam gratia conferatur; sed hoc esset instituere Sacramentum, & non determinare tantum materiam Sacramenti, ut vult Scotus; ergo, &c. Neque hæc arguit in Creatura infinitatem; Nam Christus, ut homo, seu humanitas Christi non aliter habuit potestatem instituendi Sacramenta. Hæc autem facultas instituentorum Sacramentorū; puro homini concessa, longè futura esset inferior potestati Christi; quia non titulo connaturalitatis, sicut Christo ei conueniret, sed citra omne meritum, ac debitum. Vnde concludo, Quòd Deus est causa principalis Sacramenti, & eius effectus, scilicet gratiæ, & characteris; Christus, ut homo est causa principalis meritoria illius effectus, & efficiens ministerialis; Minister vetò causa instrumentalis ministerialis.

Virum Sacramenta causent gratiam?

EST veritas catholica, Sacramenta nouæ legis causare gratiam iustificantem ex opere operato; idest ex vi talis actionis. Sacramentalis, quatenus actio Sacramentalis est, seu vi, & efficacia Sacramenti administrati; non autem ex opere operante; idest ex dignitate personæ suscipientis, aut administrantis Sacramentum. Et ne hæretici præfatam,

vocem in deprauatis sensibus accipiant, illam clarè explicabimus. Nempe, quòd ita sacramenta ex se, & per se ipsa causant in suscipiente gratiam; vt si Sacramentum non esset, talis gratia non conferretur, neque propter actus, & opera ministrantis, neque etiam propter actus, & opera suscipientis. *Ex hac autem non sequitur, Quòd si suscipiens Sacramentum, merè passiuè se habeat, gratiam recipiat; Nam ad hoc vt Sacramentum causalitatem gratiæ actu exerceat, postulat aliquas condiciones, & dispositiones in subiecto, in quo gratia est recipienda more aliorum agentium naturalium. Hæc veritas est definita in Concilio Florentino in Decreto unionis, & in Trident. sess. 7. can. 6. 7. & 8. vbi asseritur. Si quis dixerit per omnia noua legis Sacramenta non conferri gratiam ex opere operato, anathema sit. Quamuis igitur Sacramentum ex se, absque ordine ad vllam dispositionem habeat vim producendi gratiam; vt tamen eam actu producat, necesse est; vt suscipiens non ponat obicem; & præterea, si sit adultus, necesse est, vt se ad eam recipiendam per aliquos actus disponat. Vnde in ipsa Sacramenti susceptione duplex confertur gratia, vna propter efficaciam, & virtutem Sacramenti, alia propter suscipientis dispositionem.*

Sacramentorum aliqua sunt ordinata ad primam gratiam producendam, nempe gratiam iustificantem, quæ est gratia, quæ primò animæ infunditur; alia verò ad secundam, quæ aduenit animæ iam sanctificatæ, & præexistenti gratiam adauget. Sacramenta, quæ causant primam gratiam sunt Baptismus, & Pœnitentia, & dicuntur Sacramenta mortuorum; quia Baptismus, & Pœnitentia sunt ordinata ad tollendum peccatum originale, & actuale media gratia regeneratiua, & sanatiua, quæ aliam non supponunt ante se. Non nego tamen, quòd Baptismus, & Pœnitentia possunt aliquando conferre secundam gratiam; idest augmentum gratiæ; quando scilicet inueniunt suscipientem in gratia confuturum: Sacramenta verò quæ conferunt augmentum gratiæ, sunt Confirmatio, Eucharistia, Ordo, Extrema vñctio, & Matrimonium; hæc enim Sacramenta vitam spiritualem supponunt in suscipiente, & dicuntur Sacramenta viuorum; supponunt enim gratiam Baptisini, vel Pœnitentiæ. Causant verò interdum per accidens primam gratiam; vt esset, si quis præmissò discretio examine conscientiæ, nequeat comprehendere culpam mortalem, quam commisit; vel ex hypotesi, quòd non habeat copiam confessarij, apud quem se accuset de alijs culpis, quarum recordatur; cogitur tamen ex officio ad celebrationem sacri; hic consequetur infallibiliter primam gratiam, sumptione Sacramenti Eucharistiæ; modo tamen accesserit attritus, vel contritus; vt habet communis opinio Theologorum.

Communis Scholasticorum sententia tenet, Quòd Sacramenta nouæ legis præter gratiam iustificantem, quæ est communis effectus omnium Sacramentorum, habent peculiare gratias Sacramentales; hæc gratias

Sacramentalis, quæ est primarius effectus Sacramentorum nouæ legis addit aliquod intrinsecum gratiæ habituali; & est quædã impressio permanens, & confortans, deriuata ex passione Christi, & per Sacramenta producta, quo Christianus inuincitur; & permanenter ad opera vitæ Christianæ roboratur. Ratio est; Quia singula Sacramenta ordinantur ad distinctos fines; ergo debent habere distinctos effectus: unde ratione huius effectus distincti, vnumquodque Sacramentum ab alio distinguitur; & sic Baptismus differt à reliquis Sacramentis ratione gratiæ regeneratiuæ, quæ dicitur propria, & Sacramentalis huius Sacramenti, & per hanc gratiam homo primò sanctificatur; & ideo datur per modum spiritualis regenerationis; quia sicut per generationem datur primum esse rei genitæ; ita per Baptismum datur primum esse diuinum. Sacramentum Pœnitentiæ, quod est institutum ad dandam primam gratiam, non primam simpliciter in toto tempore vitæ, sed primam post lapsum, & spirituales mortem: & sic gratia Sacramentalis propria huius Sacramenti, per quam à reliquis distinguitur, est spiritualis resurrectio, & sanitas animæ: idem dicendum de reliquis Sacramentis, quæ etiam ordinantur ad suos fines peculiares: & sic in Confirmatione gratia Sacramentalis addit speciale auxilium, ad constanter, ac firmiter confirmandam Fidem: Extrema vntio ad tollendas reliquias peccatorum, & vincendas tentationes, quæ in articulo mortis occurrunt: Ordo ad cultum Dei religiosè propagandum: & Matrimonium ad onera coniugij facilius toleranda.

Præter primarium effectum, & per se intentum, nempe gratiam sanctificantem, tria hæc Sacramenta, nempe Baptismus, Confirmatio, & Ordo, producant secundarium effectum, videlicet Characterem, & hæc Sacramenta reiterari minime possunt; reliqua verò, sicut characterem, non imprimunt, ita reiterationem suscipiunt. Hæc veritas est de Fide ex traditione Apostolorum, ab Ecclesia recepta, & definita in Concilio Tridentino sess. 7. can. 9. sic, *Si quis dixerit in tribus Sacramentis, Baptismo, Confirmatione, & Ordine non imprimi Characterem in anima, hoc est signum indelebile, & spirituale; unde iterari non possunt, anathema sit.* Unde ratio, quare hæc tria Sacramenta non possunt repeti; & alia possunt, non est, nisi character. Est enim character, nomen Græcum, quodd significat notam, vel signum alicui impressum, & affixum, per quod ab alijs distinguitur: unde character est signum, siue sigillum animabus nostris impressum. Describitur ab aliquibus, est potestas spiritalis in intellectu indelebiter recepta ad diuinam recipiendam, vel peragendam.

De Charactere Sacramentali.

PER hoc, quòd Character dicatur signum, non per hoc importat relationem ad rem significaram; quia signi nomine venit id, quòd mediante aliquod ab alio discernitur, & dignoscitur: vnde benè dicimus contra Scotum, non esse relationem; quia potestas non est relatio: insuper si esset relatio; deberet assignari fundamentum talis relationis; sed non potest, quia vel est anima, vel Fides, & gratia; non anima, aliter character esset in omnibus hominibus; neque Fides, vel gratia, quia character potest consistere sine Fide, & gratia; quòd non esset, si character esset relatio; nam posito fundamento, & termino, vel illo ablato, ponitur, vel tollitur relatio. Est igitur character qualitas absoluta, pertinet probabilius ad secundam speciem qualitatis, quæ est naturalis potentia, & impotentia: ita D. Tho: 3. *par. quest. 63. art. 2.* Caietanus, Soto, & alij Theologi; Nam character impiimitur a Sacramentis, in quantum per illa deputamur ad ea, quæ sunt Christiani cultus, consistentis in recipiendo, aut tradendo diuina; sed ad utrumque requiritur aliqua potentia; ad recipiendum potentia passiuæ, ad tradendum potentia actiuæ; ergo, &c. & quidem per Baptismum datur potestas ad diuina suscipienda; per Ordinè verò ad ea administranda; per Confirmationem autem datur potestas media inter utramque. Ex hoc sequitur, non benè ab aliquibus reduci potest character ad primam speciem qualitatis, quæ est habitus; quia habitus intenditur actibus, & contrariis destruitur; character autem, nec augetur actibus vllis, nec impietate deletur.

Conueniunt omnes Scholastici in hoc, Quòd character sit in anima; solum potest esse dubium, an recipiatur immediatè in substantia animæ, an in intellectu, an in voluntate; & primò non videtur subiectari in substantia, vel essentia animæ; nam character est operatiuus; sed anima non operatur, nisi medijs potentijs; ergo subiectatur in potentijs; & licet potentia naturalis recipi debeat in essentia animæ, à qua per modum proprietatis dimanat; potentia tamen supernaturalis residet in potentijs, quas perficit. Neque subiectatur in voluntate; quia nullus dari potest in voluntate habitus indifferens ad bonum, & malum; quia voluntas est principium bonæ, aut malæ operationis: vnde qualitates ei in hærentes per se respiciunt bonum, aut malum; sed character abstrahit à bono, & malo; ergo non est in voluntate. Remanet ergo, quòd sit in intellectu practico, nam per se ordinatur ad protestationem Fidei, scilicet per externum cultum Dei; sed confessio Fidei, est actus intellectus; ergo, &c.

Utrum sit possibilis in creaturis defacto existentibus potentia obedientialis ad quodlibet?

Quia multi dicunt virtutem Sacramentorum aliud non esse, quam potentiam obedientialem ipsarum rerum sensibilium, per quam possunt quæcumque res creatæ inservire Deo instrumentaliter ad quoscunque effectus; nempe usus, seu motus rerum sensibilium, quo per ministrum adhibentur, & usurpantur à Deo principali agente ad producendum illum effectum, qui est gratia. Unde congruenter existimaui, examinare in hoc loco illam celebrem quæstionem, *Utrum in quolibet ente creato defacto existente detur potentia obedientialis lata, seu ad quodlibet, alioquin non implicans fieri: unde*

Puto probabilius implicare potentiam obedientialem latam activam; seu ad quodlibet alioquin factibile; cum nullum inveniatur argumentum, probans in creaturis defacto existentibus huiusmodi potentiam obedientialem latam; cum semper, ut bene notat Ouedus, in ente creato, in quo reperiretur huiusmodi potentia obedientialis, deberet supponi quædam vis innata, seu inchoata, atque inadæquata, in ordine ad effectum obedientialem producendum; quia res ex se impotens elevari, posito quocunque principio ex se elevari, semper remanebit impotens elevari; sed non datur in creaturis defacto existentibus, ut constat, talis virtus inadæquata, & inchoata ad quodlibet, alioquin non implicans fieri producendum; ergo, &c.

Colligitur ex hoc, quod nomine potentia obedientialis activæ nihil aliud venit, nisi aptitudo quædam, beneficio cuius ens creatum ad motum, seu arbitrium causæ superioris operatur illud, quod ex natura sua, & sine auxilio omnino indebito, efficere, & operare non potest. Deus igitur potest elevari per suam omnipotentiam creaturam, habentem virtutem inadæquatam, seu inchoatam ad producendum aliquem effectum; non autem potest elevari creaturam, quæ nullam virtutem inchoatam habet; ut sunt creaturæ defacto existentes, ad producendum, & efficiendum quodlibet, non implicans fieri.

Nota I. Quod sicut pertinet ad perfectionem divinæ omnipotentia posse absolute elevari creaturam elevabilem; ita non est contra eius perfectionem, non posse absolute elevari creaturam inelevabilem: eo modo, quo non est contra perfectionem excellentissimi pictoris, vel scriptoris non posse uti instrumeto omnino inepto, ut esset substantia v.g. Leonis ad scribendum, vel pingendum: sicuti non potest Sapientissimus Magister docere Sapientiam equos, propter eandem rationem; & cum creaturæ actuales sint omnino ineptæ ad producendum modo dicto quodlibet, alioquin non implicans fieri; non erit contra perfectionem divinæ omnipotentia, non posse illis absolute uti ad producendum quodlibet,

Et quamvis instrumentum inlimitatum potest se extendere ad producendum quemlibet effectum, ad quem ascendit, & se extendit agens principale, & inlimitatum; non autem potest hoc facere instrumentum limitatum, cuiusmodi sunt creaturæ actu existentes.

Nota II. Quod potentia obediencialis ad vnum non trahit potentiam obediencialem ad aliud, tanquam proprietatem: & sic posito, quod in aliquo ente creato detur potentia obediencialis ad aliquos actus supernaturales eliciendos, non sequitur, debere dari ad quodlibet producendum in qualibet creatura. III. Per hoc, quod Deus non possit vti qualibet creatura, vt instrumento ad producendum quodlibet, non sequitur, Deum carere perfectissimo dominio: sicuti non sequitur, Deum non habere perfectissimum dominium creaturarum, per hoc, quod non possit vti qualibet creatura ad intelligendum quodlibet: Habet igitur Deus perfectissimum dominium suarum creaturarum, per hoc, quod possit illis vti ad ea, ad quæ creaturæ vim habent, saltem inadæquatam, & non ad ea, ad quæ nullam virtutem habent. Et licet Deus fecerit germinare lignum siccum in folia, fructus, & flores: loqui Asinam Balam: ile, vilem pascere, &c. non arguitur ex ijs potentia obediencialis; Quia assignatur in supradictis principium naturale productuum illorum effectuum, quos hic, & nunc ex defectu aliquarum conditionum non possunt naturaliter causare; sed à Deo supplentur supernaturaliter: Virga igitur restoruit per miraculosam vnionem animæ vegetatiuæ ad illam materiam, in qua adhuc perseuerabant plures dispositiones ad vitam vegetabilem. Sterilis peperit; quia Deus suppleuit accidentia, requisita ad generandum, quorum illa est naturaliter capax; cum habeat potentiam remotam, & substantialem, & careat solum potentia proxima, & accidentali. Asina denique non est propriè loquuta; quia loquutio est signum manifestatiuum rei, pro vt est in mente loquentis; cum igitur bruta careant mente, & voluntate non possunt propriè, & rigorosè loqui: describitur igitur, quasi loquens, propter sonus vitaliter in aëre productos; quos tamen Deus ita moderauit, vt ederetur sonus similis vocibus humanis, & articulatis.

Nota IV. Quod hæc potentia obediencialis, quæ negatur in creaturis defectò existentibus, est potentia obediencialis proxima, & actiua: de reliquo non negamus in creaturis defectò existentibus potentiam obediencialem remotam, & passiuam, quæ importat aliquod principium intrinsecum, vt habitum v.g. Fidei: vel aliquod principium extrinsecum, vt esset v.g. lumen gloriæ ad causandum effectus indebitos, nempe, vel actus Fidei diuinæ, vel visionem beatam. Et sic homo ad eliciendos actus supernaturales habet potentiam obediencialem remotam, quia datur in ipso habitus infusus, qui se habent per modum principij intrinseci: sicuti virtute luminis gloriæ, vel alterius suppletis eius vicem, habet intellectus hanc eandem potentiam ad eliciendam visionem

nem breuiatam, & Sacramenta nouæ legis ad producendam gratiam in anima. Vnde Sacramentum v. g. Baptismatis dicitur habere hanc potentiam obedientialem remotam; quia aqua Baptismatis v. g. in primo signo, & in actu primo recipit virtutem à Deo, per quam eleuatur, & redditur potens ad producendam gratiam; vnde bene dixit D. Thom. *quest. unica de virtutibus in communi art. 10. ad 2. Respectu eorum, quæ facultatem nature non excedunt, habet homo à natura, non solum principia receptiua; sed etiam principia actiua; respectu autem eorum, quæ facultatem nature excedunt, habet homo à natura aptitudinem ad recipiendum; sed aptitudo ad recipiendum non est potentia obedientialis actiua, sed passiua; ergo ex D. Tho: non datur in creaturis defæcto existentibus potentia obedientialis actiua respectu actuum supernaturalium, sed passiuæ tantum, & receptiuæ formarum supernaturalium, quibus medianzibus possint actus supernaturales elicere modo dicto.*

Vtrum Sacramenta nouæ legis causent physicè gratiam?

Admittitur igitur in omnibus creaturis defæcto existentibus solum hæc potentia obedientiali remota, & passiuæ; non verò actiuæ; videtur consequenter Sacramenta nouæ legis habere hanc eandem potentiã remotã ad causandã gratiam; vnde insurgit alia grauissima difficultas de modo causandæ gratiæ: An scilicet Sacramenta nouæ legis causent in nobis gratiam per modum instrumenti physici, an moralis; seu quod idem est, An concurrant ad gratiã causandã instrumentaliter physicè; an verò instrumentaliter moraliter? Nomine causæ instrumentalis physice intelligo illam, quæ non operatur physicè virtute propriæ formæ, sed alterius superioris sibi communicata; vt ferra, penicillus, &c. ad differentiam causæ instrumentalis moralis, quæ quantumuis operetur, vt subordinata alteri, non operatur per se effectum, sed inducit causam efficientem ad dandum esse effectui intento: hac ratione Concionator v. g. qui hortatur populum ad dandam elemosynam, censetur esse causa moralis largitionis elemosynæ, & dicitur etiam causa meritoria, & impetratoria. Putant enim aliqui, Sacramenta nouæ legis fuisse instrumenta solum moralia; ita vt velint, Sacramenta esse, veluti causas impetratorias, & morales gratiæ; quia dum applicantur, impetrant nobis gratiam: & sic Deus erit causa efficiens physica gratiæ Sacramenta verò causa instrumentalis moralis: ita Scotus, & alij ex eius schola. Omnes autem Recentiores Thomistæ cum Caietano, & alijs oppositum defendunt, existimantes esse irrefragabilem S. Thomæ mentem

Sacramenta nouæ legis causare gratiam instrumentaliter physicè. Probatur: Posita enim hac physica causalitate in Sacramentis nouæ legis possunt primò cum omni proprietate intelligi, & maxime accomodari verba sacræ Scripturæ, in quibus dicuntur: *Mundari, & sanctificari,*

ri, & regenerari. Imò hæc opinio, quam ut probabiliorē amplector, est magis consona sacris Concilijs Florentino, & præcipuè Tridentino, in quo *sess. 7. tñm in canonibus 6. 7. & 8. de Sacramentis*, hæc tria dicuntur, Sacramenta continere gratiam, Sacramenta conferre gratiam, per Sacramentum dari gratiam, atque iustitiam. Et *canone 8. addit conferre gratiam ex opere operato*: vnde potest efformari sic breuiter argumentum: Causa moralis non attingit per se ipsam suos effectus; benè tamen causa physica; sed Concil. Trident. dicit, gratiam verè produci à Sacramentis nostris; ergo, &c. II. Potest hæc eadem veritas demonstrari ex proprietate verborum Sacramentalium, præcipuè ex illis absolutionis, *Ego te absoluo*, ad quorum veritatem necesse est, ut Sacerdos, illa proficiens, verè, & realiter absoluat; ut docuit Concil. Costan. *sess. 54. ergo necesse est etiam, ut verè conferat gratiam*; sed non potest Sacerdos verè conferre gratiam, nisi illam efficiat suo verbo; nam si solus Deus efficit ad præsentiam verbi; ergo solus Deus absoluit, & consequenter forma illa absolutionis non erit iudicialis, sed deprecatoria, quod est contra torrentem Theologorum, & naturalem verborum sensum. III. Ollèditur; Quia Scriptura, & SS. PP. eodem modo loquuntur de Sacramentis, quo de Christi humanitate; sed Christus sua humanitate tangendo, vel loquendo faciebat miracula, & conferebat gratiam per veram, & physicam efficientiam; ut est clarum, & colligitur *ex cap. 6. Luca. Et virtus de illo exibat, & sanabat omnes. Et ex cap. 8. Sensi de me virtutem exisse*. ergo constat, Sacramenta non esse causam moralem, instrumentalem gratiæ, sed physicam, & realem, quæ non operatur monendo, consulendo, deterrendo, inuitando, sicut causa moralis, sed imperando, præcipiendo, tangendo, &c.

Hinc patet contra Durandum, Sacramenta nonz legis non esse meras conditiones, ad quorum præsentiam Deus conferat gratiam; aliter non possent dici Sacramenta causa gratiæ; quod est contra sensum Conciliorum, & SS. Patrum; Nam conditio sine qua non uò influit in effectum, sed tantum desideratur, ut causa influat; ut patet in approximatione ignis ad lignum, quæ non influit in calorem. Neque illud, per quod Sacramentum intrinsecè roboratur, & fit potens producere effectus supernaturales est potentia obediencialis ipsarum rerum sensibillum, & vltus, seu motus, quo per ministrum rectè, & ex institutione diuina, fungentem suo munere adhibentur, & vsurpantur à Deo principali agente ad producendum illum effectum, qui est gratia; ut existimauit Suarez, & alij; Nam talis potentia obediencialis actiua, ut supra probatum est in creaturis defunctis exiistentibus non datur, neque est admittenda; Sed est virtus quædam, seu morio spiritalis, Sacramentis diuinitus impressa, per quam eleuantur ad producendos illos effectus supernaturales: & sic posita hac virtute in aqua v. g. Baptismatis eleuatur aqua ad producendam gratiam, posito caractere eleuantur verba à Sacerdote prolata ad con-

consecrandum Corpus Christi, & ad absoluendum à peccatis per formam consecrationis, & absolutionis.

Non vrget, si dicas, Accidens corporeum non potest, etiam transeunter, recipi in subiecto spiritali; ergo neque accidens spirituale, vt esset talis virtus, & motio, in subiecto corporeo, vt esset aqua Baptismatis v. g. transeunter inhærere. *Nam* ratio discriminis est; quia virtus corporea, vtpotè extensa supponit partes in subiecto, quod informat; & licet possit ab actuali extensione separari; non tamen potest à radicali se iungi; at verò accidens spirituale potest esse totum in toto, & totum in qualibet parte; vnde non exigit subiectum indiuisibile, & spirituale, sicut est ipsum; vt patet in anima rationali, quæ licet sit spiritualis, & indiuisibilis; informat tamen corpus organicum, & in varias partes extensum.

Neque valet dicere: Causa principalis extrinseca non potest ferri extra adæquatam spheram suæ virtutis; ergo neque causa instrumentalis, *Nam* disparitas est hæc; Quia causa principalis specificatur ab obiecto, & termino adæquatè; vnde si egrediatur eius limites, iam destruitur species, nec remanet eadem virtus principalis; instrumentum verò, vt instrumentum nullo peculiari termino præscribitur, nec cognoscit alios limites, nisi quos habet agens præcipuum; cum non operetur in sua virtute, sed in ea agentis principalis; cum ergo virtus Dei nullis metis circumscribatur, potest vt instrumentis ad effectus illos producendos: hæc de causa Deus igne torquet spiritus nequæ, & lauacro aquæ mundat animas sordidas. *Nec* obstat, quòd instrumentum debeat esse cum passo coniunctum; *Quia* sufficit, quòd sit coniunctum composito, quantumuis non immediatè vniatur parti, cui immediate imprimit effectum; & sic Sacramenta tangendo corpus, abluunt animam. *Addo*, quòd licet immediatus ille contactus sit necessarius instrumentis causarum secundarum; instrumentis tamen diuinæ virtutis minimè desideratur.

Aduerte, Quòd quando dicimus, Sacramenta causare physicè gratiā; Loquimur de Sacramento defæcō existentibus: & sic Baptismus cum fictione susceptus, idest sine dispositione, & statu requisito ad recipiendā gratiam, quam Sacramentum potest causare, recedente fictione, confert, & causat gratiam, non physicè, sed moraliter; nam recedente fictione; idest, quando aduenit, & ponitur illa dispositio, seu actus, qui requiritur à Sacramento ad conferendam gratiam, Sacramentum Baptismatis non est, sed fuit; & sic moraliter solum persequerat; vnde moraliter solum causat gratiam.

Nota, Quòd Sacramenta causant gratiam in genere causæ instrumentalis physicæ, quando eorum significatio est completa sufficienter; Nam ratio formalis constitutiva cuiuslibet Sacramenti est significatio, ad quā Sacramentum est ordinatum à Deo; ergo gratiam efficiunt, quando eorum significatio est completa sufficienter: dixi *sufficienter*, non *totaliter*;

literi Nam ad hoc vt Sacramentum eleuetur à Deo ad gratiam producendum, satis est, si significatio Sacramenti fuerit completa sufficienter: scit autem Deus perfectissimè quod nam sit illud instans, in quo significatio cuiuslibet Sacramenti completeretur sufficienter. *Ex hoc* autem non sequitur, quòd superflua sint verba antecedentia; *Quia* ad hoc vt Sacramentum producat in illo instanti, in quo significatio completeretur sufficienter debuerunt cætera præcedere; non enim esset ultimum instans, nisi prima fluxissent.

Virum ad Sacramenta conferenda, & suscipienda requiratur intentio, & sanctitas?

CUm fuerit definitum ab Ecclesia in Concilio Florentino, & Tridentino Sacramentum tribus rebus distinctis perfici, nempe, *Materia, forma, & intentione ministri*; proculdubio videtur, quòd, vt Minister legitimè Sacramentum administret, debet intentioni Christi, & Ecclesiæ se conformare, à qua intentione sine graui sacrilegio recedere non potest. *Non* sufficit tamen in Ministro intentio habitualis, quæ consistit in hoc, quòd aliquando actualiter decreuerit, quòd quories se applicet ad conficienda Sacramenta, intendit facere, quod facit Ecclesia; Quia intentio ista habitualis non facit actum perfectè humanum, & talis intentio est etiam in dormiente. *Neque* existimatur sufficiens intentio interpretatiua in Ministro; quia hæc intentio non est, sed esset, si agens aduenteret; vnde inuenitur etiam in ebrio. *Debet* igitur Minister habere intentionem, vel expressam, & actualem, vel implicitam, & virtualem. Habet minister expressam, & actualem intentionem, quando distinctè cogitat, & vult actu id facere, quod facit Christus, & Ecclesia. Hæc autem intentio non est simpliciter necessaria ad conficiendum Sacramentum. Intentio virtualis est, quæ procedit virtute intentionis actualis, & explicitæ non retractatæ; & hæc intentio virtualis, (quàm D. Tho. habitualem nominauit, secundum vsum tortasse loquendi sui temporis) est solum necessaria ad conficiendum verum Sacramentum.

Ad conficiendum Sacramentum est etiam necessaria intentio absoluta, nec sufficit conditionata; nisi sit talis quæ transeat in absolutam; & est quando conditio est posita; Nam tunc talis intentio est sufficiens ad faciendum Sacramentum; non autem si conditio est de futuro; vt si quis dicat, si resisteris, ego te absoluo. *In infantibus*, vel adultis perpetuò amentibus nulla requiritur intentio ad suscipienda ea Sacramenta, quorum capaces sunt. *In adultis*, si sint rationis compotes, sufficit quilibet intentio, siue actualis, siue virtualis, siue habitualis, vt validè suscipiant Sacramentum; ac proinde non est necesse, vt actu id intendat, dum suscipit; sed sufficit, vt aliquando intenderit, & numquam reuocauerit; ita praxis totius Ecclesiæ: An verò sufficiat voluntas merè inter-

interpretatiua; est res valde dubia; & si aliqui concedant sufficere pro aliquibus Sacramentis; pro alijs autem negant.

Est de Fide, valorem, ac veritatem Sacramenti per se non pendere ex Fide, vel sanctitate ministri; atque adeo Sacramentum datum à ministro, quantumvis iniquo, schismatico, hæretico, vel ab Ecclesia præciso, dummodo reliqua omnia necessaria concurrant, est validum. Vnde Episcopus hæreticus validum conficit Sacramentum Eucharistiæ, Confirmationis, Extremæ vñctionis, Ordinis, & Pœnitentiæ, si habeat iurisdictionem; & hæretici contrahentes matrimonium. Ratio sumitur ab institutione Christi, qui noluit, quod nostra Sacramenta penderent quo ad suum valorem à sanctitate, vel Fide Ministri, qui se habet, vt instrumentum Christi; & consequenter non agit secundum propriam virtutem, sed principalis operantis: Quod patet exemplo operarij seminantis, ad cuius efficaciam parum refert, quod semen eiciatur lotis, vel sordidis manibus; modo semen sit bonum, & terra fertilis, nec deficiat calor solis, & pluuia de cælo: & sicut est impertinens curationi egroti, vt medicus sit sanus, aut eger, sit probus, vel improbus: dummodo opportuna remedia ægroto adhibeat: ita effectui Sacramentorum est impertinens Fides, vel sanctitas ministri; dummodo ea, quæ Christus instituit, serio apponat. Et licet hæreticus non sit membrum Ecclesiæ, cum careat Fide; quo ad ministerium tamen se gerit, vt Christi membrum; Nam Christus non solum per membra sibi coniuncta; sed etiam per abscessa operatur.

Ministri tamen non possunt sine sacrilegio Sacramenta in statu peccati mortalis peragere; dummodo exerceant tale ministerium; quod sit actio Sacramentalis, idest consecratiua Sacramenti; Nam qui Sacramentum iam confectum ministrat, puta, qui Eucharistiam iam confectam, & consecratam alicui ministrat, non peccat mortaliter: ita Vasquez, Ledesma, & alij; Nam in tali casu Minister non est per se causa gratiæ, sed se habet, vt causa applicans actiua passiuus: & à fortiori, nec Diaconos peccare mortaliter, exercentes sua ministeria cum conscientia peccati mortalis, Non nego tamen, quod oppositum sit etiam probabile.

Nota, Quod quando dixi, qui ministrat, & conficit Sacramentum, cum conscientia peccati mortalis, peccat mortaliter; Loquor de ministro sollemnitatis, & ex officio; & est ille qui speciali consecratione consignatus, & deputatus est per characterem Sacramentalem; non autem de ministro necessitatis, qui est minister non consecratus, nempe laicus, vel Sacerdos baptizans sine sollemnitate in necessitate. Vnde si foemina, vel laicus quilibet ministraret baptismum in necessitate; etiam si id faciant in statu peccati mortalis, non peccant mortaliter.

Colligo, Quod in extrema necessitate est liberum vnicuique petere Sacramenta à quolibet ministro excommunicato, suspensio, interdicto, de-

degradato, & Irregulari, si nullus alius haberi possit; quinimò fatentur plerique excommunicatum in data hypothesi non peccare, nec de nouo ullam censuram, aut irregularitatem contrahere, Sacramenta ministrando: Loquor de Sacramento Baptismatis, & Penitentiz, quæ sunt necessaria ad salutem. De reliquo absolute loquendo de omnibus Sacramentis, est licitum urgente necessitate à Ministro ab Ecclesia tolerato Sacramenta recipere. Excommunicati tolerati dicuntur illi, qui nec sunt notorii percussores Clericorum, nec sunt nominatim excommunicati, & denunciati publice, specialiter, & expresse. Est etiam licitum, quodammodo absque necessitate, petere Sacramenta à malo ministro aliàs parato, & ab Ecclesia tolerato; Quia sic petens, non inducit illi, cum sit paratus ad id; in casu verò, quòd non sit paratus, & est alius, qui commodè administret Sacramentum, videtur aliquibus probabiliter esse peccatum mortale contra charitatem, petere tunc ab illo ministro tolerato Sacramentum. Et si minister non tenetur prius confiteri in casu magnæ necessitatis; tamen satis est ad ministrandum Sacramentum attritio, reputata contritio.

*Utrum sola intentio faciendi, quod facit Ecclesia, sufficiat
ad valorem Sacramenti?*

Egimus vsque adhuc de qualitate intentionis conscientis, & recipientis Sacramenta; an scilicet debeat esse actualis, vel virtualis, vel habitualis, vel interpretatiua, & conditionata? Visum etiam fuit Sacramentum non pendere ex Fide, bonitate, & sanctitate ministri; ostendendo, bonitatem ministri non esse ad substantiam Sacramenti necessariam. Remanet solum hic ultimo loco videre, An valor Sacramenti pendeat ab intentione ministri, asserente Tridentino sess. 7. can. 11. *Si quis dixerit in ministris, dum Sacramenta conficiunt, & conferunt, non requiri intentionem faciendi, quod facit Ecclesia, anathema sit:* Vnde videtur manifestè, per Concilium, requiri ad valorem Sacramenti intentionem faciendi, saltem quod facit Ecclesia: in hoc enim omnes Catholici conueniunt.

Difficultas igitur, quæ redditur his temporibus celeberrima est, in explicando, quid intelligatur per *Intentionem faciendi, quod Ecclesia facit*. Sed ad bene hoc explicandum, oportet distinguere varias intentiones, quæ possunt esse in ministro Sacramenti. Prima enim, est intentio, seu voluntas proferendi illa verba, & faciendi actum illum externum, quem Ecclesia facit, v.g. lauandi, vel ungendi. Secunda, est intentio faciendi, & celebrandi mysterium, quod Christus instituit, & Ecclesia celebrat, & intendit: vno verbo, intentio faciendi illum ritum, vel Sacramentalem, conformando se intentioni Christi, & Ecclesiz. Tertia, est intentio conferendi effectum Sacramenti. Hoc posito videtur manifestè, Quòd per intentionem faciendi, quod facit Ecclesia, non venit tertia intentio; id est

non intelligitur intentio conferendi effectum Sacramenti; Nam conveniunt plerumque omnes, quod sine hac intentione validum esse potest Sacramentum; si quis enim intendat conferre alteri Sacramentum Baptismi, etiam si nolit ipsum sanctificare, aut gratiam ei conferre, Sacramentum erit validum. *Remanet* ergo solum videndum, an veniat prima, vel secunda intentio? Cardinalis Bellarminus, Suarez, Sayrus, Soto, Valentia, Vasquez, Siluius, & alij defendunt, Quod per intentionem faciendi, quod facit Ecclesia, non intelligi dumtaxat intentionem faciendi actum illum externum, quem Ecclesia facit, proferendo materiam, & formam; sed intelligi intentionem faciendi illū actum, ut Sacramentalem, conformando se intentioni Christi, & Ecclesiæ. Sed oppositum defendunt Magister Sententiarum, Paludanus, Angelicus de Clauasio, Ambrosius Cararinus, Salmeron, Vignerius Estius, Scribonius, Pasqualis; cum quibus

Dico, Per intentionem faciendi, quod facit Ecclesia, non intelligi, nisi solam intentionem faciendi illum ritum externum, quem Ecclesia facit, adhibendo seriò verba, & res ab Ecclesia præscriptas: vnde validum Sacramentum reddit minister quantumvis intrinsecus impius, infidelis, schismaticus, hæreticus, & Athæus, qui nullam intentionem habet conformandi se intentioni Christi, & Ecclesiæ; dummodo sit rationis compos, habeatque intentionem faciendi ritum illum externum, quem scit esse religiosum apud Christianos, adhibendo seriò verba, & res ab Ecclesia præscriptas. *Hac* sententia non solum est tuta, sed etiam est aliena à periculo iterandi Sacramenta characterem imprimentia: Est etiam roborata autoritate Summorum Pontificum, nempe Adriani I. & Innocentij III. & ex Concilijs Toletani IV. Rhotomagensis, Aquisensis, & Tridentini. & ex Patribus, S. Ioannis Chrysostomi, S. P. Augusti. & ultimo loco D. Tho: qui 3. par. *quest. 64. art. 8. ad secundum*, volens satisfacere, & in securo conscientiam eorum ponere, qui possunt dubitare, de occulta intentionis retentione impij ministri, in conferendis Sacramentis, dixit, *Melius discurrere, qui volunt, sufficere ad valorem Sacramenti, si ritus seriò peragatur, & verba illa proferantur*: quia, ut explicat idem S. Doctor *art. 10. corrupta ministrantis intentio incorruptam Ecclesia intentionem interrumpere non potest.*

Potest primò probari hæc veritas ex ipsa definitione Sacramenti; Nā Sacramentum est signum sensibile, impositū à Christo, ad significandū in tali actione, & talibus verbis; sed de ratione signi sensibilis est, ut semper sit verum signum, si proferatur, & exhibeatur vox, vel actio externa, quæ ad significandum imponitur; ergo si exhibetur actio Sacramentalis, & proferantur seriò vi potestatis, & officij, verba à ministro, Sacramentum redditur validum; quidquid in contrarium minister intendat.

Confirmatur hæc veritas I. à valore Baptifini ab infidelibus collati; Nam non fuit à catholicis putatum irritum Baptifma à Pelagianis collatum, licet de Sacramenti illius effectu prauè fentientibus: quinimò, & à Iudæo, & Pagano collatum, ratum effe cenfuit Nicolaus I. in refcripto ad confulta Bulgarorum; fed Iudæi, & Pelagiani, licet poffint velle peragere ritus illos, quos vident religiofos effe apud Chriftianos; namquam tamen habent voluntatem conformandi fe intentioni Chrifti, & Ecclefie; cum malè, & perperam fentiant de Chrifto, & Ecclefia; ergo, &c.

Confirmatur II. Quia natura Sacramenti nihil aliud postulat, præterquàm intentionem faciendi illud opus externum; Nam interdum habet minifter contrarias intentiones; vt effet, fi vellet dare Baptifmũ, & non fanctificare paruulum; ergo, vt Sacramentum fiat in ratione figni, non fuit neceffarium exigere à miniftrò aliam intentionem, feu voluntatem, præter quàm faciendi ferio vi potestatis, & officij, illud opus externum.

Confirmatur III. Nam eodem modo fanctificatio Sacramentalis eft impofita à Chrifto tali ceremoniæ exteriori, & cum ipfa coniuncta, quo ex Chrifti institutione effectus Sacramenti eft infallibiliter coniunctus cum fufceptione Sacramenti, quantum eft ex parte illius; fed effectus Sacramenti non pendet ab intentione miniftri; quia fi minifter vellet dare Sacramentum, non tamen effectum Sacramenti, fi fufcipiens eft difpofitus, recipiet effectum; ergo nec Chrifti institutio, feu illud, quod Chriftus instituit, & intendit, pendet ab intentione miniftri, nec minifter poterit fua contraria intentione impedimentum ponere Chrifti institutioni; ergo ad hoc, vt illa Sacramentalis ceremonia fignificet, nihil aliud eft neceffarium; nifi vt exterius fiat; modo tamen humano, vt dictum eft.

Suffragatur etiam pro noftra conclufione optima congruentia; Nam decuit, tum ad certitudinem Sacramentorum, tum ad pacandos animos fufcipientium; vt nullo modo ex peruerfi miniftri intentionis reuentione Sacramentum inualidum reddatur; aliter Sacramenta ab hæreticis collata, feruata forma ecclefiaftica redderentur incerta. *Daretur etiam locus dubitandi, An omnes illi, qui baptizantur, & abfoluuntur, & Sanctiffimam Euchariftiam adorant, & recipiunt, verè fine baptizati, verè abfoluti, fint verè corpore Chrifti refecti, & ritè fpecies confecrata venerentur.*

Addo, Quodd neque iuftum videtur, vt iniquus minifter, dum decipit hominem innocentem, fictè dando Sacramentum fine debita intentione; id eft faciendo illum actum, vt Sacramentalem patiatur tantum detrimentum, quantum eft priuari Sacramento, & fructu eius; & interdum fortaffe propter folam eius caufam damnari, quod videtur contra-

crarium consuetudini Ecclesiæ; Nam licet quandoque impij Episcopi, & Sacerdotes declarauerint, nullam habuisse intentionem in conficiendis Sacramentis; numquam tamen Præsules Ecclesiæ decreuerunt, nec consilium susceperunt in aliqua Synodo de iterando Baptismo, vel Ordinibus repetendis; ergo signum est, quod Ecclesia ad valorem Sacramenti nullam aliam intentionem requirit; nisi faciendi actionem illam externam, & ritum illum, quem minister scit esse religiosum in Ecclesia; serio tamen, & vi potestatis, & officij; quantumvis de relictuo minister Sacramentum illud iniquitate, & interiori sua infidelitate non credat, & nullam intentionem habeat faciendi, quod Christus, & Ecclesia intendunt.

Neque valet dicere, Quod quando iniquus minister propter suam, internam intentionis retentionem vult decipere fideles, fictè dando Sacramentum, Deum supplere effectum Sacramenti, vel absolute, & immediate, vt in infantibus, vel media Fide, & deuotione susipientis, vt in adultis. I. Quia ea, quæ sunt supernaturalia, non sunt asserenda sine sufficienti fundamento. II. Licet admittatur hæc doctrina quantum, ad vltimum effectum Sacramenti, qui est iustificatio à peccatis; non tamen potest admitti, quantum ad effectum characteris; quia hic numquam imprimitur, nisi per Sacramenta. *De relictuo* nec est verum, quod Christus supplebit effectum Sacramenti, nempe iustificationem, à peccatis; Nam hæc non datur, nisi quando Sacramentum est ratum, & validum; sed in casu posito Sacramentum per Aduersarios non est validum; cum non habeatur intentio modo dicto; ergo falsum est, quod Christus suppleat effectum gratis, quando Sacramentum non est validum.

Est maximè aduertendum in hac controuersia, nos non sustineri, ad valorem Sacramenti sufficere intentionem faciendi illam actionem externam absolute; sed vltèrius requiritur, contra hæreticos, vt actio illa Sacramentalis peragatur serio, & per modum ministerij, & non mimicè, & modo iocoso: Insuper quod adhibeatur vera materia, & forma: Et hoc modo explicamus intentionem faciendi, quod facit Ecclesia: idest minister, posita materia, & forma debita, debet intendere actionem; non vt actio profana, aut vulgaris, vel mimica, vel derisorie; sed vt est singularis quædam actio, quæ in Ecclesia, idest apud Christianos sollempni more fieri conspicitur: Vnde factum illud Athanasij, quia imitatus Episcopum, alios pueros baptizauit, dum luderet ad litus maris; ab aliquibus fuit existimatus Baptismus ille inualidus: & si fuit reputatus validus ab Episcopo Alexandrino, fuit, quia reputauit, illum habuisse sufficientem intentionem; hoc ipso, quod voluit imitari in ea re Episcopum, idem faciendo, quod ipse erat solitus facere.

Sine rationabili igitur fundamento adducunt Aduersarij exemplum ad impugnandam nostram conclusionem, dicentes, Quòd si sufficeret sola intentio in ministro, faciendi actionem illam externam; sequeretur, quòd mater, vel mulier lauans puerum casu, solo animo, & cogitatione mundandi corpus; inuocaret tamen Trinitatem, nihil de Sacramento cogitans, perficeret Sacramentum. II. Sacerdos legens Euangelium in refectorio, habens præsentem panem, nihil etiam cogitans de Sacramento, proferret verba formæ, conficeret Sacramentum; *Nam* in primo casu, quo mater illa puerum ablueret, & nihil cogitaret de Sacramento, habetur actio iocosa, & mimica, non seriò; & sic non conficeret Sacramentum. In secundo casu, neque haberetur Sacramentum; Nam actio illius Sacerdotis legentis Euangelium, non esset actio per modum ministerij; eo ipso igitur, quòd actio illa externa sit mimicè, & iocose exercita nullo modo conficit Sacramentum; nam ut dictum est, actio illa externa debet esse seriò, & per modum ministerij exercita.

Vnde nullam vim facit in sua probatione P. Petrus à S. Ioseph Ordinis Cisterciensis, & alij dicentes, Quòd si habere intentionem faciendi, quod facit Ecclesia, nihil aliud esset, quàm habere intentionem faciendi actionem illam externam, applicando materiam, & formam, inutiliter Concilium Trident. statuisset in ministris Sacramentorum requiri intentionem faciendi, quod facit Ecclesia; sed satis esset, ut præciperet solam actionem illam externam, qua coniungeretur materia, & forma debita. *Nullam*, inquam, vim faciunt in hoc; Nam potest applicari materia, & forma Sacramenti, absque eo, quòd habeatur intentio faciendi, quod Christus, & Ecclesia faciunt; ut esset, si quis ablueret aliquem puerum, vel Cathecumenum in balneo, vel alio loco, & nihil cogitans de Baptismo, formam Baptismi derisorie proferret; vel dum iuuenis in conuiuio existens cum puella aliqua præsentè Parocho, diceret recreationis gratia puellæ conuiuant, Accipio te in sponsam, & illa responderet, Accipio te in sponsum. Vnde bene fuit à Concil. Trident. definitum, Quòd in ministris Sacramentorum requiritur intentio faciendi, quod facit Ecclesia; contra hæreticos, sentientes sufficere solum, ut habeatur actio illa externa; quantumuis de reliquo sit mimicè, vel modo iocoso exercita. *Habetur* igitur sufficienter intentio faciendi, quod facit Ecclesia; si illud opus exterius seriò peragitur. Nam tunc facit, quod facit Ecclesia, facit prudens, facit requisitus, facit ex eo, quia in Republica Christiana perfungitur officio; cum factum liberum non possit esse sine voluntate faciendi; ut bene notat quidam Recentior.



De Tempore, quo fuerunt Sacramenta instituta.

PRO complemento huius tractatus videndum denique est, Quando nam fuerunt Sacramenta instituta? Et incipiendo à Baptismate, communis Theologorum sententia, & Scripturis conformior, vult, Christum Dominum instituisse Baptismum suum ante suam passionem. Tradidit igitur Christus ante suam mortem plenam institutionem Baptismi quo ad materiam, & formam; idest quo ad designationem materiæ, & traditionem formæ. D. Tho: hic, & Magister, quos alij Theologi sequuntur, sentit, Christum instituisse hoc Sacramentum eo ipso die, quo baptizatus fuit à Ioanne.

Institutio Sacramenti Confirmationis fuit inchoata in nocte cænæ, fuit autem perfecta post Christi resurrectionem, quando dixit Apostolis; *Accipite Spiritum sanctum*, &c. quia tunc fecit Christus suos Apostolos Episcopos: in nocte autem cænæ, quamvis fuerint Apostoli ordinati Sacerdotes; non tamen Episcopi: unde non fuit Sacramentum in nocte cænæ, in eo statu constitutum, in quo posset, & administrari, & recipi; nam soli Episcopi habent potestatem administrandi hoc Sacramentum.

Sacramentum Pœnitentiæ fuit institutum à Christo Domino post Resurrectionem, quando apparuit Discipulis in Cœnaculo simul existentibus, dixitque illis, *Accipite Spiritum sanctum, quorum remisistis peccata, remittuntur eis.* Ioann. 20. Eucharistiæ Sacramentum instituit Christus eadem nocte, qua ultimam legalem cœnam perfecit, cum iam suæ passioni, & morti esset vicinus; ut memoriale mortis suæ ante eandem mortem nobis relinqueret, & eo tempore altius cordibus infigere-
tur. In eadem nocte cænæ, in qua Christus fuit ultimò cum suis discipulis conuersatus, Sacramentum Ordinis instituit.

Est valde probabile, Sacramentum Extremæ vñctionis fuisse institutum à Christo Domino post Resurrectionem suam; Quia debet esse institutum post Sacramentum Pœnitentiæ; quia habet purgare reliquias peccatorum; ergo cum Sacramentum Pœnitentiæ fuerit institutum post Resurrectionem, ut supra visum est; sequitur etiam eodem tempore fuisse institutum Sacramentum Extremæ vñctionis. Fuit autem hoc Sacramentum promulgatum à B. Iacobo Apostolo, ut patet Concilium Tridentinum sess. 14. can. 1. dicens, *Si quis dixerit, Extremam vñctionem non esse verè, & propriè Sacramentum à Christo Domino institutum, & à B. Iacobo Apostolo promulgatum, sed ritum tantum acceptum à Patribus, aut figmentum humanum, anathema sit.*

Matrimonium, pro ut est contractus indissolubilis, non verò pro ut est Sacramentum, fuit institutum à Deo, quando condidit primos parentes: probabilius Matrimonij institutio deducitur ex illis verbis Ge-

nesis 2. Hoc nunc os ex ossibus meis, & caro de carne mea, propter, quod relinquet homo Patrem suum, & Matrem suam, & adhaerebit uxori suae, & erunt duo in carne una. Fuit deinde Matrimonium institutum in Sacramentum à Christo Domino probabilius, quando Matth. 19. dixit, Quos Deus coniunxit, homo non separet. Non fuit ergo Matrimonium in omni lege Sacramentum, sed tantum in Evangelica per institutionem Christi. Et hæc sufficiant de Sacramentis in genere. Subijcio censuræ, & correctioni sanctæ Romanæ Ecclesiæ, me ipsum, omnia mea, dicta, & cuncta, quæ in hoc opusculo Theologico continentur.



F I N I S.



ERRATA CORRIGE

<i>Pag.</i>	<i>Linea</i>	<i>ERRATA</i>	<i>CORRIGE</i>
19.	4	ex natura	ex natura rei
25.	22	qualis	quale
78.	43	poterunt	potuerunt
94.	39	in medium exit	in medium exit
137.	1	per hoc SS.	per hoc SS.
344.		344.	343.
409.	15	Chalcedodonsense	Chalcedonense



REGESTVM

a B

ABCDEFGHIKLMNOPQRSTUVWXYZ

Aa Bb Cc Dd Ee Ff Gg Hh Ii Kk Ll Mm Nn Oo Pp Qq Rr Ss
Tt Vu Xx Yy Zz

Aaa Bbb Ccc Ddd Eee Fff Ggg Hhh Iii Kkk Lll Mmm Nnn







5-1

